





Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.7.27





Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.7.27



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.7.27



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.2.7.27



Ex Libris Joannis Nencini
1874



Ab. 2/7.

6694

18


ANTIQVITATVM

ROMANARVM

Pauli Mommsen

1854-1855

C. Mommsen




ANTIQUITATVM
ROMANARVM

Pauli Manutii

LIBER DE LEGIBVS.

Index rerum memorabilium.



Joannis Francisci monbopoli
VENETIIS, M. D. LVII.

Cum priuilegio Pauli III Pont. Max. Caroli v Imp.
Henrici Regis Gallia, Philippi Hispania,
Senatus Veneti, in annos XX.

Dis

ANTIQVITATVM
ROMANARVM

LIBRVS

DE VETVSTIS

RELIQUIIS



V. ELLIOTT, N. D. L. L.

Scilicet in hunc modum
liber huiusmodi
liber huiusmodi
liber huiusmodi

PAVLI MANVTII
AD ILL. PRINCEPEM, HIPPOLYTVM
ESTENSEM, CARDINALEM,
IN LIBRVM DE LEGIBVS
PRAEFATIO.

MNES artes, atque omnes res, HIPPOLYTE Princeps, & Cardinalis, modo augeri, modo minui, nec easdem perpetuo esse, satis inter omnes constat. patet hoc quidem oculis primum, deinde etiam mentibus. oculis notamus euenta: mente, cur quidque eueniat, quo ue referenda sit cuiusque rei mutatio, intelligimus. itaque lapides, & metalla, quæ omnium durissima sunt, quæ uis hominum frangere uix potest, hæc tamen consumit, & conficit uetustas. quidquid enim ex partibus aliquando coit, & concretum est; id easdem in partes aliquando dilabatur, ac dissipetur, necesse est. habet hoc materia illa, unde res omnes constant, ut formæ mutationem quærat; idq; , quod sequitur, assecuta, migrat in alias naturas, quasi, quod appetiit, eo nunquam esse contenta uideatur. neque uero hæc naturales tantum ad res conditio pertinet, sed inuenta quoque hominum, operaq; attingit. mores, consuetudines, loquendi ratio, quam linguam appellamus, leges ipsæ, quas ne quid unquam ex hominum memoria deleat, in æs incidimus, omnia demum, quæ ab arte naturam imitante fluxerunt, quotidie mutantur, ac tolluntur, non modo ab externis causis contra uoluntatem nostram, uerum etiam à nobis ipsis, quia tempus ita postulet. sed artes liberales, optimaq; studia, quæ nusquam magis, quàm in Italia, honor aluerat, atque auxerat, ætas nulla magis afflixit, quàm cum Romani imperatores, imperii sede in Thraciam translata, Italiam barbaris nationibus diripiendam, ac deuastandam reliquerunt. quòd nisi superioribus annis Principes, ac Pontifices aliquot, maxime uero Leonis X egregia, propeq; diuina liberalitas huic malo subuenisset; quem Laurentii Medices, patris sui, clarissimi

A 2 uiri,

uiri, exemplo commotum, etiam ueræ laudis cupiditas impu-
lit, ut iacentes ingenuas artes, magnis propositis præmiis, ex-
citaret; barbara, credo, quod ad literas attinet, magna ex par-
te esset Italia: dignitas omnis philosophiæ, splendor omnis ob-
soleuisset eloquentiæ. sed neque ille huius præclari operis sum-
mam potuit absoluere, ereptus morte, disciplinis liberalibus
nimis immatura; & interitum illius tempora sunt eiusmodi con-
secuta, ut, quæ paululum iam luxerant honestarum scientia-
rum studia, ea perpetuis multorum annorum tenebris quasi
nox quædam obscurauerit prorsus, atque extinxerit. fatalis
enim bellorum tempestas non exercitationem modo literarum
fustulit, uerum, quæ sunt in excolenda uirtute positæ laudes,
eas labefactauit omnes, atque peruertit. ac nunc quoque, cum
paci aliqua spes, longo sane interuallo, affulisset, misera rur-
sus eodem malo tentatur Italia, ueteresq; calamitates aduersus
bonis artibus nescio quis Genius inuehit. Nunc te, Hippolyte
Cardinalis, cui summam iuuandi generis humani uoluntatem,
nec minimam cum uoluntate facultatem Deus tribuit, eximi-
am ad laudem uocat occasio. suscipe desertum pene ab omni-
bus literarum patrocinium. collige tu, quæ alii dissipant, om-
nium laudandarum doctrinarum studia, & restitue nobis illa,
quæ uel hominum improbitas, uel, ut aliò culpa deriuetur, for-
tunæ uis eripuit, hæc est actio digna Cardinali, digna Principe,
Hippolyto uero & Cardinali, & Principe dignissima. Vidimus
tuam præteritam uitam. ab ea nihil humile, nihil obscurum, ni-
hil uulgare, ampla omnia, præclara, inusitati exempli, noui ge-
neris expectantur. quæ tu, ne à te ipso dissentias, nunc quidem
magna ex parte præstabis, atque adeo iam præstas, bonis uiris,
& eruditis beneficentia subleuandis. quorum ex ingeniis non
dubito quin quotidie aliquid efflorescere tuo beneficio uideas.
quod quia præclarum est, exemplum alii sequentur. scribent
omnes, quod quisque poterit, illecti gloria, & commodorum
spe compulsi. nam, ut coniecturam de me ipso faciam; quem
esse nihil in literis fateor; sed, ut aliquid tamen essem, labora-
ui; ego olim (decennium, opinor, abiit, eoq; amplius) aucto-
ribus duobus eximijs uiris, Petro Bembo Cardinali, & Ber-
nardino

nardino Maffeo, qui postea dignitatem eandem magnis in ecclesiam Christi meritis est consecutus, dederam me ad res Romanas, illas ueteres, obseruandas, & ex omnibus antiquorum monumentis omni studio colligendas: ut, cum illam remp. qua nulla fuit, nec erit unquam illustrior, uniuersam animo, ac scientia comprehendissem, latinis eam literis explicarem, egregiumq; bene, ac laudabiliter instituta ciuitatis exemplum meis, quatenus quidem ipse possem, scriptis expressum, posteris relinquerem. Res erat præclara, meq; delectabat uehementer, & afficiebat ipsa tractatio. itaque meam omnem industriam, omnem curam, omnes denique in hoc studio cogitationes fixeram, ac locaram. sed accidit iniquo meo fato, ut horum utrumque, Bembum primo iam senem, cuius in beneuolentia ornamenti mihi erat plurimum, deinde Maffeum non ætate minus, quàm uirtute, florentem, in quo mei spes ocii sita omnis erat, à quo pendebam totus, importuna morte ereptum amiserim. destitutus eo præsidio, quo meæ fortunæ nitebantur uno, fractus animo, ac debilitatus institutum antiquitatum Romanarum opus omiseram, & ad alia me conuerteram. postea uero quàm, honorifica in primis conditione delata, magno sum à te tuo beneficio in tuorum familiarium ordinem inuitatus; quod ego summæ felicitatis loco duxi; erectus mente, atque animo, rursus, quod abieceram, suscepi, onusq; tantum, quantum priuatis opibus perferri uix, aut ne uix quidem potest, te uno fretus egregie sustineo. et, ut ex parte totum iudicare posses, de decem, quos exorsus sum, libris hunc de legibus potissimum, quem ad te mitterem, delegi: non quòd ita postularet ordo: (sextum enim in antiquitatum uolumine locum obtinet) sed, quòd, cum omnium librorum materies non modo coacta iam in unum à me esset uniuersa, uerum etiam satis diligenter in partes distributa; casu accidit, ut hic minus, quàm ceteri, rudis, minus esset impolitus. præterea feci libenter, tuis actionibus admonitus. leges enim hic liber complectitur. porro leges nihil aliud, quàm rationem, nihil, præter ordinem, docent. ratio autem, & ordo, si usquam, in tuis moribus elucet. quippe nihil agis non moderatum, nihil non æquabile, nihil, quod non cum
ea,

ea, quam sustines, persona, id est cum religione uere Christiana, ac sedis Apostolicæ dignitate consentiat. quare cum omnia mea tua sunt; quandoquidem ego me tibi, quidquid sum, & quantus quantus esse possum, totum addixi: tum uero hic de legibus Romanis liber uere tibi debetur, tibiq; est à me iure optimo inscriptus. quo in libro bene positam à nobis operam si duxeris; de ceteris quin idem sentias, haud equidem uerebor. pergo enim studio pari, uoluntate etiam, ut mihi uideor, acriore. unum modo exoptandum est; ut, quando nos ab hoc studio nulla utilitas, nulla uoluptas, ne ualetudinis quidem satis imbecillæ ratio potest auellere, nostris laboribus tua beneuolentia quasi propitium numen assit. sic enim fiet, ne qua prorsus in difficultate, ne quo unquam in scopulo nostra hæreat industria: & in eum, quò spectat animus, portum secundo cursu, tuæ benignitatis aura prosequente, facile peruehemur.

ANTIQUITATVM ROMANARVM

Pauli Manutii

LIBER DE LEGIBVS.

PRIMA omnium, atque aequissima naturæ lex est; quæ tum nihil cuiquam deesse, tum ea, quæ quisque habet, æterna iubet esse. nam, quemadmodum illæ, quæ cœlestibus corporibus præsunt, beatæ mentes, iustissimæ sunt, & suum quæque corpus iustissime regit: sic ipsa natura, quæ de superioribus illis mentibus deriuata, & in unum collecta uis est, æquissimum in agendo ordinem seruauit; eaq; , quæ egit, patere omnibus, nec unquam non esse uult. itaque & eam partem aeris, quæ sublimior, eoq; purior est, oculis traicientes, aspectu cœli iucundissimo omnes fruimur; & inferiorem, mixtam, spiritu haurimus; & sustinemur, atque alimur terra, & aqua ad ea, quæ cuique commoda ac necessaria sunt, utimur. nam, etsi horum singula uni animantium generi tributa ad usum ac uictum præcipue uidentur: tamen ita uni generi proprium unumquodque est, ut diuersi generis animantibus nihil denegetur. alitibus aer, mare piscibus, quadrupedibus terra, certa cuique animanti sedes, ac naturale domicilium est: omnia tamen omnibus communia sunt; neque alieni alimenti usu animal ullum perpetuo caret. hæc sua lege natura, communis omnium mater, ita constituit, ac sanxit. cuius ad similitudinem quo propius accedunt humanæ leges, eo certior ac laudabilior ea uitæ ratio est, quam hominum generi præscribunt. neque ad aliud exemplum spectarunt homines illi, quos antiqui scriptores diuinis laudibus extollunt, quia suas ciuitates optimis institutis ac saluberrimis legibus temperarunt. celebrantur præter ceteras Lacedæmoniorum leges, à Lycurgo latæ, Atheniensium, à Solone. commemorantur & illæ, quas Locrensibus Zaleucus, Thuriis Charondas, Getis Zamolxis, Pythagoræ discipulus, dedit. laudat etiam

B

Cre-

De legibus

Cretensium leges Plato, Carthaginiensium Isocrates. Romanas uero Polybius antepone omnibus non dubitat. hæc cum labiis, qui ceteris hominibus ingenio, ac sapientia præstiterunt, summopere laudatæ prædicatæq; sint: quid aliud, nisi præclaras fuisse, credendum est? at dissimiles inter se, & si dissimiles, quo modo omnes præclaræ? quia nimirum ad eundem finem, eandemq; quasi metam, non eadem tamen uia, omnes tendunt. ius naturæ, in quo nihil inæquale deprehenditur, primi conditores legum ante oculos habuerunt. eius imaginem in suas quisque leges, quantum imitatione licuit, transtulerunt. qui cum ad iustitiam pariter intenderent, eandem tamen in tradendo iure rationem ideo secuti non sunt, quia nō eiusdem loci, non eiusdem cœli, non eiusdem hominibus ingenii leges ferebant. hæc illi cum animo circumspicerent, attenteq; cogitarent: modo perficere possent, quod agebant; qua ratione perficerent, laborandum non esse iudicarunt. neque enim ipsarum legum uitio factum est, ut aut Athenienses minus diu, quàm Lacedæmonii, aut Lacedæmonii minus, quàm Romani, floruerint; sed quòd Athenæ citius, quàm Sparta, & Sparta citius, quàm Roma, de recta maiorum consuetudine deflectens, legum imperium maiestateq; neglexit. quare prudenter iudicat Polybius, quòd, duabus potentissimis ciuitatibus, Carthagine, & Roma, multorum annorum bello de imperio decertantibus, ad extremum succubiuisse Carthaginem, & uictas condiciones accepisse, ob eam maxime causam putat, quòd, quo tempore inter eas incidit contentio, tum & Carthagine multo, quàm antea, negligentius, & Romæ multo, quàm unquam, diligentius leges colebantur. nihil enim sine iure perpetuum est. ius autem ipsum nihil aliud est, quàm bene uiuendi norma, legibus tradita, atque præscripta. quam qui tenent, soli duas maximas res, maximeq; optabiles adipiscuntur. primum, ipsi quotidie magis in sua ciuitate cari sunt, atque honorati, inter ignotos clari, inter homines uiri, inter uiros heroes: deinde, id quod uelle bonitatis est, perficere uirtutis, facile consequuntur, ut eorum patria ciuibus frequens, pace tuta, opibus beata sit. ex hoc genere fuisse legimus Thebis Epaminondam, Spartæ Agesilaum, Athenis Aristidem, Romæ Camillum, Fabios, Decios, Scipiones Catones, innumerabiles alios. nulla enim ex omnium sæculorum memoria magis ad omnem laudem ciuitas excelluit. ex hoc etiã numero

*Primi conditores legum
ante oculos habuerunt
ius nature.*

*Nihil n. sine iure
perpetuum est
ius est norma bene uiuendi
legibus tradita.*

numero multos in patria mea fuisse, apud maiores nostros Carolum Zenum, Franciscum Barbarum, patrum ætate Bernardum Iustinianum, Hermolaum Barbarum, Francisci nepotem, Hieronymum Donatum, Andream Naugerium, accepimus. ipsi uidimus, &, quod in magna felicitatis parte ponimus, allocuti sæpe sumus Gasparem Contarenum; cui quidem ex iis, quos nominaui, prudentia, bonitate, amore in patriam, pietate in Deum anteferri nemo, doctrina ne conferri quidem potest. fuit enim ille uir, non modo Venetiis, quandiu gerendis magistratibus operam reip. nauauit, uerum & Romæ, & ubicunque fuit, postea quàm absens pene contra uoluntatem, præter opinionem certe Cardinalis factus est; fuit, inquam, ille uir, cuius mihi nunc scribenti uultus, & os illud, regia quadam maiestate decorum, ante oculos obuersatur; in omni genere uitæ inter omnes homines admirabilis, & eximius. qui cum esset habitu naturæ excellenti, ac prope diuino; domestica etiam disciplina, præter rectum, & honestum, nihil agnosceret, nihil uellet; tamen, assiduo philosophiæ studio, ita uoluntatem auxerat, ita naturam expolierat, ut cum nemo magis uirtutem diligeret, tum nemo diligendam magis iudicaret. hunc ego mihi cum à prima adolescentia, tanquam unicum exemplum, & in moribus, & in literis ad imitandum proposuissem; nunc, in utroque à perfecta illa facultate, quæ in illo fuit, quàm longe absim, quàmque id, quod imitari statueram, consequi difficile sit, re tentata, & cognita perspicio. equidem, in literis, neque tempori, quantum rei familiaris occupatio permittit, neque labori, quantum mea non admodum firma ualetudo fert, hætenus peperci: seduloque sum conatus, ut, quemadmodum ille suorum studiorum rationem extare uoluit; itaque multa literis ab illo præclarissime tradita leguntur; itidem ego facerem, &, pro mea tenui facultate, meis scriptis hominum studiosorum utilitati commodisque consulerem. par in utroque uoluntas fortasse fuit: nos inferiores ingenio, scientia uero impares maxime sumus. ille Venetam remp. hoc est eam, quæ inter omnes nostri temporis resp. plurimum excellit; nos Romanam, hoc est eam, quam omnium præstantissimam antiquitas habuit, ad scribendum delegimus. ille, quod uoluit, perfecit; nos, euentu dubio, perficiendi tamen spe conamur, nam, etsi quanta in reuerfamur, intelligimus: tamen, quia superioribus quinque libris,

De legibus

primo de urbe, altero de ciuitate, tertio de religione, quarto de senatu, quinto de comitiis, operam à nobis non omnino male positam existimamus; incepti nondum pœnitet; animoq; satis alacri pergemus ad ea, quæ restant. Sextus hic erit de legibus liber. in quo cum diligentia, tum ingenii, addo etiam prudentia, grauissimæ sunt partes. nam ex iis legibus, quæ Romæ latæ sint, nullam prætermittere, diligentia est; quo in genere negligentes certe non fuimus. quid autem in ferenda lege quisque cogitauerit, & utrum id, quod cogitauit, utile reip. fuerit: hæc uero neque sine ingenio, eoq; peracuto, quisquam uiderit, neque sine prudentia iudicauerit. quare cum eam partem, quæ tota studii ac laboris est, & à uoluntate pendet, absoluerimus; (nihil enim in hoc, quantum quidem in nobis erit, desiderari patiemur) eam, quæ ad ingenium, & prudentiam pertinet, quæ nobis satis parce natura tribuit, si minus pro rei susceptæ magnitudine, ac dignitate præstabimus, iniquus erit lector, si quis infirmitatem pro crimine posuerit, meamq; causam potius condemnauerit, quia, quod debui, non potuerim, quàm probauerit, quia, quod potui, certe uoluerim. Quinque partes erunt huius libri. primo loco, quibus nominibus appellatæ leges sint, quis cuiusque lator, quæ cuiusque sententia fuerit, ostendemus. hac parte absoluta, quæ erit omnium maxima, tum illa quatuor, quæ ad rationem ferendæ legis pertinent, ordine curabimus; ut, à quo genere hominum, quibus in locis, quibus temporibus, quibus de causis latæ leges sint, explicemus. **I. V. S.** omne aut à natura est, aut à consuetudine, aut à legibus. ius naturæ ipsum per se, sine consuetudine, & legibus, ad optimam uitæ conditionem satis erat. satis enim beate uiueremus, si naturam ducem sequeremur. sed quia, quod iustum, & laudabile est, multi, uel quia sunt hebetes, non intelligunt, uel, quia sunt improbi, dissimulant; iccirco, ne peccantibus daretur excusandi locus, scripta lex est, quæ, quid agendum, fugiendum ue esset, perpetuis literarum notis testatum, atque expressum ante oculos poneret. est igitur lex tanquam præco, qui, suggerente natura, iustitiam ciuibz enunciat: cuius uocem qui uolentes auribus percipiunt, eamq; fideliter animo custodiunt; ita uiuunt, ut uirtutem à uitio facile distinguant, & ab altero, tanquam à pestifero angue, refugiant, alteram amplexentur, & amabilem præ ceteris

teris rebus existiment: uerum, quia publica res ita cum priuata
 cohæret, ut altera alterius commodo nitatur, nec fere, nisi utri-
 que recte sit, diu uigere & stare ciuitas ulla possit; propterea, quæ
 utrique consulerent, leges, aliæ pro statu reip. aliæ pro singulo-
 rum utilitate, diuersis temporibus latæ sunt. fuit igitur & ius pu-
 blicum, & ius priuatum. Rursus, quia publica sunt infirma, si se-
 parentur à diuinis; publici iuris facta diuisio est, ut altera pars ad
 religionem, altera ad res humanas pertineret. Ius priuatum ne ip-
 sum quidem simplex est, sed leges quidem omnes de rebus huma-
 nis, alias tamen de iure ciuili, alias de criminibus continet. Pri-
 mum igitur nobis agendum est de iure publico, deinceps de pri-
 uato; & primum de publico diuino, deinde de humano: item de
 priuato, primum eo, quod ad ius ciuile pertinet, secundo loco de
 eo, quod crimina persequitur. ROMANÆ leges aut à
 regibus latæ sunt, aut ab iis magistratibus, quos, regno sublato,
 alios aliis temporibus creatos, ciuitas habuit. ipsas leges magna ex
 parte alicunde sumptas facile crediderim. non enim dubitandum
 est, quin, cum ea tempestate in Italia & Albani, & Sabini, & præ-
 ter ceteros Etrusci floruerint; cumq; Albæ Romulus, in Sabinis
 Numa, Priscus etiam matre Etrusca, patre in Etruria orto natus
 esset; ad suam quisque patriam respexerit, & ea, quæ in iis popu-
 lis probabiliora uidebantur instituta, delegerit, Romæq; legibus
 sanxerit. à Lacedæmoniis etiam non nulla, ab Atheniensibus mul-
 ta ad ius constituendum uideo deriuata. nam fere, quæcunque in
 XII tab. decemuiri scripserunt, de Solonis legibus translata sunt.
 nec uero, ab ingenio pauca, atque à prudentia esse deprompta;
 credendum est, presertim in rep. cum in magnis opibus imperii,
 pro uario rerum euentu, noua iura temporum necessitas expri-
 meret. Regum ætate non multas in urbe leges fuisse existimaue-
 rim: non solum, quia regum iussa pro legibus erant; ad eos gra-
 uissima quæque deferbantur; eorum omnes dicto annuere, im-
 perio parere cogebantur: uerum etiam, quia ciuitas, neque dum
 populo satis frequens, neque opibus locuples, legum multitudi-
 nem non desiderabat. inter paucos, & assiduis bellis exercitos,
 nondum licentia, nondum plane uis emerferat: non luxuries, non
 illa, quæ fere opes consequitur, malarum artium lues in urbem in-
 uaserat. regibus exactis, simul cum publicis opibus & nata noua
 uitia

De legibus

uitia sunt, & ea, quæ fuerant, aucta. tunc, ut ad uarios morbos diuersa medicamenta inuestigata, inuentaq; sunt, sic ad ea mala, quæ manare cœperant in ciuitate, comprimenda, atque sananda, uaria legum genera peperit necessitas. neque tamen reges ipsi leges neglexerunt. poterant omnino, quidquid uellent; sed uoluit nemo, nisi quod liceret. quin, ut ait Liuius, ab ipso statim urbis primordiò Romulus, rebus diuinis rite perpetratis, uocata ad concionem multitudine, quæ coalescere in populi unius corpus nulla re, præterquam legibus, poterat, iura dedit. quem Numa subsecutus, multo etiam magis ciuitatem legibus excoluit, & ab armis ad religionem, bonosq; mores totam traduxit. omnesq; deinceps, præter Superbum, ita regnarunt, ut, quod idem Liuius alio loco tradit, Brutus idem, qui tantum gloriæ, Superbo exacto, meruit, malo publico uel maximo id facturum fuerit, si, libertatis immaturæ cupidine, priorum regum alicui regnum extorsisset. quare, cum ipsos moderati ingenii, optimiq; exempli fuisset, tum leges habuisse, quarum ad præscriptum uniuersos ciues uiuere uoluerint. quibus de legibus, deq; iis, quæ postea latae sunt, ita summatim agemus, nihil tamen ut patiamur desiderari. ac primum de publicis, & inter has primum de iis, quæ ad religionem pertinent, agendum est. **LEGES** publicæ de sacris & de religione iam inde à primis regibus, Romulo, & Numa, non sane paucae institutæ sunt. sed ante omnia, Romulus uidetur, ne quis unquam suas leges, aut sua facta posset infirmare, legem illam, quam regiam Vlpianus uocat, de suo imperio tulisse; cum populus, ab eo rogatus, omne suum ei, & in eum imperium, omnemq; potestatem contulit. Hoc facto ad inducendam religionem animum adiecit, & cum religione securitatem simul ciuium spectauit. de ipsa enim urbe id primum statuit, ne quis, nisi per portas, ingrederetur, egrederetur ue; mœnia sacrosancta essent. quam legem uidetur Cicero significasse in II de natura deorum, cum ait, muros à pontificibus habitos esse sanctos, quos uiolare nefas esset. Ita, cum & suam Romulus, & publicam salutem religione muniisset, sanxit deinde, idq; semper seruauit, ne quid publice inaugurato fieret. uidit enim, reliquas leges, quas ferre de rebus humanis cogitabat, haud paulo plus in nouo, uarieq; multis ex locis confluente populo habituras esse ponderis, si cum

si cum quadam erga deos pietate coniungerentur: quandoquidem id esse quasi frænum. uideretur ad impetus animorum reprimendos, hominesq; in officio, rectaq; ratione continendos. Atque hac quidem de lege ita loquitur Cicero in III lib. de natura deorum, ut ab ea fluxisse Romani imperii magnitudinem significet. Romulum, inquit, mihi persuadeo, auspiciis constitutis, iecisse fundamenta nostræ ciuitatis. Tum, sacris rebus ac ritibus præesse principes ciuitatis, hoc est, patricios, lege iussit; qui, diuina tractari à plebeiis hominibus, neque pium, neque decorum iudicaret; siquidem ea, quæ uim habet necessitatis, inopia faceret, ut eorum non modo manus labe rerum uilissimarum frædarentur, uerum animi quoque tum cogitandis, tum etiam patrands sceleribus inquinarentur. Addidit aliam legem, ne in templo nocturnæ uigiliæ haberentur: optimo sane consilio, primum, ne quid per noctem minus caste, minus ue pudice, sacrorum specie, committeretur; quod fieri plerunque contigit; deinde, ne qua fieri coitio, ne quid iniri aduersus ipsum, publicam ue rem occulti consilii, ne quid insidiarum tendi posset. ad quam legem Cicero spectauit, cum in suis legibus illa scripsit: Nocturna mulierum sacrificia ne sunt, præter illa, quæ pro populo rite fiant. Et quoniam opinio fabularum, quibus antiquitas deos admiscere solita est, familiaritatem quandam inter homines & deos uidetur inducere; unde manat primum contemptus, & in moribus licentia, deinde ad omne facinus audacia: uinculum hoc quoque incolumitatis publicæ firmissimum sapientissimus rex futurum putauit, si pœnam iis lege indiceret, qui fabulosa de diis figmenta credidissent. Quid illud? ubi diuersa religio est, tollitur societas, & consuetudo. ex eo facile odia, & ex odiis seditiones existunt. quo sæpe malo ciuitates intereunt. prouidit hoc Romulus, cauitq; lege lata, ne deos peregrinos, præter Faunum, colerent, ne ue sacrificia externa facerent. Has leges, & eas, de quibus infra suo loco agemus, uidetur comitiis curiatis tulisse. qua de re Pomponii iurisconsulti uerba recitabo. Romulus, inquit, populo in XXX partes diuiso, quas curias appellauit, quod tunc reip. curam per sententias earum partium expediebat, leges quasdam curiatis ad populum tulit: tulerunt & sequentes reges: quæ omnes conscriptæ extant in libro Sex. Papirii; qui fuit illis temporibus, quibus

*Nocturnæ uigiliæ non
habentur in templo*

Eni

De legibus

quibus Superbus, Demarathi Corinthii filius. isq; liber appellatur ius ciuile Papirianum. Hæc Pomponius. Verum in Romulo temperatum fuit ingenium, quale scilicet nascentis urbis initia postulabant, tum ad rem bellicam, tum ad religionem accommodatum. Numa totus in re diuina fuit: itaque ad eos sacerdotes, quos Romulus instituit, qui sexaginta fuerunt, ipse alios præterea adiecit, flaminem Dialem, Martialem, Quirinalem, uirgines Vestales quatuor, falios Marti Gradiuo duodecim, pontificem maximum ex patriciis, cui omnia sacra tum publica, tum priuata commisit. hæc, non dubito, quin ad perpetuitatem legibus sancita sint, sicuti alia multa, quæ religionis causa tum ab aliis regibus, tum à magistratibus in rep. constituta sunt. Regibus eicctis, lege tribunicia omnes leges exoleuerunt; (ponam enim eiusdem Pomponii uerba) iterumq; cæpit populus R. incerto magis iure, & consuetudine aliqua uti, quàm perlata lege: idq; prope XX annis. postea placuit, publica auctoritate X constitui uiros, per quos peterentur leges à Græcis ciuitatibus; ut ciuitas fundaretur legibus: quas, in tabulis X æneis perscriptas, pro Rostris proposuerunt, ut possent apertius perspicere: datumq; est eis ius eo anno in ciuitate summum, uti leges corrigerent, & si opus esset, interpretarentur, neque prouocatio ab eis, sicut à reliquis magistratibus, fieret. qui & ipsi animaduertunt aliquid deesse primis X legibus: ideoq; sequenti anno alias duas eisdem tabulis adiecerunt. In his legibus, quas centuriatis comitiis X uiri tulerunt, multa proprie de iure diuino sancita esse, necesse est: siquidem ita diligenter, & ita copiose scriptæ sunt, inspectis prius & sapientissimi Solonis legibus, & aliarum Græciæ ciuitatum institutis, ac moribus, ut uel ætate sua Liuius, in immenso aliarum super alias acervatarum legum numero, fontem tamen omnis publici priuatiq; iuris XII tab. esse dicat. sed de sacris ritibus pleraque, uetustate oblitterata, euauerunt: non nulla de legibus ad creandos sacerdotes pertinentibus, ueterum historiarum, ac monumentorum ope, quasi scalmus è naufragio, seruata sunt. Atque hoc de genere (ut à primis temporibus ordiar: unde ueluti per gradus ad postrema descendam) leges inuenio Romiliam primum; qua cautum est, ne alii, præter patres, & magistratus, sacra inirent, peragerent ue; deinde tribuniciam, Sextiam Liciniam, ut X uiri sacrorum,

rum, non, ut antea, omnes patricii, sed ex parte dimidia de plebe crearentur: item aliam tribuniciam, Ogulniam, ut, cum quatuor pontifices essent, placeretq; sacerdotum numerum augeri, quatuor præterea pontifices, quinque augures, de plebe omnes, allegerentur: ut omnino octo pontificum, nouem augurum numerus fieret. iam enim inter plebem, & senatum, hoc est inter inopes, & diuites, peculiare malum in liberis ciuitatibus erumpere discordia cœperat; seq; plebs, quasi profanam, à sacris amoueri querebatur. ideoq; tribuni pl. aduersante senatu, ad extremum, latis rogationibus, obtinuerunt, ut sacerdotia communicarentur. Fuere præterea de cooptandorum sacerdotum iure partim pro plebe, partim pro collegiis latæ tribunicia Cn. Domitii, consularis L. Cornelii Syllæ dictatoris, tribunicia T. Atii Labieni, consularis C. Cæsaris, consularis deinceps & M. Antonii. cum enim, ueteri lege, ac more, augures ab auguribus, pontifices à pontificibus, reliqui sacerdotes à suis quique collegiis crearentur, unus pontifex maximus à populo; quod omnium pene historicorum, Liuii maxime testimonio constat; Cn. Domitius tribunus pl. Neronis imperatoris atauus, pontificibus offensior, quòd alium, quàm se, sui patris in locum cooptassent, lege lata, ius sacerdotum subrogandorum à collegiis ad populum transtulit, eo anno, quo C. Marius tertium consul fuit. nec multo post ipse pontifex maximus populi suffragio creatus est, opinor in locum Q. Seruillii Cæpionis; ut ex Valerii libro v i licet coniicere. huius legis in II in Rullum agraria oratione Cicero meminit his uerbis. Hoc idem de ceteris sacerdotiis Cn. Domitius tribunus pl. uir clarissimus, tulit; quòd populus per religionem sacerdotia mandare non poterat, ut minor pars populi uocaretur; ab ea parte qui esset factus, is à collegio cooptaretur. sunt etiam hæc in oratione pro C. Cornelio. Quid? auunculus tuus, clarissimus uir, clarissimo patre, auo, maioribus, credo silentio, fauente nobilitate, nullo intercessore comparato, populo R. dedit, & potentissimorum hominum collegiis eripuit cooptandorum sacerdotum potestatem. Existimo autem hac lege permissum, ut absentes etiam possent petere sacerdotia. nam eam, ut opinor, significat Cicero, cum ad M. Brutum ita scribit. Ciceronem nostrum in uestrum collegium cooptari uolo. existimo omnino absentium rationem haberi sacer

C dotum

De legibus

dotum comitiis posse. nam etiam factum est antea. Caius enim Marius, cum in Cappadocia esset, lege Domitia factus est augur: nec, quo minus id postea liceret, ulla lex sanxit. Postea L. Sylla, rerum potitus, cum alia multa contra populum, qui Marianas partes fouerat, tum hoc sanxit, ut rursus sacerdotes à collegiis crearentur. de quo sic Pedianus in diuinationis commentario. His X annis, uictore Sylla, bellis ciuilibus, spoliatus est populus R. potestate tribunicia, iudicandi iure, arbitrio creandorum sacerdotum. Sed quemadmodum legem Domitiam abrogauit sua lege Sylla: sic legem Syllæ, aliquot post annis, T. Atius Labienus tribunus pl. abrogauit, Domitiamq; restituit. fecit autem hoc auctore C. Cæsare: qui, si populus in mandando sacerdoti suffragium ferret, se, qui popularis admodum erat, pontificem maximum, in demortui Metelli Pii locum, creatum iri, non sine causa putabat. quod re comprobatum est. nam, P. Seruilio Isaurico, & Q. Lutatio Catulo, consularibus uiris, & prouecta iam ætate, deiectis, ipse, nondum prætorius, in amplissimi sacerdotii gradum ascendit. Tulit & ipse legem, non quæ à Labieni lege discreparer, (fuit enim uterque popularis) sed quæ nouum aliquod ius adscriberet. Domitiam quidem legem in eo capite confirmauit, ut absentibus petere sacerdotia liceret. scripsit enim hæc in sua lege: Qui petit, cuius ue ratio habebitur. quorum/uerborum sententiam Cicero exponens in epistola ad M. Brutum, Aperte, inquit, indicat, posse rationem haberi etiam non præsentis. Rursus à populo ad collegia, lege Labieni abrogata, ius cooptandorum sacerdotum retulit post obitum Cæsaris M. Antonius consul, eo consilio, ut facilius ac certius M. Aemilius Lepidus, cuius filio filiam suam collocauerat, pontifex maximus in Cæsaris locum subrogaretur. ita, quod historia demonstrat, ius creandi sacerdotes quater immutatum est, à Domitio, Sylla, Labieno, Antonio. mihi tamen & de quinta mutatione oritur opinio, ut puto, satis certa, primum ex epistola ad M. Brutum; in qua ita scriptum est. Pansa uiuo celeriora omnia putabamus. statim enim collegam sibi subrogasset, deinde, ante prætorum, sacerdotum comitia fuissent. cum enim, quo tempore hæc epistola scripta est, tum non à collegiis, sed à populo subrogari solitos esse sacerdotes, manifestum sit, quia comitia de populo dici nemo nescit; hæc autem epistola

eo

eo anno scripta sit, quo Hirtilius & Pansa cos. fuerunt, id est eo, qui Antonii consulatum primus consecutus est: liquet, Antonii legem non esse seruata, sed eam, quam Domitius tulerat, iterum esse restitutam. nitor etiam Dionis testimonio; qui libro XLVI leges Antonii à Pansa consule abrogatas esse narrat. quod etiam fecit Lentulus ille, qui scripsit his uerbis ad Ciceronem: Primus ego leges Antonianas fregi. ut eius potius exemplum Pansa, quam ipse Pansa, secutus esse uideatur. est etiam ex ipso Cicerone minime dubium de abrogatis Antonii legibus argumentum. Acta, inquit oratione XIII in ipsum, Antonii rescidistis: leges refixistis: per uim, & contra auspicia latas decreuistis. præterea patet hoc eo clarius, quod in ea, de qua proxime meminimus, ad Brutum epistola proximam legem de sacerdotiis Cicero Iuliam appellat; quæ petendi sacerdotii potestatem absentibus permittebat. quod si post Antonii consulatum, in quo legem tulit de iure cooptandi, proxima dicitur C. Cæsaris lex: nimirum sublata iam erat Antonia, & mos ille renouatus cooptandorum sacerdotum populi comitiis, quem sua lege primus Domitius induxerat. quanquam non id primus esset aggressus. nam aliquot annis ante C. Licinius Crassus eadem sententia legem promulgauit, nec tamen pertulit. sic enim in libro de amicitia loquitur C. Lælius, is, qui cum Africano minore coniunctissime uixit. Quam popularis lex de sacerdotiis C. Licinii Crassi uidebatur. cooptatio enim collegiorum ad populi beneficium transferebatur. tamen illius uendibilem orationem religio deorum immortalium, nobis defendentibus, facile uincebat. atque id actum est prætoris me, quinquennio ante, quam consul sum factus. itaque re magis, quam auctoritate, causa illa defensa est. Hic, quando ueterum testimonia, quæ sunt de legibus ad sacerdotum creationem pertinentibus, recitavi; adiungam dubitationis nescio quid, quod explicare, non cuius, ut opinor, facillimum est. non enim minus libenter meas dubitationes, quam expositiones, profero: neque ego me eum esse profiteor, cui omnia pateant. contra, si quis est, qui se multa nescire fateatur, & qui libenter in legendo dubitet, is ego sum. Quæro igitur, utrum Cn. Domitii lex etiam ad ipsius pontificis maximi creationem pertinuerit, an uero ad sacerdotes, pontifice excepto. nam, si Domitius legem tulit non de pontifice maximo, sed de ceteris sacerdo-

De legibus

tibus à populo creandis; quia de pontifice ferri non opus esse iudicaret, cum is iam ante à populo crearetur: cur dixit Dio libro xxxvii, legem Domitiam de cooptatione sacerdotum à Labieno tribuno pl. esse renouatam, ut pontifex maximus in locum Metelli C. Cæsar à populo crearetur? quòd si quis Domitium & de pontifice maximo tulisse dixerit: huic ego opponam Ciceronis, & Liuii auctoritatem: qui, quod Domitius tulit, ut in sacerdotibus fieret, id iam ante in pontifice maximo esse factum significant, ut scilicet à parte populi crearetur. Ciceronis uerba sunt hæc in ii in Rullum oratione. Item, inquit, eodemq; modo, capite altero, ut comitiis pontificis maximi. ne hoc quidem uidit; maiores nostros tam fuisse populares, ut, quod per populum creari fas non erat propter religionem sacrorum, in eo tamen propter amplitudinem sacerdotii uoluerint populo supplicari. atque hoc idem de ceteris sacerdotiis Cn. Domitius tribunus pl. uir clarissimus, tulit; quòd populus per religionem sacerdotia mandare non poterat, ut minor pars populi uocaretur; ab ea parte qui esset factus, is à collegio cooptaretur. satis aperte significat, ante Domitii legem à parte populi pontificem esse factum. sed Liuius paulo clarius etiam hoc idem libro xxv exponit: ait enim. Comititia inde pontifici maximo creando sunt habita. ea comitia nouus pontifex M. Cornelius Cethegus habuit. comitia pontificis maximi nominat, plurimis ante Domitii ætatem annis. Quænam igitur est huius explicandæ quæstionis ratio? hæc fortasse. Concedo, ante Domitii legem populi comitiis pontificem maximum esse factum: sed Domitium existimo, cum reliquorum sacerdotum, id est pontificum, augurum, xv uiro- rum, vii uiro- rum, flaminum, aliorumq; omnium, qui iure sacerdotii sacris rebus præessent, eandem esse conditionem uellet, ut, quemadmodum pontifex maximus item ipsi à parte populi crearentur, de sacerdotibus omnibus, generatim tulisse, ut etiam pontificem ipsum maximum comprehendere uideretur. ita, quod de iure subrogandorum sacerdotum Domitius tulit, non illud quidem in pontifice maximo nouum fuit, sed, cum generalibus uerbis esset perscriptum, non minus ad eum, quàm ad reliquos sacerdotes, pertinuit. quam ob causam, cum L. Sylla Domitiam legem abrogauit, abrogatum simul & de pontifice maximo, & de sacerdotibus reliquis dicemus: non, quòd nominatim

minatim Domitius de pontifice maximo tulisset : (iam enim , neque hoc esse factum , neque fieri oportuisse , diximus) sed , quòd , cum de sacerdotibus omnibus tulisset , legis sententia etiam ad pontificem maximum , qui & ipse sacerdos esset , pertineret . itaque , lege abrogata , omnium sacerdotum , quorum in numero pontifex maximus erat , ad collegia rursus translata cooptatio est . eademq; lege à Labieno renouata , pontificis maximi & reliquorum sacerdotum par conditio fuit , ut omnes à parte populi crearentur . quod enim communiter omnibus de sacerdotibus sancitum à Domitio fuerat , eo pontificem maximum excludi ius non fuit . -Vetus etiam de religione lex illa fuit , quam Q. Papirius tribunus pl. tulit ; quæ uetabat iniussu populi quidquam consecrari , neque aut hominem , aut locum , aut rem excipiebat ullam . quod ex oratione pro domo conici uidetur posse . Item illæ de ritu capiundæ uirginis Vestalis , Papia primum , deinde Popillia . qua de re apud Gellium scripta sunt hæc . De more rituq; capiundæ uirginis , literæ quidem antiquiores non extant , nisi quòd capta fuisse fertur , quæ capta prima est , à Numa rege . sed Papiam legem inuenimus : qua cauetur , ut pontificis maximi arbitratu uirgines è populo uiginti legantur , sortitioq; in concione ex eo numero fiat . sed ea sortitio ex lege Papia non necessaria nunc uideri solet . nam , si quis honesto loco natus adeat pontificem maximum , atque offerat ad sacerdotium filiam suam , cuius duntaxat , saluis religionum obseruationibus , ratio haberi possit ; gratia Popillia legis per se ratum fit . capi autem uirgo propterea dici uidetur , quia pontificis maximi manu prehensa , ab eo parente , in cuius potestate est , ueluti bello capta abducitur . in libro Fabii pictoriis , quæ uerba pontificem maximum dicere oporteat , cum uirginem capit , scriptum est . ea huiusmodi sunt . Sacerdotem Vestalem , quæ sacra faciat , quæ ius fiet sacerdotem Vestalem facere pro populo R. Quiritibus , uti quod optima lege fiat ; ita te Amata capio . Amata autem inter capiendum à pontifice maximo appellatur , quoniam , quæ prima capta est , hoc fuisse nomine traditum est . Legum de religione ultima erit , & quasi agmen coget ea , quæ sacerdotes militiæ uacationem , præterquam Gallico bello , habere iussit : non , quòd iis bello prorsus interdiceret : sed hoc tribuit , ut , si minus ire ad militiam uellent , cogi ne possent . nam spon-

te

De legibus

te multos augures, multos pontifices ad bellum exiisse, historiæ narrant. qui tamen extra Italiam primus pontifex maximus P. Licinius Crassus Mucianus contra Aristonicum, qui Asiam occupauerat, profectus est, is in prælio interfectus, neglectæ religionis poenas dedit. hanc legem significat Plutarchus in Fabii Maximi uita, cum ait: Crassum, quod erat pontifex maximus, diuina quædam lex domi tenuit. eodemq; & Liuius libro VIII spectauit. Nominatæ, inquit, consulibus prouinciæ sunt; Scipioni Sicilia extra sortem, concedente collega, quia sacrorum cura pontificem maximum in Italia retinebat; Brutii Crasso. sed hic Crassus multis annis ante illum fuit, qui ab Aristonico est interfectus: ut ex obseruatione temporum facile est intelligere. Sequuntur proxime leges de ludis: quas cum iis, quæ ad religionem pertinent, coniunctionem, & quasi affinitatem quandam habere, satis ex eo constat, quod nulli sine sacrificiis ludi fuerunt. et sacrificia religionis pars est. ideo & M. Varro, cum de rebus diuinis libros quinque componeret, unum de ludis, ut de re diuina, fecit. qua ratione adducti sumus, ut post leges de sacerdotiis eas, quæ sunt de ludis, exponeremus. Ac prima inter has Licinia nominatur, de ludis Apollinaribus: qui cum in unum annum uouerentur, incertoq; die fierent; senatus P. Licinium Varum, prætorem urbi ferre ad populum iussit, ut in perpetuum in statum diem uouerentur. hi ludi, cum Annibal esset in Italia, uictoriæ causa Q. Fuluius Flacco tertium, Ap. Claudio cos. ex Martii, clari uatis, carmine primum instituti sunt: cuius in libris hæc inuenta Liuius recitat lib. v. eademq; fere & Macrobius lib. Saturn. i. Hostes, Romani, si expellere uultis, uomicamq; , quæ gentium uenit longe; Apollini uouendos censeo ludos, qui quotannis comiter Apollini fiant: cum populus dederit ex publico partem, priuati uti conferant pro se, suisq; . iis ludis faciendis prærit prætor is, qui ius populo plebiq; dabit summum. x uiri Græco ritu sacra faciant. hæc si faxitis, gaudebitis semper, fietq; res uestra melior. nam is dius extinguet perduelles uestros, qui uestros campos pascit placide. hoc inuento carmine, censuerunt patres Apollini ludos uouendos, faciendosq; ; uoueri autem, & fieri à prætore urbano; quod is esse uideretur, qui ius populo plebiq; summum daret: cum facti essent, duodecim millia æris prætori ad rem diuinam, & duas

& duas hostias maiores dandas : & ut X uiri sacra ritu Græco facerent , hisq; hostiis , Apollini boue aurato , & capris duabus albis auratis , Latonæ boue femina aurata . Ludos prætor cum facturus esset , edixit , ut populus per eos ludos stipem Apollini , quantum commodum esset , conferret . populus eos coronatus spectauit . matronæ supplicauere : uulgoq; apertis ianuis in propatulo epulati sunt : celebrerq; dies omni carimoniarum genere fuit . Anno proximo , referente Calpurnio prætore , decreuit senatus , ut ii ludi in perpetuum uouerentur . triennio post , ut in perpetuum in statum diem uouerentur . P. Varus , ut diximus , prætor urbanus , à senatu iussus , legem tulit ; & ex ea lege ipse primus uouit , fecitq; ante diem II nonas Quinct. eumq; diem solennem deinde seruatum esse Liuius tradidit . ego tamen M. Bruti , qui Cæsarem interfecit , prætoris urbani , absentis nomine , neque uno die tantum , neque II nonas Quinct. factos inuenio , sed , cum nonis Quinct. essent commissi , usque ad III idus datos fuisse . quod ex duobus locis libri epistolarum ad Atticum XVI colligitur . quod ipsum , de pluribus ludorum Apollinarium diebus , confirmat , ut opinor , Liuius lib. XXXVII , his uerbis : Ludis Apollinaribus ad V idus Quinct. cælo sereno , interdiu obscurata lux est . Alios præterea ludos Romæ fuisse , notum est . de quibus agetur in alio libro separatim . nunc leges ostendamus : id quod propositum nobis est . Liciniam Fannia sequitur : de qua Gellius hæc . Ludis Megalensibus principes ciuitatis mutua inter sese conuiuia agitabant : qui uetere s. C. quod factum est C. Fannio & M. Valerio cos. iurare cogebantur , conceptis uerbis , apud consules , non amplius in singulas cenas sumptus esse facturos , quàm centenos , uicenosq; æris , præter olus , & far , & uinum , neque uino alienigena , sed patrio usuros , neque argenti in conuiuium plus pondo , quàm libras centum , illaturos . sed post illud s. C. lex Fannia lata est , quæ ludis Romanis , item plebeiis , & Saturnalibus , & aliis quibusdam diebus in singulos dies centenos æris infumi concessit , decemq; aliis diebus in singulis mensibus tricenos , ceteris autem omnibus denos . Et quoniam spectandi locum senatores in imis gradibus ante omnes habuerunt ; quod instituere curules ædiles , cen forum iussu , Atilius Serranus , & L. Scribonius Libo : fecit sua lege L. Roscius Otho , Ciceronis ætate , alteram in populo distinctionem .

De legibus

tionem . tulit enim , ut equester ordo seorsum à plebe in XIII gradibus federet , iis tamen equitibus exceptis , qui siue suo , siue fortunæ uitio decoxissent . cui generi certum locum assignauit , pœna irrogata , si in XIII sedissent . hinc illud in Antonium , oratione II. Tenes ne memoria , te prætextatum decoxisse ? patris , inquires , ista culpa est . concedo : illud tamen audaciæ tuæ , quod sedisti in XIII : cum esset lege Roscia decoctoribus certus locus constitutus ; quamuis quis fortunæ uitio , non suo , decoxisset . Primum igitur senatores in sedilibus circo proximis confidebant . secundo loco proxime sedisse equites putabam , cum , exceptis senatoribus , & magistratibus , dignitate anteirent : sed à Cornelio Tacito monitus opinionem mutaui . is enim , sedisse quidem in XIII ordinibus equites , narrat , non tamen ante plebem , sed confuse , tantum ut XIII ordines haberent . Nero , inquit libro XV , equitum Romanorum locos sedilibus plebis anteposuit apud circum . nam ad eam diem indiscreti ibant : quia lex Roscia nihil , nisi de XIII ordinibus , sanxit . Hic legis Titia & Cornelia , à duobus fortasse tribunis pl. lata , (nam & plebeii Cornelii fuerunt) subiungenda mentio est ; quæ sanxit , ne quis in pecuniam luderet , sponsonemq ; eius rei ergo faceret , nisi si certaretur disco , pilo ue iaciendo , currendo , saliendo , ludendo , pugnando : quæ uirtutis causa fiebant . hanc legem utrum reip. an imperatorum temporibus latam existimem , compertum non habeo . mentionem uideo fieri apud iurisconsultos . Nec omittendum illud , quod pertinere uidetur ad ludos ; histrionum licentiam repressam esse lege . qua de re is , qui libros rhetoricorum scripsit ad Herennium , atque etiam Suetonius meminit . Non est , opinor , à legibus de religione lex illa seiungenda ; quam uetustam fuisse Liuius asserit , priscis literis , uerbisq ; scriptam ; ut , qui prætor maximus esset , idibus Sept. clauum pangeret . cuius religionis seruandæ gratia creatum esse dictatorem , idem Liuius ait , L. Manlium Imperiosum , ab eoq ; clauum esse fixum dextro lateri ædis Iouis optimi maximi , ea parte , qua Mineruæ templum fuit : & addit , eum clauum , quia raræ primis urbis temporibus erant literæ , notam numeri annorum fuisse credi : eoq ; Mineruæ templo dicatam legem , quia numerus Mineruæ inuentum esset : eam autem carimoniam , cum per aliquot annos fuisset intermissa , ideo esse renouatam , ut pestilentia sedaretur .

sedaretur : quod antea factum , prospereq; rem successisse , seniores prædicabant . Post res diuinas humanæ sequuntur ; & inter humanas primum dignitatis locum obtinent magistratus . itaque ordo postulat , ut , quæ leges de iis latæ sunt , eas hic exponamus . Prima fuit , ut opinor , hæc ; ut de senatu , id est de patriciis familiis , omnes magistratus crearentur : idq; à Romulo institutum reliqui deinde reges obseruarunt . hanc autem legem , uix putauerim , comitiis curiatis , ut reliquas , à Romulo esse latas . quippe , quæ aduersus plebis uoluntatem res esset , eam rem cur ipsius plebis iudicio potestatiq; committeret ? sanxit igitur hoc regio iure , publicisq; tabulis consignauit , & obseruari pro lege uoluit . quod perspicue demonstrat Dionysius lib. II , cum ait ; Romulum de muneribus patriciorum & plebeiorum lege sanxisse , ut patricii sacra curarent , magistratus gererent , ius dicerent ; plebei , quia rudes inopesq; essent , agros colerent , quæstuariisq; artibus operam darent . Temperamentum illud tamen , quo ciuitatum concordia , id est salus ipsa , custoditur , maxime quæsiuit . nam , ne nimis in ordinem patricium uideretur esse propensus , datum aliquid populo uoluit , & , ut is suis suffragiis magistratus crearet , leges scisceretur , bella decerneret , curiatis comitiis tulit . Duumuiros quoque , qui perduellionem iudicarent , ita creari iussit , ut ad populum prouocatio esset . qua ipsa de lege & infra mentio fiet inter eas , quæ ad crimina capitalia pertinent . nec tamen hic , cum ad duumuiros , hoc est ad magistratum pertineat , omittendam putauimus . Eiusdem lege creauit populus tribunum Celerum , qui equitibus præerat , & ueluti secundum locum , ut ait Pomponius iurisconsultus , à regibus obtinebat . quo in numero fuit L. Iunius Brutus , ille reges eiiciendi , & inducendæ libertatis auctor . Creatos etiam , regnante Romulo , quæstores , Vlpianus prodidit à Iunio Gracchano traditum in iis libris , quos de potestatibus inscripsit . idem tamen hæc subiungit : Sicuti dubium est , an , Romulo & Numa regnantibus , quæstor fuerit ; ita , Tullo Hostilio rege , quæstores fuisse certum est . et sane crebrior opinio est , Tulium Hostilium primum in remp. quæstores induxisse . Legem aliam præterea in regno Romano de magistratibus non uideo nominari . Regibus pulsus , prima de magistratibus lex fuit , quam L. Iunius Brutus tulit , ut singulis annis bini consules , regia potesta-

D te ,

De legibus

te, crearentur, iisq; primum creandis centuriata comitia ab interrege, ut ait Dionysius, haberentur: quæ tamen à præfecto urbis esse habita, Liuius tradit. sic enim lib. I scripsit, in extremo: Duo consules inde comitiis centuriatis à præfecto urbis ex commentariis Ser. Tullii creati sunt. in quo uidetur illi esse cum Dionysio controuersia: quæ tamen nulla est. nam & ab interrege, & à præfecto simul urbis habita sunt ea comitia, quibus primi consules creati sunt, cum iis præfuerit Sp. Lucretius Tricipitinus, Lucretiæ pater: qui erat idem interrex, idem urbis præfectus; interrex, quod eum senatus habendis consularibus comitiis, Bruto referente, creasset; præfectus, quod ei Tarquinius, ad bellum proficiscens, curam urbis mandauerat. utrumque enim scriptum est apud Dionysium. aut igitur à præfecto urbis Lucretio creati consules sunt, ut ab interrege, non ut ab urbis præfecto; aut etiam, quod, qui interrex esset, idem & præfectus urbis uocari posset. urbis enim curam gerebat interrex; quia tunc, urbanas res qui curaret, magistratus omnino nullus esset. Post hanc legem duæ sequuntur proximæ, à P. Valerio consule, Bruti collega, latæ, quibus plebis potestas aucta, senatus & magistratuum imminuta est; primum, ut magistratum nemo caperet, nisi qui à populo imperium acciperet: si quis aliter fecisset, capitali pœna puniretur; qui eum occidisset, ei impune esset: deinde, ut aduersus magistratum prouocatio ad populum esset; ne uel quis magistratus ciuem Romanum aduersus prouocationem uerberare, aut necare uellet. quam legem centuriatis comitiis esse latam, Valerius tradidit lib. IIII. Pro patriciis ea fuit, quæ, ut opinor, T. Lartio Flauo II, Q. Clælio cos. lata est, de dictatore sine prouocatione creando, & ut de consularibus legeretur. fuit autem hæc lex ideo pro patriciis, quia, cum creari dictatorem de consularibus iuberet, sequebatur, ut de patriciis crearetur. consules enim tunc, & per annos deinde multos, patricii fuerunt: nec prius de patriciis legi dictator desuit, quàm creari duo consules patricii desierunt. non enim consul patricius dictatorem quenquam de plebe dixisset. itaque qui primus de plebe dictator fuit, C. Martius Rutilus, is à M. Popillio Lænate consule plebeio dictus est: cum ita casus tulisset, ut aduersus Etrusci belli terrorem dictator dicendus esset, nec nisi à consule plebeio dici posset: quia consul alter patricius M. Fabius Ambustus bello

lo retineretur . ita communicata plebi dictatura , anno ab urbe condita CCCIC. idq; contra ueterem consuetudinem, non tamen contra legem factum est. non enim lex dictatorem de plebe fieri uenerat , sed de consularibus iusserat . at C. Martius consularis . satisfecit igitur legi Popillius, cum consulem hominem dictatorem dixit; patriciis non satisfecit, quia consulem de plebe dixit; cum omnes antea de patriciis dicere consueuissent . Eadem fortasse lege sancitum est, (legem certe, quæ hoc sanxerit, nominat Plutarchus in Fabio) ne dictator equo posset uti, idq; uel ob eam causam; quod, cum plus inesse roboris in pedestribus copiis putaretur, propterea in legione permanere, nec locum deferere deberet imperator; uel quod, cum ad alia omnia dictatoris esset singularis potestas, in hoc uno uoluerunt eum populo inferiorem uideri. senatus tamen petenti Fabio Maximo Verrucoso contra ueterem legem concessit, ut equo uehi posset: datumq; id hominis uirtuti, ac tempori, cum, cæsis ad Cannas Romanis, in uno Fabio, dictatore creato, melioris fortunæ spes reposita uideretur . Illa pro plebe aduersus patricos fuit, quæ in Sacro monte lata est, & Sacratæ nomen accepit, ut plebi sui magistratus essent, iiq; sacrosancti, quibus auxilii latio aduersus consules esset, ne ue cui patrum capere eum magistratum liceret . qua lege tribuni pl. quinque primi creati sunt: nec tamen, utrum una tantum lex, an plures in Sacro monte latæ sint, satis constat. Liuius, & Dionysius, ubi rem ipsam narrant, unam nominant. sed Liuius alibi non semel, Sacratæ leges, dixit. Cicero quoque de prouinciis consularibus, Si patricius, inquit, tribunus pl. fuerit, contra leges Sacratas esse. et pro domo sua: Vetant leges Sacratæ priuatis hominibus leges irrogari. et in ea, quæ integra non extat, pro C. Cornelio: Tanta in illis uirtus fuit, ut anno post reges exactos XVI, propter nimiam dominationem potentium, secederent, leges Sacratas ipsi sibi constituerent. quibus locis non de una lege, sed de pluribus accipiendum uidetur. quod si unam omnino legem uelimus fuisse, &, recte tamen dictum utroque numero, defendere; rationem afferemus hanc, unam legem dici, quia re uera una sit; plures, quia pluribus partibus, eodem tamen spectantibus, constet: quo modo XII tab. & legem, & leges appellari uidemus. Sequitur lex à Publilio, & Lætorio tribunis pl. lata, ut plebei magistratus tributis

De legibus

comitiis fierent; qui curiatis antea fieri solebant. Tum illa lex, qua, ut x tribuni pl. crearentur, bini è singulis classibus, anno à primis tribunis pl. xxxvi cautum est. Alia lex fuit, qua, Dionysio teste, cauebatur, ne quis, tribuno apud populum concionante, aliquid contra diceret, uel dicentem interpellaret; si quis fecisset, uades tribunis daret, pœnamq; à tribunis impositam solueret; qui uades non dedisset, morte puniretur; bona eius sacra essent, de pœnis autem ipsis populus iudicaret. Et quoniam Atinii plebisciti, quod ad tribunatum pl. pertinuit, mentionem à Gellio fieri uideo; quænam eius fuerit sententia, quærendum uidetur. Ego sic existimo; tribunos pl. ante Atinium plebiscitum partim senatores fuisse, alios non fuisse: quòd scilicet liberum esset populo R. tribunatum pl. mandare cui uellet. Atinius, quo modo quidem mihi uidetur, nec ademit hanc libertatem plebi Romanæ, & auxit potestatis tribuniciaæ dignitatem. tulit enim, non, ne quis, nisi iam senator, tribunus fieri posset, (plebis enim libertatem huiusmodi rogatione minuisset; neque id plebes ullo modo sciuiisset) uerum, ut, quem tribunum pl. creasset, is hoc ipso in posterum senator esset. atque hanc esse Gellii uerborum sententiam crediderim, cum ait libro xiv, tribunis pl. senatus habendi ius fuisse, quanquam senatores non essent ante Atinium plebiscitum. hoc etiam è quodam Suetonii loco suspicamur. nam in Augusto, Comitiis, inquit, tribunicis, si candidati senatores deessent, ex equitibus R. creauit. ex quo sequitur, non licuisse antea equitibus R. tribunatum petere. multo igitur minus tertio ordini, iis, qui de plebe dicebantur, qui nec equites, nec senatores erant. quin, primis temporibus, tantum abest, ut ex senatu tribuni pl. crearentur, ut ob eam ipsam causam instituti sint, ne senatus aduersus plebem crudelius, aut arrogantius ageret: ideoq; ex ipsa plebe per annos multos creati sunt. postea cœpere equites quoque Romani, ac senatores tribunatum pl. petere. Nec multo post x uiri, sine prouocatione creati, xii tab. leges condidere, comitiisq; centuriatis pertulere. quibus in legibus cum alia multa prudenter ad temperandam ciuitatem, tum de magistratibus multa sancita esse, credibile est. X uirorum imperio finito, cum tribuni pl. creati essent, quos x uiri simul cum prouocatione sustulerant, quæ firmissima plebi auxilia, & tanquam duæ tuendæ libertatis arces fuerant;

rant; tribunatu inito, sine ulla mora M. Duilius de consulibus cum prouocatione creandis rogationem pertulit. quam ipsam multo ante P. Valerius consul, ut diximus, tulerat; sed, intermissam, & quasi sublatam X uirorum magistratu, Duilius renouauit, auctam opinor, aliqua re, & grauiori iure confirmatam: sicuti & alia leges multae diuersis temporibus plures latores habuere, cum uetus lex noua lege uel corrigeretur, uel, ut tempus, moresq; ferebant, aliis cautionibus adiectis, augeretur. hinc de communi omnium Quiritium iure leges, primum Valeria & Horatia, deinde Publilia, postremo Hortensia, prima duorum consulum, reliquae duae dictatorum: hinc sumptuariarum, uel, ut Cato censorius appellabat, cibariae, Orchia, Fannia, Didia, Licinia, Aemilia, Antia: hinc de ambitu Petilia, Cornelia & Baebia, Calpurnia, Tullia, Iulia. quae non ideo alia post aliam latae sunt, ut priorem legem posterior abrogaret; sed, ut dixi, uel ut corrigeretur aliquid, uel ut nouum ius, utile ciuitati, ascisceretur; uel ut, moribus ad deteriora quotidie magis inclinantibus, poena grauior irrogaretur. quod libro II de officiis Cicero significat his uerbis. Nondum centum, & decem anni sunt, cum de pecuniis repetundis à L. Pisone lata est lex; nulla antea cum fuisset. at uero postea tot leges, & proximae quaeque duriores. causam porro iuris eadem de re constituendi hanc uideo fuisse, ut antiquae legi, iam uetustate senescenti, noua subueniret. quod in lege Licinia de sumptibus, quae fere idem, quod Fannia, sanxit, quaesitum esse, in Macrobio legimus, Sat. lib. III. atque hoc ipsum de XII tab. euenisse, idem tradit. quarum ubi contemni coepit antiquitas; eadem illa, quae illis legibus cauebantur, in alia latorum nomina transferunt. Retulit igitur Duilius, quod ante latum erat: & quod Duilius retulit, id eodem anno lege lata L. Valerius & M. Horatius cos. non confirmarunt modo, sed auxerunt etiam nouo iure adscripto; cum ille de prouocatione à consulibus tantum, hi de prouocatione ab omni magistratu, quicumque crearetur, lege sanxerint. qui & aliam legem, qua ueterem illam Sacratam confirmarunt, tulerunt, ut sacrosancta essent tribunorum pl. corpora; cuius rei prope iam extincta memoria erat; religione etiam ad legem adiecta, caerimoniis quibusdam ex magno interuallo relatis. eademq; lege cautum est, ut, qui aedilibus, iudicibus, X uiris nocuisset, eius caput Ioui sacrum esset.

De legibus

esset. sed horum consulum prima lex ea fuit, quæ tribunorum pl. potestatem quammaxime auxit, quam tulere centuriatis comitiis, ut, quod tribuni pl. iussissent, populum teneret: quod ante ueluti in controuerso iure fuisse, & Liuius ait, & Dionysius confirmat. cur autem controuersum fuerit, Liuius non exponit, sed Dionysius subobscurè significat; quia, cum lege centuriatis comitiis lata populus omnis teneretur; tributis uero comitiis latam plebei tantum seruarent; plebs eandem esse conditionem in utrisque legibus uolebat; ut, quemadmodum centuriatis comitiis, ubi plus patricii possent, latas leges plebei obseruarent, item eo iure, quod tributis comitiis sancitum esset, in quibus plebei patriciis suffragio præstabant, patricii tenerentur. Eodem anno idem Duilius plebem rogauit, plebesq; sciuit; qui plebem sine tribunis pl. reliquissent, quiq; magistratum sine prouocatione creassent, tergo ac capite punirentur: qualem & consules Valerius & Horatius tulerant. Anno proximo L. Trebonius tribunus pl. rogationem tulit, ut, qui plebem Romanam tribunus pl. rogaret, is usque eò rogaret, dum x tribunos pl. faceret. nam Duilia lex de tribunis nunquam numerum præfinierat: tantum, ut relinquerentur, sanciebat, & ab iis, qui creati essent, cooptari collegas iubebat. sustulit igitur Trebonia lex cooptationem. nam cum iusserit, ab eo, qui comitia tribunis creandis haberet, omnes plane tribunos, qui x omnino erant, creari; nimirum partem tribunorum creari, reliquos autem ab iis, qui creati essent, cooptari uetuit. quod cum M. Duilius tribunus pl. fecisset; recteq; factum, neque contra legem ab ipso latam commissum, defenderet; anno insequenti Trebonius tribunus pl. ne in posterum fieret, lege cauit. nec aliam legem intelligit Liuius lib. IIII, cum ait: Ante omnia refellit falsum imaginis titulum, paucis ante annis lege cautum, ne tribunis collegam cooptare liceret. hæc enim uerba nihil aliud significant, nisi id, quod idem lib. III scripsit, ut, qui plebem Romanam tribunos pl. rogaret, is usque eò rogaret, dum x tribunos pl. faceret. Secuta lex est de tribunis mil. consulari potestate promiscue ex patribus ac plebe creandis: qui tamen per annos IIII & XL patricii omnes creati sunt. Huic proxima successit de censoribus quinquenni imperio è gente patricia creandis, Gegano Macrino II, Quintio Capitolino V cos. quam ipsam legem sexennio post Mam. Aemilius

milius dictator correxit, lege lata ne plus quàm annua ac semestris censura esset. gravis enim omnis diuturna potestas in libera ciuitate. Biennio post lata lex est à tribuno pl. tollendæ ambitionis causâ, ne cui album uestimentum addere petitionis causâ liceret. cuius deinde uim auctoritatemq; fuisse nullam, innumera de candidatis exempla declarant. Legem etiam nominat in Coriolani uita Plutarchus, Marcio Censorino suadente latam, ne cui bis eundem magistratum petere liceret. quam postea constat esse abrogatam: cū multi iterum, ac sæpius consules fuerint. De duplicando quæstorum numero lata lex est, ut, præter duos urbanos, quorum fuisse originem antiquissimam iam ostendimus, duo, qui consulibus ad ministeria belli præsto essent, crearentur, iiq; promiscue de plebe ac patribus, libero populi suffragio. Plebis autem opes maxime omnium auxerunt L. Sextius, & C. Licinius Stolo; qui tribuni pl. duas leges tulerunt, unam, ut x uiri sacrorum ex dimidia parte de plebe crearentur; alteram, ut alter utique consul plebeius esset. quam Liuius Liciniam, non Sextiam, uocat, opinor ob eam causam, quòd Licinius tulerit, subscripserit Sextius. Leges deinde aliæ de consulatu latæ sunt, omnes è rep. quæ tamen haud omnino sunt obseruatæ. quid enim utilius reip. quàm ne quis iterum consul fieret? quod quidem omnium ciuium iura exæquare uidebatur, & male cogitantibus uiam obstruebat ad potentiam singularem. hoc igitur lege sancitum est: item illud, ne quis ante XLII ætatis annum consulatum petere posset. temeritas enim florentis ætatis, prudentia maxime senectutis, aut eius ætatis, quæ ad senectutem accedit. Absentes etiam à consulatu lege summoti sunt. æquum enim fuit adesse, & populo supplicari in eo magistratu, quæ populus ipse mandabat. Duas tulit L. Sylla, utranque præclaram, unam, ne quis intra x annos consul iterum fieret; alteram, ne ædilitas, & prætura omitteretur. quæ ualuerunt ambæ ad extrema reip. tempora. eam quidem de magistratibus curulibus non omittendis Cicero significat oratione XI in Antonium: Vopiscus, inquit, ex ædilitate consulatum petit. soluatur legibus. Sed, quo anno lex Licinia de altero consule plebeio rogata est, eodem M. Furius Camillus è s. c. tulit, ut ædiles ex patribus duo crearentur, qui curuli sella, ut consul, censor, & dictator, sederent. Ab eodem latum existimo, ut prætor unus, qui ius in urbe diceret, quod ante

ante

De legibus

ante consulum munus fuerat, patricius crearetur, quæ lex neque à quo magistratu, neque quibus comitiis lata sit, Liuius explicat. ego tamen, cum patricii prætorem postulassent, iisq; , ut de gente patricia crearetur, à tribunis pl. concessum esset; non dubito, quin legem, qua patriciis honor accederet, patricius magistratus tul-
rit. quod si ita est; latam à dictatore Camillo, qui controuersias in-
ter patres plebemq; sedauit, facile crediderim; presertim cum; &
legem de curulibus ædilibus è gente patricia creandis ab eodem di-
ctatore eodem anno esse latam, Liuius narret. comitiis autem u-
tranque legem non iisdem latam puto, sed tributis de ædilibus cu-
rulibus, quia minor esset magistratus, centuriatis autem de præ-
tore, qui maiores inter magistratus fuit. cum enim minores magi-
stratus tributis comitiis, maiores centuriatis crearentur; leges
quoque, quibus creati sunt, iisdem comitiis latas esse, rationi con-
sentaneum est. non enim, quia lex de ædilibus & è s. c. & à dicta-
tore, id est à summo magistratu, lata sit, propterea comitiis centu-
riatis latam esse dicendum est: cum, & alias leges tum è s. c. tum
à maiore magistratu tributis tamen comitiis latas esse, constet, ut
quam Piso consul de incestu P. Clodii è s. c. rogauit: quam in fo-
ro latam esse, ubi non centuriata, sed tributa comitia habebantur,
patet ex epistola, Vereor, lib. I ad Atticum. Illud additum uide-
tur aut tunc, aut postea, in lege de prætore urb. ne plus quàm X
dies ab urbe abesset. hanc ego facio coniecturam ex iis uerbis in
Philippica II: Cur M. Brutus, te referente, legibus est solutus,
si ab urbe plus, quàm X dies, abfuisset? erat enim prætor urb.
eo anno M. Brutus. Quod autem hic magistratus, consulibus ab-
sentibus, consulare munus in urbe sustinebat; factum id non le-
ge, sed more maiorum: qui tamen fere pro lege solebat esse. ita-
que Vlpianus, Diuturna, inquit, consuetudo pro iure, & lege in
iis, quæ non ex scripto descendunt, obseruari solet. eiusq; rei
causam egregie tradidit Iulianus: qui, cum hæc scripsisset; Qui-
bus de causis scriptis legibus non utimur, id custodiri oportet,
quod moribus & consuetudine introductum est; subiunxit: Nam,
cum ipsæ leges nulla ex alia causa nos teneant, quàm quòd iudicio
populi receptæ sunt; merito & ea, quæ sine ullo scripto populus
probauit, tenebunt omnes. quid enim interest, suffragio populus
suam uoluntatem declaret, an rebus ipsis, & factis? quare rectissi-
me

me etiam illud receptum est, ut leges non solo suffragio legislato-
ris, sed etiam tacito consensu omnium per desuetudinem abrogen-
tur. Anno proximo, cum, pro uno consule plebeio tres patri-
cios prætextatos esse, unum prætorem, & duos ædiles, tribuni pl.
in concione quererentur; concordie causa concessum primo est,
ut ædiles cur. alternis annis ex plebe fierent. postea promiscuum
fuit, libero in omnibus ædiliū cur. comitiis populi suffragio.

Cautum etiam plebiscitis non nulli scripsere, ne quis eundem ma-
gistratum intra X annos caperet; neu duos magistratus uno an-
no gereret; utiq; liceret consules ambos plebeios creari. sed, le-
gem de magistratuum interuallo neque in consulibus, neque in
prætoribus seruata inuenio; credo, quia, quod populus postre-
mum comitiis iuberet, id ius ratumq; esse in XII tab. sancitum e-
rat. iussu autem populi & suffragia esse interpretabantur. qua ra-
tione & duos consules patricios contra legem Liciniam creatos, Li-
uius lib. VII scriptum reliquit. Graue etiam eo anno patricii
damnum accipere, quo Q. Publilius Philo dictator legem nouam
tulit, ut alter utique ex plebe censor crearetur; ueterem confir-
mauit, ut plebiscita omnes Quirites tenerent. Nullus iam erat
magistratus præter præturam, in quo patribus plebs inuidere pos-
set. promiscua erat curulis ædilitas: communis consulatus, atque
adeo plebis potius, quàm patrum; cum duos consules patricios fie-
ri lege non liceret, duos autem plebeios nulla lex uetaret: ad di-
ctaturam, ad censuram æque plebeiis hominibus & patriciis adi-
tus patebat: de prætura, quæ patriciis tantum hominibus defere-
batur, nulla tamen adhuc querela, nulla plebis uox exaudiebatur:
credo ob eam causam, quia, cum unus prætor crearetur, eum
ipsum locum appetere, impudentiæ uideretur. itaque, cum au-
ctus deinde prætorum numerus est, tum, ne cuius magistratus par-
ticeps plebs non esset, prætura plebeiis etiam hominibus imperti-
ta. Eodem anno M. Valerius consul de prouocatione legem tu-
lit, diligentius sanctam. eamq; tertio tum post reges exactos latam
esse, semper à Valeria familia, lib. X scribit Liuius. causam autem
sæpius renouandæ haud aliam putat fuisse, quàm quòd, plus pau-
corum opes cum possent, quàm libertas plebis, prouocationis au-
xilium aduersus magistratuum iniurias haud fere quisquam uteba-
tur. quod autem eam legem ait tertio tum ab eadem familia esse

E latam;

De legibus

latam; neque præterea latores ipsos nominat; significat, primum eam, quam P. Valerius Poplicola consul, anno post reges exactos, de prouocatione aduersus magistratus ad populum primus tulit; de qua lib. II mentionem fecit; deinde eam, quam consul L. Valerius tulit, ne quis ullum magistratum sine prouocatione crearet: de qua idem Liuius lib. III scriptum reliquit. in tertia ita sanctum: eum, qui prouocasset, uirgis cædi securiq; necari non licere: si quis aduersus ea fecisset, eum improbe fecisse. pœnam autem in eum, qui contra fecisset, Valerius in sua lege nullam nominauit: & quæ tum probitas erat, pœnam in ipso improbitatis nomine satis grauem duxit. At multis post annis, cum andacia magis emeretur, neque satis à facinore deterreret infamia; graui pœna, si quis uerberasset, necasset ue ciuem Romanum, M. Porcius Cato sanxit. has leges, de prouocatione à tribus consulibus Valeriæ gentis latas, ad populi libertatem potestatemq; pertinuisse, manifestum est: easq; significat Cicero Academicorum II, cum ait: Com memorant reliquos, qui leges populares de prouocationibus tulerint, cum consules essent. tres enim consules Valerios intelligit. Postea secuta est illa, quam M. Fuluius Pæto, T. Manlio Torquato cos. M. Curius Dentatus tribunus pl. tulit, ut ante comitia patres auctores fierent, hoc est, ut probare se diceret eos magistratus, quos populus creasset. quam legem, Cicero in libro de claris oratoribus, Ap. Claudio Cæco interrege comitia habente, Liuius autem, P. Sulpicio, latam esse tradunt. de quo tantum illud dicam; ab eo, qui primus interrex esset proditus, comitia non haberi solita esse. quare, si duo interreges proditi sunt, à posteriore habita esse comitia necesse est. priorem esse proditum Appium Liuius asserit, Cicero Sulpicium uidetur existimasse. itaque ille Sulpicium, hic Appium comitia habuisse dicit. Lex autem Menia, quæ ipsa quoque de magistratibus fuit, quam in Bruto simul cum lege Curia Cicero nominat, quo anno lata sit, quidq; plane sanxerit, adhuc quæro. De communi omnium ciuium Romanorum iure, ut, quod à plebe scitum esset, eo Quirites omnes tenerentur, legem tulit Q. Hortensius dictator, bis antea latam, à Valerio Potito, Horatio Barbato cos. & à Publio dictatore. Illa fuit pro dignitate magistratuum præclara lex, quæ, si cuius pater in hostium potestate esset, ab eo magistratum capi uetuit. uidelicet hoc iudicarunt

iudicarunt sapientissimi uiri, hominis non liberi filium remp. administrare, nimis indecorum esse. itaque Liuius lib. XXVII, Seruilius, inquit, negabant, iure aut tribunum pl. fuisse, aut ædilem esse: quòd patrem eius, quem III uirum agrarium occisum à Boiis circa Mutinam esse, opinio per X annos fuerat, uiuere, atque in hostium potestate esse, satis constabat. et lib. XXX de eodem: Latum ad populum est, ne Cn. Seruilio fraudi esset, quòd, patre, qui curuli sella sedisset, uiuo, cum id ignoraret, tribunus pl. atque ædilis pl. fuisset, contra quàm legibus sancitum erat. Legem etiam fuisse, qua is, qui comitiis præfesset, sui rationem in petendo magistratu habere uetaretur, Liuius lib. X significat. Tulit & L. Villius tribunus pl. rogationem, quot annos nati quique magistratum peterent, caperentq;: unde & ipsi, & posteris cognomen inditum, ut Annales Villii dicerentur. Et quoniam, quis plane cuique magistratui petendo legitimus annus esset, nominatim hac lege expressum non inuenio; quid ipse legendo obseruauerim, breuiter subiiciam. Omitto quæsturam, tribunatum pl. ædilitatem pl. quia curules tantum magistratus in lege Villia nominatos existimo. nam si quæsturæ certum annum Villius sua lege statuisset; unde postea tam incerta ratio? gesserunt enim quæsturam duo Gracchi, Tiberius, & Caius, anno ætatis XXVII, M. Cicero anno XXXI, C. Cæsar XXXIII, M. Cato Uticensis XXIX. quòd si quis dixerit, liberam fuisse, quò quis anno uellet, quæsturæ petitionem, modo peteretur post annum XXVI, qui esset ad petendum legitimus; ideo mirum uideri non debere, si Cicero, Cæsar, & Cato, non eodem omnes anno, petierint; quandoquidem satis duxerint leges obseruare, quæ petendæ quæsturæ annum definiebant XXVI, gerendæ XXVII: hoc si quis obiecerit; ad coniecturam, id est ad rationem ipsam, confugiam. Quid enim? simile ne ueri est, C. Cæsarem, (omitto Ciceronem: cui tamen, cum homo nouus esset, laborandum maxime fuit de dignitate, nec, quæ prima daretur, occasio negligenda) sed C. Cæsarem, quo nemo magis honores appetiuit, nemo potestatis & imperii fuit auidior, eum ne uerisimile est petitionem quæsturæ ab anno XXVI, si is legitimus esset, in annum XXXII distulisse? uerum habeo, quo nitari, aliud paulo firmitus argumentum. uideo enim, Pompeium Magnum, cum annum ageret XXXV, consulatum gessisse, solum uidelicet

E 2 legibus,

De legibus

legibus, meritorum ingentium in rep. eximiaq; uirtutis ergo. at eo anno magistratum nullum per leges capere licuisse, Cicero demonstrat. quo modo igitur & Cicero ipse, & Caesar, & Cato quaesturam ante annum XXXV ceperunt? num obscurum est, leges loqui de curulibus tantum honoribus, aedilitate, praetura, consulatu; quaesturae autem, aedilitatis pl. tribunatus pl. rationem habuisse nullam? sed recitentur uerba Ciceronis. Quid, inquit in oratione pro lege Manilia, tam singulare, quam ut, ex S. C. legibus solutus, consul ante fieret, quam ullum alium magistratum per leges capere licuisset? dicit, Vllum alium magistratum. quod si de quaestura leges locuta sunt, falsum est: cum, ut ostendi, quaesturam multi gesserint ante annum XXXV: quo anno gestum esse primum a Pompeio consulatum, quem Cicero significat, tum ex Appiano constat, tum ex Velleii historia; in qua scriptum est, periisse Pompeium Caesare & Seruilio cos. anno aetatis suae LVIII. a quo anno si retrorsum numeres; cadet primus eius consulatus in annum eius aetatis XXXV. ut tamen ita supputes; non simul cum anno aetatis Pompeii finisse consulatum, sed cum ille iam annum esset ingressus XXXVI. ita cum fastis Capitolinis, & cum Appiano Velleii congruet historia. nam, quod ait Plutarchus anno LIX interiisse Pompeium, id quoque potest esse uerum, hoc modo, ut primum eius aetatis annum capiamus C. Atilio Q. Seruilio cos. quo anno Pompeium esse natum, Velleius affirmat. tamen si, cum ait ipse Pompeium periisse anno LVIII, non incipit numerare ab eo anno, sed a proximo sequenti; quod scilicet non ita multo ante exitum consulatus Atilii & Seruilii natus esset Pompeius, & exiguum illud spatium in annorum numero uideretur omittendum. Constat igitur, legem Villiam nihil de iis honoribus sanxisse, qui caperentur ante eum annum, quo Pompeius primus consul fuit, siue eum uelis esse XXXV, siue malis XXXVI. nam aedilitatis curulis annus erat XXXVII. cuius rei argumentum est, quod eam petiit Scipio Aemilianus XXXVI, & solutus legibus, consul factus est. annum porro fuisse eius aetatis XXXVI, Velleius demonstrat his uerbis. Decessit M. Aquillio C. Sempronio cos. anno ferme LVI. de quo si quis ambiget, recurrat ad priorem consulatum eius; in quem creatus est anno XXXVI. ita dubitare desinet. ut omittam, quod, cum aedilitas praeturam biennio antecedit, &

praetura

prætura item biennio consulatum; consulatus autem geratur anno XLIII, quod paulo post ostendemus; necesse est, ut gerendæ ædilitati legitimus annus sit XXXVII. Nunc agamus, quando fastis de ædilitate dictum est, de anno præturæ. at hoc, si de ædilitate conceditur, in dubium uocari non potest. geritur enim ædilitas anno XXXVII: sequitur post biennium prætura: quod indicant & multorum exempla, & illa maxime uerba Ciceronis in epistola ad Furnium: Si ædilis fuisses, post biennium tuus annus esset. ergo geritur prætura anno XL. Nec de consulatu difficilis probatio est. percurrantur fasti: neminem inuenies, nisi prætura biennio saltem ante gesta, consulem fuisse. est igitur annus consulatus XLIII. accedit Ciceronis testimonium in oratione v in Antonium: in qua sunt hæc: Quid Macedo Alexander? cum ab ineunte ætate res maximas gerere cœpisset, non ne tertio & trigésimo anno mortem obiit? quæ est ætas nostris legibus X annis minor, quàm consularis. Hanc, opinor, legem Dio significauit, cum ait lib. XXXIX: Consules in senatu sententiam dixerunt, ut ei prætura daretur; licet nondum per leges liceret. quò spectauit & Plutarchus, cum dixit: Decreuit senatus, ut Catoni prætura extra ordinem daretur. et Valerius lib. III, cum inquit: Cato Cypriacam pecuniam maxima cum diligentia, & sanctitate in urbem deportauerat. cuius ministerii gratia senatus relationem interponi iubebat, ut prætoris comitiis extra ordinem ratio eius haberetur. sed ipse id fieri passus non est, iniquum esse affirmans, quod nulli alii tribueretur sibi decerni. quanquam est quiddam, hac in re cur magis dubitem. nam, cum eo sit anno decretum, quo Marcellinus, & Philippus consulatum gesserunt; certe per ætatem potuit Cato petere præturam: tribunus enim pl. ante annos quinque Silano & Murena cos. fuerat. prætura uero quadriennio tantum à tribunatu distat. eoq; magis liquet, potuisse Catonem Marcellino & Philippo cos. petere præturam, quòd anno sequenti, Pompeio & Crasso cos. petiit, non ut designaretur, sed, ut creatus magistratum statim iniret, quòd anno proximo superiore habita comitia nulla fuerant: ideoq; consules Pompeius & Crassus ex interregno facti sunt: qui deinde prætores crearunt. quòd igitur ob domesticas discordias Marcellino & Philippo cos. producta in annum sequentem comitia sunt; propterea Cato non petiit eo anno,

petiit

De legibus

petiit autem sequenti, consulibus, ut dixi, Pompeio & Crasso creatis. quare, etiam si Plutarchus dixerit, Licet nondum per leges liceret: uidendum tamen est, an senatus potius decreuerit, ut omnino Cato prætor crearetur, neque à populi suffragiis penderet, quorum dubius esset euentus. quam sententiam illa quoque uidentur confirmare Valerii uerba: Campestrum experiri temeritatem, quàm curiæ beneficio uti, satius esse duxit. Fuit & lex, ut duo prætores crearentur; mox alia, ut tres; deinde Bæbia, ut quatuor: &, quia leges ad temporum rationem accommodantur; propterea, simul cum urbis opibus, & ciuium frequentia, prætorum quoque numerus ita deinde auctus est, ut, quo anno C. Cæsar cum M. Antonio consul fuit, XVI prætores Romæ esse cœperint; cum ante Syllæ dictaturam VI, ut ait Velleius, post VIII, deinde X fuissent. quos deinde ab Augusto rursus X esse factos, apud Dionem in historia scriptum est. Legimus etiam apud Censorinum de prætore urb. plebiscitum, à Pletorio tribuno pl. latum, his uerbis: Prætor urb. qui nunc est, quiq; posthac fuerit, duos lictores apud se habeto; isq; supremam ad solis occasum ius inter ciues dicito. Referam in hunc numerum & eam legem, quam, ad imminuendam tribuniciam potestatem, dictator Sylla tulit, primum, ne tribunis pl. alios magistratus capere liceret; deinde, ne ad eos prouocatio esset; tum, ne leges ferre possent; postremo, ne iis concionari liceret. hanc Sylla iratus plebi tulit, quia pro Marianis partibus contra ipsum steterat. sed, eo mortuo, C. Aurelius Cotta consul primum legis caput abrogauit. tulit enim, ut alios magistratus tribunis pl. capere liceret. alterum caput abrogauit Pompeius Magnus in primo consulatu, lege lata, ut ad tribunos pl. esset prouocatio. omniaq; omnino, quæ tribunis pl. ademerat Sylla, illis esse restituta, exemplis intelligitur. ius autem intercedendi, lege nunquam amiserunt: quod illis initio belli ciuili inique ereptum, queritur Cæsar his uerbis lib. I de bello ciuili: Aguntur omnia raptim, atque turbate: neque docendi Cæsaris propinquis eius spatium datur: nec tribunis pl. sui periculi deprecandi, neque etiam extremi iuris intercessionem retinendi, quod L. Sylla reliquerat, facultas tribuitur: sed de sua salute seipso die cogitare coguntur; quod illi turbulentissimi superioris temporis tribuni pl. octauo denique mense suarum actionum respicere,

spicere, ac timere consueuerant. et in eodem libro, paulo post: Nouum in rep. introductum exemplum queritur, ut tribunicia intercessio armis notaretur, atque opprimeretur, quæ superiori- bus annis armis esset restituta: Syllam, nudata omnibus rebus tri- bunicia potestate, tamen intercessionem liberam reliquisse; Pom- peium, qui amissam restituere uideatur, bona etiam, quæ ante ha- buerat, ademisse. Vetuit etiam lex tribunos pl. integrum diem ab urbe abesse: de qua, ut opinor, significant illa uerba Celsii lib. III, cap. II. Tribuni pl. quos nullam diem abesse Roma licet, cum post mediam noctem proficiscuntur, & post primam facem ante mediam sequentem reuertuntur, non dicuntur abfuisse unum di- em; quando, ante horam noctis sextam regressi, partem aliquam illius in urbe sunt. Nam, quod in Liuius lib. IX legitur, duos tri- bunos pl. L. Liuium, & Q. Melium, cum de iis, qui pacem Cau- dinam fecerant, dedendis in senatu ageretur, ita locutos; Neque exolui religione populum deditioe sua, nisi omnia Samnitibus, qualia apud Caudium fuissent, restituerentur; neque se pro eo, quod, spondendo pacem, seruassent exercitum populi Romani, pœnam ullam meritos esse; neque ad extremum, cum sacrosancti essent, dedi hostibus, uiolari ue posse: tribunos quidem plebis esse, cum hæc dicerent, Liuium, & Melium, constat; non tamen simul illud, eosdem fuisse tribunos pl. cum pacem ad Caudium spon- derunt. non enim hoc anno, quo de sponforibus pacis populo Sam- nitum dedendis actum est, sed proximo superiore pax illa per spon- sionem facta fuerat; in qua non affuisse tribunos pl. indicant hæc, quæ subscribam, eiusdem Liuii uerba. Sponderunt consules, præfecti, legati, quæstores, tribuni mil. nominaq; omnium, qui sponderunt, extant. itemq; illa, haud ita multo post, in eo- dem libro. Samnitibus non fuit satis, consules spondere; sed le- gatos, quæstores; tribunos mil. spondere coegerunt. tribunos pl. non nominat. ergo nulli affuerunt. Liuius autem, & Melius eo tempore tribuni mil. ut opinor, in castris fuerant. unus, quod me- minerim, aut etiam, quod omnino legerim, Q. Metellus Nepos, cum tribunatum pl. gereret, contra leges in Syriam ad Cn. Pom- peium sua sponte, nulla ui cogente, profectus est. quo facto subiit ignominiam, nulla tamen affectus est insigni pœna, consul etiam ali- quot post annis cum Lentulo Spinthere creatus est; siue quod ho- minis

De legibus

minis uitia familiæ dignitas tegeret; siue quòd eum non tam ipsius facta deprimerent, quàm Pompeii, & aliorum, qui plurimum in rep. poterant, amicitia subleuaret. Redeo ad institutum. De iure magistratuum, ne quis peteret absens, legem tulit Pompeius Magnus in tertio consulatu: in qua cum neminem excepisset, mox, soceri sui C. Cæsaris recordatus, lege iam in æs incisa, & in ærarium condita, correxit errorem, uno Cæsare excepto. Tulit aduersus censoriam potestatem P. Clodius in tribunatu, ne quem censores in senatu legendo præterirent, ne ue qua ignominia afficerent, nisi qui utriusque censoris sententia damnatus esset. qua de lege sic in Pisonem Cicero: Ab eodem homine uetus illa magistra pudoris, & modestiæ, censoria seueritas sublata est. Tullia fuit de legationibus liberis, lata à M. Cicerone consule, ne, sicut antea, infinitum, sed annum tempus earum esset. Alias quoque de magistratibus, atque huiusmodi de genere non dubito fuisse, præsertim tribunicias, ut potestas patriciorum magistratuum minueretur. semper enim tribuni pl. id egerunt, ut iura magistratuum, ac senatus ad uniuersum populum omnia transferrent. quare longum esset omnes enumerare: neque tamen de omnibus mentio reperitur. insignes autem præter ceteras hæ sunt, quas nominauimus. De comitiis omnes fere populares leges fuerunt. Tulit cum Volerone Publilio Latorius, id quod iam dictum est, ut tributis comitiis plebei magistratus fierent. quo primum tempore tributa comitia Romæ esse instituta, facile suspicor. neque enim ante hanc legem usquam ea uideo nominari: &, opinor, curiatis comitiis plebei magistratus, centuriatis patricii creabantur. plebei autem dicebantur, qui plebis causa, & ex ipsa plebe, patricii uero, qui patriciorum causa, & ex patriciis familiis primum erant instituti. postea plebi quoque ius petendi patricos magistratus concessum est: plebeios magistratus, saluis legibus, patricius nemo petiit. sed legem Voleronis, quam à non nullis uideo Voleroniam imperite uocari, cum leges à prænominibus nominari mos non esset, Publiliam appellauerim: siquidem Publiliæ gentis Volero prænomen fuit. Tulerunt deinde L. Valerius, & M. Horatius cos. ut, quod tributis comitiis lex sanxisset, eo Quirites omnes æque tenerentur, ac si centuriatis comitiis perlata lex esset, ita centuriatis comitiis tributa sunt æquata, &, quod ait Liuius, tribuniciis rogationibus acerrimum

acerrimum telum hac lege datum est: cum, quidquid tribuni pl. ferrent, id deinde ab omnibus ciuibus seruari necesse esset. Etiam illa Publilii dictatoris contra senatum pro populo fuit; qua cautum est, ut omnium legum, quæ comitiis centuriatis ferrentur, ante initum suffragium patres auctores fierent: ne scilicet roboris haberet minus, si quid popolare patribus inuitis latum esset. Item illa C. Cæsii tribunicia, ut ordinem senatorium amitteret is, quem populus damnasset, cui ue imperium abrogasset. Quoniam autem potestatem soluendi legibus senatus habebat; C. Cornelius eam potestatem lege paululum imminuit: tulit enim, ne quis in senatu, nisi CC senatores affuissent, legibus solueretur; ne ue quis, cum solutus esset, intercederet, cum de ea re ad populum ferretur. quæ duo capita neque omnino è senatus, neque è populi uoluntate utraque fuerunt, sed primum pro populo, alterum pro senatu. inuitis tamen optimatibus, ut Pedianus ait, lata lex est; qui uel pauci gratificari solebant. De iure, & tempore comitiornum lex Aelia & Fusia contra populum pro senatu fuerunt; cum tamen à tribunis pl. lata sint: id quod significat Cicero in oratione in Piso nem his uerbis: Centum prope annos legem Aeliam & Fusiā tenueramus. intra centum enim annos ante Pisonis & Gabinii consularum non modo consules eodem anno non fuerunt Aelius, & Fusius, sed nemo omnino ex Aelia gente consulatū gessit. quare, cum eodem anno lata lex uideatur; nimirum, à duobus tribunis pl. latam esse, iure putabitur. Quod autem Vlrucus Zasius in eo libro, in quem antiquas leges coniecit, legem Aeliam & Fusiā tradit post interfectos Gracchos, & ante Punicum bellum tertium esse latam; aperte loquitur pugnantia. nam si post interfectos Gracchos; quo modo ante Punicum bellum tertium? cum Ti. Gracchum Scauola & Pisone cos. annis post euersam Carthaginē, & Scipionis triumphum, XIII occisum esse, non solum historiæ, uerum & fasti declarent; quos Paulo III Pontifice, felici quodam literarum fato, Romæ repertos, multis locis iniuria temporum mutilos, & imperfectos, restituit, atque absoluit magnæ doctrinæ uir, & ingenio præditus eximio, Carolus Sigonius. Accedit testimonium Ciceronis: qui contra Vatiniū, Leges, inquit, Aeliā, & Fusiā in Gracchorum ferocitate uixerunt. Opinor, etiam, contra quā idem Zasius uidetur existimasse, non unam legem,

F gem,

De legibus

gem, sed duas, Aeliam & Fusiam fuisse. nam, etsi saepe Cicero ita loquitur, ut dicat legem Aeliam & Fusiam; aliquando tamen eas separat, ut duas leges agnoscere uideatur. in oratione pro Sextio, Iisdem, inquit, consulibus sedentibus, atque inspectantibus, lata lex est, ut lex Aelia, lex Fusia ne ualeret. et in Vatinius: Num quem ex omnibus tribunis pl. tam audacem audieris fuisse, ut unquam contra legem Aeliam, aut Fusiam concilium conuocaret? et ibidem, paulo post, aliquanto apertius: Sanctissimas leges, Aeliam, & Fusiam dico, quæ in Gracchorum ferocitate, & in audacia Saturnini, & in colluione Drusi, & in contentione Sulpicii, & in cruore Cinnano, & inter Syllana arma uixerunt. satis ne perspicue demonstrat, duas leges fuisse, cum & sanctissimas appellat, & uerbum subiicit numero multitudinis? præterea in ea de prouinciis consularibus, in extremo, idem declarat, cū ait: Aut uobis statuentum est legem Aeliam manere, legem Fusiam non esse abrogatam. et post reditum in senatu: Vt lex Aelia, & Fusia ne ualerent. quibus ex locis, duas fuisse leges, non obscure patet. Sed uideamus, quæ fuerit utriusque sententia: quod etiam, ut puto, de numero erit argumentum. sententiam uero non aliunde, quàm ex ipso Cicerone, possumus colligere. quare loca ipsa proponemus: ut, non modo quid in iis sancitum sit, uerum etiam, quid inter utranque differat, intelligatur. ac primum, quod ait in ea pro Sextio: Iisdem consulibus sedentibus, atque inspectantibus, lata lex est, ne auspicia ualerent, ne quis obnunciaret, ne quis legi intercederet, ut omnibus fastis diebus legem ferri liceret, ut lex Aelia, lex Fusia ne ualeret: dicendum est, quatuor illas partes, de auspiciis, de obnunciatione, de intercessionem, de fastis diebus, omnes duabus legibus, quæ subiiciuntur, Aelia, & Fusia, comprehendi; sed tres priores Aelia, posteriorem autem Fusia: rursus; è tribus prioribus, eiusdem generis, & quasi naturæ duas esse; tertiam separatam, & tanquam alienam. nam auspicia ideo erant, ut esset obnunciatio. cum enim de cælo seruatum esset, tum ferentibus legem obnunciabatur. itaque auspiciorum quasi partus quidam erat obnunciatio: nec unquam seruatum est de cælo, quin obnunciatum sit, siue prospera, siue aduersa signa uisa essent; cum prospera confirmarent id, quod cum populo ageretur, aduersa impedirent. propterea sublatum esse à Clodio morem de cælo seruandi, scripsit Dio lib. xxxviii. cum

cum tamen antea ita diligenter auspicia seruata essent, ut M. Drusi legibus, quia contra auspicia lata iudicarentur, senatus decreuerit populum non teneri. quod Cicero libro II de legibus, & Peditius in commentario Cornelianæ tradidit. ergo cum hoc auspiorum genere quasi cognatione quadam cohæret obnuntiatio. at intercessio nihil habet commune cum auspiciis. auspicia enim ad religionem referebantur, quod à cælo, id est, à deorum numine, pendere uiderentur. intercessio autem humanæ potestatis erat; & cum à uoluntate semper, nulla religionis obseruatione, manabat, tum ab ea uoluntate non nunquam, quæ ab omni religione dissentiret, & cum ipsa quasi deorum uoluntate pugnaret. præterea, seruare de cælo, augurum, atque omnium plane magistratum fuit; quod & supra notauimus: intercedere uero, duntaxat ad tribunos pl. tum ueteri Sacratum legum iure, tum, ut ego existimo, legis Aeliæ iussu pertinuit. loquor autem de intercessione ad populum, cum lex ferretur. nam in senatu, cum S. C. fieret, non tribunos pl. tantum, sed omnes, qui eadem potestate, qua ii, qui S. C. facerent, maiore uel essent, intercedendi facultatem habuisse, diximus in libro de senatu. atque etiam, quod in eo libro non diximus, forensis, ut ita dicam, erat intercessio, cum prætori de priuata controuersia decernenti prætor intercedebat. cuius generis idoneus locus erit in libro de iudiciis. nunc persequamur institutum. Dixi, legis Aeliæ fuisse tria illa membra, de auspiciis, de obnuntiatione, de intercessione; quæ Clodius sua lege sustulit: quartum de fastis diebus Fusia lege sancitum. itaque in oratione de prouinciis consularibus, in extremo, paulo distinctius locutus est Cicero, cum caput illud, de fastis diebus, separatim à reliquis posuit, reliqua uero tria separatim quidem & ipsa ab eo capite, sed ipsa tamen inter se coniuncta. ut dubitandum minime sit, quin hæc in una lege simul fuerint, sicuti simul sunt à Cicerone pronunciata. quod si in una lege: ne illud quidem dubitandum de duabus legibus, Aelia scilicet, & Fusia, utram intelligamus. nam, si de tribus coniunctis unum aliquod in Aelia lege fuisse docuero; Aeliæ legi & reliqua duo tribui debere, concedendum, ut opinor, erit. docebo autem Peditiani uerbis obnuntiationem Aeliæ legis fuisse. nam illud in Pisonem, A. P. Clodio, fatali portento prodigioq; reip. lex Aelia, & Fusia euerfa est, ipse sic interpretatur: Le-

De legibus

gem tulit P. Clodius tribunus pl. ne quis per eos dies, quibus cum populo agi liceret, de cælo seruaret. propter quam rogationem, ait, legem Fusiam, & Aeliam, propugnacula, & muros tranquillitatis, atque ocii, euersam esse. obnunciatio enim, qua perniciosius legibus resistebatur, quam Aelia lex confirmauerat, erat sublata. miror autem, cur eo loco nihil de sententia Fusiae legis addiderit Pedianus; cum tamen ipsam legem simul cum Aelia nominarit. non enim tantum tulit Clodius, ne quis per eos dies, quibus cum populo agi liceret, de cælo seruaret; quod contra lex Aelia iubebat; sed etiam, ut omnibus fastis legem ferri liceret: ut aperte demonstrant illa, quæ sunt à nobis ex oratione pro Sextio recitata, & hæc in ea de prouinciis: Aut statuendum uobis est, legem Aeliam manere; legem Fusiam non esse abrogatam; non omnibus fastis legem ferri licere; cum lex feratur, de cælo seruari, obnunciari, intercedi licere. Verum, ut fortasse mutilus Pedianus, quia prætermiserit id, quod Fusia lege scitum Clodius abrogauit; non item mendosus in eo, quod de lege Aelia posuimus. satis enim plane loquitur, atque ita, ut, cur de mendo suspicemur, causam esse nullam uideam. quare habemus quod uolumus, obnunciationem ad legem Aeliam pertinere. quòd si hoc; ergo & illud, auspicia quoque, à quibus obnunciatio deriuatur, & intercessionem ad eandem legem pertinere. et, si hæc tria ad legem Aeliam; unum illud, quod reliquum est, de fastis diebus, ad Fusiam pertineat, necesse erit. Eandem utriusque legis sententiam, nisi fallor, attigit in epistola, Quæris, lib. I ad Atticum, cum ait: Lurco autem tribunus pl. qui magistratum simul cum lege Aelia iniit, solutus est & Aelia, & Fusia, ut legem de ambitu ferret. inibant enim ueteres Romani magistratum auspicato: neque omnino quidquam publice, nec domi, nec militiae, sine auspiciis gerebatur. quod autem in tribunatu pl. Lurconi mandando factum erat, ut auspicia seruarentur; id ut ipse in lege de ambitu ferenda ne seruaret, neque auspiciorum ullam omnino rationem haberet, decretum est à senatu: neque hoc solum, sed illud simul, ut omnibus fastis legem ferre posset. quod lex Fusia uetabat. ideo enim soluit eum senatus & Aelia lege, & Fusia, ut neque auspiciorum religio, neque dierum ratio impedimento esset, quo minus primo quoque tempore perferri lex de ambitu posset. Has ipsas leges & in oratione pro Sextio lege

lege Clodia significat abrogatas, cum ait: Mitto eam legem, quæ omnia iura religionum, auspiorum, potestatum, omnes leges, quæ sunt de iure, & de tempore legum rogandarum, una rogatione sustulit. nam etsi non nominat; legem tamen Aeliam significari certum est, cum ait, Quæ sunt de iure; Fusiam autem, cum subiicit, Et de tempore. ius enim intelligit auspicandi, obnunciandi, intercedendi, quæ sanxerat Aelia lex: tempus autem, quo legem perferri non liceret, fastos uidelicet dies, de quibus cauerat Fusia lex. nec dubito, quin, cum dixit, Omnia iura religionum, auspiorum, potestatum, ad sententiam potius Aeliæ leais, quàm Fusiae, spectauerit. nihil enim horum uideo, quod ad Fusiam referri possit. nam ego quidem in uerbo, Potestatum, obnunciationem, & intercessionem significari puto; quæ legis Aeliæ fuisse, iam diximus. et, quanquam, Auspiorum, potestatum, dixit, ad interpretationem antecedentis uerbi, Religionum; quod sæpe facit; & in dictione, Potestatum, & obnunciatio, & intercessio simul includuntur: solam tamen obnunciationem ad religionem refero. nam intercessioni cum religione nihil erat: quod paulo ante demonstraui. Verum sic aliquis argumentabitur. si, cum dixit, Cicero, Religionum, auspiorum, potestatum, Aeliam legem tantum significauit, Fusiae rationem nullam habuit: cur proxime ipse se exponens intulit, Omnes leges, quæ sunt de iure, & de tempore legum rogandarum? nam, si proxima superiora exponit; quod nemo dubitat; proxima uero ad solam Aeliam legem referuntur: cur non subiecit, unam, potius, legem, quàm, omnes leges? Est omnino hæc specie probabilis argumentatio, re uero falsa. nam, quid attinet argumentari de sententia Ciceronis, cum ipse semet ipsum patefaciat, atque exponat? uidebat maioris esse momenti, legem Aeliam tolli, quàm Fusiam. nam Aelia lex perniciosarum legum lationem impendebat obnunciatione, & intercessione. Fusia uero, non, ut omnino ferri ne posset lex, efficiebat, sed tantum, ut ne fastis diebus posset: comitialibus autem ut posset, non uetabat. itaque, quo plus intererat reip. nunquam ferri malas leges, quàm sero ferri: eo erat utilior ciuitati Aelia lex, quæ malum prohibebat, quàm Fusia, quæ tantum differebat. potius igitur legis Aeliæ sententiam ostendit Cicero, quàm Fusiae; quòd, id, in quo grauius peccauerat Clodius, commemorare, plus ad concitandam

De legibus

randam inuidiam posse intelligebat . nec tamen ideo legis Fusiae sententiam omisit , ut eius abrogationem Clodio condonaret . nam subiecit deinde , ut legem utranque significaret ; Omnes leges , quae sunt de iure , & de tempore : quorum alterum ad Aeliam , alterum ad Fusiam spectare , iam diximus . Quod si quis paulo obstinatio-
rior repugnat adhuc , nec facile manus dat : cedat saltem ipsi Ciceroni : cuius in consuetudine notanda nisi plurimus fuisset , nunquam haec , quae sum aggressus , ulla ex parte praestare mihi licuisset ; si modo , ut praestare possim , is , cui accepta omnia refero , conce-
sserit Deus . ipse igitur Cicero cum Vatinius saepe obiiciat , eum contra legem Aeliam & Fusiam fecisse ; tamen in ea pro Sextio , cum de eodem Vatinius loquatur , unam Aeliam nominat . ait enim sic : Qui ita se in populari ratione iactarat , ut auspicia , legem Aeliam , senatus auctoritatem , consulem , collegas , bonorum iudicium nihil putaret . et in ea post reditum in senatu , cum eiusdem Aeliae vim & significationem exponat , de Fusia nihil afferat ; proxime tamen utranque nominat : Legem , inquit , tribunus pl. tulit , ne auspiciis obtemperaretur ; ne obnunciare consilio , aut comitiis , ne legi intercedere liceret ; ut lex Aelia , & Fusia ne ual-
rent . et in Vatinius : Audire à te cupio , quare , cum ego legem de ambitu ex S. C. tulerim , sine ui tulerim , saluis auspiciis tulerim , salua lege Aelia , & Fusia , tu eam esse legem non putes .
Rursus dubitabitur in ea pro Sextio , primum , cur eas leges significauit potius , quàm nominauit : deinde , si significandas duxit , cur , cum de duabus tantum legibus intelligeret , Omnes , dixit : quasi & de iure , & de tempore legum rogandarum plures leges essent . placet in his dubitationibus immorari . nam , ut ex lapidum conflictu ignis , sic ex rationibus utrinque collatis ueritas elicitur . Significauit potius , quàm nominauit , non solum , quia nominauerat antea , cum dixit : Iisdem consulibus sedentibus , atque inspe-
ctantibus , lata lex est , ut lex Aelia , lex Fusia ne ualeret : ut , cum de re iam nominata , & sua sponte satis nota loqueretur , obscura non posset esse significatio : uerum etiam , quia uehementior & grauior saepe fit oratio , cum id , quod obiicitur , significatur potius , quàm nominatur . quo potissimum genere abundant ii , qui inter ce-
teros excellunt , Demosthenes , & Cicero . Omnes , autem potius dixit , quàm , duas ; uel quia re uera , praeter Aeliam , & Fusiam ,
de

de iure, aut de tempore legum rogandarum lex erat nulla: ut, qui Aeliam, & Fusiam, is omnes plane significaret: uel quia, cum essent alia quoque leges & de iure, & de tempore, quas ultimæ Aelia & Fusia, in eandem sententiam scriptæ, confirmarunt; qui tolleret duas ultimas, superiores quoque omnes tolleret. nam quem admodum, magis nobili sublato, ut apud philosophos est, minus quoque nobile simul tollitur; ut, sublato corpore, simul ea tolluntur, quæ in corpore adhærescunt: sic, qui Aeliam & Fusiam rogatione tollebat, quas & diligentius, & grauius, quàm superiores omnes, esse conscriptas uerisimile est, eum omnes simul leges eadem rogatione fustulisse certum est. quòd si quis, utrum, ante Aeliam, & Fusiam, & de iure, & de tempore alia leges fuerint, dubitat; neque credit, nisi uel ratione admodum firma, uel graui teste probatur: ego, ut in utroque satisfaciam, rationem, ut opinor, afferam non imbecillam; testem autem eum producam, quem leuissimum appellare nemo possit. primum igitur pro ratione illud opponam: cum in oratione in Pisonem ita loquatur Cicero: Centum prope annos legem Aeliam & Fusiam tenueramus: credibile non esse, supra centum annorum spatium urbem Romam sine ulla lege de auspiciis, & de fastis diebus fuisse: presertim cum idem in illa in Vatiniū acerbissima interrogatione auspiciū uetustatem his uerbis ostendat: Qui tantus furor, ut auspicia, quibus hæc urbs condita est, quibus omnis respub. atque imperium tenetur, contempseris? quod ipsum in III de natura deorum confirmauit: scripsit enim sic: Mihi ita persuasi, Romulum, auspiciis, Numam, sacris constitutis, fundamenta iecisse nostræ ciuitatis. accedit Pediani testimonium in commentario Pisonianæ. Obnunciatio, inquit, qua perniciosi legibus resistebatur, quam Aelia lex confirmauerat, erat sublata. uerbum enim, Confirmauerat, legem Aeliam obnunciandi ius non sanxisse primam significat, sed, quod alia lex sanxerat, confirmasse. Vt omittam, quod supra commemorauī, uetustissimum fuisse ius intercedendi, datum tribunis pl. iam ab illo tempore, cum in Sacro monte institutus magistratus est, qui plebem tueretur. quod cum ita sancitum esset; intercessio tamen tribunicia Aelia lege confirmata est. Verum de lege Aelia & Fusia satis multa. pergā ad reliquas leges, quæ ad comitia pertinent. Lex fuit, quam Gellius me-

morat

De legibus

morat, ut, quo die auspicia capta essent, eodem ea de re, cuius rei causa auspicatum esset, comitia absoluerentur. alioqui infirmum & inane populi iussum erat. Leges quoque tabellariae hoc de genere uidentur. sunt enim de suffragiis ferendis: cum porro suffragium populus fert, comitia dicuntur. haec quatuor fuerunt, omnes, ut puto, tribuniciae, Gabiniae, Cassiae, Papiriae, Coelia. Gabinia sanxit, ut populus in magistratibus mandandis suffragium non, ut antea, uoce, sed per tabellam ferret. Cassia biennio post idem iussit, in omnibus iudiciis populi, perduellione excepto. Papiria & ipsa populo tabellam dedit, in iubendis ac uetandis legibus. Coelia, quo uno in genere uocis suffragium reliquum erat, hoc est, in perduellione, quod lex Cassia exceperat, in eo genere tabellam dedit. ita quatuor tribunorum pl. rogationibus factum est, ut populus libere, quod sentiret, in omnibus comitiis, nullo inimicitarum metu, posset ostendere: ideo tabellam iudicem tacitae libertatis appellat Cicero in agraria II, & lib. III de legibus; in oratione autem pro C. Cornelio, principium iustissimae libertatis Cassiam legem, quae tabellam in iudiciis populo dedit. magis enim intererat populi, tabella uoluntatem in iudiciis tegere, cum ageretur de capite fortunisque ciuium, quam aut in magistratibus, quod lex Gabinia sanxerat, aut in legibus, quod postea Papiria. Haec de sententia legum tabellariarum: nunc de latoribus, & quo quaeque anno lata sit. Gabinium rogauit homo ignotus, & sordidus: quod lib. III de legibus Cicero tradit. et, cum biennio ante Cassiam rogata sit, quod idem eodem in loco demonstrat; Cassiam uero Lepido & Mancino cos. esse latam, ex libro de claris oratoribus constet: necesse est, Pisone & Laenate cos. rogatam, existimare. Cassiam Lepido & Mancino cos. auctore Scipione Africano posteriore, tulit L. Cassius Q. F. Longinus Rauilia, pater illius L. Cassii, qui in omnibus causis quærere solebat, cui bono; & C. Cassii, eius, quem C. Mario C. Flauio cos. leges multas ad minuendam nobilitatis potentiam tulisse, in quibus hanc, ut, quem populus damnasset, cui ue imperium abrogasset, in senatu non esset, Pedianus tradidit. Papiriam tulit C. Carbo, ille eloquentissimus; tulit autem, ut opinor, P. Popillio & P. Rupilio cos. nam eo anno tribunum pl. fuisse, quo Scipio Aemilianus de Numantinis triumphauit, omnes historiae declarant: quem à porta ad concionem productum

ductum, quid de Ti. Gracchi morte sentiret, seditiose interroga-
uit. Coelia, non facile est conicere, à quo sit rogata: sed, roga-
tam Q. Metello T. Flaminio cos. crediderim, ex iis uerbis, quæ
sunt apud Ciceronem lib. III de legibus: Vt opprimeret Cælius
Popillium. nam, id de P. Popillio dictum esse, quem C. Gracchus
Metello & Flaminio cos. tribunus pl. in exilium eiecit, uidetur
intelligendum. ut eius iudicii causa, quo Popillius, tribuno pl.
Graccho, est oppressus, Cælius sua lege tabellam dederit. sed hoc,
quia non plane firmis nititur coniecturis, inter dubia referatur.
Etiam in eo consultum est reipublicæ, quod aduersus ambitio-
nem lata lex, ne quis candidatus nomenclatore in magistratus pe-
titione uteretur. eò tamen, ut fere sit, progressa pedetentium li-
centia est, ut, Ciceronis ætate, suis cuique candidato nomencla-
tor, cum prensaret, peteret ue, adesset. atque inter laudes M. Ca-
tonis, qui Uticensis postea dictus est, hanc enumerat Plutarchus,
quod in petitione tribunatus legem, quæ candidato nomenclato-
rem adesse uetat, solus seruauit. Lex Maria ipsa quoque præcla-
ra: quam Plutarchus à C. Mario, qui septies consul fuit, tribuno
pl. esse legem significat. eius legis hæc sententia fuit, ut pontes, qui-
bus suffragiorum cistæ imponebantur, essent angustiores; ne scili-
cet multis locus esset. nam in turba fraudem aliquam committe-
re, difficilis negotii non est. propterea, quod hac lege sancitum
est, id ambitiosis oppositum fuisse, & plane Cicero dicit in III de
legibus, & Plutarchus ipse significat in Marii uita, cum ait, in tribu-
nati legem de suffragiis tulisse, qua potentium opes tum in feren-
dis suffragiis, tum in creandis magistratibus imminuit. Tulit & P.
Sulpicius tribunus pl. L. Sylla, Q. Pompeio cos. ut in omnibus tri-
butis libertini suffragium ferre possent; cum in quatuor tantum
urbanis tribubus antea ferre consueuissent. hanc legem puto à ui-
ctore Sylla, Sulpicii inimico, esse abrogatam. puto autem ob eam
causam, quia C. Manilius tribunus pl. aliquot post annis eandem
legem ferre conatus est: idemq; postea & P. Clodius cogitauit.
testis Cicero in duabus orationibus, pro C. Cornelio, pro Milo-
ne. Sancitum & legibus illud existimo, quod apud Ciceronem
libro II de legibus scriptum est; ut augurum arbitrato comitia-
tus & concilia uel instituta dirimerentur, uel habita rescinderen-
tur. Quod autem in eorundem augurum commentariis traditum

G erat,

De legibus

erat, Ioue fulgente tonante comitia haberi nefas esse; & illud, finistrum fulmen aduersum infaustumq; comitiis esse signum; item illud, dimittenda esse comitia, cum quis eo morbo, qui insputatur, corruisset, ex quo comitialis morbus dictus est: hæc omnia & in augurum libris notata, & ut seruarentur, legibus cautum esse, non dubito. Atque hæc, quæ ad impedienda comitia pertinent, non tam religionis causa homines sapientissimi legibus constitui uoluerunt, quàm ut, si quando perniciofa reip. rogatio ferretur, obsisti per aliquem augurem facile posset. quam totam rationem C. Cæsar, qui nihil, nisi potentia suæ causa, fecit, in consulatu neglexit; Bibulumq; collegam obnunciantem armis foro expulit. Pertinere & illud ad uim comitiorum uidetur, quod in XII tab. cautum inuenio, ut, quod postremum populus iussisset, id ius ratum esset. Item lex illa, qua cautum est, ne priuilegia, nisi centuriatis comitiis, irrogarentur. cuius meminit Cicero in oratione pro domo, & in ea pro Sextio, & libro III de legibus. Nec excluditur ab hoc genere illa lex, quam renouare multis post annis C. Cornelius tribunus pl. quem Cicero defendit, conatus est; ne quis, nisi per populum, legibus solueretur. itaque in omnibus s. C. quibus tum aliquem legibus solui placebat, adiici erat solitum, ut de ea re ad populum ferretur: sed paulatim ferri desitum est: resq; in eam consuetudinem uenit, ut postremo ne adiceretur quidem in s. C. de rogatione ad populum ferenda: eaq; ipsa s. C. per pauculos admodum fiebant. quam ob causam, ferente legem Cornelio, ut antiquum ius renouaret, inductus à senatu P. Seruilius Globulus tribunus pl. intercessit. Firmavit etiam populi iudicia, quæ comitiorum nomine continentur, Cassia lex, C. Mario C. Flauio cos. à C. Cassio tribuno pl. L. Cassii Rauilia filio, de quo proxime meminimus, rogata; ut, quem populus damnasset, cui ue imperium abrogasset, in senatu ne esset. Migremus nunc paulisper ex urbe in prouincias. Tulit primo de prouinciis C. Gracchus tribunus pl. Tiberii frater, ut consulares prouinciæ per senatum quotannis decernerentur. Postea C. Cæsar, qui dictator fuit, ne prætoriae prouinciæ plus, quàm annum, neu plus, quàm biennium, consulares obtinerentur. tulit autem hanc legem uicto Pompeio: cum ipse iam per nouem annos Galliam contra C. Gracchi legem obtinuisset, consecutus id, quod nemo antea, & s. C. & le-

ge.

ge. Hic, quando legum caussa de prouinciis incidit mentio, non alienum est, & quot omnino in ditione populi R. & à quibus, quo ue anno captæ, tum, quæ consulares, quæq; prætoriae fuerint, subiicere. Quo anno M. Cicero Ciliciam pro consule administravit, qui fuit ab urbe condita DCCII, M. Marcello Ser. Sulpicio cos. prouinciæ XV fuerunt in ditione populi R. Sardinia, Corsica, Sicilia, duæ Hispaniæ, citerior, ulterior; Asia, Aetolia, Macedonia, Illyrium, Dalmatia, Africa, Achaia, Galliæ duæ, cisalpina, transalpina; Cilicia, Bithynia, Pontus, Creta, Syria, Cyprus. quibus ex omnibus prouinciis uectigal capiebat annum resp. ut à Plutarcho proditum est, octuagies quinquies decies centena millia. Sardiniam cepit; inter primum & secundum Punicum bellum, consul T. Manlius Torquatus; de qua triumphauit: eaq; prima, anno urbis DXVIII, prouincia populi R. facta est, missis ad eam componendam X legatis: quod in faciendis prouinciis seruatum est. Corsicam uicit, ac prouinciam fecit C. Papirius Maso consul, & à senatu triumpho non impetrato, ipse de sua sententia in monte Albano primus triumphauit, anno DXXII. et hanc una cum Sardinia semper unus rexit magistratus Romanus. Siciliam primus uicit, magnaq; ex parte prouinciam fecit Q. Catulus primo Punico bello: post aliquot annos, captis Syracusis, uniuersam in prouinciæ formam redegit M. Marcellus bello Punico secundo, aut certe, qui ei successit, M. Læuinus. nam de Marcello Velleius tradit: debellatum uero in Sicilia à Læuino potius prætor, quàm à Marcello consule, & Cicero in Verrem, & Lilius significant. Marcellus quidem, secutus exemplum Papirii Mafonis, in Albano monte triumphum egit, urbemq; ouans est ingressus. Hispaniæ tum à Scipione Africano maiore, secundo Punico bello, tum, aliquot post annis, M. Catonis Censorii uirtute, multis uictoriis domitæ: & in eas magistratus Romani modo pro consulibus, modo pro prætoribus ierunt. uarie tamen possessæ, & ut ait Velleius, sæpe partibus amissæ, certa ac stabilis esse populi R. possessio, stipendiumq; pendere non prius, quàm Augusto principe, cœperunt. Asiam cis Taurum montem bello Antiochino L. Scipio, maioris Africani frater, profectus in eam consul, ad imperium adiunxit, annoq; post consulatum proximo triumphauit, ab urbe condita DLXIII. post eam possidere de beneficio senatus populiq; R.

G 2 reges

De legibus

reges Attali, donec M. Perperna consul Aristonicum, qui eam, Attalo rege mortuo, occupauerat, deuicit, ac cepit. eam tamen in prouinciæ formam non Perperna, sed, qui ei successit, M. Aquilius consul redegit: qui etiam de Aristonico triumphauit, anno DCXXIII. Aetoliam M. Fuluius Nobilior subegit. bellum gerere cœpit consul, pro consule confecit, & triumphauit biennio post, anno urbis DLXVI. Macedoniam XL diebus deuicit consul iterum L. Aemilius Paullus, anno DXXCVI, neque tamen prouinciā fecit, sed de sententia X legatorum, quos ad componendam Macedoniam, atque Illyricum senatus de more misit, Macedonas omnes liberos esse iussit; & ut suis legibus uiuerent, suas urbes, & agros haberent, magistratus annuos crearent, permisit; ueteris etiam stipendii, quod regibus pependerant, dimidia parte releuauit: anno proximo, Perse rege inter captiuos Romam ducto, triumphauit. prouinciā uero Macedoniam fecit anno urbis DCVII Q. Metellus, is, qui ex ea pro prætore triumphauit, & Macedonici cognomen est adeptus. hanc prouinciā postea cum Achaia coniunxit, eque duabus unam fecit, rogatione perlata, P. Clodius tribunus pl. & utranque L. Pisoni, quasi præmium; quod in Cicerone eiiciendo consensisset, dedit administrandam. Illyrium & Dalmatiam eodem anno, quo Macedoniam Paullus, L. Anicius prætor debellauit, & unam prouinciā fecit, triumphauitque; post Paullum aliquot diebus, rege Illyriorum Gentio cum fratre, coniuge, & liberis ante currum ducto. Carthaginem, & Numantiam, illam Africā, hanc Achaia caput, exciderunt eodem anno, & triumpharunt, Scipio Aemilianus, & L. Mummius; tulitque inde Scipio cognomen Africani, Mummius Achaici. factæ sunt prouinciæ duæ, Africa, & Achaia. Africam autem intelligo regionem uniuersam, quam Carthaginenses possederant. nam Numidia, & ipsa pars Africæ, Massanisa regnum fuit, Syphace superato; paruitque regibus, & à C. Cæsare demum, post Scipionem, & Iubam, Mauritaniam regem, deuictos, in formam prouinciæ redacta. Mauritaniam uero, & ipsam in Africa, multis post annis, Calligula imperator in duas prouincias diuisit. Galliam cisalpinam puto prouinciā esse factam eo tempore, cum M. Marcellus, is, qui consul quinquies fuit, primusque Annibalem acie uicit, Viridumarum, Gallorum regem, singulari certamine occidit, deque Gallis Insubribus triumphauit, anno DXXXI.

patet

patet enim prouinciam esse factam, quia coloniae plures annis frequentibus eò deductae. transalpinam uero Galliam, quae Narbonensis quoque dicta est, Q. Fabius, L. Paulli nepos, deuictis Allobrogibus, unde cognomen sumpsit, in prouinciae formam redegit, anno DCXXXII. Ciliciam perdomuit P. Seruius pro consule; qui, quod Isauron, Ciliciae arcem, euerit, Isauricus est dictus; triumphauitq; anno DCLXXIX. ex eo tempore Cilicia prouincia fuit. Bithyniam populo R. rex Nicomedes, ut antea rex Attalus Asiam, testamento reliquit: eaq; simul cum Ponto, in quo Mithridates regnauit, una prouincia fuit, Bithyniaq; nomine appellata. utranque uero prouinciam fecit, Mithridate uicto, Pompeius Magnus pro consule, triumphauitq; anno DCXCII. eiusdem Pompeii lex à Plinio iuniore in epistolis memoratur, Bithynis, & Ponticis data: ne quis annis XXX minor magistratum caperet, ne ue in senatu esset; qui uero magistratum cepisset, ei liceret in senatu esse: ne decuriones, in curiam à censoribus lecti, pecuniam pro introitu darent. sed id obseruatum semper non est. nam, ut apud eundem Plinium legimus, quandoque bina millia soluerunt. quae uocabantur sportulae. item, ut senatores certis de causis à censoribus ordine mouerentur: ut Bithynicis ciuitatibus adscribere sibi, quos uellent, ciues liceret, dum ne ciuitatis essent alienae, sed earum quisque ciuitatum, quae essent in Bithynia. atque haec à Pompeio sunt ad exemplum Romanae ciuitatis instituta. Cretam debellauit Q. Metellus pro consule, & triumphauit anno DCXCI; Creticusq; postea nominatus. Syria, Pompeii Magni singulari uirtute, ultimo bello Mithridatico uicta, leges accepit, prouinciarumq; populi R. numerum auxit. triumphauit ex ea Pompeius pro consule, item ex Asia, Ponto, Armenia, Paphlagonia, Cappadocia, Cilicia, Scythis, Iudaeis, Albanis, Iberia, Creta, Balternis, praeterea de regibus Mithridate, & Tigrane, anno DCXCII. Cyprus ultima, stante rep. in prouinciae formam redacta, misso in eam M. Catone quaestore cum iure pratorio, lege P. Clodii tribuni pl. Pifone & Gabinio cos. anno DCXCV. sed primum ea simul cum Cilicia, tanquam una prouincia, s. C. tradita est P. Lentulo pro consule. quod illa uerba Ciceronis in epistola ad Lentulum significant: Te posse perspicere, qui Ciliciam, Cyprumq; teneas, quid efficere, & quid consequi possis. postea quaestores in eam missi.

quod

De legibus

quod ab eodem Cicerone didicimus; qui ad C. Sextilium Rufum in quadam epistola ita scribit: Tuæ laudi conducere arbitror, cum primus in eam insulam quæstor ueneris, ea instituere, quæ sequantur alii. Tertia pars superest, quæ prouinciæ consulares, quæ uel prætoria dicerentur. Ne quis erret, neutrum perpetuum fuit. non enim hæc, uel illa prouincia semper aut cōsularis, aut prætoria, sed ita nomen mutabant, ut uarie modo à consularibus, modo à prætoribus administrabantur. quam potestatem senatus habebat, ut, quos uellet, in quas uellet mitteret, administratione annua: quod lege Sempronia C. Gracchi tribuni pl. sancitum erat. Cæsari tamen Galliæ in quinquennium, contra legem Gracchi, & lege Vatinia tribunicia, & s. C. mandatæ sunt, posteaq; in alterum quinquennium lege Trebonia item tribunicia, Pompeio Magno & Crasso II cos. confirmatæ. qua de re sic ad Lentulum Cicero: Stipendium Cæsari decretum; & ne lege Sempronia succederetur, facile perfectum est. Dècerni autem solitas lege Gracchi, non à populo, sed à senatu prouincias, idem in oratione pro domo, in P. Clodium inuehens, plane demonstrat. Ita ne uero? inquit. tu prouincias consulares, quas C. Gracchus, qui unus maxime popularis fuit, non modo non abstulit ab senatu, sed etiam, ut necesse esset quotannis constitui per senatum, lege sanxit, eas, lege Sempronia per senatum decretas, rescidisti? extra ordinem, sine sorte, nominatim dedisti, non consularibus, sed reip. pestibus? Erat igitur eadem prouincia, ex uoluntate senatus, modo consularis, modo prætoria. itaque Macedoniam (ut hæc exempli causa nominetur) Cn. Dolabella, C. Curio, M. Lucullus, L. Torquatus, C. Antonius, omnes consulares, administrarunt: tum, Cn. Octavius prætorius, pater Augusti naturalis, rursus consularis L. Piso, & Pisonem reuocato, Q. Ancharius prætorius. idemq; patet in ceteris. Quo autem anno s. C. illud Cælius in epistola sua ad Ciceronem misit; in quo s. C. hæc sunt; senatui placere, in Ciliciam prouinciā, inq; VIII reliquas prætorias mitti: regebantur VIII prouinciæ, quæ in eo s. C. prætorie uocantur, à magistratibus VIII prætoriis, Cypro excepta, quam quæstor, ut proxime ostendi, cum iure, ut opinor, prætorio, administrabat: quia, lege Clodia missum esse in eam M. Catonem cum iure prætorio, adiecto etiam quæstore, Velleius prodidit. propterea Cyprum inter prætorias esse memoratam, facile credo. reliquæ septem
fuere,

fuere, Sicilia, Sardinia, Asia, Macedonia, Bithynia, Creta, Africa. et cum Sardinia Corsicam simul fuisse, cum Bithynia Pontum, paulo ante dictum est. Sed quærat, fortasse, quot fuerint, & quæ fuerint, & à quibus administratæ eo anno prouinciæ consulares. Septem fuerunt, hæ, duæ Gallia, Illyricum & Dalmatia, quas unus C. Cæsar tres regebat; duæ Hispania, quas Cn. Pompeius per legatos absens administrabat; Syria, cui M. Bibulus, Cilicia, cui M. Cicero præerat. ita fuerunt hoc anno XV prouinciæ, consulares VII, prætoriæ VIII. et in unam consularem Ciliciam, in prætorias autem omnes eo s. C. successores mitti placere, decretum est. Neque uero miretur quisquam, si Aetoliam, Græciam, Achaia, Thessaliam, Bœotiam, Pamphylia, Phrygia, Lycaoniam, Lydiam, Ioniam, Cariam, Mysiam, Gallogræciam, siue Galatiam, Pisidiam, Lyciam, Cappadociam, Armeniam, non nominauerim. nam Aetolia Græciæ pars fuit: Græcia uero cum Achaia, Thessalia, Bœotia ad iurisdictionem Macedoniae pertinuit; omnesq; simul ab uno regebantur. id seruatum est post consulatum Pisonis, & Gabinii. nam eo anno legem tulit P. Clodius, ut omnes illæ prouinciæ ab eo, qui Macedoniae præesset, regerentur. non enim tulit, ut à Pione nominatim regerentur, (nam fuisset priuilegium, non lex) sed, ut ab eo, cui Macedonia daretur. is autem fuit eo anno L. Piso; cuius causa lata lex est. Pamphylia uero, Phrygia, Lycaoniam, qui Ciliciam, idem administrabat. at Lydia, Ioniam, Cariam, Mysiam, etiam Phrygiæ parti præerat idem, qui Asia. nec mirum est, Phrygiam in duas iurisdictiones dispertitam fuisse; ut una pars Ciliciæ, altera tribueretur Asia. nam etiam ipsius Asiae tres diœcesis ad Ciliciam attinuisse, Cicero ipse, aliiq; prodiderunt. Galatiam regebat Deiotarus rex, socius fidelissimus populi R. Pisidæ, & Lycii inter socios erant, suisq; legibus, sine magistratu Romano, utebantur. itaque Cicero eas gentes appellat auxilia in epistola ad Atticum. Exercitum, inquit, infirmum habebam, auxilia sane bona, sed ea Galatarum, Pisidarum, Lyciorum. hæc enim sunt nostra robora. Cappadociæ rex erat Ariobarzanes, ipse quoque socius populi R. nam Pompeius reges multos, à Mithridate pulsos, in regnum restituit, & fœdere ac societate reip. obstrinxit: Armeniam Tigrani regi, qui Mithridatem armis iuuerat, uenia data, concessit: nationes quasdam prouincias fecit populi R.

populi R.

De legibus

puli R. aliis, ut sui iuris essent, suisq; legibus uiuerent, permisit. Hæc est Romanæ ditionis ab Hispania ulteriore, ultima ad occidentem prouincia, ad Euphratem, qui terminus ad orientem imperii fuit, descriptio quædam, breuiter à nobis informata. nec enim uagari longius licuit in ea tractatione, quæ nostri argumenti propria non est: quia tamen disiecta non uidetur; hæc attigimus. In prouincias ibant uel consulares cum XII fascibus, uel prætorii cum sex, totidem utrique, quot in urbe habebant. interdum etiam prætorios cum iure consulari, & XII fascibus, senatus in prouincias mittebat, ut Q. Ciceronem in Asiam: de quo Suetonius, Extant, inquit, M. Ciceronis epistolæ, quibus Quintum fratrem, parum secunda fama proconsulatum Asiæ administrantem, hortatur, & monet, imitetur in promerendis socii uicinum suum Octauium. proconsulatum uocat hominis prætorii administrationem. eadem ratione titulus est, Q. Metello Celeri pro cos. in duabus epistolis, quæ lib. V fam. primæ leguntur: qui tamen consulatum non gesserat, sed ex prætura in Galliam cisalpinam profectus erat. et in oratione pro Flacco notauimus hæc: Cum prouinciam Asiam proconsulari imperio obtineres: cum tamen prætorio de homine loquatur. Primis temporibus, cum prouinciæ tuendæ armis essent, & in discrimine uersarentur, exhibant in eas, inito statim magistratu, consules, & prætores, uel ut quæque cuique sorte obtigerat, uel etiam quandoque consulibus inter ipsos comparantibus. sic enim loquebantur, cum inter eos de duabus consularibus prouinciis conuenisset. nam comparandi consuetudinem apud prætores non uideo fuisse. quod si bellum produceretur; imperium in iisdem prouinciis pro consulibus, aut pro prætoribus à senatu prorogabatur. postea L. Sylla lege cauit, ne quis plus anno prouinciæ præesset; qui uiderit, opinor, in rep. diuturnis imperiis assuescere; tutum non esse. itaque Galliarum illa per decennium Cæsaris administratio libertatis exitium fuit. hac de lege Cicero in epistola ad Appium his uerbis: Eò discessisti, quod ego te ne persequi quidem possem triginta diebus, qui tibi ad decedendum lege, ut opinor, Cornelia constituti essent. et in eadem: Ut habere rationem possis, quo loco me salua lege Cornelia conuenias; in prouinciam ueni pridie cal. Sext. Nunc de legibus agamus, quæ rectoribus prouinciarum imperium dabant. eæ duæ fuerunt

fuerunt, curiata, uetus admodum lex, & Cornelia, quam tulit L. Syl-
 la dictator. curiata dabat imperiū populus, ut Liuius indicat lib. IX,
 Cornelia senatus. nam, cum s. c. esset factum, ut prouincias magi-
 stratus sortirentur, aut compararent inter se; tum, si ii, uel sine lege
 curiata, in prouincias proficiscerentur, imperiū habere dicebantur,
 donec in urbē reuertissent. ideo, quod in epistola Ciceronis ad Len-
 tulum scriptum est, Ap. Claudius, frater P. Clodii, cupidus prouin-
 ciæ, dictabat, sese, si licitum esset legem curiatam ferre, sortituro
 esse cum collega prouinciam; si curiata lex non esset, comparaturū
 cum collega, Lentuloq; Spintheri, Ciliciam pro consule administran-
 ti, succellurum: legem curiatam consuli ferre opus esse, necesse non
 esse: se, quoniam ex s. c. prouinciam haberet, lege Cornelia impe-
 rium habiturum, quoad in urbem introisset. Quod autem in agra-
 ria II scriptum est, Rem militarem sine curiata lege attingere non li-
 cet; propterea dictū, quia sumptu publico ibant in prouincias, quorū
 de imperio lata curiata lex esset. poterant igitur publica pecunia mi-
 lites alere, & bellum gerere. at sine curiata lege poterat quidem ali-
 quis priuato sumptu in prouinciam ire: exercitum uero habere, bel-
 lumq; de suo gerere, cui tantæ opes erant, ut liceret? non igitur sine
 curiata lege, quæ pecuniam dabat, rem militarem attingere cuiquā
 licebat. nam, cum ad Atticum Cicero ita scribit: Appius sine lege
 suo sumptu in Ciliciam cogitat: non intelligit de pecunia in stipen-
 dia militum eroganda, (nec enim sustinere sumptum potuisset) sed,
 opinor, de suo cohortisq; uiatiko. ipse enim Cicero, uaticum dari
 solitum comitibus eorum, qui irent in prouincias, significat in episto-
 la ad Cassium his uerbis: Cetera cuiusmodi sint, ex hoc iudica, quod
 legato tuo uaticum eripuerunt. Curiata porro lex, non, ut primis
 temporibus, uniuersi populi suffragiis, curiatim in forum conueni-
 entis, ferebatur, sed tantum à xxx lictoribus, xxx ueteres curias
 repræsentantibus. itaque Cicero in oratione II in Rullum, cum lo-
 quatur de curiatis comitiis, id est de lege curiata, qua x uiris impe-
 rium dari Rullus uolebat, Illis, inquit, comitiis, ad speciem, atque
 ad usurpationem uetustatis, per xxx lictores auspiorum caussa
 adumbratis. Ferri autem solitam à consulibus legem curiatam,
 idem Cicero in eadem oratione significat his uerbis: Consulibus, le-
 gem curiatam ferentibus, à tribunis pl. saepe est intercessum. idemq;
 confirmant illa uerba in epistola ad Lentulum: Legem curiatā con-

H fuli

De legibus

fuli ferre opus esse, necesse non esse. Nam, quod in sua lege Rullus posuerat, ut à prætore ferretur: extra ordinem fuit: quia uidebat adduci consules minime posse, ut eam ferrent, utpote qui nullum X uiris imperium dari uellent: itaque Ciceronis extant orationes legem Rulli de X uiris. Has duas leges de imperio, Corneliam, inquam, & curiatam, Cicero significat lib. VII ad Atticum his uerbis: Nec senatus decreuit, nec populus iussit, me imperium in Sicilia habere. In prouincias populi R. coloniæ ducebantur; propterea, quando de prouinciis proxime dictum est, subscribemus hic legem illam, quam Cn. Pompeius Strabo consul, Cn. Pompeii Magni pater, tulit; ut transpadanis coloniis idem ius, quod reliquis coloniis, esset; id est, ut, petendi magistratus gratia, ciuitatem Romanâ adipiscerentur, & hereditates à populo R. capere, reliquoq; iure ciuium R. uti possent. hoc iure postea Latinas omnes esse priuatas, in eo Suetonius ostendit, cum ait, Cæsarem colonias Latinas, de petenda ciuitate agentes, adiisse, & aliquid utique effecturum fuisse, nisi consules conscriptas in Ciliciam legiones ob id ipsum retinuissent. Sequitur militia: de qua legem ueterem uideo fuisse, ut, qui ciuem ab hoste seruasset, is ab imperatore quercea corona donaretur: quam Cn. Marcio Coriolano datâ esse, Plutarchus memoriæ tradidit. Fuit & illa, ne dolo malo, ne ue aliena iniquitate, sed iure & propria uirtute bellum gereretur. quam Camillus, is, qui urbem Romam à Gallis Senonibus liberauit, ita diligenter coluit; ut, cum Falerios, Faliscorum urbem, obsideret, eamq; illi tradere publicus literarum magister, deductis in castra nobilibus pueris, tentasset, iniustum beneficium recusarit, magistrumq; uinctum Falerios cum pueris remisit. Lex etiam lata est, quam Sacratam Liuius appellat, ne cuius militis scripti nomen, nisi ipso uolente, deleteretur: & ne quis, ubi tribunus mil. fuisset, postea ordinum ductor esset. Duas aliquot post annis tribuni pl. eodem anno rogarunt, unam L. Atilius, & C. Marcius, ut tribuni mil. senideni in quatuor legiones à populo crearentur; quæ antea, perquam paucis suffragio populi relictis locis, dictatorum & consulum ferme fuerant beneficia: alteram M. Decius, ut II uiros nauales, classis ornandæ reficiendæq; causa, populus iuberet. Leges duas C. Gracchus tribunus pl. tulit, unam de uestibus militi publice dandis, stipendio non imminuto; alterâ, ne quis infra XVII ætatis annum ad militiam cogeretur. ex quo patet, interdum ad militiam ante

ante coactos fuisse, qui nondum annum ætatis XVII agerent. quod puto difficillimis reip. temporibus, exhausta cladibus ciuitate, ut secundo Punico bello, extra ordinem esse factum. Legibus de militia recte subiiciuntur leges de triumpho. non est enim triumphus sine militia. Antiquissima fuit, quæ nunquam seruata non est; ut, qui ob rem in bello bene gestam triumphum ducturi essent, ante triumphum urbem ne ingrederentur. triumphabant enim cum imperio: & imperium deponere, urbem intrantibus necesse erat. triumphum autem senatus decernebat: sed imperium in urbe, quo die triumphum duceretur, populus dabat, rogatione ab aliquo tribuno pl. lata. id aperte demonstrant illa apud Liuium, lib. XLV. Tribus his omnibus triumphus ab senatu decretus: mandatumq; Q. Cassio prætori, cum tribunis pl. ex auctoritate patrum ageret, rogationem ad plebem ferrent, ut iis, quo die urbem triumphantes inueherentur, imperium esset. Et erant impediendi triumphi rationes multæ, primum, cum tribuni pl. imperatori, qui triumphum peteret, aliqua de causa infensi, de rogatione ferenda omnes recusarent; deinde, cum rogationem quidem tribunus aliquis ferret, sed eam populus suffragiis antiquaret; tertio, ubi, tribuno rogationem ferente, unus, plures uel de collegio intercederent; postremo, cum tribunus imperatori ob res in bello gestas diem diceret, sicuti C. Memmius L. Lucullo; qui, duobus potentissimis regibus, Mithridate, & Tigraue, deuictis, tamen non nisi triennio post triumphare potuit. ad extremum, accusationem Memmio remittente, Cicerone consule triumphum duxit: unde illa: Nos enim currum clarissimi uiri nostra manu in urbem duximus. hanc legem de imperio unius diei intra urbem Cicero significat his uerbis lib. IIII ad Att. Pontinius uult ad III non. Nou. triumphare. huic obuiam Cato, & Seruilius prætores aperte, & Q. Mucius tribunus pl. negant enim latum de imperio. et est latum, Hercule, insulse. latum insulse dicit, quia legem de imperio Pontinii Ser. Galba prætor clam ante lucem tulerat. quod à Dione traditum est. et agi quidquam cum populo ante horam primam, leges uetabant. Paulo post secuta est altera, (si modo primis temporibus lege potius, quàm more, triumphabant) ut, qui hostes acie uicissent, triumphantes urbem inirent. idq; factum etiam cum intra VII lapidem urbis Romanæ fines includerentur, apud Valerium notauimus. Post, ut imperatorum ambitioni, qui leuibus præliis

H 2 prospere

De legibus

prosperis factis, triumphum petebant, obuiam iretur, lege cautum est, ne quis triumpharet, nisi qui & v millia hostium una acie cecidisset, & de suo exercitu multo pauciores amisisset. quo in utroque ne falsus senatui numerus ederetur, altera lex à L. Mario M. Catone tribuni pl. lata est, ut punirentur ii, qui aut hostium occisorum, aut ciuium amissorum in numero mentiti essent. Sancitum & illud est, ut, pro aucto imperio, non pro recuperatis quæ populi R. fuissent, triumphus decerneretur. quam ob causam neque Q. Fuluius, qui Capuam receperat, neque L. Opimio, qui Fregellas, permisit senatus ut triumpharent. Eademq; fuit eorū conditio, qui ad res gerendas sine magistratu missi erant. qui etsi res triumpho dignas gessissent, triumphare tamen lege uetabantur. itaque nec P. Scipioni, qui postea Annibalem uicit, ob recuperatas Hispanias, nec M. Marcello ob captas Syracusas triumphum senatus decreuit. Pompeius tamen, qui Magni cognomento est usus, Sylla dictatore cōcedente, contra legem, eques Romanus adhuc, triumphauit. Illud etiā fortasse lege datum, ut, qui triumphans urbem ingressus esset, ei laurea corona in spectaculis uti liceret. id ex eo conicio, quod Valerius, cui Plinius lib. naturalis historiæ xv subscribere uidetur, C. Papirium Masonem tradit, cum, triumpho à senatu non impetrato, in Albano monte triumphasset, myrtea corona pro laurea in spectaculis usum esse. Inter publicas leges illa quoque referenda, quam, quo anno Cn. Manlius cum C. Marcio consul fuit, tribuni pl. tulerunt, ne quis populum seuocaret. nam, cum Manlius ad Satrium in castris, nouo exemplo, tributim de uicesima eorum, qui manumitterentur, legem tulisset; eiusq; legis, quia publicum uectigal haud parum augeretur, patres auctores fuissent; tribuni pl. non tam lege, quam exemplo, moti, ne quis postea populum ab urbe auocaret, capite sanxerunt: nihil enim non per milites iuratos in consulis uerba, quamuis perniciosum populo, si id liceret, fieri posse. Leges agrariæ num sunt de iure publico? sunt omnino, quia pertinent ad populi commodum. Primus omnium promulgauit Sp. Cassius Viscellinus in III consulatu, perferre tamen non potuit, Virginio collega, omniq; senatu resistente. hic anno proximo, quasi de regno cogitasset, à patre, ut Valerius, & Plinius Secundus affirmant, à populo, ut ab aliis traditum Liuius ait, damnatus, nefarii consilii poenas morte perfoluit. in quo foedissimum in Valerio erratum deprehendi. nam

libro

libro II, ubi de parentum seueritate aduersus liberos agit, ita scribit: Cassius filium, qui tribunus pl. agrariam legem primus tulerat, adhibito propinquorum & amicorum consilio affectari regni crimine damnavit, uerberibusq; affectum necari iussit; ac peculium eius Cereri consecrauit. tribunum pl. ait fuisse Cassium, qui agrariam legem promulgauit; quod aperte falsum esse, Liuius, & Dionysius demonstrant. tulit enim de agro Hernicorum diuidendo in III consulatu: quo tempore Cassii erant patricii, (consules enim fiebant) & patricio tribunatum pl. dari leges uetabant. inde plebis concitanda agrorum diuisio seditiosis tribunis pl. occasio semper fuit. itaque deferendis legibus non sine magno ciuili motu saepe actum. Primus pertulit Sex. Licinius Stolo tribunus pl. is, qui etiam, ut alter consul de plebe crearetur, legem rogauit. eius lege nemini ultra D agri iugera, neque pecoris maioris ultra C, minoris ultra D capita licuit habere. his adiungebantur capita seruorum, ac ingenuorum, quae quis ad custodiam agri, pecorisq; certo numero haberet. Et, ut appareat leges à tribunis pl. odio nobilium potius, quàm studio publici commodi, esse latas; paucis post annis hic ipse Stolo, accusante M. Popillio Lænate, primus, ut ait Valerius, sua lege damnatus est, quòd M iugerum agri cum filio possideret, emancipandoq; filium fraudem legi fecisset. rationem postea locupletes iniierunt, ut plus D iugeribus possiderent, nec tamen Licinia lege damari possent. aliis enim ad emendum agrum summissis, ipsi possidebant. huic malo mederi primus uoluit C. Laelius, (de minore loquor: nam ita duo Laelii, ut duo Africani, fuere) Africani Scipionis amicitia non minus, quàm sua uirtute, clarus: sed, aduersante locupletum magno numero, cum excitari ciuilem discordiam & contentionem uideret, ocio ad tranquillitati ciuium consulens, susceptam rem abiecit: ex quo Sapientis cognomen est consecutus. Liciniam secuta est Quinctia, à C. Quinctio Flaminino tribuno pl. lata, quam, non nullis ante II bellum Punicum annis, tulit ad populum, inuito senatu, de agro Gallico & Piceno uiritim diuidendo. Post captam autem Carthaginē de agris in Africa diuidendis Rubria lex lata est, Liuià uero de x uiris, qui diuiderent, quarum legum in tabula aenea mentionem inuenimus. Ti. Gracchus tribunus pl. aliquot post annis legem pertulit, cuius sententia hæc erat: si quis filium emancipatum haberet, ei dimidiam partē D iugerum attribuerē posset: III uiri agris diuidendis plebi crearentur:

De legibus

crearentur : ne quis agrum à III uiris acceptum uenderet. hæc lex utrum seruata sit, an, occiso Tiberio, neglecta, parum constat. seruata ait Plutarchus; idq; senatum uoluisse, ut plebis dolor, Tiberii morte susceptus, leniretur: neglectam; uidetur Liuius tradidisse; cum in epitome, renouatam à Caio, Tiberii fratre, scriptū sit. res ita conueniet, si & seruata, leniendæ plebis causa, primis post Tiberii interitum annis, & postea ita neglectam credamus, ut eandem Caius referre necessarium duxerit. quod & aliis non paucis in legibus esse factum animaduerti. Tulit & Sp. Thorius legem, qua agrum publicum uetigali leuauit: quam uitiosam & inutilem Cicero appellat in Bruto, quia nocuit ærario. Sequuntur eodem de genere tribunicia duæ, Titia, Marcia; Titia, M. Antonio oratore, A. Postumio Albino cos. à Sex. Titio lata; Marcia, quibus consulibus incertum, à L. Marcio Philippo. Est etiã agrariæ Plotiæ, & Flauia mentio apud Ciceronem lib. I ad Atticū: quam utranque fuisse tribuniciam, constat. utraque autem uidetur hoc sanxisse, ut uel agri, quos à senatu locupletes emissent, reddita possessoribus pecunia plebi distribuerentur; uel, si neminem uetere possessione moueri senatus uellet, alii agri ea pecunia, quæ ex nouis uetigalibus per quinquennium reciperetur, emerentur, & plebi, quæ agros non haberet, partirentur. hoc certe uidetur in Flauia scriptum fuisse, ut ex epistola ad Atticū lib. I licet coniiicere. in alia uero, quæ ante hanc proxima est epistola, Flauiam eandem fere, quæ fuit Plotia, Cicero scribit esse. ex quo, non dissimilem utriusque sententiam fuisse, facile cognoscitur. sed Flauiam, quæ Q. Metello Celere & L. Afranio cos. promulgata est, cur existimem esse perlatam, nihil habeo. Dictator quoque Sylla, lege lata, multos agros in Etruria militibus suis diuisit. Scriboniam tribuniciam C. Curionis filii nominat, eamq; uiariam appellat, nec dissimilem agrariæ Rulli, M. Cœlius epist. fam. lib. VIII. Vltimus agrariam legem pertulit C. Cæsar in primo consulatu: qua Stellatam campum, maioribus consecratum, ut ait Suetonius, & agrum Campanum, ad subsidia reip. uetigalem relictum, diuisit extra sortem XX millibus ciuium, quibus terni pluresq; liberi essent. Postremo loco duas P. Clodii tribuni pl. leges cōstituemus, quæ ad ius publicum uidentur pertinere; unam, ut frumentum populo, quod antea semis æris ac trientibus in singulos modios dabatur, gratis daretur: quam legem & L. Saturninus in tribunatu ferre conatus erat.

altera

altera fuit de collegiis restituendis, quæ nouem ante annis Cæcilio & Marcio cos. sublata fuerant: quibus alia quoque, quæ antea non fuerant, Clodius adiunxit. quod ei Cicero sæpe in orationibus exprobrat. Superfunt leges de iure priuato: quarum duo genera esse diximus, unum, earum, quæ ad ius ciuile, alterum, quæ ad crimina pertinent. De iure ciuili, quod, ut ait iurifconsultus, de iure gentium quædam detrahit, quædam assumit, lex erat de adoptionibus; quæ ut curiata lege fierent, cautum erat. licebat autem non patricio plebeio, sed plebeio patricium adoptare. atque hoc in genere tria lex iubebat obseruari: primum, ut is adoptaret, qui neque procreare iam liberos posset, & cum potuisset, expertus esset: alterum, ut tum generum ac dignitatis, tum sacrorum ratio haberetur, id est, ut ita fieret adoptio, ut ne quid aut de dignitate generum, aut de sacrorum religione minueretur: tertium, ne qua omnino calumnia, ne qua fraus, ne quis dolus adhiberetur: quæ si seruarentur omnia, tum adoptionem recte fieri. nihil tamen horum in adoptione P. Clodii seruatum esse, arguit Cicero in oratione pro domo sua: neque solum ob hanc causam ait esse infirmam irritamque illam adoptionem, uerum etiam, quod, cum curiata lex ferretur, tum seruatum de cælo sit: quod cum fieret, neque legem ferri, neque omnino quidquam agi cum populo licebat. primum enim adoptandi causas esse oportuit, de quibus pontifices iudices erant: deinde, si causæ probarentur, curiata lex ferebatur: quam qui ferret, is omnia seruare debebat, quæ in ceteris legibus, cum ferrentur, seruari mos fuit. quod utrumque significat Cicero in ea oratione, cum ait: *Ut is adoptet, qui, quod natura iam assequi non potest, legitimo & pontificio iure quærat.* itaque, quod est apud Cornelium Tacitum lib. XVII, *Lege curiata apud pontifices adoptio fiebat; id ita est intelligendum, ut, nisi & lex ferretur, & adoptandi causas pontifices probassent, adoptio fieri non posset.* utrumque uero separatim agebatur; cum de causis pontifices cognoscerent, legem uero magistratus ferret. Adoptantis autem ætatem XVIII annis maiorem, quam eius, qui adoptaretur, esse oportere, à Modestino scriptum est his uerbis: *Non tantum cum quis adoptat, sed & cum arrogat, maior esse debet eo, quæ sibi per adoptionem, uel per arrogationem filium facit; sed utique plena pubertate, id est XVIII annis, eum præcedere debet.* De testamentis leges multæ fuere; quarum nominantur Voconia, Furia, Falcidia, Cornelia, Iunia,

nia,

De legibus

nia, Velleia. Voconia, de mulierum hereditatibus inter secundum & postremum Carthaginienſe bellum à Q. Voconio Saxa Aricino tribuno pl. ſuadente M. Catone cenſorio lata, ſanxit hoc, ne quis heredem relinqueret filiam ſupra Æs XXV M. nam Dio lib. LVI ita ſcriptum reliquit. Auguſtus quibuſdam feminis tribuit, ut ſupra XXV M heredes eſſe poſſent: licet hoc lex Voconia uetaret. Etiam hoc eadem lege cautum eſt, ut à Theophilo, in tit. inſtit. de lege Falcidia, didicimus, ne plus legatarius, quàm heres, haberet. quo de genere Trebellianum quoque S. C. extat, ne bona ultra dodrantem uniuerſali fidei commiſſo ab herede relinqui poſſint. Voconia, & Furia, Falcidia, Iunia, Velleia, tribuniciaæ fuerunt, Cornelia conſularis, L. Syllæ. de Voconia diximus. Furia cauebatur, ut à Theophilo ſcriptum legimus, ne cui plus, quàm M nummum, legaretur; quod amplius legatum eſſet, quadruplum reſtitueretur. Falcidia cauebatur, ne cui plus liceret legare, quàm dodrantem ex tota hereditate, id eſt, ut, ſiue unus heres inſtitutus eſſet, ſiue plures, apud ipſum, eos uel quarta pars tantum remaneret, meminit huius legis Celfus, lib. XXII digeſtorum, his uerbis: Cum de lege Falcidia quaeritur, heredis probatio eſt, locum habere legem Falcidiam. quod dum probare non poteſt, merito condemnabitur. In Iunia Velleia hoc erat, ut, qui teſtamentum faceret, omnes eos uirilis ſexus neceſſario inſtitueret heredes, qui, cum naſcerentur, ei heredes ſui futuri eſſent; eorumq; in locum liberi ſuccederent: qui niſi inſtituti eſſent, aut ſi exheredati, ad exemplum poſtumorum, eſſent, teſtamentum ne ualeret. atque in hac lege duplex caput fuit, primum, ut, mortuo filio, nepotes nondum nati poſſint inſtitui: item, ut, uiuente filio, naſciturum nepotes poſſint inſtitui, ſi, auo uiuente, & mortuo filio, naſcantur; ne facti ſui, cum naſcentur, ſi ſe præteritos inuenerint, rumpant teſtamentum. altero capite cautum eſt, ut nepotes, iam nati uiuente filio, ab auo heredes inſtituantur, uel nominatim exheredentur; ne forte, mortuo poſt teſtamentum filio, facti ſui heredes, ad exemplum poſtumorum teſtamentum inſirment. quæ tradita ſunt in iuriſconſultorum libris. Cornelia falſum teſtamentum facientibus poenam irrogabat: eaq; lege ſenatores ſoli tenebantur, ut in Suetonio legimus. niſi ſi, non ſenatores, ſed ſignatores, legas. quòd ſi quis in hoſtium poteſtate deceſſiſſet; eius teſtamentum perinde lex Cornelia confirmabat, ac ſi, qui teſtamentum illud feciſſet, in hoſtium poteſtatem

statem non peruenisset. testis Iulianus lib. XXVIII digestorum. Testamenta porro lex infirmabat, irritaq; prorsus iubebat esse, quæ improba, inofficiosa, inhumana dicerentur, hoc est, contra leges, merita, pietatem facta: item, quæ à V testibus, iisq; fide dignis, non essent obsignata. quod ad VII deinde testes prætorum edicto translatum est. postremo ab imperatoribus inuentum, ut testes subscriberent, ut legitur instit. de testamentis, paulo post principium. atque horum generum causas, de rescindendis confirmandis ue testamentis, à Cuius esse iudicatas, quod hastæ iudicium dicebatur, Cicero, Valeriusq; declarant. Aelia Sentia, quam iurisconsulti nominant, non uidetur ad nostrum institutum pertinere. non enim stante rep. sed Augusti temporibus, à Sex. Aelio, L. Sentio cos. lata est. ueruntamen, quia spectat ad testamenta, quorum leges hoc in loco exponuntur, simul cum aliis eam legibus enumerare non alienū duximus. in ea scripta sunt hæc: ut unus modo heres necessarius fieret: plures si fierent, irritū esset: ne duo plures ue ex eadem causa heredes scripti essent: qui primo loco esset nominatus, heres esset: item, quibus de causis manumitti seruos placeret: ne quis, licet ex tutoris auctoritate, posset manumittere, nisi causam apud consilium probaret: ne ue serui, in fraudem creditorum, aut libertate donarentur, aut heredes instituerentur. nam cum, pluribus heredibus seruis institutis, iisdemq; manumissis, futurum esset, ut creditores ad suum peruenire non possent; quia, data seruis libertate, pretium hereditatis diminueretur; ideoq; seruorū manumissio iniusta uideretur, quia contra rem creditoris esset; lex Aelia Sentia sanxit, ut unum duntaxat seruum cum libertate heredē debitor facere posset. atque hæc uidere licet uer. I instit. quibus de causis manumittere non licet. postremo iubebat, ut, si esset donatio facta inter uirum & uxorem, maritusq;, re nondum tradita, uita excessisset, ne mulier rei uindicationem post obitum mariti haberet, sed tantummodo exceptionem, si non possideret contra petitores. Hæc de lege Aelia Sentia, ueterem fortasse aliquam legem referente, obseruauimus. Alia uero fuit Aelia Sanctia, à Cicerone in Topicorū libris nominata: quæ assiduo uindicem esse assiduum, id est locupleti locupletem, iubebat. pertinuit igitur ad iudicia. atque hac de lege nihil amplius, neque de latoribus, neque de tempore, neque de sententia, compertum habemus. sed, præter eam, leges hoc de genere X ui deo nominari, diuersis temporibus latas, tribunicias V, Semproniam, Seruiliam, Liuiam, Plotiam, Vatiniam; prætoriam, Aureliam; consu-

I lares,

De legibus

lares, Corneliam, Pompeiam, Iuliam, Antoniam. his de singulis prius quàm agamus, tria loca, quæ ad hoc de iudiciis argumentũ pertinent, unum Plutarchi, alterum Pediani, tertium Ciceronis examinabimus. ordinem enim, & sententiam earum legum, quas nominauimus, perturbant, & obscurant. quare, ut erroris causa tollatur, disputabimus primum ea, quæ ueterum in libris aut re uera, ut ego sentio, falsa sunt, aut eiusmodi, ut, uera cum sint, falsa tamen uideri possint. hoc ubi satis apertum fuerit; tum, ueritate quasi è tenebris educta, leges ipsas, & quibus singulæ temporibus latæ sint, & quæ cuiusque uis ac sententia fuerit, ostendemus. Ac primum, quòd in Gracchorum uita Plutarchus tradidit, legem à C. Graccho esse latam, ut CCC equites simul cum CCC senatoribus iudicarent, id ego (pace tanti uiri dixerim) falsum esse iudico. non enim lege Gracchi equites cum senatoribus, sed soli equites rem iudicariam administrarunt. probatur antiquorum exemplis. nam Paterculus, ubi leges C. Gracchi commemorat, Dabat, inquit, ciuitatem omnibus Italis: extendebat eam pene usque ad alpes: diuidebat agros: uetabat quenquam ciuem plus D iugeribus habere: noua conliduebat portoria: nouis coloniis replebat prouincias: iudicia à senatu transferebat ad equites: frumentũ plebi dari instituerat: nihil immotum, nihil tranquillum, nihil denique in eodem statu relinquebat. satis plane loquitur. non dicit, cõmunicata inter equites & senatores iudicia, sed à senatu ad equestrem ordinem translata. et idem infra. Tribunatum iniit M. Liuius Drusus: qui cum senatui priscum restituere cuperet decus, & iudicia ab equitibus ad eum transferre ordinem; (quippe eam potestatem nacti equites Gracchanis legibus, cum in multos clarissimos, atque innocentissimos uiros sæuissent, tum P. Rutilium, uirum non sæculi sui, sed omnis æui optimũ, interrogatum lege repetundarum, maximo cum gemitu ciuitatis damnauerant) in iis ipsis, quæ pro senatu moliebatur, senatum habuit aduersarium. et infra. Per idem tẽpus Cotta iudicandi munus, quod C. Gracchus ereptũ senatui ad equites, Sylla ab illis ad senatum transtulerant, æqualiter inter utrunque ordinem partitus est. hæc ille: quæ Pedianus in commentario diuinationis confirmat his uerbis. C. Gracchus legem tulerat, ut equites Romani iudicarent. iudicauerunt per annos XL, sine infamia. post uictor Sylla leges tulerat, ut senatorius ordo iudicaret: & iudicarunt per X annos, turpiter. et in eodem commentario infra: Rutilium Rufum, quòd in Asia cum prætore suo consensisset, ne publicani aliquid agerent in prouincia sua, equites Ro-

mani,

mani, qui tum iudicabant, damnarunt. Quòd si quis in tuenda Plutarchi caussa ita pertinax est, ut Velleii, & Pediani testimonio standum neget; uel quòd de solis equitibus non satis aperte loqui uideantur; uel quòd ipsi quoque falli, ut homines, alucinariq; potuerint: audiat Appiani uerba: quæ, ut ego statuo, Plutarchum manifeste condemnant. is igitur libro primo sic: M. Liuius Drusus tribunus pl. senatum, & ordinem equestrem, iudiciorum caussa, quæ adempta senatui, & equitibus tradita fuerant, dissidentes, lege conciliare, & ad concordiam perducere conatus est: itaque tulit ad populum, ut ad utrumque ordinem cognitio caussarum pertineret. sed quoniam ob superiorum temporum discordias numerus senatorum ad CCC redactus erat; persuasit equitibus, ut de suo ordine totidem legerent, ne in iudiciis numero inferiores essent. quid apertius? non enim tribus aut quatuor uerbis rem obscure significat, sed ita copiose, ita non ambigue declarat, ut de illius sententia dubitare, nisi qui nodum in scyrpo uelit quærere, nemo possit. quid opus fuit, legem à Druso ferri de communicandis inter duos ordines iudiciis, si, quod ait Plutarchus, eiusdem sententiæ legem C. Gracchus ante pertulerat? presertim cum, eam fuisse abrogatam, nemo dicat. accedit ad hæc Liuii testimonium: cuius in epitome lib. LXX scriptum est. P. Rutilius, uir summæ innocentia, qui legatus Q. Mucii pro consule à publicanorum iniuriis Asiam defenderat, inuisus equestri ordini, penes quem iudicia erant, repetundarum damnatus in exilium missus est. et ibidem. Senatus, cum impotentiam equestris ordinis in iudiciis exercendis ferre nollet, omni uiniti cœpit, ut ad se iudicia transferrentur. et libro sequenti. M. Liuius Drusus tribunus pl. legem tulit, ut æqua parte iudicia penes senatum & equestrem ordinem essent. Age, falsus testis Velleius, leuis Asconius, Appianus mendax, uanus & futilis Liuius: quid de Cicerone? an ipsum quoque præ Plutarcho nihil putabimus? nemo est, opinor, qui non illum grauem, & certum ueritatis auctorem ducat, presertim in ratione iudiciaria; in qua ita uersabatur, ut excelleret. quid igitur hic ait? ante bellum Italicum nunquam equites cum senatoribus iudicasse. quo patet, Gracchi legem de solis equitibus fuisse. uerba ipsa recitabimus: ne nobis, quod adiunt, sine pigore credatur. in oratione pro C. Cornelio, cuius in-

De legibus

ter Pediani commentarios fragmenta quædam sunt, ita scriptum est: Memoria teneo, cum primum senatores cum equitibus Romanis lege Plotia iudicarent, hominem diis ac nobilitati perinuisum, Cn. Pompeium causam lege Varia de maiestate dixisse. Cum primum, dicit. ex quo satis liquet, lege Gracchi, quæ multis ante annis lata erat, nullam in iudiciis equitum & senatorum societatem fuisse. quod ipsum interpret es eorum uerborum Pedianus confirmat: adscribit enim hæc. M. Plautius Siluanus tribunus pl. Cn. Pompeio Strabone L. Porcio Catone cos. secundo anno belli Italici, cum equester ordo in iudiciis dominaretur, legem tulit adiuantibus nobilibus: quæ lex uim eam habuit, quam Cicero significat. nam ex ea lege tribus singulæ è suo numero quinos denos creabant, qui eo anno iudicarent. ex eo factum est, ut senatores quoque in eo numero essent, & quidam etiam ex ipsa plebe. et in ea pro Scauro. Reus est factus à Q. Seruilio Capione lege Seruilia, cum iudicia penes equestrem ordinem essent. non obscure significat solos equites iudicasse. quod & Pedianus demonstrat, qui subscribit hæc: Scaurus tanta fuit constantia, & animi magnitudine, ut Capionem contra reum detulerit, &, breuiore die inquisitionis accepta, effecerit, ut ille prior causam diceret; Marcum quoque Drusum tribunum pl. cohortatus sit, ut iudicia commutaret. quid est, iudicia commutaret? nempe id, quod iam ex Appiano recitauimus; ne solis equitibus iudicandi potestatem relinqueret. Eodemq; referenda sunt illa uerba in Bruto: Equestrem ordinem C. Seruilius Glaucia beneficio legis deuinxerat. Sequor igitur libentius ego quidem auctorem in hac re Ciceronem, quàm Plutarchum: primum, quòd in rebus Romanis homini potius Romano, quàm Græco, credendum est: deinde, quòd ab ætate C. Gracchi propius abfuit, quàm Plutarchus: postremo, quòd, iudiciorum peritissimus cum esset, ueteres leges minus ei cognitæ fuisse uerissimile non est. Atque hæc de Plutarcho. nam locum in epitome Liuiana, ex quo uidetur idem Liuius placuisse, mendosum libenter existimauerim: ut homini parcam alioqui Romanarum rerum peritissimo. iam enim, ante legem Plotiam nunquam cum senatoribus equites iudicasse, Cicerone teste, ut alia omittam argumenta, probatum est. et ipsum quoque Liuium idem sensisse, indicare uidentur illa, quæ iam recitauimus, ex epitome,

me, lib. LXX. Venio ad Pedianum: qui & ipse, non, ut Plutarchus, in genere iudicum, sed in legum ordine ac numero peccauit. is in commentario diuinationis ita scripsit: C. Gracchus legem tulerat, ut equites Romani iudicaret. iudicauerunt per annos XL, sine infamia. post uictor Sylla legem tulerat, ut senatorius ordo iudicaret: & iudicauit per decem annos, turpiter. hæc, si legum sententiam consideres, uera sunt. nam & equites lege Gracchi, ut iam diximus, & senatores lege Syllæ iudicarunt. itaque eadem sunt à nobis supra recitata, ut probaremus illud contra Plutarchum de solis equitibus lege Gracchi iudicantibus. sin ordinem ac numerum legum spectes; falsa Pedianus narrat. non enim post legem Gracchi secuta proxime est lex Syllæ, sed lex Cæpionis, & deinde Drusi, post Siluani, postremo Syllæ. Drusi autem lege, quæ fuit eadem cum Cæpionis lege, eo ipso, quo lata est, anno sublata, rursus lege Sempronia per annum soli equites iudicarunt. multos enim ab equitibus, lege Varia de maiestate accusatos, Appianus asserit esse condemnatos. anno post, successit Plotia: & Plotianum denique Syllæ lex consecuta. quare culpam Pediani, non uideo, qui liceat excusare; qui equites dicat lege C. Gracchi per annos XL, hoc est ad L. Syllæ dictaturam, iudicasse: cum tantum usque ad eum annum soli ea lege iudicauerint, quo M. Plautius Siluanus tribunus pl. (legem enim Liuiam, quæ statim, ut diximus, sublata est, omitto) ad populum tulit, ut singulæ tribus quinos denos è suo numero crearent iudiciorum causa, eosq; non uno ex ordine, sed ex omnibus, hoc est senatorio, equestri, ipsa plebe. quòd si generatim dixisset, nulla Gracchanæ legis mentione facta, equites per annos XL iudicasse: uere dixisset. liceret enim intelligere, id quod res est, equites modo solos lege Gracchi, modo cum senatu, atque etiam cum plebeiis hominibus lege Plotia iudicasse. ad quam sententiam referendum est illud Ciceronis in II in Verrem actione: Cognoscet ex me populus R. quid sit, quamobrem, cum equester ordo iudicaret, annos prope L continuos nullo iudice equite Romano iudicante ne tenuissima quidē suspicio acceptæ pecuniæ ob rem iudicandam constituta sit. quo loco fortasse adductus est Pedianus, ut, solos, equites Gracchi lege usque ad Syllam dictatorem iudicasse, crederet. qui cum exponit illud, Annos prope L continuos, ait: Tanto enim fere tempore equester ordo
lege

De legibus

lege Sempronia iudicauit: cum Cicero, ut opinio mea fert, equites quidem iudicasse dicat usque ad Syllam dictatorem, non tamen de solis equitibus, ut Gracchi lex iusserat, sed & de solis equitibus primum, & mox de equitibus una cum senatoribus aliisq; etiam ex ipsa plebe iudicantibus significet: quod lege Plotia cautum erat. Pedianum autem satis aperte de uno ordine equestri, per annos XL iudicante, locutum esse, tum ea, quæ proxime recitavi, uerba demonstrant, tum etiam illa, quæ in eiusdem commentarii scripsit argumento: quæ sunt hæc. Agitur causa senatoriis iudiciis in inuidia apud populum constitutis, flagitante plebe iudicia equestris ordinis; quæ fere ante annos X Sylla sustulerat. uocat iudicia equestris ordinis ea, quæ Sylla sustulit: cum non unius equestris ordinis, sed omnium ordinum iudicia fuerint: siquidem, ut omnibus ordinibus iudicandi potestas daretur, lex Plotia sanxerat. quòd si quis dixerit; fieri posse, ut, Plotia lege ante Syllam dictatorem abrogata, rursus Gracchi lex restituta sit; ideoq; Syllam, lege Gracchi postea sublata, equestris ordinis iudicia sustulisse: hic tamen nihil dicet. nam cum Pedianus illa, quæ ipsa recitauimus, literis mandauit: Gracchus legem tulerat, ut equites Romani iudicarent: iudicauerunt per annos XL: de Gracchi tantum lege uidetur accepisse, oblitus uidelicet Plotiæ legis, de qua scripsit postea idem in commentario orationis pro C. Cornelio. Quòd autem ab eo anno, quo Gracchus eam legem tulit, ad Syllam dictatorem annos XL numerat: id si paulo subtilius ad ueritatem uelis reuocare, falsum inuenitur: cum inter consulatum Opimii, qui Gracchum occidit, & dictaturam Syllæ anni XLI interint; nec tamen Opimio consule, sed biennio ante, ut ex epitome Liuiana Plutarchoq; cognoscitur, Gracchus in primo tribunatu eam legem rogauerit. sed est hoc apud scriptores antiquos in more positum, ut integros numeros malint, decem, centum, mille, quàm cum exigui numeri additione, pronunciare. quod à Pediano factum, mirum non est; cum ipse à Cicerone idem esse factum animaduertisset. nam in oratione aduersus L. Pisonem, cum dixisset Ego in C. Rabirio perduellionis reo XL annis ante me consulem interpositam senatus auctoritatem sustinui contra inuidiam, atque defendi; subiungit Pedianus hæc: Possit aliquis credere, lapsum memoria Ciceronem; qui dicat, XL annis ante se consulem factum

etum esse s. c. aduersus L. Appuleium Saturninum tribunum pl.
 cum XXXVI anni à C. Mario L. Valerio Flacco cos. numeren-
 tur. sed hic non subtilis computatio annorum facta est; uerum
 summatim tempus comprehensum est: & pèrinde accipiendum,
 ac si dixerit, prope XL annis. hæc enim consuetudo est ipsius Ci-
 ceronis. itaque in ea quoque, quam habuit in Catilinam in sena-
 tur, cum octauus decimus dies esset, postea quàm factum s. c. ut
 uiderent consules ne quid resp. detrimenti caperet, dixit: Vigesi-
 mum iam diem patimur hebescere aciem horum auctoritatis.
 Præterea, cum senatores per XI annos, hoc est ab eo anno, quo
 Sylla dictator est factus, ad Pompeii & Crassi primum consulatum
 soli potestatem habuerint iudicandi; integrum tamen numerum
 Cicero ponit in II in Verrem actione. ait enim sic. Omnia non
 modo commemorabuntur, sed etiam, expositis certis rebus, a-
 gentur, quæ intra X annos, postea quàm iudicia ad senatum trans-
 lata sunt, in rebus iudicandis nefarie, flagitioseq; facta sunt.
 quem Pedianus imitatus est, cum dixit, Senatorius ordo iudicauit
 per X annos, turpiter. idem tamen, quòd intelligeret non plane
 X annos fuisse, sed XI, quibus ordo senatorius iudicauit, alio lo-
 co dixit: Flagitante plebe iudicia equestris ordinis, quæ fere ante
 annos X uictor Sylla sustulerat. In eo certe nimis magnum Ci-
 cero numeri fecit incrementum, quòd eo, de quo meminimus, lo-
 co, equestrem ordinem annos prope L continuos iudicasse dixit:
 cum anni tantum XLIII fuerint. sed oratoriæ licentiæ datur, ut
 res in narrando plus interdum, quàm concedit ueritas, efferatur.
 quanquam historici quoque, qui quidem arctioribus tradendæ ue-
 ritatis legibus astringi uidentur, id sibi iuris arrogarunt. nam Li-
 uius, Vrbs, inquit, à Romulo uiribus datis, tantum ualuit, ut in
 XL deinde annos tutam pacem haberet. cum Numæ regnum in-
 telligat, quod per annos XLIII, perpetua pace, durauit. Tertius
 restat de tribus, quos proposui, locus in Cicerone considerandus.
 nam cum in ea pro C. Cornelio dixerit, Lege Plotia primum sena-
 tores cum equitibus Romanis iudicasse; falsum hoc esse, possit a-
 liquis obiicere; cum biennio ante M. Liuius Drusus, quod Appia-
 ni uerbis iam ostendimus, legem tulerit, ut cum equitibus senato-
 res pari numero iudicia tractarent. Respondemus: utrumque ue-
 rum esse; & lege Plotia primum senatores cum equitibus iudicaf-
 se; &

De legibus

se; & Drusum tamen ante rogationem tulisse, ut cum equitibus senatores iudicarent. nam etsi lege Drusi ita sancitum est: tamen, quod ea lex iussit, propterea non est obseruatum; quod eo ipso anno L. Marcius Philippus consul, inimicus Drusi, obtinuit à senatu, ut leges eius omnes uno s. c. tollerentur: itaque decretum est, contra auspicia esse latas, neque iis populum teneri. hoc tum à Pediano in commentario Cornelianæ, tum à Cicerone in lib. de legibus II, & in oratione pro domo sua proditum est. ut omittam quod in Appiani notauimus historia, equites, Druso interfecto, lege Gracchi iudicasse de iis, quorum dolo malo bellum Italicum esse commotum diceretur, idq; ex ea lege, quam de maiestate Q. Varius tribunus pl. eo anno rogauit. quo in nomine mendosi sunt ii, qui typis impressi ueneunt, Appiani libri. nam, pro Q. Varius, habent Q. Valerius: cum legem illam de maiestate non à Valerio, sed à Vario latam esse, Valerius, Cicero pro C. Cornelio, & in Bruto, & Pedianus declarent. Venio nunc ad leges ipsas, quas x nominaui, Semproniam, Seruiliam, Liuiam, Plotiam, Corneliā, Vatiniam, Aureliam, Pompeiam, Iuliam, Antoniam: quibus de singulis ita nobis est agendum, ut, temporum ratione seruata, prima quæque cognoscatur. Ante C. Sempronii Gracchi tribunatum soli senatores, uetustissima, ut opinor, Romuli lege, iudicabant, exceptis causis, in quibus de pecuniis ob iudicandum captis ageretur. nam de his ad equites quæstio pertinebat. idq; non antiquum fuisse, sed tributum esse equestri ordini ætate Ti. Sempronii Gracchi, Tiberii & Caii patris, qui etiam senatum, quod id fieri passus esset, reprehenderit, cum futuras ex eo publicas discordias calamitatesq; prædiceret; Appianus historiæ suæ lib. I scriptum reliquit. C. Gracchus, Tiberii filius, tribunus pl. Cn. Domitio Ahenobarbo, C. Fannio Nepote cos. legem tulit, quam paucis ante annis frater eius Tiberius ferre conatus erat, ut equites soli iudicarent. sic enim, contra quàm Plutarchus prodidit, ex Velleio, Pediano, Appiano, Cicerone ipso probaui. Postea Q. Seruilius Capiō consul, qui deinde cum Cimbris male pugnaui, legem rogauit, ut cum equitibus, qui antea lege C. Gracchi soli iudicauerant, etiam senatores iudicarent. hanc tamen legem, quam & Cassiodorus, & Obsequens, & Cicero ipse latam significant, non multo post esse abrogatam, ex eo suspicor, quod paucis post annis C. Norbanum,

C. Norbanum, quo accusante Cæpio damnatus erat, non ab equitibus, & senatoribus, sed à solis equitibus esse iudicatum, Cicero lib. II de oratore declarat his uerbis. Animos equitum Romanorum, apud quos tum iudices caussa agebatur, ad Q. Cæpionis odium, à quo erant ipsi propter iudicia abalienati, renouabam, atque reuocabam. Facit etiam mecum illa ratio, quòd, cum M. Liuius Drusus tribunus pl. Philippo & Cæsare cos. legem tulerit, ut cum equitibus senatores iudicarent; quod proxime, cum de lege Liuiæ ageretur, probabimus: manifestum est, solos equites ante Drusi tribunatum iudicasse. Præterea, scriptum est apud Cicero- nem in oratione pro C. Cornelio, non ante legem Plotiam senatores cum equitibus iudicasse. at, legem Plotiam Pompeio Strabone, & Porcio Catone cos. latam esse, Pedianus docet. ex quo, legis Seruiliæ de communicandis inter equites & senatores iudiciis nullam habitam esse rationem, ac ne Liuiæ quidem, quæ id sanxit, facile est cognoscere. Post Cæpionem M. Liuius Drusus tribunus pl. eius Drusi filius, quo tribuno pl. ad labefactandam C. Gracchi potentiam senatus usus erat, L. Marcio Philippo, Sex. Iulio Cæsare cos. tulit ad populum, ut cum equitibus senatores causas cognoscerent. cuius legibus, Philippo consule referente, s. c. sublati, in eundem, quo ante fuerat, statum re iudiciaria restituta, soli equites ex lege Gracchi iudicarunt. Anno deinde interiecto, M. Plautius Siluanus tribunus pl. Cn. Pompeio Strabone, L. Porcio Catone cos. qui fuit annus belli Italici secundus, tulit ad populum, ut singulæ tribus è suo numero quinos denos, per annum iudicatu- ros, suffragio crearent. quo factum est, ut senatores quoque in eo numero essent, & quidam etiam ex ipsa plebe. Post uictor Sylla, dictator primus reip. constituendæ causæ factus, infensus equitibus, quia pro Cinnanis partibus steterant, legem tulit, ut nemo, nisi qui senator esset, iudicare posset. quod ante C. Gracchi tribunatum fieri solitum esse, diximus. Sylla mortuo, quod ille sanxerat, per annos XI seruatum est, hoc est, usque ad Cn. Pompeii & M. Crassi primum consulatum: quo anno L. Aurelius Cotta prætor populum rogauit, populusq; iussit, ut tres ordines, senatores, equites, tribuni ærarii simul iudicarent. tamen si, & centurionibus aditum ad res iudicandas patuisse hac ipsa lege, & sequentibus Pompeia, Iulia, censu tamen præfinito, Cicero docet

K in

De legibus

in Philippica I. uidetur autem Paterculus, nisi mendosi libri sunt, neque tempus, neque sententiam huius legis perfecte nouisse: qui lib. II legem à Cotta latam per id tempus significet, quo Gabinus tribunus pl. rogationem tulit, ut Pompeius contra piratas summo cum imperio mitteretur. quod falsum esse constat. nam Gabinus biennio post Pompeii consulatum, hoc est Pisone & Glabrione cos. eam legem tulit: quod & Velleius ipse asserit, & inde facile licet existimare, quod, absoluto bello piratico, statim C. Manilius tribunus pl. tulit ad populum, ut Mithridaticum bellum Pompeio mandaretur. id Plutarchus Velleiusq; confirmant. Maniliam autem legem Cicerone prætore latam esse, luculenta ipsius oratio declarat. porro autem Ciceronem gessisse præturam Lepido & Tullo cos. qui fuit annus post Pisonis & Glabrionis consulatum proximus, quis est qui ignoret? testem habemus Pedianum: ut alia, quæ facile probarent, argumenta prætermittam. tulit igitur de piratico bello rogationem Gabinus tribunus pl. Pisone & Glabrione cos. at Cotta, cum rogationem de iudiis eo anno tulerit, quo designatus ædilis Cicero Verrem accusauit, defendente Hortensio consule designato; plane uidetur eo anno tulisse, quo Pompeius & Crassus consules fuerunt. quod aperte Dio narrat. Hoc de tempore. Quod ad sententiam attinet; non uideo, qui probari possit id, quod idem narrat, Cottam iudicandi munus inter equites & senatum æqualiter esse partitum; cum, eam potestatem non his modo, sed præterea tribunis ærariis esse permissam, sexcenti loci demonstrerent. nisi forte illud (libenter enim tueor antiquitatem) Aequaliter inter utrumque ordinem partitus est, ideo Paterculus dixit, ut significaret non solum senatum, ut antea, sed equestrem pariter ordinem post legem Aureliam iudicasse: ut ærarios tribunos, qui deinde cum senatoribus & equitibus iudicarunt, etsi non nominauit, non tamen exclusisse uideatur. quo modo & Ciceronem lib. V in Verrem locutum uidemus. ait enim, cum Cottæ legem significet. Iudicium de iudicibus, & de te futurum est. at quo tempore futurum est? nempe eo, cum populus R. aliud genus hominum, atque alium ordinem ad res iudicandas requirit, nempe ea lege de iudiis iudicibusq; nouis promulgata. Alium ordinem, dixit, cum tamen non uno de ordine, sed de tribus, hoc est, de senatoribus, equitibus, tribunis ærariis in ea lege mentio fieret. Eodemq;

demq; modo, cum, censorum iudicia rescissa esse iudicum sententiis, significare uellet, in oratione pro Cluentio locutus est. Senatores, inquit, equitesq; Romani in compluribus iam reis, quos contra leges pecunias accepisse subscriptum est, suæ potius religioni, quàm censorum opinioni, paruerunt. et in Diuinatione: Iudiciorum leuitate ordo quoque alius ad res iudicandas postulatur. Pedianus etiam in commentario II orationis in Verrem, Cottam, inquit, prætorem significat, qui legem promulgarat de restituendis equestri ordini iudiciis. cum tamen Cottæ lex non de uno equestri ordine, sed de senatoribus, equitibus, tribunis ærariis mentionem faceret. Plutarchus etiam in Pompeio iudicia ad equites ait esse translata: cum tamen lege Cottæ inter tres ordines essent communicata. Quòd si quis putat in uno ordine, quem Cicero ad res iudicandas requiri significat, simul cum equitibus tribunos ærarios intelligi; opinione fallitur. nam senatores, equites, tribuni ærarii, non ordines duo, sed tres à scriptoribus antiquis appellantur. itaque Pedianus in commentario Cornelianæ, L. Cotta, inquit, lege sua iudicia inter tres ordines communicauit, senatum, equites, tribunos ærarios: et in commentariis duarum orationum, in Pisonem, in extremo; pro Milone, in principio. Lex Vatinia secuta est. tulit enim eam, ut opinor, P. Vatinius tribunus pl. Cæsare & Bibulo cos. qua sententia, nondum inuenire potui: sed fuisse popularem, cum Vatinius senatum, senatus illum uehementer oderit, facile possum existimare. Lex Pompeia, quam tulit Cn. Pompeius Magnus in consulatu II, nihil ab Aurelia de tribus ordinibus discrepabat, (nam postea de tribus ordinibus iudicantibus exempla multa sunt, maximeq; apud Pedianum) sed ex amplissimo censu, è centuriis legi iudices iubebat. Iulia, quam C. Iulius Cæsar, rerum potitus, tulit, iudicia ad duo genera iudicum redegit, equestrem ordinem, ac senatorium; tribunos ærarios, quod erat tertium, sustulit. Antonia consularis, M. Antonii, qui III uir fuit, hoc sanxit, ut ad duas iudicum decurias accederet tertia è centurionibus, hoc est, ut cū equitibus, & senatoribus (tertium enim ordinem, tribunos ærarios lex Iulia sustulerat) centuriones iudicarent. quod genus hominum ne superiores quidem leges, Iulia, Pompeia, Aurelia, iudicandi iure excluderant; sed præscripserant, quo censu eos esse oporteret: sicuti senatoribus quoque, & equitibus, & tribunis ærariis census erat

De legibus

præfinitus: cum in iudice, ut ait Cicero, & fortuna spectari deberet, & dignitas. Antonii uero lex plus æquo impudens & dissoluta, quæ rationem census nullam habuit, omnibus, quicunque ordinem duxissent, iudicandi potestatem permisit. atque hanc Antonii legem de tribus decuriis non esse abrogatam, cum ille hostis iudicatus est, cum eiusdem legem de sacerdotiis abrogatam esse supra docuerim, è Suetonio cognoscitur: qui in Augusto ita scripsit: Ad tres iudicū decurias quartam addidit, ex inferiore censu, quæ ducenariorum uocaretur, iudicarentq; de leuioribus summis. Hæc de ordine iudiciorum, pro uariis legibus, uario. De numero autem iudicum, lex Gracchi CCC fecit, omnes ex equestri ordine, totidem, quot antea senatores iudices fuerant: lex Drusi CCC equites, & CCC senatores, numero pari: lex Plautii DXXV: iussit enim è singulis tribubus, quæ XXXV erant, quinos denos creari: lex Syllæ CCC, omnes ex ordine senatorio. lex Aurelia cum lege Syllæ de numero, ut opinor, congruebat, cum in ordinibus discreparet. nam libro epist. fam. VIII de iudicibus CCC, cum lex Aurelia seruaretur, mentionem fieri uideo. quod si ita est: auctum deinde numerum esse lege Pompeii, uere dicemus: quia Velleius auum suum inter CCCLX à Pompeio lectum esse narrat. eundemq; numerum Plutarchus in Pompeio tradidit. lex Cæsaris, cum de tribus ordinibus unum, ut diximus, sustulerit; numerum simul iudicum, ut ego sentio, commutauit. lex Antonii cum tertiam decuriam addiderit; satis liquet, eorum, qui res iudicarent, ampliorem numerum esse factum. quem rursus & ab Augusto esse auctum, cum ad tres decurias quartam addidit, facile cognoscitur. De iudicum ætate legem fuisse, ne quis intra XXX ætatis annum iudicaret, facile possum ex eo coniecere, quod Suetonius de Augusto scripsit: Iudices à XXV ætatis anno elegit, id est, quinquennio maturius, quàm solebant. Callistratus quidem iurisconsultus, lege Iulia cautum esse, ait, ne minor annis XX iudicare cogeretur, ne ue minorem annis XX compromissarium iudicem liceret eligere. Sanxit idem eadem lege, ut opinor, de numero patronorum. nam ante L. Domitii Ahenobarbi, & Ap. Claudii Pulchri consulatum raro quisquam pluribus, quàm quatuor, patronis usus erat. his consulibus M. Scaurū, de repetundis accusatum, sex defenderunt. eoq; progressa res est, ut eadem caussa post bella ciuilia non nunquam à duodecim patronis

nis ageretur. cui licentiæ, ut in Pediano scriptum est, C. Cæsar dictator lege modum imposuit. Et fortasse idem Cæsar, qua in lege de numero patronorū, in eadem tulit de ratione iudicandi. quod Gellius lib. XIII, cap. II significare uidetur his uerbis: Atque in rerū quidem diffinitionibus, comperendinationibusq; & aliis quibusdam legitimis in rebus ex ipsa lege Iulia, & ex Sabini Massurii, & ex quorundam aliorum iuris peritorum commentariis commoniti sumus. Legimus etiam apud Priscianum de lege Latoria, quæ minorem annis xxv stipulari uerbat. De diebus quoque iudiciariis leges nominat Vlpianus his uerbis: Si feriatis diebus fuerit iudicatum; lege cautum est, ne iis diebus iudicatum sit, nisi ex uoluntate partium; & quod aliter aduersus ea iudicatum erit, ne quis iudicatum facere, ne ue soluere debeat; ne ue quis, ad quem ea de re aditum erit, iudicatum facere cogat. In hoc ordine locum habent leges illæ, quæ & de personis, quæ facinus iudicare possent, & de causis, in quibus possent, tum de indiciis, deq; testimonii dicendi potestate agebant. Ac primum illud ponatur, legibus eos iure iudicandi exclusos non esse, quos ignominia censores notassent. id Cicero significat his uerbis in oratione pro Cluentio. In omnibus legibus, quibus exceptum est, de quibus causis aut magistratum capere non liceat, aut iudicem legi, aut alterum accusare, hæc ignominia causa prætermissa est. timoris enim causam, non uitæ pœnam, in illa potestate esse uoluerunt. et ibidem, paulo post, Prætores urb. qui iurati debent optimum quenque in selectos iudices referre, nunquam sibi ad eam rem censoriam ignominiam impedimento esse duxerunt. postea tamen inductum lege Iulia, ut senatu moti iudicare non possent. quod & lege Cassius, de senatoribus, traditū est; & Paulus quoque, ut proxime docebimus, significat. Turpi autē iudicio damnatis ademptam esse iudicandi potestatem, idem Cicero in eadem oratione, paulo ante, demonstrat. Quod si, inquit, illud iudicium putaretur: ut ceteri, turpi iudicio damnati, in perpetuum omni honore, ac dignitate priuantur; sic hominibus ignominia notatis neque ad honorē aditus, neque in curiam reditus esset. turpia uero, famosaq; iudicia erant, calumnia, præuaricationis, furti, ui bonorū raptorum, iniuriarum, de dolo malo, pro socio, mandati, tutelæ, depositi, & alia quædam à Iuliano memorata digest. lib. III. Famosos etiam, non minus, quàm qui turpi iudicio damnati essent, Pegasus & Ner-

ua

De legibus

ua filius eos iudicarunt, qui quæstus causa in certamina descendissent, aut propter præmium in scenam prodiissent. athletas autem, quia ludicram artem non facere, sed uirtutis gratia exerceri uiderentur, infamia liberabant Sabinus & Cassius. quæ scripta sunt apud Vlpianum. Præterea, cum ab eodem ita traditum sit lib. digest. XLVIII; qui iudicio publico damnatus esset, eum ius accusandi non habuisse, nisi si libertorum, uel patronorum suorum mortem, uel rem suam exequeretur; consuetudinem uidetur potest, eundem iudicandi munere exclusum, quanquam ad rationem accedit auctoritas. nam ita scriptum postea comperi apud Marcellum iurisconsultum. Omnes etiam de ui priuata damnatos iudicare lex Iulia prohibebat. quæ de re Martianus his uerbis lib. dig. XLVIII: De ui priuata damnati pars tertia bonorum ex lege Iulia publicatur: & cautum est, ne senator sit, aut decurio, aut ullum honorem capiat; ne uero in eum ordinem sedeat, ne uero iudex sit. Huc illa pertinent, quæ tradita sunt à Paulo iurisconsulto: quæ seruata credimus etiam reip. temporibus. nihil enim à iure, aut æquo dissentiunt. Quidam, inquit, lege impediuntur, ne iudices sint; quidam moribus, quidam natura: natura, ut surdus, mutus, & perpetuo furiosus, & impubes, quia iudicio carent: moribus, ut femina, & serui; non, quia non habeant iudicium; sed, quia receptum est, ne ciuilibus fungantur officiis: lege, qui senatu motus est. qui uero possunt esse iudices, nihil interest, in potestate, an sui iuris sint. Cum iudicibus recte coniunguntur testes. itaque subscribemus ea, quæ de testimonio dicendo idem Paulus tradidit. Lege, inquit, Iulia, & Papia iudiciorum publicorum cauetur, ne cui inuito denunciatur, ut testimonium dicat aduersus focerum, generum, uirtricum, priuignum. Cassius etiam Longinus; cuius libri non extant; sed eorum testimonio Martianus digestorum lib. I utitur; putabat, ei, qui ob turpitudinem senatu motus, nec restitutus esset, non licere neque iudicare, neque testimonium dicere: quia lex Iulia repetundarum ea fieri uetaret. Calumniæ damnatis publico iudicio quid licuerit, satis aperte Papiniani præclara sane uerba demonstrant. Quæsitum, inquit, scio, an in publicis iudiciis calumniæ damnati testimonium iudicio publico perhibere possint. sed neque lege Rhemmia prohibentur; & leges Iuliæ de ui, repetundarum, peculatus eos homines testimonium dicere non uetuerunt. ueruntamen, quod legibus omissum est,

est, non omittetur religione iudicantium: ad quorum officium pertinet, eius quoque testimonii fidem, quod integræ frontis homo dixerit, perpendere. Mulieribus quoque uidetur licuisse testimonium dicere: siquidem, non licuisse de adulterio damnatis, Paulus indicat his uerbis: Ex eo, quod prohibet lex Iulia de adulteriis testimonium dicere condemnatam mulierem, colligitur, etiam mulieres testimonium in iudicio dicendi ius habere. Dictum est de iudicio, & testimonio: superest de iudicio. Senatori iudicium profiteri saluis legibus non licebat. aliis impunitas dabatur, nec tamen omnibus in causis, sed prodicionis, maiestatis, & si quid huiusmodi: in causa repetundarum non dabatur: itaque nec per indices agi solitam esse legimus. Non est ab hoc genere aliena Memmia lex; quæ eorum, qui reip. causa abessent, recipi nomina uetabat. itaque C. Cæsar, cum in prouinciam, peracto consulatu, abiisset, & ab L. Antistio tribuno pl. Romæ appellatus esset, appellato collegio obtinuit, cum reip. causa abesset, reus ne fieret. at M. Antonius, ille disertus, L. Crassi æmulus in oratoria laude, cum, quæstor in Asiam proficiscens, Brundisium iam peruenisset; literis certior factus, incesti se postulatum apud L. Cassium prætorem, cuius tribunal, propter nimiam seueritatem, scopulus reorum putabatur, legis Memmiæ beneficio uti noluit; ne sibi male conscius uideri posset; statimque in urbem recurrit, & causa dicta, absolutus est. hanc legem Cicero significat in oratione in Vatinius, cum ait: Cum tibi, utrum uelles, liceret. poterat enim Vatinius, cum legatus esset, iudicium recusare. quod ei per legem Memmiam licebat. Cur igitur, inquit, Cicero, cum legationis perugio, quod lex Memmia tibi dabat, uti nolueris; postea, ne causam diceres, tribunos pl. appellasti? Non abhorret à legibus de iudiciis lex illa, quam C. Calpurnio Pisone M. Acilio Glabrione cos. C. Cornelius tribunus pl. tulit, ut prætores ex edictis suis perpetuis ius dicerent: cum antea, ut quisque auaritia, aut ambitione ducebatur, uarie ius dicere consueissent. In iure ciuili & coniugia sunt: de quibus illa fuit admodum præclara lex, quam à Romulo latam Dionysius & Plutarchus prodidit, ut uxor uiro pecuniarum sacrorumque omnium esset socia, eique, si sine liberis & intestato diem obiisset, heres esset; si filios reliquisset, æqualem cum iis partem possideret: quæ si aduersus

uirum

De legibus

uirum delinqueret, uir ipse cum propinquis eam iudicaret, &, si aut impudica fuisset, aut uenefica in liberos suos, aut etiam uinum ebibisset, (hæc enim omnia Romulus capitalia esse uoluit) morte multaret, uel, si mallet, diuortium faceret. quod si quis alia de causa uxorem repudiasset; eius bonorum partem ad uxorem pertinere, partem uero Cereri sacram esse iussit. diis porro inferis, qui diuortium faceret, sacrificare uoluit. ita probas mulieres, & uiro obsequentes, tum præmio, tum pœna Romulus affecit. quæ lex ad matrimonii concordiam ita ualuit, ut per annos DXX nullum diuortium in urbe fuerit. mores enim ad ingenium uiri unaquæque fingeat, eiq; in omnibus rebus morigera fidem officiumq; præstabat. Legem etiam uideo fuisse, illam quidem paulo seueriorem, sed ad augendam uiribus ciuitatem utilissimam, ut, quicumque per ætatem uxorem ducere possent, omnes ducerent, quæq; genita essent, educarent. qua lege factum est, ut maximis cladibus ciuitas affecta, præsertim secundo Punico bello, nunquam tamen penitus exhauriretur, sed novos semper exercitus summitteret; adeo, ut extremis illius belli temporibus, post multas legiones occisione cæsas, tamen supra C millia ciuium Romanorum in armis fuerit. Post Romulum Numa quiddam lege sanxit, quod ad tuendam matrimonii fidem ac religionem pertinuit. scripsit enim hæc in pellices; quæ legimus in Gellio. Pellex ædem Iunonis non tangito. si tangit; Iunoni, crinibus demissis, agnum feminam cædito. Fuit illa quoque lex de coniugiis, quam in XII tab. X uiri scripserunt, ne patriciis liceret cum plebe connubio iungi. quod eo consilio factum est, ne per nuptias reconciliati iisdem animis contra X uiros, qui deponere imperium nolebant, pro libertate consentirent. quam legem paucis post annis C. Canuleius tribunus pl. abrogauit, lege lata, ut patrum & plebis promiscua connubia essent. in quo tamen patres acerrime repugnarunt; qui contaminari sanguinem suum, confundi iura gentium ea rogatione arbitrabantur; cum tamen ad ciuium concordiam, in qua ciuitatum sita salus est, nihil esset utilius. Legem etiam uideo fuisse, ne libertinam ingenuus, aut libertinus ingenuam uxorem duceret. nam S. C. Hispalæ Feceniæ libertinæ concessum esse scribit Liuius, ut ei nubere ingenuo liceret. quo patet, libertinis cum reliquis ciuibus connubia non fuisse. Postea lege Pæpia
cautum

cautum est, ut omnibus ingenuis, præter senatores, eorumq; liberos, uxores libertinas habere liceret. hoc Iulianus: addit Vlpianus: Si senator libertinam habuerit uxorem; quamuis interim uxor non sit, attamen in ea conditione est, ut, si amiserit dignitatem, uxor esse incipiat. Et Paulus ex lege Iulia subiungit: Qui senator est, qui uel filius, nepos, pronepos uel, ex filio, uel ex filia natus; cuius eorū est, erit uel, ne quis eorum sponsam, uxorem uel sciens dolo malo habeto libertinam, aut eam, quæ ipsa, cuius uel pater, mater uel artem ludicram facit, fecit uel: ne uel senatoris filia, neptis uel, ex filio, proneptis uel ex nepote, filio nato, nata, libertino, ei uel, qui ipse, cuius uel pater, mater uel artem ludicram facit, fecit uel, sponsa, nupta uel sciens dolo malo esto. Propterea reprehēdit in orationibus Cicero M. Antonium, qui libertini hominis, Q. Fadii, filiam uxorem duxerat. Non omitendum quod apud Callistratum legimus; v legibus mulieris damnatæ dotem publicatam, maiestatis, uis publicæ, paricidii, ueneficii, de sicariis. Nunc agamus de iure ac libertate ciuium R. quo de genere primum Sacratæ legibus, deinde XII tab. sancitum est, ut neque priuatis hominibus leges irrogarentur, hoc est, ne priuilegia ferri possent, nec de capite ciuis, nisi comitiis centuriatis, rogari liceret. quod utrunque memorat Cicero in oratione pro Sex-
tio, & in suas leges lib. de legib. III transtulit. Legem autē de prouocatione ad populum ter à Valeria familia latam animaduerti; sed tertio M. Valerius consul diligentius eam sanxit, adscripta pœna, si quis eum, qui prouocasset, uirgis cecidisset, securi uel necasset. at qua pœna? hac una, improbe fecisse. ea tum probitas erat, ut ignominia non minus, quàm acerbissima pœna, timeretur. Postea lex Porcia, quam fortasse M. Porcius Cato, ille maior, in consulatu tulit; etsi neque Plutarchus in eius uita, neque alius, quod meminerim, ullam mentionem facit; ne ciuem Romanum uerberari, necari uel liceret; si quis fecisset, graui pœna puniretur. qua in sententia leges alias deinde scriptas esse, significat in coniuratione Catilinæ Salustius, cum ait: An, quia lex Porcia uetat? at aliæ leges item condemnatis ciuibus non animā eripi, sed exilium permitti iubent. propterea uidemus in criminum suspitione seruos ad eliciendam ueritatem torqueri solitos esse, cum de liberis hominibus quæstionem haberi leges uetarent. quo fiebat, ut ii, qui aliquid supplicio dignum commiserant, seruos, si quos eius culpæ participes, aut conscios habebant,

L

bebant,

De legibus

bebant, statim liberarent. liberos enim torqueri sciebant non lice-
 re. quod cum magistratus, qui iudicio præerat, antequam fieret, su-
 spicaretur, mittebat ad eum, cuius nomen delatum erat, ut seruos
 in sua potestate haberet, (sic enim loquebantur) hoc est, ne manu-
 mitteret; cum eos ad confitendam ueritatem tormentis cogi uellet:
 hinc illud apud Liuium lib. VIII. Eo anno Minucia Vestalis suspecta
 primo propter mundiorem iusto cultum, insimulata deinde apud
 pontifices ab indice seruo, cum decreto eius iussa esset sacris abstinere,
 familiamq; in potestate habere; facto iudicio uiua sub terram ad
 portam Collinam dextra uia strata defossa Scelerato campo. cum
 enim pontifices fore suspicarentur, ut Minucia, indicium metuens,
 seruos, à quibus prodi posset, manumitteret; habere eam in potesta-
 te familiam iusserunt. ideo & Pedianus in commentario orationis
 pro Milone, Pompeium ad Milonem significat misisse, ut quosdam
 seruos, quorum opera in occidendo Clodio usus esse dicebatur, in
 potestate sua haberet: Milonem respondisse, ex iis seruis, quos no-
 minasset, partim neminem se unquam habuisse, partim manumisisse.
 postea quoque lege Iulia Augusti cautum est, ne serui uxoris adul-
 terij accusatæ intra LX dies manumitterentur: idemq; in seruis pa-
 tris eius constitutum. de quo apud iurisconsultos. Tulit & C. Grac-
 chus tribunus pl. ne de capite ciuium Romanorum iniussu populi
 iudicaretur. qua de lege, miror, cur neque Plutarchus, neque Pa-
 terculus, neque Liuius, cum Gracchi ceteras leges comemorarent,
 uerbum ullum fecerint. Fuerunt hoc de genere & illa, quæ ad mo-
 deranda iudicia legibus esse constituta, significat Cicero in oratione
 pro domo sua: ne pœna capitis cum pecunia coniungeretur: ne nisi
 prodicta die quis accusaretur: ut ante magistratus accusaret inter-
 missa die, quàm multam irrogaret, aut iudicaret: ut esset accusatio
 trinum nundinum, prodicta die, qua iudicium esset futurum. repen-
 tina enim accusatione reos opprimi, iniquum, & graue uisum est.
 Fuere & de sepulcris leges: quorum iura Romanis sacra fuisse, anti-
 quæ legis illa uerba declarant: Vbi corpus demortui hominis con-
 das, sacer esto: et illa; Ne quis uestibulum aditum ue ad sepulcrum
 usu capito, neu bustum uiolato: et illa; Deorum manium iura san-
 cta sunt. quod & postea seruatum esse, irrogata uiolantibus pœna,
 posteriores iurisconsulti Vlpianus, Paulus, Caius tradiderunt. In ur-
 be sepeliri, neque ante XII tab. usitatum fuit, & deinde lex ipsa XII
 tab.

tab. uetuit his uerbis: In urbe ne sepelito, ne ue urito. id autem opinor, tum ut ab oculis uiuentium cadauera, quæ mœstitiâ animis inferunt, quamprimum amouerentur; tum ne cœlum illud urbanû, unde proxime spiritus duceretur, tetro putrescentium corporum nidore corruptum, pestem aliquam importaret. quod autem à docto & diligenti uiro scriptum est, ante XII tab. consuetudinem fuisse, ut intra urbem mortui sepelirentur: id referri uidetur à Cicerone, qui lib. II de legibus ita scriptum reliquit. Credo fuisse aut eos, quibus hoc ante hanc legem uirtutis causa tributum est, ut Poplicolæ, ut Tubertò; quod eorum posteris iure tenuerunt; aut eos, si qui hoc, ut C. Fabricius, uirtutis causa soluti legibus, consecuti sunt. plane significat, etiam ante XII tab. intra urbem sepeliri non licuisse; siquidem Poplicolæ & Tuberto uirtutis causa tributum est. quod ipsum & Dionysius confirmat, & Plutarchus in Poplicola, his fere uerbis, aut certe hac sententia: Decretum est, ut intra urbem iuxta Veliam sepeliretur, utiq; eius posteris idem ius esset: qui tamen ætate nostra eo iure non utuntur: sed, ubi quis de genere Valerio mortuus est, cadauere in eum locum, ubi Poplicola sepultus est, delato, extollitur accensa fax; deinde eadem demittitur. quo genere quandam uetusti iuris imaginem ostendunt: ut perspicuum sit, eo se, si uelint, uti posse. Seruius quidem, ubi exponit illud Virgilii, Aen. lib. XI. Finitimos tollunt in agros, urbiq; remittunt, Duiliò consule primum à senatu decretum esse ait, ne quis in urbe sepeliretur. quod imperatores quoque Adrianus, & Antoninus Pius renouarunt: & fuisse hanc ueterem consuetudinem, patet in l. mortuorum, c. de religiosis, & sumptibus funerum. Datum etiam decreto senatus iis, qui triumphassent, ut, cum eorum corpora extra urbem cremata essent, in urbem ossa & cineres referrentur, humiq; mandarentur. hoc Pyrrhonem Lyparæum scripsisse tradit Plutarchus in libro Romanarum rerum. Sumptum in mortuis & lamentationem XII tab. sustulerunt. quo utrunque in genere stulte nimis & pueriliter hodie peccatur. cetera, quæ scripta sunt in XII tab. quæ ad hoc genus pertinent, quia lib. II de legibus à Cicerone commemorantur, huc transferre non necesse duximus. illa, quæ ab aliis scripta obseruauimus, de sepulcrorum ratione adscribemus; ac primum hoc, in agris sepulcra fuisse; in agri uenditione, iura tamen sepulcrorum penes eum, qui uenderet, remansisse; eumq; sibi tantum agri in uenditione excepisse, quantum adeundo sepulcro

De legibus

fatis esset: quod qui non faceret, ei summo probro ac turpitudini fuisse. unde illud in oratione Ciceronis pro Roscio Amerino: Cui de tanto patrimonio ne iter quidem ad sepulcrum patrum relictum est. hac autem ipsa de re Pomponius iurisconsultus ita scripsit: Dominis fundorum, in quibus sepulcra fecerint, etiam post uenditos fundos adeundorum sepulcrorum ius est. tum igitur in agris, tum iuxta militares, uel publicas uias uel cadauera, uel, si cremata essent, cineres condebantur. nam & sepeliendi cadaueris, & cremandi consuetudinem fuisse, indicat illud in XII tab. In urbe ne sepelito, ne ue urito. et illud, quod in XI de legibus scripsit Cicero: P. Cornelium Africanum sepultum esse, L. Cornelium Syllam primum è Corneliis cremari uoluisse. Sepeliri autem antiquius fuisse, quàm cremari, Plinius lib. VII, cap. LIII declarat his uerbis: Ipsum cremari, apud Romanos non fuit ueteris instituti. terra condebantur. at, postquam longinquis bellis obrutos erui cognouere, tunc institutum. et tamen multæ familiæ priscos seruauere ritus: sicut in Cornelia nemo ante Syllam dictatorem traditur crematus, idq; uoluisse ueritum talionē, eruto C. Marii cadauere. hæc Plinius: cui, quod ante XII tab. in more fuerit, id uetus non uideri, mirum est. Cremandi consuetudo usque ad Antoninorum imperatorum ætatem perdurauit. rursus terra condi cœptum est. Illud ex Festo Pompeio scitu dignum, ante, quàm cadauer ad pyram deferretur, digitum abscissum esse; ut, reliquo corpore perusto, ad eum iusta fierent. Cadauere pyræ imposito, qui propinquitate mortuo deuinctus arctissime fuerat, is auersus rogo facem accensam inferebat. Legimus & illud, maiores natu, ad tubas; minores, ad tibias, ad sepulcrum esse delatos; qui uero claris maioribus orti essent, his eorum imagines in funere prælatas: addit Seruius Honoratus, ante sepulcrum aram fieri solitam. quod & Cicero in epist. ad Att. significat. tametsi non aram modo, sed fanum filiæ mortuæ cogitabat. Signum hominis sepulti non unum fuit. nam & lapis, & regula, & cespes, & tumulus, & cippus sepulturæ locum indicabant. De fœnore leges multæ fuerunt ad avaritiam coercendam. unam Liuius lib. VII nominat; quam C. Marcio, Cn. Manlio cos. duo tribuni pl. M. Duilius, L. Menenius de unciario fœnore tulerunt. et aliquot post annis tulisse ad populum L. Genucium tribunum pl. ne fœnerari liceret, idem Liuius à quibusdam proditum esse tradit. sed; ut est hominum genus lucri appetens; cum uia fraudis inita esset, ut

in

in focios, qui non tenebantur iis legibus, nomina transcriberentur, M. Sempronius tribunus pl. L. Cornelio, Q. Minucio cos. legem tulit, ut cum sociis ac nomine latino pecuniæ creditæ ius idem, quod cum ciuibus Romanis, esset. De creditis pecuniis, ob unius fœneratoris libidinem & crudelitatem, qui nexum debitorem formosum adolescentem, de stupro recusantem, uerberibus lacerauerat, C. Petilius, L. Papilius Mugillanus lege sanxerunt, ne quis, nisi noxam meruisset, donec poenam lueret, in compedibus aut in neruo teneretur: pecuniæ creditæ bona debitoris, non corpus obnoxium esse. idem à posterioribus imperatoribus sancitum. Fœneratores autem olim quadrupli, fures dupli. condemnatos, ex quo patet peiorem apud ueteres habitum fœneratorem, quàm furem, apud Catonem in lib. de re rust. scriptum est. Licinia consularis, à L. Licinio Lucullo Asiæ pro consule ad leuandam aræ alieno prouinciam lata, primum sanxit, ne supra centesimam iure fœnoris solueretur: deinde, ne maiores essent usuræ, quàm quibus ueteri iure pecuniæ antea credebantur: postremo, in quo debitoribus consultum est maxime, ne creditoribus à debitore fœnoris nomine plus liceret accipere, quàm quanta fructuum creditoris quarta pars esset. Sunt & illæ duæ de iure ciuili, Cæcilia Didia, Iunia Licinia, utraque consularis. Cæciliam Didiam tulerunt Q. Cæcilius Metellus, T. Didius cos. anno ab V. C. DCLV. Iuniam autem Liciniam D. Iunius Silanus, L. Licinius Murena cos. anno ab V. C. DCXC. nam & Cicero eam consularem uidetur agnoscere, cū ad Cæciliam Didiam adiungat: et, latam, Ciceronis ætate, indicant illa uerba in oratione v in Antonium: Vbi pœnæ recenti lege Iunia & Licinia? De Cæcilia Didia primum illud pono, quod uideo minus esse animaduersum; ab his consulibus non unam legem, sed duas diuersa sententia esse latas. id ego, cū Ciceronis loca contulissem, diligenterq; considerassem, facile potui conicere. nam in oratione pro domo sua ita scripsit: Quæ est quasi alia uis, quæ sententia Cæciliæ legis & Didia, nisi hæc, ne populo necesse sit in coniunctis rebus compluribus, aut id, quod nolit, accipere, aut id, quod uelit, repudiare? quibus uerbis hanc Cæciliæ Didia sententiā fuisse constat, ne diuersis de rebus lex ferretur. at in eadem oratione de alia Cæcilia Didia mentionem fieri, ex ea re, qua de Cicero loquitur, intelligo. loquitur autem de trinundino, quod in seruanda lege ferebatur, & M. Drusi leges, quòd in iis ferendis trinundini habita ratio non esset, sublatas

De legibus

sublatas à senatu significat: uerba sunt hæc: Hora fortasse sexta quæ-
stus sum in iudicio, cum C. Antonium, collegam meum, defenderẽ,
quædam de rep. quæ mihi uisa sunt ad illius miseri causam pertine-
re. hæc homines improbi ad quosdam uiros fortes longe aliter, at-
que à me dicta erant, detulerunt. hora nona illo ipso die tu es adopta-
tus. si, quod in ceteris legibus trinumnundinum esse oportet, id in
adoptione satis est trium esse horarum: nihil reprehendo. sin eadem
obseruanda sunt, ut decreuit senatus M. Drusi legibus, quæ contra le-
gem Cæciliam & Didiam latae essent, populum non teneri: iam intel-
ligis, omni genere iuris, quod in sacris, quod in auspiciis, quod in legi-
bus sit, te tribunum pl. non fuisse? Quid? illa, quæ scripta sunt in ora-
tione v in Antonium, non ne satis aperte declarant, legem Liciniam
de tempore sanxisse, quod in ferenda lege seruari oporteret? quæ,
quo res pateat illustrius, placet recitare. Tulerunt, inquit, tribuni pl.
de prouinciis contra acta Cæsaris, ille biennii, iste sexennii. num etiã
hanc legem populus R. accepit? quid? promulgata fuit? quid? non
ne ante lata, quàm scripta? non ne ante factam uidimus, quàm futurã
quisquam est suspicatus? ubi lex Cæcilia & Didia? ubi promulgatio
trinundinum? ubi pœnæ recenti lege Iunia & Licinia? quo in loco
quia Cæciliam Didiam cum Iunia Licinia coniungit, quæ iis, qui tri-
nundinum non seruassent, pœnas irrogabant; propterea lib. II epist.
ad Att. ubi Cæciliæ Didia pariter & Iuniæ Liciniæ mentio simul fit,
de hac Cæcilia Didia, quæ tempus legum latoribus definiebat, non
de illa, quæ diuersis de rebus legem ferri uetabat, opinor intelligen-
dum. Nunc de Iunia Licinia agamus. hæc, non plane uideo, quid san-
xerit. nam, quod aiunt non nulli, eam, festis diebus cum populo agi,
aut legem aliquam promulgari, uetuisse: id à quo libro didicerint, nõ
inuenio. nemo enim ex iis, quorũ scripta æreis typis diuulgata circũ-
feruntur, id memoriæ mandauit. et, ut aperte meam sententiam pro-
nunciem, quam peritiores iudicabunt; uereor ne, quicũque ille fuit,
ex iis uerbis, quæ sunt in oratione pro Sextio, inductus sit in errorẽ.
sunt autem hæc. Iisdem consulibus sedentibus, atque inspectantibus,
lata lex est, ne auspicia ualerent; ne quis obnunciaret; ne quis legi
intercederet; ut omnibus fastis diebus legem ferri liceret; ut lex Ae-
lia, lex Fusia ne ualeret. quæ non ad Iuniam Liciniam, sed ad Fusiam
pertinent. Fusia enim non omnibus diebus fastis, sed iis tantum, qui
comitiales essent, leges ferri iubebat. quod iam antea in ordine le-
gum.

gum de comitiis, demonstratum est. quæ fuit igitur, dicet aliquis, Iunia Liciniæ sententia? forte hæc, ut iis, qui trinundinum in ferenda lege non seruassent, grauiore, quàm lex Cæcilia Didia sanxisset, pœnæ irrogarentur. id, puto, declarant illa uerba in Antonium; quæ etsi ante recitauimus, iterare tamen, quia postulat locus, non alienū uidetur. Vbi, inquit, lex Cæcilia & Didia? ubi promulgatio trinundinum? ubi pœnæ recenti lege Iunia & Licinia? Fuit alia Licinia non recens consularis, sed uetus tribunicia, & eiusdem generis Acbutia: quibus hoc rogatum, ut potestas nulla, curatio ue non modo iis, qui de aliqua curatione, aut potestate tulissent, sed nec eorum collegis, cognatis, affinibus mandaretur. Est autem illud animaduertendum; duas fuisse diuersis de rebus Acbutias leges, hanc, de qua meminit Cicero in agraria II, quæ cum Licinia idem sanxit; & illā, quæ XII tab. correxit, quam Gellius lib. XVI, cap. X nominat. Sunt & de iure ciuili Atinia, Furia, Fusia; de quibus meminit Cicero lib. in Verrem III. et de ciuium iure omnes fuisse, criminum capitalium publiciq; iudicii nihil attigisse, Padianus asserit. Atiniani de usucapionibus fuisse, ne furtiua res usu capi posset, sed eius rei perpetua esset auctoritas, tum iurisconsultorum libri, tum Gellius lib. XVII, cap. VII declarat. etiam lex Iulia, & Plautia, de quibus agatur inter crimina, quasi Atiniæ subscribentes, rem ui possessam usu capi prohibuerunt. Furiam eam fuisse puto, quam de testamentis esse latam, supra dixi; ne cui plus, quam M nummum, legari posset: alioquin eius, quod amplius legatum esset, quadruplum restitui debere. Fusia sententiam nemo significat. nisi si Furiam & Fusiam eandem putemus: quia Fusios, & Valesios, pro Furiis, Valeriis, ueteres dicebant. De ciuitate, quin uel à primis reip. temporibus latæ leges multæ sint, dubitare non licet: sed earum nomina uetustas deleuit. duarum extat mentio apud Liuium. prior sanxit; ut socii ac Latini, qui stirpem ex sese domi relinquerent, ciues Romani fieri possent. postea, cum ei legi fraudem socii facerent, altera lex, sociarum ciuitatum petentibus legatis, lata est, ne quis quem, ciuitatis mutandæ causa, suum faceret, ne ue alienaret. Aliæ deinde leges, ut res, aut hominum uoluntas tulit, latæ sunt, Seruilia, Licinia Mucia, Iulia, Plautia Papiria, Petronia, Papia. Seruilia fortasse prætorialia fuit, aut tribunicia, à C. Seruilio Glaucia lata, qui cum L. Saturnino tribuno pl. in prætura occisus est. patet enim, hanc legem ante

De legibus

ante Muciam Liciniam rogatam esse. quod Cicero in ea pro Balbo declarat his uerbis. Quòd si, acerbissima lege Seruilia, principes uiri, ac grauissimi & sapientissimi ciues hanc Latinis, id est fœderatis, uiam ad ciuitatem populi iussu parere passi sunt: neque in his est hoc reprehensum Licinia & Mucia lege; cum presertim, & quæ sequuntur. Huius legis hæc sententia fuit, ut Latini, ciuibus Romanis damnatis, ciues ipsi Romani fierent. Licinia & Mucia consularis fuit, L. Crassi & Q. Scauolæ, ut socii Latini, qui ciues Romani antea facti essent, in suarum ciuitatum iura redigerentur. qua lege ita alienati sunt Itolorum animi, ut Italici belli, quod post triennium exortu est, ea uel maxima causa fuerit. hoc spectauit Cicero cū dixit in oratione pro Sextio: Nihil acerbius Latini socii ferre soliti sunt, quàm id, quod perraro accidit, ex urbe exire à consulibus iuberi. unam tamen hæc lex habuit exceptionē, ut non omnes plane in suas ciuitates redirent, sed omnes præter eos, qui ciuitatem Romanam lege Seruilia essent consecuti. id mihi demonstrarunt facile illa uerba, quæ pro Balbo scripsit Cicero: Cum, paucis annis post hanc ciuitatis donationem, acerrima de ciuitate quaestio Licinia & Mucia lege uenisset; nū quis eorum, qui de fœderatis ciuitatibus esset ciuitate donatus, in iudiciū est uocatus? et in eadem infra. Acerbissima lege Seruilia principes uiri, ac grauissimi & sapientissimi ciues hanc Latinis, id est fœderatis, uiam ad ciuitatem populi iussu patere passi sunt: neque in his est hoc reprehensum Licinia & Mucia lege. Iulia lata est à L. Casare consule, P. Rutilii collega. ea sanxit, ut iis, qui, bello Italico exorto, in fide manserant, (manserant autem omnes Latini) & iis, qui in fidem postea rediissent, ciuitas daretur. ita primum Latini, deinde etiam Itali omnes, cum ad amicitiam populi R. rediissent, ciuitate donati. Iulia autem dicta, quia, cum eius collega Rutilius in prælio esset occisus, solus eā Cæsar ex S. C. tulit. Plautia Papiria, quod ego sciā, à nemine nominatur: mihi tamen ea, quam Cicero nominat in oratione pro Archia, cū ait; Data ciuitas Siluani lege, & Carbonis; Plautia & Papiria uidetur fuisse, lata à duobus eiusdem anni tribunis pl. M. Plautio Siluano, C. Papirio Carbone, C. Carbonis, eloquentissimi uiri, filio, sexennio post quàm Crassus & Scauola legem eam tulerant, de qua proxime meminimus. nam Siluanū Cn. Pompeio Strabone, L. Porcio Catone cos. tribunatum gessisse, Pedianus docet. Carbonem autem eodem anno tribunū pl. fuisse, ex eo suspicari licet, quòd dem

eum post M. Liuii mortem, qui Philippo & Cæsare cos. est interfectus, tribunatum administrasse, Cicero in Oratore significat his uerbis. Me stante C. Carbo C. F. tribunus pl. in concione dixit: O M. Druse; patrem appello: tu dicere solebas sacram esse remp. quicumque eam uiolassent, ab omnibus esse ei pœnas persolutas. patris dictum sapiens temeritas filii comprobauit. præterea cum à duobus eiusdem anni consulibus non esse latam hanc legem, satis liqueat; quia Silanus & Carbo collegæ in consulatu nunquam fuerunt: necesse est à duobus tribunis pl. latam existimare. quòd si à tribunis pl. sequitur, ut ab iis duobus potius, quos nominaui, quàm ab aliis: ut tamen de secundo Carbonis tribunatu intelligamus. nā primum cum Q. Vario, C. Curione, Q. Metello, Cn. Pompeio gefsit, Cæsare & Lupo cos. ut ex Ciceronis Bruto patet. Eius legis hæc sententia fuit, ut ascriptis in fœderatas ciuitates ciuitas daretur, ita, si tum, cum lex ferebatur, in Italia domicilium haberent, & si sexaginta diebus apud prætorem essent professi. Post hanc legem Petronia, ut opinor, secuta est. latam enim ante Papiam, patrum ætate, ut peregrini urbe prohiberentur, Cicero de officiis ostendit. Petronius, inquit, apud patres nostros, Papius nuper. Sed Papiam post eam esse latam, quam à Siluano & Carbone rogatam dixi, idem Cicero & in oratione pro Archia significat his uerbis. Quid? cum ceteri non modo post ciuitatem datam, sed etiam post legem Papiam aliquo modo in eorum municipiorum tabulas irrepserint; hic, qui nec utitur quidem illis, in quibus est scriptus, quod semper se Heracliensem esse uoluit, reiicietur? ex quo primū de tempore, deinde de sententia legis Papiæ docemur: de tempore, latam esse post eam, qua ciuitas data est; quam à Siluano & Carbone rogatam ostendimus: de sententia, pœnam esse irrogatam iis, qui dolo in tabulas municipiorum irrepsissent, ut ex eo, legis Plautiæ & Papiæ beneficio, ciues Romani fierent. nam ascriptis, ut dixi iam, in fœderatas ciuitates aditus ea lege in ciuitatem Romanam dabatur. Sed me rursus de Papiæ legis tempore in dubium reuocat Valerius; qui M. Perperna patrem, lege Papiæ damnatum, pristinas in sedes rediisse tradit, amissa ciuitate Romana, in quam contra leges irrepserat. quod si ita est; uidetur Papiæ lex ante Siluani & Carbonis tribunatū esse lata: cum Perperna, cuius pater damnatus est, annis XL consulatum ante eorum tribunatum gesserit. sed fortasse

M Valerius

De legibus

Valerius parum, eo quidem in loco, in tradenda ueritate diligens. malo enim ab eo, quam à Cicerone, dissentire; presertim cū idem de Perperna triumpho falsa narret: qui Aristonicum quidem uicit, triumphare tamen morte praeuentus non potuit: eumq; honorem successor eius M. Aquillius tulit. quod Velleius & Iustinus significant. nam Strabo tantum Perperna mortem memorat, de triumpho uerbum non facit. Manilia legis mentio reperitur, de finibus per singulos arbitros regendis; & Mamilia, in eos quorum consilio Iugurtha senatus decreta neglexisset; quiq; ab eo in legationibus, aut imperiis pecunias acceperant, qui elephantos, quiq; perfugas tradidissent; item, qui de pace, aut bello cum hostibus pactiones fecissent. quam legem tulit C. Mamilius Limetanus tribunus pl. eamq; Cicero in Bruto, & Salustius in Iugurthino memorant. sed in Salustio, pro Mamillus, Mamilius, mendose legitur; et, pro Limetanus, Lemetanus. habet enim argenteum nummum uir clarissimus, antiquitatis bene peritus, Andreas Lauretanus ita inscriptum, C. MAMIL. LIMETAN. Lex Ateria pertinuit ad multas; & cum alia, tum hoc sanxit, ut multarum dicendarum non, ut ante, consulum duntaxat, sed omnium esset magistratum. hanc legem & à Gellio, si modo Gellius ita scripsit, & ab iis, qui Gellii testimoniū secuti sunt, falso nominatam Aterinam existimo. opinor enim Ateriam legem, non Aterinam, fuisse, quam Sp. Tarpeius Montanus Capitolinus, & A. Aterius cos. tulerint. quod uidetur confirmare Festus Pompeius: qui de Tarpeia lege meminit his uerbis. Posteaquam aere signato populus R. uti coepit, Tarpeia lege cautum est, ut bos centussis, ouis decussis aestimaretur. quam Tarpeiam Festus, eandem Gellius Ateriam (sic enim est legendum) appellat; quod, cum à duobus eiusdem anni consulibus esset lata, utrius nomine uocaretur, nihil interesset. nec est ab re, ut id ita esse constet, ipsius Gellii uerba recitare. sic enim lib. XI, cap. I scriptū reliquit. Timæus in historiis, quas oratione Græca de rebus populi R. composuit, & M. Varro in antiquitatibus rerum Romanarum, terram Italiam de Græco uocabulo appellatam, scripserunt, cum boues Græca ueteri lingua *ἰταλλί* uocitati sint; quorum in Italia magna copia fuerit, bucetaq; in ea terra gigni, pasciq; solita sint complurima. coniectare autem ob eandem causam possumus, quod Italia tunc esset armentosissima, multam quoque, quæ appellatur suprema,

suprema, institutam, in singulos dies duarum ouium, triginta boum, pro copia scilicet boum, proq; ouium penuria. sed quoniam, cum eiusmodi multa pecoris, armentiq; à magistratibus dicta erat, abigebantur boues, ouesq; alias pretii parui, alias maioris; eaq; res faciebat inaequalem multæ punitionem: iccirco postea lege Ateria constituti sunt in oues singulas æris deni, in boues æris centeni. Post hanc duas item de modo multarum leges esse latas, utranque consularem, primo Meneniam Sextiam, deinde Papiriam Iuliam, ex Liuiio, Festoq; cognoscitur. multam autem uidentur ii tantum indixisse, apud quos legis erat actio. quod apud iurisperitos, l. tertia, c. de modo multarum, constat, & in eo tit. multarum coarctata est licentia.

Tres etiam de nummis leges, omnes, ut opinor, tribunicias, à Plinio uideo nominatas, Papiriam de assibus, ut, qui unciales erant, semunciales fierent; Liuiam, ut octaua æris pars argento misceretur; Clodiam, ut Victoriati, quod antea nummi genus, ex Illyrico aduectum, mercis loco habebatur, percussis, & quod indicat ipsum nomen, uictoriæ imagine signati, in usu essent. Atque ex his legibus licet conuincere, nouum nummum nisi lege nullum Romæ esse percussum, aut in pondere, pretio ue mutatum, ut cum as ex librali factus est duarum unciarum: quod significat Plinius cum ait: Pondus æris imminutum primo Punico bello, cum impensis resp. non sufficeret: constitutumq;, ut axes sextantario pondere ferirentur. est enim sextans sexta pars librae. idemq; de asse postea, primum unciali, deinde semunciali facto, deq; denario à decem assibus ad sexdecim, quinario à quinque ad octo, sestertio à dupondio ac semisse ad quatuor deducto, uidetur existimandum. Sempronia C. Gracchi, tribunicia, de frumento pauperibus semissibus & trientibus distribuendo, iubebat ut frumentum publice emeretur, singulisq; mensibus per singulas tribus uilissimo pretio plebi diuideretur. eratq; locus Romæ constitutus, in quo frumentum publicum asseruabatur una cum legibus frumentariis, qui dicebatur, Horrea Sempronia. Fabia de sectatorum numero, Cincia de donis & muneribus nominantur, illa contra ambitionem, hæc aduersus auaritiam. ac de Cincia Liuius lib. XXXIII, Quid, inquit, legem Cinciam excitauit de donis & muneribus, nisi quia uectigalis iam, & stipendiaria plebs esse senatui coeperat? Tacitus autem libro XIII. Patres legem Cinciam flagitant: qua cauetur antiquitus, ne quis ob causam orandam pecuniam, donum ue accipiat. et infra

De legibus

eodem libro: Cincia lex aduersus eos, qui pretio causas orauissent. libro autem XV. Oratorum licentia Cinciam rogationem, candidatorum ambitus Iulias leges, magistratuum auaritia Calpurnia scita pepererunt. Sed primus omnium ob defensum negocium, ut ait Amianus lib. XXX, pecuniam accepit Antipho Rhamnusi. postea Claudius imperator usque ad X HS capi permisit: quod & Nero confirmauit, qua de re testem habemus Suetonium: cui subscribit lib. XI Tacitus, & Plinius in VI epistolarum ad Rufum. iurisconsultis permissum uidetur capere usque ad C aureos. l. i. uerſi. si cui cautum. de uariis, & extraordinariis cognitionibus. Priuati sumptus non sunt ab iis, qui reip. præsunt, negligendi. domus enim exhauriuntur: & ex domibus ciuitas constat. itaque ualere non potest, quasi corpus aliquod, membris male affectis. propterea leges sumptuariæ multæ ad coercendam luxuriam diuersis temporibus, omnes utilissimæ, latæ sunt, ut de modo supellectilis domesticæ, funerum, cenarum, aliq; de genere. Publium quidem Cornelium Rufinum, à quo L. Sylla dictator originem duxit, strenuum ducem, bis consulatu & dictatura functum, Plutarchus, Valerius, & Gellius motum senatu narrant à censoribus C. Fabricio Lucino, Q. Aemilio Papo, quod eum comperissent argenti facti, hoc est uasorum argenteorum, (sic enim Q. Mucius, ut ait Vlpianus, definit) decem pondus habere. Et de sumptibus mulierum C. Oppius tribunus pl. tulit, ne quæ mulier plus semuncia auri haberet, neu uestimento uersicolori uteretur, ne ue iuncto uehiculo in urbe, oppido ue, aut propius inde M passus, nisi sacrorum publicorum causa, ueheretur. Fuit etiam lex Metilia, qua ratio poliendarum uestium fullonibus præscribebatur. hanc ego mēdose opinor nominari Metellam apud Plinium, lib. XXXV. leges enim à nomine, non à cognomine, uocabantur. ea lata est anno ab V. C. DXXXIII: siquidem, ut ait Plinius, dedere ad populum ferendam C. Flaminius & L. Aemilius censores. De moderando autem funerum sumptu legem tulit Sylla dictator: qui tamen in funere Metellæ coniugis præscriptum sua lege modum transgressus est. De sumptibus in cenas tribunicia C. Orchii; consulares, C. Fannii, T. Didii, P. Licinii Crassi Diuitis, L. Cornelii Syllæ, M. Aemilii Lepidi; rursus tribunicia Q. Antii Restionis, consularis C. Iulii Augusti. quibus de legibus, uidentur ea subscribenda, quæ scripta sunt apud Macrobiū: ut, quid singulæ sanxerint,

fanxerint, cognoscatur. Prima, inquit, omnium de cenis lex ad populum Orchia peruenit: quam tulit C. Orchius tribunus pl. de senatus sententia, tertio anno, quàm Cato censor fuerat. cuius uerba, quia prolixa sunt, prætereo. summa autem eius præscribebat numerum conuiuarum. et hæc est lex Orchia, de qua Cato mox orationibus suis uociferabatur, quòd plures, quàm præscripto eius cauebatur, tum ad cenam uocarentur. cumq; auctorem nouæ legis aucta necessitas imploraret; post annū XXII Fannia lex lata est, anno post Romam conditam, secundum Gellii opinionem, DLXXXVIII. de hac lege Sammonicus Serenus ita refert. Lex Fannia, sanctissimi Augusti, ingenti omnium ordinum consensu peruenit ad populum. neque eam prætores, aut tribuni, ut plerasque alias, sed ex omni bonorum consilio & sententia ipsi consules pertulere; cum resp. ex luxuria conuiuiorum maiora, quàm credi potest, detrimenta pateretur. siquidem eò res redierat, ut gula illecti plerique ingenui pueri, pudicitiam, & libertatem suam uenditarent; plerique ex plebe Romana uino madidi in Comitium uenirent, & ebrii de reip. salute confulerent. Hæc Sammonicus. Fannia legis seueritas in eo superabat Orchiam legem, quòd in superiore numerus tantummodo cenantium cohibebatur, licebatq; secundum eam unicuique bona sua inter paucos consumere: Fannia autem & sumptibus modum fecit assibus centum: unde à Lucilio poeta, festiuitatis suæ more, centussis uocatur. Fanniam legem post annos decem & octo lex Didia consecuta est. eius ferundæ duplex fuit causa, prima, & potissima; ut uniuersa Italia, non sola urbs, lege sumptuaria teneretur, Italis existimantibus Fanniam legem, non in se, sed in solos urbanos ciues esse conscriptam: deinde, ut non soli, qui prandia cenas ue maiore sumptu fecissent, sed etiam qui ad eas uocati essent, atque omnino interfuissent, pœnis legis æque tenerentur. Post Didiam Licinia lata est à P. Licinio Crasso Diuite. cuius ferundæ, probandæq; tantum studium ab optimatibus impensum est, ut s. c. iuberetur, ut, ea tantummodo promulgata, prius quàm trinundino confirmaretur, ita ab omnibus obseruaretur, quasi iam populi sententia comprobata. lex uero hæc, paucis mutatis, in plerisque cum Fannia congruit. in ea enim ferenda quæsitæ sunt nouæ legis auctoritas, exolescente metu legis antiquioris, ita Hercules, ut de ipsis XII tab. factum est. quarum ubi contemni antiquitas cœpit; eadem illa, quæ il
lis

De legibus

lis legibus cauebantur, in alia latorum nomina transierunt. sed legis Liciniae summa, ut calendis, nonis, nundinis Romanis cuique in dies singulos xxx duntaxat asses edundi causa consumere liceret; ceteris uero diebus, qui excepti non essent, ne amplius apponeretur, quam carnis aridae pondo tria, & fassamentorum pondo. Secuta est, non ita multis post annis, lex Cornelia, & ipsa sumptuaria; quam tulit L. Cornelius Sylla dictator: in qua non conuiuiorum magnificentia prohibita est, nec gulae modus factus, uerum minora pretia rebus imposita, & quibus rebus dii boni, quamque exquisitis, & pene incognitis generibus deliciarum? quos illic pisces, quasque offulas nominat? Sylla mortuo, Lepidus consul legem tulit & ipse cibaria. Cato enim sumptuarias leges cibarias appellat. Dehinc, paucis interiectis annis, alia lex peruenit ad populum, ferente Antio Restione: quam legem, quamuis esset optima, obstinatio tamen luxuriae, & uitiorum firma concordia, nullo abrogante, irritam fecit. illud tamen memorabile de Restione, latorque ipsius legis, fertur, eum, quoad uixit, foris postea non cenasse; ne testis fieret contemptae legis, quam ipse bono publico pertulisset. Subiiciam hic leges aliquot ex XII tab. quae sunt de iure ciuili, sumptas à Cicerone, Liuiio, Valerio, Plinio, Seneca, Festo, Quintiliano, Gellio, Dionysio, atque illam primum, ei legi admodum similem, quam Romulus tulit, ut parentibus liberos ter uendendi ius atque potestas esset, statuque liberos etiam possent uenundare. id postea ab imperatoribus sublatum est, cautumque; ut ob solam famis necessitatem à patre distrahi filius posset. l. i. & ii. c. de patribus, qui filios distraxerunt. Alia fuit item XII tab. Si furiosus existet; agnatorum, gentiliumque; in eo, pecunia uel eius potestas esto. Nec ab hac lege aborret illa, & ipsa XII tab. qua prodigo bonis interdicebatur; utique; in agnatorum curatione esset, cogebatur. Alia lex fuit XII tab. ut, si quis reus in agendo plus petiisset, causa caderet. idem apud iurisconsultos legimus, in uersis. si quis agens, inst. de actionibus. sed immutatum postea, in uersis. et haec quidem, inst. de actionibus. Etiam illa nominatur: Si quis in ius uocatur; si morbus, auitas uel uitium est; qui in ius uocabitur, iumentum dato: si nolet, arceram ne sternito. Ad iudicia pertinet ea, quae sanxit, ut uindictae secundum libertatem darentur. Nec minus ea, in qua tuendae fidei causa scripta sunt haec. Aeris confessi, rebusque; iure iudicatis, xxx dies iusti sunt: post deinde manus iniectio esto: in ius ducito: ni iudicatum faxit, aut quis pro eo in iure uindex

uindex sit, (sic enim apud Gellium lib. XX, cap. I legitur) secum du-
cito, uincito, aut neruo, aut compedibus, XV pondo ne minore;
aut, si uolet, maiore uincito: si uolet, suo uiuito: ni suo uiuit, qui
cum uinctum habebit, libras farris in dies dato: si uolet, plus dato.
erat autem ius interea paciscendi: ac, nisi pacti forent, habebantur
in uinculis dies LX. inter eos dies, trinis nundinis continuis ad præ-
torem in Comitium producebantur: quanti; iudicati essent, præ-
dicabatur. quòd si plures essent, quibus reus esset iudicatus: lex ita
loquebatur: Tertiis nundinis partes secanto: si plus minus ue se-
cuerint, sine fraude esto. Ciuilis humanitatis atque clementiæ uis-
detur lex illa XII tab. quam X uiri tulerunt, ut uicinos ad societa-
tem magis allicerent: quæ fuit huiusmodi. Sanatibus idem iuris
esto, quod fortibus. Et ad ius commune spectauit illa item XII
tab. ut, si quis sepem in confinio poneret, terminum non excede-
ret; si murum, pedem relinqueret; si domum, pedes duos; si se-
pulcrum, foueam ue, quantum id profundum esset; si puteum,
passum; si oliuam, ficum ue, pedes nouem; si denique aliæ arbo-
res plantarentur, quinque pedes ab alieno loco ponerentur; in
controuersia de finibus, quinque pedum usucapio nulla esset.

NUNC, quando de iure ciuili leges dictæ sunt; eas, quæ ad cri-
mina pertinent, explicabo. et, quia non omnium eadem est uis &
natura criminum; sed alia publica, alia priuata; rursus, quia non
eiusdem generis ipsa publica sunt, sed ita distinguuntur, ut alia ca-
pitalia sint, alia non capitalia; ordinem à conditione criminum pe-
temus; & de publicis capitalia primum, deinde non capitalia, po-
stremo loco priuata, eaq; ipsa duobus dispertita generibus, aut
cum infamia, aut sine infamia, persequemur. quod antequam aga-
mus; definiendum est, quale fuerit in rep. id, quod capitale cri-
men nominamus. quod ut aperiatur, præponendum illud est, lege
Porcia cautum fuisse, ne quem ciuem Romanum ullam ob cul-
pam, perduellione excepto, necare uerberare ue liceret. quòd si
quis ita grauiter peccasset, ut supplicio dignus ultimo duceretur;
is post M. Catonis censorii ætatem, qui eam legem tulit, non capi-
te, aut ulla omnino corporis parte, sed aut bonorum publicatione,
aut amissione ciuitatis, cum aqua & igni interdiceretur, (nam exi-
lium nulla lex irrogabat: sed, interdicta aqua & igni, exilium ne-
cessario sequebatur) aut carcere etiam pœnas dabat. uinculorum
enim

De legibus

enim uideo fieri mentionem in oratione pro Cecina, & in primo de oratore. Crimen igitur capitale non ita plane est intelligendum, quòd uita priuaretur is, qui crimine capitali damnatus erat; sed ideo capitale, quòd eum, qui damnatus erat, capitis pœna sequeretur. capitis autem pœna, uel libertatis, uel ciuitatis amissio dicebatur. quam utranque capitis diminutionem uocabant. at capitis diminutio cum triplex esset, maxima, media, minima; non omnis tamen pœna fuit, sed tantum duæ priores, maxima, quæ libertatis ademptione fiebat; & media, quæ ciuitatis. minima, cum familia mutaretur, beneficium potius, quam pœna, fuit. quòd si cui magistratus adimeretur; capitis ea diminutio non fuit; ut Instit. lib. I legimus: sicuti capitis diminutio fuit manente magistratu, ut in emancipatione filii: quod lib. XLVIII de capite minutis traditum est. quocunque autem in crimine uel maxima, uel media capitis diminutio sequeretur, capitale illud esse crimen dicebatur. porro, qui libertatem, idem ciuitatem simul, & familiam amittebat. serui enim neque ciues, neque gentiles erant: qui ciuitatem, familiæ quidem iura, non tamen libertatem. nam etsi in oratione pro Cecina scriptum ita est: Si semel ciuitas adimi potest, retineri libertas non potest: qui enim potest iure Quiritum liber esse is, qui in numero Quiritum non est? quod uidetur Liuius lib. XLV confirmare, cum ait, Omnibus V & XXX tribubus mouere, id esse ciuitatem libertatemq; eripere: tamen eo non moueor: nec, quia dicat Callistratus iurisconsultus, per deportationem adimi libertatem; & in Topicis Boetius, deportationem esse capitis maximam diminutionem. non enim uere proprièq; exules, aut deportati, aut omnibus tribubus moti, in ærariosq; relati, libertate carent; etsi neque testamentum facere, neque hereditatem capere, neque omnino earum rerum, de quibus iure ciuili statutum est, habere ullam liceat. ius quidem in eo suum exul, ac deportatus amisit, & quodam modo partem pristinae libertatis: (siquidem amittit ea, quæ iuris ciuilis sunt: quæ uero ius gentium complectitur, ea retinet omnia) libertatem tamen ipsam, qui reductus in seruitutem non sit, adhuc retinet. quare causæ potius, quam agebat, rationem, oratorio more, Cicero habuit, quàm ueritatis. et apud Liuium Claudius censor, contra collegam disputans, exaggerandi causæ eripi libertatem ordini libertino cum ciuitate

uitate

uitate dixit. Boetius autem cum deportationem esse diminutionem capitis maximam dixit, non ad ius gentium, neque ad libertatis uniuersæ, sed ad earum tantum rerum, quibus iure ciuili constitutis deportati priuabantur, amissionem spectauit. Illa sunt de exilio notanda: etsi mentionem ciuium Romanorum exulantium sæpe fieri uidemus, nulla tamen lege damnatis ciuibus exilium esse irrogatum. quod ne uocari possit in dubium, ponam uerba Ciceronis in oratione pro Cecina. Exilium, inquit, non supplicium est, sed per fugium portusq; supplicii. nam, qui uolunt pœnam aliquam subterfugere, aut calamitatem, eo solum uertunt, hoc est, sedem, ac locum mutant. itaque nulla in lege nostra reperietur, ut apud ceteras ciuitates, maleficio ullum exilio esse multatum. sed, cum homines uincula, neces, ignominiasq; uitant, quæ sunt legibus constituta, confugiunt, quasi ad aram, in exilium. qui si in ciuitate legis uim subire uellent, non prius ciuitatem, quàm uitam, amitterent. quia nolunt, non adimitur iis ciuitas, sed ab iis relinquitur, atque deponitur. nam, cum ex nostro iure duarum ciuitatum nemo esse possit; tum amittitur hæc ciuitas denique, cum is, qui profugit, receptus est in exilium, hoc est, in aliam ciuitatem. hæc Cicero: quæ tum, non esse exilium ulla in lege nominatum, aperte docent; tum uero ideo multos in exilium ante damnationem sua uoluntate profugisse, quia legis pœnam, quam præsentibus corpore subirent, ut uincula, neces, ignominiam aliquam, omnino uitare uellent. nam etsi, reo in exilium profecto, nihilo minus caussa peragebatur, & sententiæ ferebantur: (id exemplo Fabricii, de ueneficio condemnati, ex oratione pro Cluentio constat: qui cum, absolutione desperata, à subselliis sua sponte discessisset, eum tamen, latis sententiis, absentem iudices condemnarunt: idemq; de Verre Pedianus significat, & in commentario Miloniana, cum ait: Multi præsentibus, & cum citati non respondissent, damnati sunt) tamen, quod ad corpus attinet, aut ad præsentem ignominiam, ipse sibi iam reus cauerat; leuiores ducebat reliqua, siue sibi absenti aqua & igni interdiceretur, siue bona publicarentur, siue aliqua infamiæ nota inureretur. At idem Cicero ipse sibi quasi repugnare in paradoxis uidetur: ubi de exilio, tanquam pœna legum, ita loquitur. Omnes scelerati, atque impii, quorum tu te ducem esse profiteris, quos leges exilio affici uolunt,

N exules

De legibus

exules sunt, etiam si solum non mutarunt. an, cum omnes leges te exulem esse iubeant, non eris tu exul? et ibidem alia his similia. in oratione autem pro Murena, noua ambitus lege, quam ipse tulit, senatores in exilium missos, his uerbis demonstrat: Legem ambitus flagitasti: quæ tibi non deerat: erat enim seuerissime scripta Calpurnia. gestus est mos & uoluntati, & dignitati tuæ. sed tota illa lex accusationem tuam, si haberes nocentem reum, fortasse armasset, petitioni uero refragata est. pœna grauior in plebem tua uoce efflagitata est: commoti animi tenuiorum. exilium in nostrum ordinem: concessit senatus postulationi tuæ, sed non libenter duriores fortunæ communi conditionem te auctore cōstituit. Atque hac ipsa de lege, deq; exilio x annorum loquitur & Dio lib. xxxvii. nec desunt alia de ciuibus Romanis exulantibus exempla: quos tamen à lege, uel à iudicibus, qui ministri legum sunt, nominatim in exilium esse eiectos, non debemus opinari. quo modo igitur exules? Sciendum est, exilii duo genera fuisse, uoluntarium, & legitimum: & uoluntarii rursus duo genera, unum, cum reus ante latas à iudicibus sententias in exilium abibat, uel ut legis pœnam uitaret, quod iam diximus; uel quia, cum se damnatum iri perspicue uideret, sponte uellet eam pœnam subire, quam paulo post leges ei sine dubio illaturæ uiderentur: quod ii, quos paulo ante nominaui, Verres, Fabriciusq; , omni prorsus absolutionis abiecta spe, fecerunt. non enim ante damnationem ideo discesserunt, ut legis pœnam uitarent: quandoquidem Fabricius nihil exilio grauius timere à iudicibus poterat: cum Oppianicum, qui mox eodem crimine præsens damnatus est, nullam omnino, præterquam exilii, calamitatem tulisse constet. nec de repetundis, quo crimine damnatus est Verres, alia præter exilium, & litis æstimationem, nocentes reos pœna sequebatur. quam utranque pœnam, post profectionem damnatus, Verres tulit. Alterum exilii uoluntarii genus fuit, cum reus, post damnationem, quia multam, à iudicibus dictam, soluere non posset, ex urbe discedebat. quod ut putem ei legibus, ad effugiendam multæ solutionem, fuisse permissum, adducor iis uerbis, quæ sunt in oratione pro Cecina: In colonias Latinas sæpe nostri ciues aut sua uoluntate, aut legis multa profecti sunt: quam multam si sufferre uoluissent, tamen manere in ciuitate potuissent. . . Legitimum autem exilium erat, cum
reus,

reus, non ille quidem uerbo, re tamen ipsa in exilium mittebatur. uetus enim consuetudo fuit, inducta legibus, more confirmata, quæ non modo in rep. sed imperatorum quoque ætate, multisq; post sæculis uiguit: ut, si quis exilii pœna dignus uideretur, ei, nulla exilii facta mentione, tecto, aqua, igni interdiceretur. ita earum rerum, quæ maxime sunt ad uitam sustentandam necessaria, usu priuatus, cum uno aeris alimento contentus esse non posset, abire cogebatur. ex quo exulare ciues Romani dicebantur. patet hoc in oratione pro domo: in qua ita scriptum est. Qui erant rerum capitalium condemnati, nō prius hanc ciuitatem amittebant, quàm erant in eam recepti, quò uertendi, hoc est mutandi, soli causa uenerant. id autem ut esset faciundum, non ademptione ciuitatis, sed tecti, & aquæ, & ignis interdictione faciebant. Ac ne ciues quidem omnium improbissimi, atque audacissimi, cum in suos inimicos, acerrimo incitati odio, non leges, sed priuilegia ferrent, exilium nominabant, sed iis aqua, & igni interdicebant. itaque & de ipso Cicerone, quod in eadem oratione legimus, P. Clodius tribunus pl. cui nihil in tota uita modestiæ fuit, qui in tribunatu pro sua libidine, neglecto more maiorum, abiectis legibus, cuncta gessit, ita populum rogauit: Velitis, iubeatis, ut M. Tullio aqua, & ignis, interdicator. neque solum Clodius, sed antea quoque homines maxime seditiosi, C. Gracchus, & L. Appuleius Saturninus de suis inimicis eodem modo tulerunt. est enim eadem in oratione ita scriptum. Ne tum quidem, cum aberam, negare poteras esse. me tua lege senatorem. ubi enim tuleras, ut mihi aqua, & ignis interdiceretur? quod Gracchus de P. Popillio, Saturninus de Metello tulit. et minorem, siue mediam capitis diminutionem, cum ciuitas etsi non uerbo, re tamen adimebatur, ita fieri solitam, tradit Iustinianus instit. lib. I. de capitis diminutione, his uerbis: Minor, siue media capitis diminutio est, cum ciuitas quidem amittitur, libertas uero retinetur: quod accidit ei, cui aqua, & igni interdictum fuerit, uel ei, qui in insulam deportatus est. ergo, cum dixit Cicero aduersus Clodium in paradoxis; Familiarissimus tuus de te priuilegium tulit, ut, si in opertum Bonæ deæ accessisses, exulares; hoc significauit; Vt tibi aqua, & igni interdiceretur. et, cum de ambitu damnatis & annorum exilio puniendis Dio locutus est, cuius uerba supra recitauimus, non aliud

De legibus

intellexit, quàm, ut iis in X annos aqua, & ignis interdiceretur. Erat autem, ut neque flagitia sunt paria, sic hoc poenæ genus neque loci spatio, neque temporis æquale. quibusdam enim tantum intra urbem, hoc est intra pomœrii fines, aliis longius, aqua, & igni interdicebatur. crediderim tamen, actum satis leniter ac misericorditer cum reis, neminemq; , aut certe paucos admodum extra Italiæ terminos aquæ & ignis interdictione summos; qui uideam Oppianicum, de ueneficio, quod capitale crimen erat, damnatum, impune tamen ad urbem habitare potuisse. notauimus enim hæc in oratione pro Cluentio: Cum uagus, & exul erraret Oppianicus, & huc ad urbem profectus esset, (solebat enim intra urbem aliquid habere conducti) cecidisse ex equo dicitur, & homo infirma ualitudine latus offendisse uehementer, &, postea quàm ad urbem cum febris uenerit, paucis diebus esse mortuus. Quid, quòd Q. Pompeium Rufum, & T. Plancum Bursam, utrunque de ui damnatum, quod ex Dionis historia constat, alterum Baulis fuisse, alterum Rauennæ, scribit M. Cœlius in epistola ad Ciceronem? nam Cicero ipse CD millibus passuum, non ulla communi lege, neque iudicum sententiis, sed iniquissimo P. Clodii priuilegio, per operas Clodianas lato, abesse iussus est, aqua & igni citra illum terminum interdictis. Milonis autem Massiliæ exulantis exemplum uix cum altero licet exemplo coniungere. graue enim facinus, occiso in Appia uia Clodio, à senatu iudicatum est: & fuit satisfaciendum populo, Clodii morte concitato. ideoq; noua lex perlata, & extra ordinem quæsitum. nec tamen satis habeo compertum, Massiliam ne sedem exilii Milo delegerit, quòd citra esset ei interdictum aqua & igni, an uero, quòd, cum propius urbem, concedente lege, posset habitare, Massiliam tamen probauerit, ac uoluerit. nec puto leges, aut iudices præscripsisse cuiquam, ubi esse deberet, sed ubi esse non posset. nec uero iis, de quibus & Cicero in oratione pro Balbo, & historiæ loquuntur, Q. Maximo, P. Popillio, Q. Philippo Nuceria, aut C. Catoni Tarraco, aut Q. Capioni, & P. Rutilio Smyrna locus exilii definitus est: sed ipsi, cum Romæ esse non liceret, eas urbes, ut iucundas, aut quietas, aut commodas, aut sibi fortasse beneuolas, ad habitandum legerunt. Memorabile illud fuit, quod legimus in Polybio: capite damnatis egredi palam ex urbe licuisse; quòd

fi

si tribuum una, quæ scilicet ad damnationem deesset, suffragium de reo nondum tulisset, facultatem reo esse datam exilii suo sibi arbitratu deligendi. exulibus autem commorari tuto licebat in qua uellet urbe fœderata, ut Neapoli, Præneste, Tybure. Hæc Polybius: cuius ætate populus de capitalibus criminibus iudicabat: quod idem scriptum reliquit. nam postea prætores quæsierunt, excepto crimine perduellionis, aut si quando tribunus pl. diem alicui diceret, suffragiumq; de reo mallet à populo, quàm sententias à iudicibus, & prætorè, ferri. Quòd autem exilii tempus disparibus in culpis diuersum fuisse dixi; id ita uerisimile est, ut exemplis probari multis non debeat. quare unum ponam, etsi minime necessarium. Damnatis de ambitu aqua & igni per X annos tantum interdicebatur: quod ante demonstraui. at damnatis de corrupto iudicio, in uniuersum uitæ tempus: quod ex oratione pro Cluentio licet conicere: cuius in extremo, periturum extra patriam Cluentium, si damnatus erit, his uerbis significat: Quid erit profectum, nisi ut huius ex mediis mortis insidiis uita ad luctum reseruata, mors sepulcro patris priuata esse uideatur? Ac de duobus exiliis, uoluntario, ac legitimo, utrum fuerit grauius, uenit in mentem quæri posse. legitimum existimo: primum, quòd eos, quibus aqua & igni interdictum est, recipi tecto intra spatium interdictum leges uetant: quod iis non contigit, qui sua sponte in exilium profugerunt: deinde, quòd, ut ego arbitror, aliquanto turpius est, exulare legibus eiectum, quàm, exulare non eiectum. eicitur enim ciuitate, cui aqua, & ignis interdicitur: qui uero sua uoluntate discedit, non is ciuitate pellitur, sed eam ipse deserit, ac relinquit. huc adde, quòd, quibus interdicitur, ii senatores postea non sunt; & eos legi suo loco à cenfore in senatum leges prohibent: quibus uero non interdicitur, ii, etiam si urbe carent, senatores tamen sunt. hoc ex oratione pro domo didicimus: in qua hæc sunt. Ne tum quidem, cum aberam, negare poteras esse me senatorem. ubi enim tuleras, ut mihi aqua, & ignis interdiceretur? quòd Gracchus de P. Popillio, Saturninus de Metello tulit. homines seditiosissimi de optimis, ac fortissimis ciuibus, non ut esset interdictum, quod ferri non poterat, tulerunt, sed ut interdiceretur. ubi cauisti, ne meo me loco cenfor in senatum legeret? quod de omnibus, etiam quibus damnatis interdictum est, scriptum est
in

De legibus

in legibus. Ergo, cum de pœnis capitalibus loquimur, aut exilium inter eas numerandum non est, quod lex nulla, nullum ob malefactum, irrogabat: aut eo de exilio dicendum, quod, etsi non nominaretur, necessario tamen, cum damnatis interdiceretur aqua & igni, consequeretur. Capitalia uero crimina publicis iudiciis omnia cognoscebantur: non item publica iudicia de capitalibus omnia criminibus fiebant. nam, ut instir. lib. IIII traditum est, si quam infamiam irrogabant publica iudicia cum damno pecuniario, publica quidem erant, non tamen capitalia. quod quidem si de causis publicis, in quibus cum detrimento rei familiaris famæ iactura coniungeretur, uerum est: multo magis de priuatis. et hoc ipsum declarat Cicero satis aperte in epistola ad Patum, his uerbis. Iudicia non solemus omnia tractare uno modo. priuatas causas, & eas tenues, agimus subtilius; capitis, aut famæ, scilicet ornatius. seiunxit enim à causis capitalibus causas famæ, siue publicas, siue priuatas. Sed ipse me in dubitationem reuoco. Si causæ famæ, capitales non sunt: cur Quintiî causam, quæ famæ est, capitalem Cicero significat? ait enim in exordio. Quid hoc iniquius, aut indignius, quàm me, qui caput alterius, famam, fortunasq; defendam, priore loco causam dicere? et infra. Clamabat Quintiî: sese iccirco nolle satisfacere, ne uideretur iudicasse, bona sua ex edicto possessa esse: sponsonem porro si istiusmodi faceret, se, id quod nunc euenit, de capite suo priore loco causam esse dicturum. et in extrema oratione. Horribile est, causam capitis dicere: horribilius, priore loco dicere: sane non leuiter aliquandiu hæc me loca, & alia huiusmodi in ea oratione perturbant, eoq; magis, quòd causa Quintiî ad recuperatorem agitur. ex quo sequitur, ut priuata sit. recuperatores enim, & Cui-ri, & arbitri, iudices sunt, (liceat hic arbitros inter iudices, uocabulo minime proprio, nominare) ciuilibus in controuersis ab urbano prætore dati. causam porro capitalem ad recuperatorem agi, ita mihi absurdum, ita non rationi consentaneum uidebatur, ut persuaderi nullo modo posset. sed fortasse, ut sæpe distinctione ueritas illucescit, idem hic quoque potest euenire. cogitauî, nunquid, causam esse capitalem, & agi de capite, siue, capitis esse causam, idem sit. non enim dubito, quin, causæ capitales quæ uocantur, eadem causæ capitis uocari omnes possint: quæ uero capitis,

capitis, fortasse non omnes item capitales. nam causa capitis Quinctiana dicitur: quam tamen nullo modo capitalem fuisse concedo: cum in ea neque de libertate, neque de ciuitate adimenda, quæ capitalia fuisse iudicia notum est, agatur. et causa Mancini, quem, ut Cicero, & alii prodiderunt, à patrepatrato ex S. C. Numantini deditum, Numantini non receperunt, causa quidem capitis est, (agitur enim in ea de ciuitate, de libertate, de capite) capitalis tamen non est. in capitalibus enim quæritur de crimine, & damnatos diminutio capitis ex iudicum sententia sequitur: in aliis autem capitis causis agitur quidem de capite, non tamen quæritur de crimine, capitisque diminutio uel nulla sequitur, ut in causa Quinctii, uel, si sequitur, ut in causa Mancini, non sequitur uti pœna à iudicibus irrogata, sed ideo sequitur, quia is, qui iam deditus erat ex S. C. Numantinis, capite fuisse diminutus ostenditur: ita ut iudex non iudicet, sit, nec ne, capite minuendus; quod fit in causis capitalibus; sed, fuerit ne antea, an non fuerit, capite diminutus: & status hominis non tunc mutatur, sed, qualis sit, cognoscitur. itaque, cum de eo dixit Cicero lib. I de oratore, Quam possumus reperire ex omnibus rebus ciuilibus causam, contentionemque maiorem, quam de ordine, de ciuitate, de libertate, de capite hominis consularis? crimen nullum significauit, cuius criminis causa uocatus in iudicium Mancinus, periculum amittendæ ciuitatis, aut libertatis in eo iudicio subiret; sed facultatem iudicibus cognoscendi, ac statuendi datam intellexit, eas ne res æque Mancinus possideret, atque antea quam à patrepatrato esset deditus, an uero, quia deditus esset, amisisset, etiam si receptus à Numantinis non esset. quare capitalis causa non fuit: actum tamen esse de capite, ob eam, quam exposui, causam recte Cicero dixit. At, quod ad Mancini causam attinet, ferri potest. extat enim ratio, cur, in ea de capite agi, dicatur. in causa uero Quinctii, in qua nullo modo neque de ciuitate, neque de libertate agebatur, mentio capitis unde ducta? an ex eo, quia caput pro exilium usurpari posse uideatur? repugnat uetus loquendi consuetudo: nec huius generis exempla licet inuenire. potius igitur, ex oratoris licentia, crediderim: ut exaggeretur res, ad inuidiam aduersus Neuium ex eius crudelitate, & misericordiam erga Quinctium ex eius periculo quærendam. atque hoc eo magis constat, quòd

De legibus

quòd Cicero nec in eo uere ac proprie loquitur, cum eam uocat accusationem, quæ sponsi causa est: nec, cum ait, Quem nunc interficere nefarie cupis: quandoquidem ciuibus Romanis eripi nullo crimine uita posset. causam uero non esse capitalem, propriis uerbis ipse clare demonstrat in eo loco: Iudicium, C. Aquilii, non de re pecuniaria, sed de fama, fortunisque P. Quinctii uides. et cum dixit: Hortensius partes accusatoris obtinet: oratorie loquitur. nec enim re uera accusabat Hortensius, sed accusare uidebatur. nec est, nisi capitalibus in causis, accusator. Redeo unde diueri. Publicorum criminum alia capitalia, alia non capitalia: quodque notandum magis est, ne maiestatis quidem iudicium capitale semper fuit, cum tamen publicum semper esset. nam Claudiæ Vestalis, Appii Cæci filia, C. Fundanius, & Ti. Sempronius ædiles pl. quòd populo R. calamitatem esset imprecata, multam dixerunt æris grauis XXV millia. quæ capitalis pœna non fuit. iudicium autem illud & publicum fuisse, inde patet, quòd ad populum factum est; idque etiam Ateius Capito propterea inter publica iudicia retulit; & maiestatis nomine notatum, Suetonius in Tiberio significat his uerbis: Claudia nouo more iudicium maiestatis apud populum mulier subiit, quòd in conferta multitudine, ægre procedente carpento, palam optauerit, ut frater suus Pulcher reuiuisceret, atque iterum classem amitteret, quo minor turba Romæ foret. Publica erant capitalia, incestus, maiestas, repetundæ, uis publica duplex, ea, quæ in rempublicam, ac magistratus inferebatur, de qua lex Lutatia fuit, & ea, quæ in priuatos ciues, de qua Plotia, & aliæ leges: tum, peculatus, de residuis, inter sicarios, paricidium, ueneficium, ambitus, pecuniæ ob iudicandum captæ, adulterium, de falsis, de plagiariis, de tutorum fraude, de famosis libellis, de furto, clandestina coitio. quibus de criminibus aut ad prætorem, aut ad iudicem quæstionis, aut ad populum notio pertinebat. de maiestate, perduellione excepto, de ui, de repetundis, de crimine inter sicarios, de ambitu prætor quærebat: de incestu, & perduellione populus, sed tributis comitiis de incestu, tribuno pl. populum per tribus in forum cogente; centuriatis autem de perduellione, cum in campum consul centuriatim populum aduocasset. de ueneficio autem & prætor, qui iudex quæstionis idem dicebatur, & iudex quæstionis, etiam si prætor non esset, cognoscebat.

gnoscebat. Prætores, quæ cuiusque futura esset quæstio, ante sortiebantur: ut deinde singulis de criminibus singuli, prout sors tulisset, cum consilio quærerent. etsi de crimine inter sicarios, cum in iudicium quandoque ita multi uocarentur, ut prætor unus minime sufficeret, non unus, sed duo prætores cognoscebant. quod in oratione pro Cluentio animaduertimus. idemque eandem ob causam in aliis criminibus interdum esse factum, licet existimare. non nunquam etiam, diem dicente aliquo tribuno pl. qui cogendi ad iudicium populi ius habebat, non prætor, sed populus ipse de maiestate quæstionem exercebat. itaque Cn. Domitius trib. pl. is, qui cum C. Cassio postea consul fuit, accusauit M. Silanum, quod iniussu populi bellum cum Cimbris consul gessisset; cum in eo bello graues ob eam causam calamitates acceptas esse diceret. qua de re suffragium tribus tulerunt. Quod autem dixi, prætores de criminibus quæsisse: unum excipio prætorem urb. qui nullo de crimine publico quærebat; itaque nec quæsitior dicebatur; tantum, ciuilibus controuersis ad eum delatis, ius dicebat, hoc est iudices, & iudicii formulam, quam sequerentur, dabat: nec enim prætor ipse iudicare solitus erat, sed, cum iudices, ab ipso dati, de controuersia cognouissent, ac iudicassent, exequebatur. ideo in omnibus ferme edictis prætorum legitur, Iudicium dabo. in quo posteriores lapsi sunt. Est igitur aliud, ius dicere; aliud, iudicare: contra quam, qui ueterum iurisperitorum libros ignorant, opinantur. et, quemadmodum ciuilibus in rebus prætor non cognoscit, neque iudicat, sed ius dicit: sic, qui ab ipso iudices dati sunt, non ius dicunt, sed cognoscunt, ac iudicant. hinc recuperatores, hinc C. iuri, hinc arbitri, quos prætor dabat, ut iudicarent. atque hoc & Cicero iudicauit in epistola ad Q. fratrem. Prætor, inquit, solet iudicare, deberi? Quædam tamen erant, in quibus non modo non iudicabat, uerum nec ius dicebat prætor urb. sed, omissa iurisdictione, imperio prætorio exequebatur; ut, cum bonorum possessionem secundum tabulas, aut contra tabulas dabat; item, cum restituebat in integrum; & huius generis non nulla. Porro, cuius prætoris erat iurisdictione, eius non erat quæstio publica: neque, cuius quæstio publica, eius iurisdictione. unus tamen de toto prætorum collegio, qui erant omnes octo, & iuris dicendi, & quærendi potestatem habebat, is, qui prætor inter peregrinos uocabatur. nam & ius inter peregrinos ab eo dictum, satis

O constat:

De legibus

constat : & , quæsitum , sociorum , hoc est peregrinorum causa , de repetundis , Pedianus demonstrat in orationis commentario aduersus competitores. Nunc , quæ diuersis temporibus leges ad ea , quæ nominauimus , crimina uindicanda , peccandiq; licentiam reprimendam rogatae sunt , eas ostendemus . et , quoniam inter publica primum locum obtinet religio ; de incestu , quæ in sacram personam , sacro ue in loco commissa libido fuit , ante omnia est agendum . Incestus ita graue crimen ducebatur , ut , cum P. Clodius Bonæ deæ carimonias & sacra libidinis causa polluisset , s. c. factum sit , ut populus de reo cognosceret . quo licet conicere , quæstionem de incestu non esse legibus prætori demandatam . quod eo magis opinamur , quia legimus apud Pedianum , de M. Aemilio Scauro , qui princeps senatus fuit , diminutæ ac neglectæ religionis reo , comitiis tributis , accusante tribuno pl. Cn. Domitio , esse quæsitum . Lex illa fuit seuerissima , quæ uirginem Vestalem , si stuprum commisset , ad portam Collinam defodi uiuam iubebat . quam legem Numma Pompilius , Romanorum II rex , qui Vestalium uirginum sacerdotium Romæ instituit , ab Albanis transtulit . illi enim Vestales uirgines , in stupro deprehensas , uirgis ad mortem cadebant : Numma uero mortem quidem & ipse pœnam esse uoluit , sed cruoris expertem ; ut uiuæ sepultæ , diem suum miserrimis in tenebris obirent . Nec dubito , quin & is , qui stuprum cum Vestali commisset , morte pœnas lueret : ut in pari scelere pari supplicio punirentur . Possem alia non pauca aduersus religionem crimina subiungere : sed locus hic non est . agitur enim de capitalibus : ea porro capitalia non sunt ; ut , si quis auguri nō paruerit , aut inaugurato quid fecerit : si quis deos patrios alieno ritu , aut nouos separatim coluerit : si quis loca sacra priuata fecerit : si quis in deos , aut de diis nefarie atque impie locutus erit : si quis sacrum , aut in loco sacro surripuerit : si quis sacram personam , aut profanam in loco sacro percussit : & illa duo : quorum alterum apud Paulum iurisconsultum , alterum apud Vlpianum legimus ; si quis alicuius numinis superstitione leues mentes terruerit ; si quis illicitam diuinationem pollicitus erit . De maiestate , nisi si aut perduellionis causa esset , aut tribunus ædilis ue pl. accusaret , quæstionem prætor , is , cui obuenisset ea quæstio , exercebat . quod ex Pediano , qui C. Cornelium apud P. Cassium prætorem de maiestate reum ait esse factum , fati-

tis

tis liquet. interdum tamen capitale non fuisse crimen de maiestate, supra demonstratum est. Quot autem modis maiestas laderetur, nō omnino fortasse, sed magna tamen ex parte, ut opinor, exponemus. Læsa maiestas iudicatur, ubi quid in populum suum, suam ue remp. aut in magistratus, personam ue principis commissum est: in populum, ut si quis exercitum hostibus tradidit; si exercitum sollicitauit, delectum ue iniussu populi aut senatus habuit; si quis exercitū extra suam provinciam iniussu populi duxit, aut ipse, relicto exercitu, provinciæ finibus excessit; si quis remp. sua culpa male gessit; si stationem deseruit; si contra libertatem consilia iniit; si seditionem aut bellum excitauit; si publicum hostem domi priuatus habuit; si ius ciuitatis aut magistratus imminuit; si præter dignitatem populi R. regio in comitatu fuit; si contra bonum publicū locutus est; quod maiestatis quidem crimen, non tamen capitale fuit; ut exemplo docuimus: præterea, si quis ad hostem transiit, aliud ue quid cum iis aduersus remp. pactus est. Hæc in populum læsæ maiestatis crimina. in magistratum autem, uel in principis personam, si quis uim omnino ullam attulit; si tribuno pl. intercedenti non paruit, aut ab eo concionem auocauit, eum ue priuati loco habuit, ut puta, si occurrenti in uia non cessit, si consilium plebis disturbauit: & huius generis alia; quæ facile possumus intelligere ex ea definitione, quæ prodita literis est: Maiestatem is minuit, qui ea tollit, ex quibus ciuitatis amplitudo constat. Leges nominantur hæc, primum illa XII tab. de qua Polybius lib. V: ut, qui hostem concitasset, uel ciuem hosti tradidisset, capite pœnas daret: deinde, tribunicia, Appuleia, Varia; consulares, Cornelia, Iulia, Antonia. Appuleiam tulit, opinor, L. Appuleius Saturninus tribunus pl. quem postea cum C. Seruilio Glaucia prætore C. Marius VI consul s. C. interfecit. hac lege damnatum legimus C. Iunium Norbanum; quia, seditione populi concitata, quod ad maiestatem pertiuit, Q. Seruiliū Cæpionem innocentem damnasset. Variam tulit Q. Varius Sucronensis tribunus pl. qui Philippo & Cæsare cos. in locum M. Liuii Drusi interfecti tribunus pl. creatus est. huius legis hæc sententia fuit, ut quæreretur de iis, quorum ope, aut consilio bellum Italicum esset concitatum. quo crimine cum essent multi condemnati; & ad plures præterea, quos damnari necesse esset, ea culpa pertinere uideretur: fecit sapienter senatus, qui decreuerit, ne, dum tu-

De legibus

multus Italicus esset, iudicium ullum lege Varia fieret. Secuta est Cornelia, L. Syllæ dictatoris; inde Iulia, C. Cæsaris, in primo, ut opinor, lata consulatu, aut post uictum in Pharsalia Pompeium. nam consul iterum, bello Pompeii, aut Alexandrino impeditus, abfuit. hæc lex damnatis aqua & igni interdicebat. Postremo Antonia, M. Antonii consulis, qui III uir postea fuit: quæ damnatis de maiestate prouocationem ad populum dabat. quod antea in uno perduellione, omnium de maiestate criminum grauissimo, licebat. In causa maiestatis, & prodicionis, & si quid esset huiusmodi, impunitatem indici datam Pedianus ait; in causa repetundarum negat. nulla uero prorsus in causa senatoribus licuisse indicium profiteri, ne uidelicet summi dignitas ordinis minueretur, affirmat. Præmium autem, si quis accusasset & damnasset aliquem magistratum, ei datum crediderim eius ipsius, qui damnatus esset, magistratum; si modo accusator competitor fuisset, aut ei alioqui per leges petere liceret: aut, si reus magistratus designatus non esset, & magistratum antea gessisset, ius eodem loco dicendæ sententiæ; si modo senator esset accusator. nam, cum ait Cicero in oratione pro Balbo: Legum præmiis prætoriam sententiam, & prætextam togam consecuti sunt: aperte significat, quæ summa darentur accusatoribus præmia, hæc duo fuisse, potestatem dicendæ prætorio loco sententiæ, & magistratum: cum scilicet damnatus esset is, qui, ob gestam antea præturam, sententiam prætorio loco diceret; aut is, qui designatus esset in aliquo magistratu. quod si hæc summa erant accusatoribus præmia: certe non nisi summis de criminibus dabantur. et si hoc; sequitur illud, ut ob maiestatem, quod summum erat crimen, præcipue darentur. Perduellio, quod omnium de maiestate criminum fuit atrocissimum, (nam tunc est perduellio, cum in ipsam remp. uel in personam magistratus, aut principis infertur iniuria) non à prætore, sed à II uiris cognoscebatur. deinde ad populum erat prouocatio. itaque & Horatium illum, qui sororem occidit, & Sp. Cassium Viscellinum, qui de regno cogitauit, perduellionis accusatos, alterum à populo esse absolutum, alterum condemnatum, & bonis publicatis, necatum, Liuius monumentis historiarum prodidit. quamquam Horatii factum paricidium, non perduellio, uidetur fuisse: & lege paricidii, quam Numa Pompilius fecerat, iudicatum esse, Hostilii regis iussu, Festus Pompeius docet. cur igitur perduellionem

Liuius



Liuius nominat? ait enim. Rex, concilio populi aduocato, II uiros, inquit, qui Horatio perduellionem iudicent secundum legem, facio. Caussam hanc, fortasse ueram, licet opinari: uel quia Numa, uir sanctissimus, paricidium omne perduellionem uoluit esse; uel quia, si non omne paricidium, saltem illud, quod in cognatos, affines ue committeretur. Lege perduellionis, primum II uiri iudicabant, deinde ad populum erat prouocatio. declarat hoc oratio pro Rabirio perduellionis reo: ex qua, primum à II uiris, deinde à populo de Rabirio iudicatum esse, cognoscitur. quod etiam Suetonius tradidit. quanquam, multo ante, iudicem hoc de crimine populum fuisse; non modo Horatii proximo demonstratur exemplo, uerum etiam ex eo, quod à Plutarcho in Poplicola de Vitelliis, & Aquilliis, qui patriciæ gentis utrique fuerunt, proditum est. nam, cum de Tarquinio rege restituendo cogitassent, damnati à populo pœnas morte debitas luerunt. Atque hoc uno crimine damnatos necare ciues Romanos licuisse, cum eo tamen, si populus ita iudicasset, (nam, alioqui ne liceret, Sempronia C. Gracchi tribunicia lege sancitum est) satis plane constat: quippe, cum & crucem Rabirio à La bieno accusatore in campo constitutam Cicero dicat; &, mortem lege Iulia irrogatam, posteriores etiam iurisconsulti tradiderint, rei quoque memoria post mortem condemnata. Notat Vlpianus, quod à nobis omittendum non fuit; purgandum fuisse crimen perduellionis etiam successoribus; si forte reus obiisset ante quam de eo iudicatum esset. ait enim sic. Is, qui in reatu decedit, integri status decedit. extinguatur enim crimen mortalitate. nisi quis forte maiestatis crimine reus fuerit. nam, nisi hoc crimen à successoribus purgetur, hereditas fisco uendicatur. plane non, quisquis legis Iuliæ maiestatis reus est, eadem conditione est, sed qui perduellionis reus est, hostili animi aduersus remp. uel principem animatus. ceterum, si quis ex alia causa legis Iuliæ maiestatis reus sit, morte crimine liberatur. hæc Vlpianus: quæ alii quoque confirmant, ut paulo post in crimine repetundarum ostendemus. Quemadmodum autem omnium de maiestate criminum perduellio grauissimum fuit: sic à populo iis comitiis, quæ maxima omnium erant, centuriatis, inquam, iudicabatur. quod in ea, quam proxime nominaui, oratione pro Rabirio declaratur. idemq; Liuius, Valeriusq; significat; qui cœturias nominant in eo perduellionis iudicio, quod de Ti. Graccho,

&

De legibus

& C. Claudio censoribus, accusante tribuno pl. fiebat. nec dubito, quin Atilius ille Calatinus, Q. Fabii Maximi focer, quem scribit Valerius oppidi Soranorum proditione reum ad populum esse factum, centuriatis & ipse comitiis causam dixerit: cum oppidi proditio, quæ in remp. grauis iniuria est, uideatur esse perduellio. itaque miror (ut aliud ex alio) cur proditionem & maiestatem Peditius quodam in loco separatim nominauerit: cum proditio certe in maiestatem includatur, atque etiam, ut ego existimo, perduellio sit: quod inter maiestatis crimina summum fuit. nisi si ut speciem, quo modo philosophi loquuntur, à genere seiunxit, perduellionem scilicet à maiestate. nam & uocabulum ipsum, prodere, uidetur proprie ac directe perduellionem spectare. est enim, ubi quis cum hostibus aduersus remp. conspirat. Videtur etiam considerandum: cum tribuni pl. aliquem perduellionis accusarent, ut duos, quos nominaui, censores Rutilius, Rabirium Labienus, qua ratione populum, ut de reo iudicaret, per centurias conuocarent. siquidem tribunus pl. minor erat magistratus: centuriata uero comitia non nisi à maiore magistratu, ut consule, prætore, esse habita, traditum est. Dicendum, quod ueterum in libris patet; accusasse quidem tribunum pl. comitia uero maiorem magistratum, tribuno poscente, habuisse. et hoc significat Liuius lib. xxvi, cum ait: C. Sempornius Blaesus perduellionis se iudicare Cn. Fuluius dixit, diemque comitiis ab C. Calpurnio prætore urb. petit. eodemque modo locutus est lib. xliii. Vtrique censori, inquit, tribunus pl. Rutilius perduellionem se iudicare pronunciauit, diemque comitiis à C. Sulpicio prætore urb. petiit. est igitur, petere diem comitiis, petere ut sibi certo die comitia dentur. fuitque hoc genus antiquum loquendi; quo & ante Liuium Valerius Antias usus est. notaui enim apud Gellium hæc, hoc ipso de crimine, lib. vii, cap. ix. Peposci, non poposci, Valerius Antias lib. annalium xlv scriptum reliquit. Denique, ait, Licinius tribunus pl. perduellionem ei diem dixit, & comitiis diem à Q. Marcio prætore peposcit. Quæro etiam illud, cur censores illos, perduellionis accusatos, in exilium ituros fuisse, si damnati essent, non morte multatum iri, Liuius demonstret. ait enim sic. Gracchus conceptis uerbis iurauit, si collega damnatus esset, non expectato de se iudicio comitem exilii eius futurum. Hoc ego mihi uideor hac tueri ratione posse: quia censor magistratus esset; nec

nec interfici, aut omnino uiolari magistratum, leges sinerent. Addi fortasse & illud potest: non fuisse uere, quæ censoribus illis obiiciebantur, crimina perduellionis; quòd eorum alter concionem à tribuno pl. auocasset, alter eum, intercessioni non parendo, in ordinem coegisset: maiestatem quidem illam fuisse, perduellionem autem non fuisse: cum sit omnis perduellio maiestas, non omnis maiestas perduellio. quòd si quis tribunum pl. alium ue magistratum necasset, aut aduersus rep. tyrannidis caussa consilia iniisset: uere tunc perduellio fuit. ideo & Calsium Viscellinum, de regno cogitantem, esse necatum, & Rabirio, ob interfectum Saturninum tribunum pl. accusato, crucem in campo Martio supplicii caussa fuisse constitutam, animaduertimus. Postea totum hoc ad populum prouocandi ius lex Iulia, non C. Cæsaris, sed O. Octauiani, sustulit. Repetundarum crimen capitale, nec ne, fuerit, dubitatur à doctis. uerum omnem dubitationem tollit una distinctio. prioribus enim temporibus capitale non fuit: postea, cum auaritia magistratuum haud paulo latius manare iam in prouinciis cœpisset, uisum est ut acrioribus remediis obuiam iretur. itaque, lege lata, capitale crimen factum est. utrunque probatur exemplis. L. Lentulum, de repetundis damnatum, postea cum L. Marcio Censorino censorem esse factum, tradit Valerius lib. VI. quo patet, damnatione ius Romæ manendi ademptum illi non esse; siquidem censuram deinde sit affecutus: quam gessit anno ab urbe condita DCVI. Idem illa confirmant, quæ scripta sunt lib. I rhetoricorum ad Herennium: Lex uetat eum, qui de repetundis damnatus sit, in concione orationem habere. augur quidam, damnatus de repetundis, in demortui locum qui petat, nominauit. ueteris enim legis, non eius, quæ postremis reip. temporibus lata esset, exemplum uidetur attulisse: cum libro de officiis II ita loquatur Cicero: Proximæ quæque leges de repetundis duriores. Hæc, mansisse Romæ primis illis temporibus, qui iam de repetundis damnati essent, facile demonstrant. Rursus, capitale crimen fuisse, eoq; damnatos exulasse, interdictis aqua & igni, A. Gabinii, & C. Verris exemplo cognoscitur. quòd si quis obiecerit, non eos lege exulasse, sed quia, cum soluendo non essent, aut omnino cum nolent soluere, uoluntarium in exilium profecti sint: adiungemus de C. Catone: quem & esse damnatum de repetundis, Cicero in Verrem,

rem,

De legibus

rem, Velleiusq; tradunt; & exulasse Tarracone, ex oratione pro Balbo, perspicuum fit: cum tamen æstimata ei lis esset tantummodo HS XVIII millibus. ut exulasse uideatur, non, quod fortasse posset aliquis de Gabinio & Verre suspicari, ne solueret quod æstimatum erat; quod minimum sane pecuniæ fuit; sed quia legi, quæ repetundarum damnatis aqua & igni interdiceret, parere cogere-
retur. Est etiam apud Velleium P. Rutilii exemplum, repetundarum lege damnati: quem exulasse, & Cicero in oratione pro Balbo, & epitome Liuiana lib. LXX declarat. Verum, ut hæc sint dubia, quæ tamen satis aperta mihi quidem uidentur; Pediani testimonio nihil certius, nihil illustrius. is, ubi exponit illud Ciceronis in Verrem lib. I. Auaritiæ supplicio communi; subiungit, Aestimatione litis, & exilio: satis manifeste exilium cum pecuniaria pœna in repetundarum crimine coniungens. Actionem fuisse in hoc crimine aduersus heredes, nisi si rei in reatu, ut iurisconsulti loquebantur, periissent, cum ex ipsis cognoscitur iurisconsultis, tum Valerius indicat his uerbis: C. Licinius Macer, uir prætorius, Calui pater, repetundarum reus, dum sententiæ dicerentur, in Mænianum conscendit: deinde M. Ciceronem, qui id iudicium cogebat, prætextam ponentem cum uidisset, misit ad eum, qui diceret, se non damnatum, sed reum periisse, nec sua bona hastæ posse subiici: ac protinus sudario, quod forte in manu habebat, ore & faucibus coarctatis, incluso spiritu pœnam morte præcurrit. quæ cognita re, Cicero de eo nihil pronunciauit. igitur illustris ingenii orator ab inopia rei familiaris, inusitato paterni fati genere uindicatus est. Pœna uero damnatis de repetundis, quod ex Pediano satis liquet, dupli fuit. Lex per annos DC hoc de crimine lata Romæ nulla est: consulibusq; Cenforino & Manilio L. Piso Frugi tribunus pl. primum de repetundis rogationem tulit, ut Cicero lib. de officiis II, & in Bruto docet. eodemq; anno, aut certe proximo, alia lex à Cæcilio tribuno pl. lata est: quæ damnatum L. Lentulum, eum, de quo proxime meminimus, qui postea censor fuit, prodidit Valerius lib. VI. necesse est enim, ut, si ante censuram lege Cæcilia damnatus est, lata lex sit uel L. Marcio M. Manilio cos. quo anno & Calpurnia lata est; uel certe Sp. Postumio L. Calpurnio. nam Africano & Druso cos. qui anno proximo consules fuere, censuram Lentulus & Cenforinus gesserunt.

aliæ

aliæ deinde leges de repetundis, Seruilia, Acilia, Cornelia, Iulia: quibus singulis aliquandiu iudicia sunt administrata. nam posterior quæque proximam superiorem abrogauit, sic tamen, ut quædam retineret, atque adeo interdum multa. non enim dubito, quin, quot in rebus crimen repetundarum Seruilius constituit, iisdem in rebus, aut omnibus, aut plerisque, idem crimen Acilius, cum suam legem ferret, esse uoluerit. quod igitur ad criminis rationem, & peccandi genera pertinet, legem à lege non admodum dissensisse crediderim. pœnam uero semper fere auxit posterior lex, & iudicii rationem aliqua re multæ mutarunt. itaque C. Seruilius Glaucia, (redeo enim ad quatuor leges, quas proxime nominauimus, qui cum Saturnino tribuno pl. prætor est occisus, cum de repetundis rogationem ferret, nouum de comperendinatione caput primus intulit, intraq; spatium hoc iudicii tempus conclusit, ut accusatori dies XX ad agendum, totidem defensori ad defendendum darentur. ante hanc legem ampliari quidem licebat, comperendinari uero in iudicio repetundarum non licebat. quorum alterum lege Seruilia confirmatum, alterum, nulla in ueteri lege scriptum, sed nouum inductum, Acilia sustulit. qua de re Pedianus sic. Ante legem Glauciæ de comperendinatione, aut statim sententia dicebatur, si absolendus esset reus: aut, Amplius, pronunciabatur, si uideretur esse damnandus, cum dixissent iudices, Non liquet, hoc est, obscura est. itaque ea pars, interposita dilatione, dicebat, in cuius peroratione uidebatur obscuritas. comperendinatio uero utriusque partis recitatio est. et infra subiungit hæc. Alii sic. Inter comperendinationem & ampliationem hoc interest, quòd comperendinatio ex una tantum re dabatur, cum causam iudex non intelligeret. et omnino, si uidebatur iudicibus bona causa, absoluebant reum; si mala, non statim damnabant, sed hac excusatione parcebant. nam, cum condemnandi nota esset C litera, absoluedi A; ampliandi signum NL dabant; quo significabant non liquere: unde ampliatio nascebatur. quibus ex uerbis primum illud intelligitur, in ampliatione aut accusatorem solum, aut defensorem iterum causam egisse: deinde, etiam hoc constat, esse, Amplius, pronunciatum, non cum ambigeretur, absoluedus, an condemnandus esset reus, sed cum ita dilucide pateret culpa, ut condemnandus omnino uideretur. in quo ta-

P men,

De legibus

men, ut, quasi ad excusandam dilationem, speciem aliquam dubitationis præferrent, ampliandi signum in tabellis dabant N. L. tumq; iterum dicebat is, uel pro reo, uel contra reum, qui, quod proposuerat, argumentis non satis probasse uideretur. Quod ad primum attinet; etsi Peditano, sicuti debeo, plurimum tribuo; quæro tamen, uere ne senserit, an secus. uenit enim in mentem suspicari, ne, quemadmodum in comperendinatione, sic in ampliacione ab utraque parte iterum acta causa sit. Lilius enim libro XLIII causam de repetundis ex ampliacione utrinque ait esse actam. idem ex iis uerbis possum coniecere, quæ sunt apud Ciceronem actionis secundæ lib. I in Verrem: Quid ego nunc in altera actione Cn. Dolabellæ spiritus, quid huius lacrymas, & concursationes proferam? uocat alteram actionem post ampliacionem. quod uerbum spectare potius utranque partem, quam alterutram, uidetur. et Asconius ipse, non dubito, quin idem senserit. subiungit enim hæc in suo commentario: Hic apparet, etiam in ampliacione sic alteram dici, quemadmodum in comperendinatione. De illo altero, cum dixit, ampliacionem fuisse, non in causa dubia, sed in manifesta rei culpa, non ad causam melius cognoscendam, sed ad damnationem differendam: plane non assentior: nec tamen audeo dissentire. libenter enim existimauerim, Amplius, esse pronunciatum, cum obscura causa esset, nec de absolutione, aut condemnatione satis liqueret, proptereaq; amplius requiri ad causam demonstrandam uideretur. nam si ampliatio futuræ damnationis esset signum: quorsum, cum de Philodamo esset, Amplius, pronunciatum, tantopere Dolabella & Verres contendissent, ut condemnaretur? non opera superuacanea fuisset? contenderunt autem, quia uidebant posse fieri, ut absolueretur. quid? Peditanus ipse non ne contra suam sententiam loquitur? quasi enim oblitus ea, quæ ante de ampliacione dixerat, hoc in loco ait: Mos ueterum hic fuerat, ut, si absoluendus quis esset, statim absolueretur; si damnandus, statim damnaretur; si causa non esset idonea ad damnationem, absolui tamen non posset, amplius pronunciareretur. Sed fortasse Peditanus excusari poterit, si tempora distinguantur, hoc modo; ut ante legem Glauciae ampliatio fuerit dilatae condemnationis indicium; post legem uero Glauciae, obscuritatis, nec satis exploratae sententiae. utrunque sane duo Ciceronis

ceronis loca, si quis attenderit, uidentur ostendere: primum, in iudicio Philodami, de quo proxime dictum est. ibi enim, dubium fuisse post damnationem euentum iudicii, plane constat. deinde, cum ea dixit in eodem libro: Verum, ut opinor, Glaucia primus tulit, ut comperendinaretur reus. antea uel iudicari primo poterat, uel, Amplius, pronunciari. utram igitur putas legem molliorem? opinor, illam ueterem: qua uel cito absolui, uel tarde condemnari licebat. nam hoc, Tarde condemnari, ad illud, quod proxime dixerat, refertur; Amplius, pronunciari. ut ampliatio-
ne nihil aliud, quam tardam condemnationem, significare uideatur. Differt etiam in hoc à comperendinatione ampliatio, quòd ampliatio tantum à iudicum arbitrio ac uoluntate pendet, comperendinatio uero est illa quidem in iudiciis posita, sed petente uel accusatore, uel defensore. nam, nisi alteruter, aut uterque petiisset, nihil iudices de comperendinando reo cogitassent. non potuissent autem comperendinationem inuitis iudiciis omitti, Pedianus docet, cum ait, ideo testibus usum esse Ciceronem, ut, si posset, comperendinationem tolleretur. sperabat enim Cicero, causa per testes patefacta, iudiciisq; probata, futurum ut de tollenda comperendinatione à iudiciis impetraret. ergo, tum in iudiciis, tum in accusatore ac defensore situm fuisse comperendinandi ius, uere dixi. Differebant etiam origine ampliatio, & comperendinatio. nam uetustiore fuisse ampliatioem, uerba Ciceronis de lege Glaucia demonstrant. et, P. Licinio, C. Cassio cos. hoc est multis ante primam de repetundis legem annis, quam à L. Pisone latam diximus, ampliatos esse reos in iudicio repetundarum, apud Liuium lib. XLIII animaduertimus. Redeo ad rem: nec tamen à re longius discessum est: quando in lege Seruilia caput fuit de comperendinatione: & Acilia, de qua proxime agemus, comperendinationem simul cum ampliatioem, quæ utraque rei potius causa, quam accusatoris, uidetur esse constituta, omnino sublatam esse iussit. Tulit eam legem M. Acilius Glabrio, pater eius, qui Verri in causa prætor fuit, & cum C. Calpurnio Pisone post biennium consulatum gessit. tulerit autem in tribunatu pl. an in prætura, minus constat. latam tamen in tribunatu potius, quam in prætura, ut existimem, hoc adducor argumento, quòd reliquas de repetundis leges à tribunis pl. omnes uideo rogatas esse, exceptis

P 2 iis,

De legibus

iis, quas patricii, qui tribuni pl. esse non poterant, rogarunt, ut Cornelia, Iulia. Seuerissimam fuisse hanc Glabrionis legem, in qua ne comperendinari quidem, aut ampliari liceret reum, Cicero lib. I in Verrem, & Pedianus tradunt. itaque multi, nulla omnino, neque comperendinationis, neque ampliationis, dilatione interposita, semel accusati, semel dicta causa, semel auditis testibus, ea lege damnati sunt. Quod autem in eo loco Cicero dixit; Ego tibi illam Aciliam legem restituo; non dixit, restituo, quasi de lege ante Seruiliam lata; sed habuit rationem praesentis temporis, cum ex lege Cornelia, non iam ex Acilia, de repetundis quaerebatur. Acilia enim tollebat omnino & comperendinationem, & ampliationem: quae utraque, comperendinatio quidem certe, lege Cornelia permittebatur. id Cicero significauit satis aperte, cum dixit: Adimo enim comperendinatum: quod habet lex in se molestissimum; bis ut causa dicatur. et in eo: Glaucia primus tulit, ut comperendinaretur reus. nam, si primus Glaucia, ergo aliquis post eum item de comperendinatione tulit. eum autem Acilium constare non fuisse: id quod ostendimus. fuit igitur L. Sylla: cuius ex lege hoc tempore iudicia de repetundis administrabantur. idemque declarat Pedianus, cum ait, ideo testibus usum esse Ciceronem, ut, si posset, comperendinationem tolleretur. frustra enim Cicero conatus esset tollere, ac ne conatus quidem esset, si necessaria fuisset. Cum autem in eo loco subiunxit, Ita mittam in consilium, ut, etiam si lex ampliandi faciat potestatem, tamen isti turpe sibi existiment, non primo iudicare: hoc dicit: Ita testes interrogabo, ita scelera Verris patefaciam, ut, etiam si lex Acilia, quam, quod ad me attinet, tibi restituo, (adimo enim comperendinatum) permittat id, quod maxime permittit, dilationem uidelicet, iudices tamen, haudquaquam ampliantes, (comperendinationem non nominat; quia comperendinatio, non iudicium, sed accusatoris, & defensoris erat, cum, eorum alterutro petente, fieret, ampliatio uero iudicium) magnitudine criminum, & ui probationum inspecta, sibi turpe arbitrentur non primo iudicare. Et, quod Aciliam Cicero mitissimam uocat, quam Asconius seuerissimam; uterque recte: seuerissimam, si cum ueteribus, mitissimam, si cum Cornelia conferatur. Haec pluribus uerbis, tum quia pertinent ad leges, tum quia locus Ciceronis in Verrem satis habet obscuritatis:

obscuritatis : & in eo interpretes omnes implicati , tanquam in fa-
lebra haerunt . Quinta fuit Cornelia , L. Syllae dictatoris , quae
comperendinationem , lege Acilia sublatam , restituit . fuit autem ,
ut posterior quaeque lex , durior , quam Acilia : etsi comperendi-
nationem concedebat , quam Acilia tollebat . sicuti lex Glauciae du-
rior , quam uetus : cum tamen Glauciae lege comperendinari pos-
set reus , uetere lege non posset . id Cicero significat his uerbis :
Vtram putas legem molliorem ? opinor , illam ueterem . eodemq;
modo seuerior , quae consecuta est , Iulia , quam Cornelia . quod
idem Cicero in oratione pro Postumo tradit . Sunt autem lege
Cornelia iudicia de repetundis omnia usque ad C. Caesaris , qui po-
stea dictator fuit , primum consulatum administrata . consul enim
Caesar nouam de repetundis legem rogauit . cuius quidem capita ,
quae ex ueterum scriptis liceat colligere , haec maxime fuerunt : ut
repeterentur pecuniae , quas quis in magistratu , potestate , cura-
tione , legatione , uel quo alio officio , munere , ministerio ue pu-
blico cepisset , uel aliquis ex cohorte ipsius : ut urbani magistratus
ab omni sorde se abstinerent , ne ue plus doni muneris ue in anno
acciperent , quam quod esset aureorum centum : ne ue quis ob iu-
dicem arbitrum ue dandum , mutandum , iubendum ue , ut iudi-
caret ; ne ue ob hominem in uincula publica coniiciendum , uin-
ciendum , uinciri ue iubendum , uel ex uinculis dimittendum ; ne
ue quis ob hominem condemnandum , absoluendum ue , ne ue ob
litem aestimandam , iudicium ue capitis pecuniae ue faciendum , uel
non faciendum aliquid acciperet . quae uerba non minus pertine-
bant ad prouinciales , quam ad urbanos magistratus . item , ne
quis omnino ob negotium faciendum , uel non faciendum , per ca-
lumniam pecuniam acciperet . Cautum praeterea , ne prouinciae
praesidium auaritia premerentur , aut exhaurirentur ; ne illi , qui
prouincias regebant , qui ue circa eos erant , negociarentur , nec
mutuam pecuniam darent , foenus ue exercerent : neque hoc tan-
tum ; sed ne uxorem quidem quisquam duceret posse ex ea pro-
uincia oriundam , uel domicilium ibi habentem ; ne ue filio uxore
ducenti consentiret : ne iis in liberos populos ius de pecuniis cre-
ditis dicere liceret : item , ne quis de prouincia exiret , aut exerci-
tum inde sua auctoritate educeret , bellum sua sponte gereret , in
regnum alienum iniussu senatus ac populi accederet : ut libertas
fociis ,

De legibus

fociis, ac præmia, ob merita in remp. data integra essent: ne cuiquam aurum coronarium aut imperare, aut accipere liceret, nisi cui decretus esset à senatu triumphus. cautum etiam hac lege, ne dona acciperent quæstores, aut xenia: ut rectores prouinciarum rationes, prius quàm decederent, apud duas in prouincia ciuitates deponerent: ne quis pro consule, aut pro prætore legatum suum ante se de prouincia dimitteret. quod ab Vlpiano, in l. meminisse, traditum est. spectauit hæc lex non modo ad eos, qui cum aliqua potestate erant, uerum etiam ad eos, qui curabant aliquod opus publice faciendum, frumentum comparandum, uel uiam reficiendam: item ad legatos, qui prouinciarum rectoribus à senatu dabantur, præfectosq; & tribunos, quæstores etiam, totamq; cohortem prætoriam, si quid accepisse à prouincialibus conuicti essent. eadem lege illud etiam sancitum erat, quid rectoribus prouinciarum, dum in prouinciam irent, à fociis populi R. liceret accipere: qua de lege Cicero, dum in prouinciam proficiscitur, ita scribit ad Atticum lib. v. Adhuc sumptus nec in me, aut publice, aut priuatim, nec in quenquam comitum. nihil accipitur lege Iulia, nihil ab hospite. postea uero quàm in prouinciam peruenit, eodem libro sic: Scito non modo nos fœnum, aut quod lege Iulia dari solet, sed ne ligna quidem, nec, præter quatuor lectos, & lectum, quenquam accipere quidquam. Ad hanc legem postea Cæsar, rerum potitus, fortasse caput hoc addidit, ut repetundarum conuicti etiam ordine senatorio mouerentur. id quidem ab eo factum, Suetonius narrat. quod uel aucta, ut dixi, sua uetere lege potuit, uel noua lege lata, uel etiam, sine lege, pro ea, quam omnium rerum unus habebat, potestate. Scriptum etiam apud Martianum iuriconsultum inuenio, lege Iulia repetundarum cautum esse, ne iudicare, ne uel testimonium dicere liceret ei, qui ob turpitudinem senatu motus, nec restitutus esset. De ui sequitur. ea duplex fuit, publica, & priuata. publica definitur, ea, quæ armis, priuata, quæ sine armis infertur. priuatis enim hominibus armorum usu tum in urbe, tum in agro lege Iulia interdictum, nisi si haberent ea uenationis, itineris, nauigationis uel causæ, legimus in Martiano, tit. ad l. Iuliam de ui publica. idq; renouatum à Iustiniano, scribit ipse in libro nouellarum const. tit. de armis. sed hoc ante legem Iuliam, & ante Magni Pompeii edictum, de quo legimus in Plinii naturalis historiæ lib.

lib. XXXIII. qui uetuit in tumultu necis Clodianæ ullum in urbe telum esse, primis temporibus institutum, obseruatumq; non dubito. uideo enim, Seruio regnante, populum R. ad centuriata comitia in campum extra urbem propterea conuenisse, quia in urbe usus armorum interdiceretur. serpit deinde licentia: quam nouis legibus & edictis reprimi necesse est. Publica uis uel contra remp. & magistratus, uel contra priuatos fiebat. contra remp. & magistratus capitalis erat semper; contra priuatos, non item, sed tantummodo, cum erepta uita esset. Priuatam uim non fuisse capitalem, etiam si non probetur exemplis, facile tamen ex ipsa definitione licet existimare. Neque uero, ut de publica, item de priuata prætor cognoscebat, sed iudices dabat. ac ne de publica quidem semper. nam existunt controuersia quædam de ui, quæ consistunt in iure ciuili, ut ea pro Cecina: in qua non prætor, sed recuperatores, quos à prætore urb. datos iudices esse iam diximus, iudicarunt. ergo de publica ui modo prætor, cui ea quæstio obtigisset, (is autem nec urbanus, nec peregrinus erat, sed unus de reliquis sex) modo iudices à prætore dati cognoscebant. dabat autem eos prætor uel urbanus, si causa esset in iure ciuili, & ageretur inter ciues, ut ea pro Cecina; uel peregrinus, si ageretur inter peregrinos; uel unus de reliquis sex, si cognitio non à iure ciuili penderet. de priuata uero nunquam prætor, semper iudices à prætore dati cognoscebant, prætore autem uel peregrino, si res esset inter peregrinos; uel urbano, si ciuis ciuem in iudicium uocaret, & in iure ciuili posita causa esset; uel uno de reliquis, si de iure ciuili nulla esset consideratio. Nunc, quando de capitalibus agitur criminibus, leges de ui publica narrabimus. Plotia fuit tribunicia, de ui publica priuatis ciuilibus illata; (nam de publica contra remp. lex Lutatia fuit) qua Catilinam ab L. Paulo, M. Lepidi, qui III uir postea fuit, fratre, accusatum, in Salustio legimus; Clodium à Milone, in oratione pro Milone; M. Tutium à C. Sempromio Rufo, in epistola M. Cælii. quæ omnes causæ, non dubito, quin capitales fuerint: cum, Catilinam & Clodium minime leuibus flagitiis affines fuisse, constet; causam autem, qua in iudicium Tutius est uocatus, extraordinariam Cælius appellet. hanc legem tulit, opinor, M. Plautius Siluanus tribunus pl. Cn. Pompeio Strabone, L. Porcio Catone cos. is, qui, ut iam diximus, legem iudiciariam

De legibus

iudiciariam tulit. Sequuntur consulares, primum Lutatia de ui reip. illata; quam Q. Lutatius Catulus consul, M. Aemilii Lepidi collega, in tumultu reip. tulit: quæ festis etiam diebus iudicium de ui iubebat exerceri, ut ex procemio patet orationis pro M. Cœlio. eaq; damnati sunt, qui de Catilinæ fociis in urbe remanserant. unde illud in ea pro Sylla: Seueritatem iudiciorum, quæ per hos menses in homines audacissimos facta est, lenitate, ac misericordia mitigate. quod exponitur in ea pro Cœlio his uerbis. De ui quæritis. quæ lex ad imperium, ad maiestatem, ad statum patriæ, ad salutem omnium pertinet: quam legem Q. Catulus, armata dissensione ciuium, reip. extremis pene temporibus tulit: quæq; lex, sedata illa flamma consulatus mei, fumantes reliquias coniurationis extinxit. Ex quo mihi oritur opinio, in oratione, quæ Salustii nomine in Ciceronem inscribitur, ubi legis Plautiæ legitur, rectius fore, si legatur, legis Lutatiæ: cum eo loco de coniuratorum damnatione uerba fiant: qui uim non in priuatos ciues, quæ lege Plotia iudicabatur, sed in uniuersam remp. comparauerant; cuius criminis quæstio Lutatiam ad legem pertinebat. et ob eam causam ipse Cicero pro Cœlio dixit: Quæ lex fumantes reliquias coniurationis extinxit: cum de Lutatia lege loqueretur. Sed quæri potest: cum Plautia lex de ui Ciceronis aetate seruaretur; cur M. Cœlius, pro quo extat Ciceronis oratio, Lutatia lege potius, quàm Plautia, sit ab Atratino in iudicium uocatus. quid enim aduersus remp. Cœlius commiserat? Facile respondetur: non quòd Romæ aut senatum obsedisset, aut magistratibus uim attulisset; sed quòd, seditione Neapoli concitata, (id enim obiiciebat accusator) intulisse uim reip. uideretur. nam in oratione quodam in loco ita scriptum est. Illam partem causæ facile patior grauius & ornate à M. Crasso peroratam, de seditionibus Neapolitanis, de Alexandrinorum pulsatione Puteolana. quod attinebat ad Alexandrinorum pulsationem, aut ad uenenum, quod Clodiæ necandæ causâ paratum esse arguebat accusator; quibus in criminibus non publica, sed priuata res agebatur; postulatus esset Cœlius lege Plotia, non Lutatia. sed, cum simul crimen de seditione Neapolitana coniungeretur; quæ ad imperium statumq; reip. pertinebat; propterea lege Lutatiæ est accusatus. atque hanc quidem partem causæ M. Crassus egit: illam de ueneno

ueneno Clodiæ dato libenter Cicero suscepit, inimicitiarum causa. sed principem locum dedit accusator, quo grauius reum opprimeret, seditionibus Neapolitanis. ideoq; lege Lutatia accusauit, cum tamen, præter seditiones Neapolitanas, alia crimina obiiceret, lege Plotia, non Lutatia, uindicanda. nam, damnatos esse reos aliis criminibus, ac legibus, quàm quo potissimum crimine, quaq; potissimum lege essent accusati, colligitur ex oratione pro Cluentio. erat igitur utrique legi locus eodem tempore in ciuitate: quia, cum diuersa essent de publica ui crimina, diuersis etiam quæri legibus oportebat. Post Lutatiam consularis Pompeia fuit, à Cn. Pompeio Magno III consule post occisum Clodium lata: quæ & pœnam grauiorem, quàm reliquæ de ui superiores leges, & formam iudiciorum breuiorem continebat. iubebat enim, ut prius, quàm causa ageretur, citati testes per triduum audirentur: dicta eorum iudices consignarent: quarta die adesse omnes in diem posterum iuberentur, & coram accusatore ac reo pilæ, in quibus nomina iudicum inscripta essent, æquarentur: dein rursus postera die à quæsitore sortitio iudicum fieret unius & LXXX: qui numerus cum sorte obtigisset, ipsi protinus sessum irent: tum ad dicendum duas accusator horas, tres reus haberet, reusq; eodem die illo iudicaretur: prius autem quàm sententiæ ferrentur, quinos ex singulis ordinibus accusator, totidem reus reiiceret, ita ut numerus iudicum relinqueretur, qui sententias ferrent, LI. hac lege qui damnati sunt, omnes exularunt, Milo, quia Clodium occidisset; Q. Pompeius, Syllæ dictatoris ex filia nepos, T. Munatius Plancus Bursa, Sex. Clodius, quòd, iis auctoribus P. Clodii corpore in curiam illato, curia flagrasset. cum cæde enim Clodii, in Appia uia facta, incendium simul curiæ, & oppugnationem domus M. Lepidi Pompeius ea lege nominatim comprehenderat. sed hos postea, & omnes lege Pompeia de ui damnatos, uno Milone excepto, uictor C. Cæsar restituit. Pompeia consularis Iulia secuta est, à C. Cæsare post uictum Pompeium lata; ut damnatis de ui aqua & igni interdiceretur. sic enim oratione I in Antonium scriptum inuenimus. aqua uero, & igni interdiceret, nihil aliud est, quàm exilium, non nominatim, sed re ipsa inferre. damnato enim necessitas imponitur exilii, ope ea denegata, atque interdicta, sine qua uiui non potest. quod etiam Pompe-

Q ia,

De legibus

ia, & ante Pompeiam Plautia, & alia quoque superiores leges, ut puto, sanxerant. itaque non dubito, quin Cæsar noua lege nouam sententiam, ad uim remouendam, attulerit. Quod autem iuriscōsultorum in libris ita scriptum est; deportationem de ui publica damnatis, de priuata uero publicationem bonorum in tertiam partem Iulia lege irrogatam: possit aliquis suspicari, cum uideat mentionem fieri deportationis, non esse legem Iuliam, de qua Cicero meminit, sed duas fuisse leges Iulias, unam à C. Cæsare latam, alteram ab Augusto. ego autem sic existimo; unam omnino fuisse. nam, si duæ; aliquid crederem iuriscōsultorum in libris, distinctionis causa, additum: sicuti, ad legem Iuliam de adulteriis, addit Vlpianus: Hæc lex ab Augusto lata est: ne qua scilicet ex Iuliæ nomine dubitatio posset existere. unam igitur de ui puto Iuliam legem, eamq; latam à C. Cæsare. nam, quod deportatio nominatur, quæ ante Augustum nulla fuit: sciendum est, sublata aquæ & ignis interdictione, eam successisse; cum tamen ueteres eadem leges ualerent. itaque & in lege Cornelia de sicariis & ueneficis, quam tulit L. Sylla reip. temporibus, deportationem tamen Martianus nominat. sed redeo ad sententiam legis. Si commissæ uis armis non esset, uerum aut uirgo, aut uidua rapta esset; raptor, & qui opem tulisset, capite pledebatur. Hac lege tenebantur, ut Martianns ait, qui turbæ seditionis uel faciendæ consilium iniissent, seruos uel, aut liberos homines in armis habuissent; omnesq; puberes cum telo in publico deprehensi. Subiungit idem: de ui priuata damnatos, neque senatores, neque decuriones, neque iudices esse, neque honorem ullum capere, Iulia lege, potuisse. Consularis & Antonia, à M. Antonio post obitum C. Cæsaris lata; ut damnatis de ui ad populum prouocatio esset. quod ad conciliandos sibi multitudinis animos, qui tyrannidem spectaret, excogitauit. Harum autem legum testimonia non recito; ne perdat narratio dignitatem, ne uel non modo aliis, uerum etiam ipse mihi molestiam pariam, dum illa crebro repetantur, ut ait, ut inquit, & eiusdem generis alia. Peculatus à principio capitalis non fuit, & pecuniaria pœna, non capitis diminutione, notabatur. id significat Liuius lib. XXVII, cum ait: M. Liuius erat, multis annis ante ex consulatu populi iudicio damnatus. quam ignominiam adeo ægre tulerat, ut & rus migraret, & per multos annos & urbe & omni cœtu careret hominum.

num. ex his uerbis, non esse M. Liuius, qui postea Salinator est appellatus, aqua & igni interdictum, sed, affectum animo grauitex eo iudicio, iratum populo, sua sponte urbe celsisse, animaduerto. eum autem peculatus nomine à populo esse damnatum, ex eo libello didici, quem nescio quis de uiris illustribus composuit. est enim in eo ita scriptum: Liuius Salinator primo consul de Illyriis triumphauit; deinde ex inuidia peculatus reus ab omnibus tribubus, excepta Mæcia, condemnatus. et apud Liuium lib. XXXVIII. damnato de peculatu L. Scipione Asiatico, Africani maioris fratres, litis aestimatae, & carceris, nisi solueret, mentio fit; aquae uero & ignis interdictio nulla nominatur. Habemus etiam exemplum M. Camilli, qui urbem Romam obsidione Gallorum liberauit. hic ob Veientanam praedam, ut ait Liuius, à L. Appuleio accusatus, XV millibus grauis aëris damnatus est. abiit autem in exilium ante iudicii diem: quia, cum, se damnatum iri, de suis tribulibus & clientibus cognouisset, de patria maluit decedere, quam iniquissimam multam, populi suffragiis irrogatam, exoluere. nam damnatis de peculatu uel soluendum erat quanti lis esset aestimata, uel in uinculis, quoad soluerent, miserrime uiuendum. quod in Scipionis Asiatici iudicio, quo de proxime dictum est, Liuius significat. quod si reus, iudicio non expectato, in exilium uoluntarium abiisset; tunc accusationem quidem is, qui cœperat, persequeretur; reum tamen absentem non alia, quam pecuniaria poena populus condemnabat: eamque pecuniam soluere, si rediret, damnatus cogebatur, aut, si soluendo non esset, in carcerem ire. et, cum ait Liuius de Camillo lib. V, Non prius ab Ardea profectum Camillum, quam comperit legem latam: quod iniussu populi mutari finibus non posset: non significat, quod fortasse uideri possit, non licuisse Camillo aliam in ciuitatem, extra populi R. ditionem, migrare; sed, non potuisse Romam redire, nisi, quam ab eo solui pecuniam populus iusserat, aut solueret, aut, lege lata, rescissoque populi iudicio, liberaretur. non enim in exilium ire coactus esset, si multae satisfecisset. idque satis aperte Liuius declarat, cum ait: Accitis domum tribulibus & clientibus, quae magna pars plebis erat, percunctatus animos eorum responsum tulit, se collaturos quanti damnatus esset; absoluerum non posse. quare non fuit capitalis peculatus, cum pecunia puniretur: sed, uel quia soluere multam

De legibus

rei non possent, uel quia nollent, ut Camillus, tanquam in exilium proficiscebantur. Quod si quis de Marcio Coriolano id, quod Dionysius & Plutarchus tradiderunt, mihi obiiciat; perpetuo exilio à tribus esse multatum, quod prædam in Antiati agro factam occultasset, nec in publicum retulisset: fatebor fortasse, peculatum fuisse, quo Marcus est condemnatus; iudicium tamen illud non uocabo, sed uim quandam & impetum multitudinis concitata: ulcisci plebs cum alias iniurias à Marcio acceptas, tum illam maxime uoluit, quod, cum frumentum à senatu peteret, unus ex omnibus patriciis acerrime restiterat. quare in illo iudicio nihil minus, quàm quid leges uellent, à plebe spectatum est. Quod autem Dionysius & Plutarchus, non absentem, sed præsentem, Liuius autem contra damnatum absentem tradit: Liuius magis assenserim. est enim uerisimilius, Coriolanum, irritata plebis uim timentem, iudicio se non commisisse, & ante iudicii diem urbe exiisse. Accedit illud, quod, etsi de Coriolani exilio inter omnes conuenit: de crimine tamen, quo damnatus est, non idem omnes tradunt. Plutarchus peculatum memorat. Liuius delicti nomen non ponit. Dionysius nominatum quidem à Sicinio tribuno pl. prædam Antiatem in Coriolani accusatione significat, sed ut perduellionis crimen, quod illi obiectum erat, probaretur; quod eam prædam Coriolanus amicis & clientibus diuisisset, eo consilio, ut focios & satellites ad parandam tyrannidem quamplurimos haberet. quare, si uerum est, quod Græci homines scriptum reliquere, multatum exilio Coriolanum; cum Liuius, non damnatum exilio, sed damnatum in Volscos exulatum abiisse tradat; ut significare quiddam de uoluntario exilio uideri possit: tamen, uel quia iudicium illud non fuit, sed furentis plebis impetus; uel quia cum peculatu coniunctum una fuit perduellionis crimen; nihil obstat, quin peculatum ex eo genere criminum fuisse credamus, quo in genere non capitis erat, sed pecuniæ pœna constituta. Hoc de crimine lex nulla nominatur. sed ante M. Aemilium Lepidum, C. Flaminium cos. quo anno superior Africanus à duobus Petiliis tribunis pl. est accusatus, iudicem senatum fuisse, Liuius libro XXXVIII significat his uerbis. Huic rogationi Q. & L. Nummii intercedebant. senatum quærere de pecunia non relata in publicum, ita ut antea semper factum esset, æquum censebant. tum Q. Terentium Culeonem

Culeonem prætorem de pecunia, quæ capta, ablata, coacta ab rege Antiocho diceretur, quærere patres iusserunt. eoq; cognoscente L. Scipio Asiaticus damnatus est. me tamen idem Liuius in dubitationem adducit, senatus ne, an populus ante eos consules, quos no minauit, de peculatu quæsierit. scribit enim duobus libris, XXVII, & XXIX, M. Liuium Salinatorem post priorem consulatum à populo esse condemnatum; ideoq; eum, cum censuram gereret, tribus omnes, excepta Mæcia, in ærarios retulisse, quod & innocentem se condemnassent, & consulem postea censoremq; fecissent. eam porro damnationem peculatus nomine fuisse, docet is, ut iam ostendi, qui de uiris illustribus librum conscripsit. parum igitur, ipse sibi constare Liuius uidetur, qui ante consules M. Aemilium & C. Flaminium semper de peculatu senatum quæsisse affirmet, cum idem eo de crimine M. Liuium, populo iudicante, damnatum ante dixerit. sed uidelicet existimo, quouis de crimine, si tribunus pl. aliquis esset accusator, populum iudicare potuisse. id quod ante dictum est, exemplisq; comprobatur. quare, ne grauis auctor, T. Liuius, damnetur inconstantia, locum hæc habeat exceptio. Post Africani, eiusq; fratris Asiatici accusationem, prætor cum iudicum consilio de iis, qui peculatus arguerentur, quæstionem exercuit. id opinor lege ab aliquo magistratu lata institutum. alioqui, quod senatus uniuersi munus erat, ad prætorem, certumq; iudicum numerum, senatu negligente, translatus, uix putarim. Lege postea Iulia capitalis peculatus factus est: quod iurisconsulti declarant. nec iniuria: cum & repetundarum crimen, huic admodum simile, capitale iam antea fuisset. cur enim, quod sociis tribuebatur, id ærarii, hoc est ciuium, causa minus fieret? tametsi Cæsar, cum tam acriter de peculatu cauit, suam potius rem, quam publicam spectauit. sibi enim, qui omnia teneret, furtum fieri statuit, non reip. Peculatus poena, inquit Vlpianus ad legem Iuliam peculatus, aquæ & ignis interdictionem continet: in quam hodie successit deportatio. porro, qui in eum statum deducitur, sicut omnia pristina iura, ita & bona amittit. Lege autem peculatus tenebatur, si quis pecuniam publicam surripuisset, uel, ut surriperetur, curasset: si quis in aurum, argentum ue, aut æs publicum quid indidisset, uel immiscuisset, fecissetq; dolo malo, quo id peius fieret. hæc apud Venuleium scripta sunt. Quod autem additur, eadem Iulia
lege

De legibus

lege obstrictos fuisse qui æs, in quo leges incisæ erant, refixisset, uel quid immutasset, aut in publicis tabulis deleuisset, induxisset ue: hæc ego non ad peculatum, sed ad maiestatem retulerim. quòd si pretio commissum id fuisset: ne sic quidem peculatus mihi uideatur, sed damnandi potius maiestatis & corruptus, & corruptor. quædam enim incerta crimina in maiestatem conferebantur: neque aliud crimen patebat latius. atque etiam, quod in lege Iulia peculatus ait Vlpianus scriptum fuisse, ne quis ex pecunia sacra, religiosaq; auferret, interciperet, in rem suam uerteret, non peculatum magis, quàm sacrilegium, fuisse existimauerim. Hæc præterea sunt in crimine peculatus: si quis imperator pecuniam ex præda captam penes se priuatim retinuisse, eamq; nec in triumpho tulisset, nec in ærarium retulisset. Pœna peculatus uel pecuniaria fuit, uel capitalis. nam qui prædam ab hostibus captam surripuerat, in quadruplum damnabatur: ceteris autem aqua & igni interdicebatur. postea irrogata est alia lege deportatio, abrogata interdictionis pœna. deportati uero, quod in Vlpiano legimus, sicut omnia pristina iura, ita & bona amittunt omnia. Et quoniam, ut repetundæ, ita peculatus publicum furtum fuit; propterea, ut in repetundis, sic in peculatu æstimationes fiebant litium, contraq; heredes, ut scripsit Papinianus ad legem Iuliam peculatus, actio dabatur. peculatum tamen, quod ante quinquennium esset admissum, obiici non oportuit, si Venuleio credimus. Cum peculatu residuæ pecuniæ coniunguntur. damnum enim utroque modo infertur ærario. residuæ autem pecuniæ sunt, ut ait Paulus, quæ priuatim retinentur, cum uel in usum publicum erogari, uel in ærarium inferri debeant. nec minus in hoc crimine, quàm in peculatu, actio aduersus heredes dabatur. quæq; de peculatu, eadem residuis de pecuniis lex cauebat. ut non dubitem, quin eadem pœna sit damnatis irrogata. amplius quidem tertia parte, quàm deberent, soluisse eos, qui de residuis pecuniis damnarentur, Martianus ait. capitis autem lege Iulia esse damnatos, uerissimillimum est. Interficarios graue crimen fuit, & ad uim pertinuit; proprie tamen lege Cornelia uindicatum est. sicuti nec de perduellionis crimine, quod ad maiestatem pertinuit, eadem lege, qua de reliquis maiestatis criminibus, quæsitum est: cum de perduellione populus, de reliqua uero maiestate prætor cognosceret. Lege de sicariis Cornelia,

nelia, quam dictator Sylla tulit, tenebatur qui hominem occidisset, aut occidendi causa cum telo ambulasset, uel uenenum parasset, habuisset, uendidisset: siue quis priuatus testimonium dolo malo dixisset, quo quis iudicio publico condemnaretur: aut si magistratus ob capitalem causam pecuniā accepisset, eorum uel quid fecisset, quod legibus permissum non esset. adiectum est ex s. C. eadem lege tene-ri eos, qui homines libidinis, uel, ut iurisconsulti loquuntur, pro-mercii causa castrauissent, aut filios, exceptis Iudaeis, circumcidis-sent, sacrificia uel mala fecissent, habuissent. excipiuntur tamen hac lege, qui occidissent perfugam, uel uim inferentem, uel pudicitiam uiolenter attentantem. exceperat etiam eos Sylla, qui ob relata pro-scriptorum ciuium capita pecuniam ex arario accepissent: quos ta-men postea C. Caesar, cum de sicariis quaereret, in sicariorum nume-ro habuit. hac lege tenebantur etiam ii, quorum fraude, aut consi-lilio naufragi per uim suppressi fuissent; qui uel data opera in eorum, quos odissent, res atque bona incendium immisissent. Hic, quae poe-na esset lege Cornelia iis, qui hominem occidissent, fortasse quare-tur. mors, ut iam significauimus, non fuit, sed aquae & ignis inter-dictio. nam Cato censorius ciues Romanos necari, aut uerberari, perduellibus exceptis, lege lata uetuit. quod si quis obiiciat, à Na-sica Ti. Gracchum, ab Opimio Caium, à Mario Saturninum, & Glauciam, à Cicerone ipso ciues Romanos uita priuatos, neque ta-men quenquam eorum lege Porcia condemnatum: huic facile sa-tisfieri poterit, si ita respondebitur: cum s. C. illud fieret, quod de-uentum nisi difficillimis ac periculosissimis reip. temporibus non es-se traditum est, Darent operam consules, ne quid resp. detrimenti caperet; iacuisse prorsus legem Porciam, & impune licuisse ciues se-ditiosos, nec salutariter de patria cogitantes interficere. quibus s. C. excitati, atque armati Nasica, Opimius, Marius, Cicero, fecerunt id contra legem Porciam, quod nisi fecissent, timendum magnope-re fuit, ne leges reliquae omnes, perniciosi malorum ciuium con-siliis, ac scelere, conciderent. leges enim ad salutem publicam re-feruntur. ea cum in dubium uenit; si legibus subuenire non licet, ad uim confugitur. eaquae iusta uis, ea pietas in patriam est, nullo neque praesenti, neque posteritatis iudicio damnata, sed omnium saeculo-rum perpetuis sermonibus, ac laudibus excepta. Atque hanc in ci-ues ultimo supplicio animaduertendi potestatem non nisi s. C. ut diximus, consulibus esse datam (nam legibus multare ciues morte

non

De legibus

non licebat) illa in Catilinam indicant : Ad mortem te Catilina duci iussu consulis iampridem oportebat. habemus enim S. C. in te Catilina uehemens, & graue. non deest reip. consilium, neque auctoritas huius ordinis. nos, nos, dico aperte, consules desumus. decreuit quondam senatus, ut L. Opimius consul uideret, ne quid resp. detrimēti caperet. nox nulla intercessit: mox interfectus est propter quasdam seditionū suspensiones C. Gracchus, clarissimo patre natus, auis, maioribus: occisus est cum liberis M. Fuluius consularis, simili S. C. C. Mario L. Valerio cos. permessa est resp. num unum diem postea L. Saturninum tribunum pl. & C. Seruiliū prætore pœna remorata est: at nos uigessimū iam diem patimur hebescere aciem horum auctoritatis. habemus enim eiusmodi S. C. ueruntamen in tabulis, tanquam in uagina, reconditum. quo ex S. C. cōfestim interfectum te Catilina conuenit. et Salustius in Catilinario: Senatus decreuit, quod plerunque in atroci negotio solet, ut darent operam consules, ne quid resp. detrimenti caperet. ea potestas per senatum more Romano magistratui maxima permittitur, exercitum parare, bellum gerere, coercere omnibus modis socios, atque ciues, domi militiaq; imperium atque iudicium summum habere. aliter sine populi iussu nulli earum rerum consuli ius est. Verum, quia S. C. huiusmodi non nisi aduersus eos ciues fieri solitum est, qui uel perniciosi legibus, uel armis, uel alia quauis ratione remp. oppugnarent; perduelles fuisse Ti. & C. Gracchos, Saturninum, Glauciam, Catilinam, eiusq; socios, ideoq; non modo S. C. sed lege quoque Porcia cōcedente, iure casos, licet existimare. Opponitur etiam illud, quod à Pediano traditum est: L. Tubulus, homo prætorius, ætate patrum Ciceronis, propter multa flagitia, cum de exilio esset accersitus, ne in carcere necaretur, uenenum bibit. qui si necem timuit; non uidetur, satis sibi constitutum fuisse præsidii in lege Porcia, iudicasse. Ego contra sic. Potuit Tubulus commissi perduellionis, quo crimine damnatos affici extremo supplicio neque Porcia, neque ulla omnino lex uetabat, sibi esse conscius: ideoq; mortem iure pertimescens, ne in carcere necaretur, uenenum bibit. potuit etiam, perduellione non cōmisso, deterritus conscientia potius, quàm legibus, mortem timere, ut ii, quos aliquo scelere contaminatos furia uexant: horrent omnia: quocunque aspexerint, aut uenerint, ibi carcer, ibi carnifex, ibi laqueus, & securis, ibi factis eorū digna sibi uidentur intueri. timuit igitur Tubulus, ne, quemadmodum multi ob recte facta legibus soluti sunt,

sunt, ut summos honores ante legitimam ætatem, aut aliquid, quod nemini præterea concedi soleret, consequerentur; sic ipse, quandoquidem se ab exilio reuocari uideret, exilio grauius aliquid, mortem nimirum, uel contra leges ob flagitia plurima subire cogeretur. certe, quo minus de Porciæ legis perpetua ui, perpetua inquam ad usque postrema reip. tempora, in dubium ueniam, facit illa uox Ciceronis in Verrem lib. v. O nomen dulce libertatis: o lex Porcia, legesq; Sempronæ: huccine tandem omnia reciderunt, ut ciuis Romanus, in prouincia populi R. in oppido fœderato, ab eo, qui beneficio populi R. fasces & secures haberet, deligatus in foro uirgis caderetur? et pro C. Rabirio perduellionis reo, Porcia lex, inquit, uirgas ab omnium ciuium Romanorum corpore amouit: hic misericors flagella retulit. Porcia lex libertatem ciuium licitori eripuit: Labienus, homo popularis, carnifici tradidit. iam illa C. Cæsaris apud Salustium, si pro perduellibus, Lentulo, Cethego, Gabinio, & reliquis, reip. statum non leuiter labefactare, sed omnino conuellere conantibus, dicuntur; quanto plus habere loci uideantur, si pro ciuibus, qui priuatis hominibus uim attulerint, nihil aduersus maiestatem publicam deliquerint, pronuncientur? Per deos, inquit, immortales, quamobrem in sententiam non addidisti, uti prius uerberibus in eos animaduerteteretur? an, quia lex Porcia uetat? atqui & aliæ item leges condemnatis ciuibus non animam eripi, sed exilium permitti, iubent. et infra. Maiores nostri, Græciæ morem imitâti, uerberibus animaduertebant in ciues, de condemnatis summum supplicium sumebant. postquam resp. adoleuit, & multitudine ciuium factiones ualere: circumueniri innocentes, aliâq; huiuscemodi fieri cœpere. tunc lex Porcia, aliâq; leges paratæ sunt; quibus legibus exilium damnatis permissum est. Extat etiam Milonis exemplum. qui si, occiso P. Clodio, de qua nece & quarendum extra ordinem, ut in atrocissima re, senatus censuit, & à Pompeio Magno consule lata noua lex est, Porciæ legis beneficio uitam retinuit, ciuili tantum morte, hoc est exilio, affectus est: multo magis reliquos ciues, qui leuiora delicta commisissent, eiusdem legis perfugio esse usos, naturalemq; mortem effugisse, credibile est. At in oratione pro Cecina, & in primò de oratore mors, quasi pœna legibus irrogata, nominatur. nam pro Cecina, Nulla, inquit, in lege

R nostra

De legibus

nostra reperietur, ut apud ceteras ciuitates, maleficium ullum exilio esse multatum: sed, cum homines uincula, necesse, ignominiasque uitant, quæ sunt legibus constituta, confugiunt, quasi ad aram, in exilium. de oratore autem: Vitia hominum, atque fraudes damnis, ignominias, uinculis, uerberibus, exiliis, morte multantur. Hæc loca legem Porciam non infirmant, sed ad perduellionis crimen spectant. quo uno in crimine ciues Romanos occidi uetustis legibus licuisse, iam diximus: quas, tanquam ciuitati salutares, neque Porcia, neque lex ulla unquam abrogauit. Sed uenit in mentem querere, magistratus ne soli, quorum in uindicandis reis potestas esset, an etiam priuati lege Porcia tenerentur. Primum, ubicunque huius legis mentionem fieri uideo, uerbum nullum animaduerto, quod ad priuatos referri possit: ad magistratus omnia manifeste spectant: idque ea maxime, quæ proxime recitata sunt, Salustii uerba declarant. deinde, quorsum de priuatis? an uerisimile est, nullam antea in ciuitate legem de ui fuisse? an potest ulla ciuitas sine legibus, presertim iis, quæ uim, quæ iniurias arceant, non dico diu uigere, sed omnino stare, atque incolumis esse? ante igitur de priuatorum ui leges multæ. magistratus autem à corporibus ciuium Romanorum abstinere prima iussit Porcia lex: quam deinde aliis legibus idem iubentibus confirmatam, Salustii testimonio cognoscitur. sed, ut de priuatis Porcia non loqueretur; intelligi tamen, quis non uidet? nam quæ potestas & magistratibus, & contra fontes, omniisque supplicio dignos admittitur, an ea priuatis relinquetur? Restat, ut soli peregrini, si modo ita meriti essent, necarentur. id quo minus fieri liceret, nulla lex unquam uetuit. et fasces illi, ac secures, quæ magistratibus præferrebantur, potestatis quidem, uetusto more, erant insignia, eius tamen potestatis, quam in peregrinos tantum liceret exercere. exilium, publicatio bonorum, carcer nocentibus ciuibus proposita fuerunt; mors, nisi si quis & in ipsam remp. & quam acerbissime peccasset (omnium enim de maiestate criminum perduellio summum erat) timenda non fuit. Illud miror; cum prætor de crimine inter sicarios querere soleret, Suetonium tradere, C. Casarem in ædilitate quæstionem de sicariis exercuisse. quod fortasse illi à senatu extra ordinem mandatum. Quod autem à Martiano scriptum est, ut digestorum lib. XLVIII constat, legis Cornelie de

de sicariis & ueneficis pœnam fuisse deportationem in insulam: nolo aliquem ideo perturbari, quia, Sylla dictatore, id est reip. temporibus, deportatio nominetur: quod à me iam negatum est. nam Sylla pœnam irrogauit aquæ & ignis interdictionem: cuius in locum deinde successit deportatio; ut Vlpianus non semel Iustinianusq; declarant. spectauit igitur Martianus sui temporis consuetudinem, pœnamq; nominauit, non eam, quam in sua lege scripserat Sylla, sed eam, qua tunc, sublata aquæ & ignis interdictione, lege Cornelia damnati plectebantur. manebat enim, & obseruabatur eadem lex, pœna mutata. De paricidio prima fuit Romuli, primi regis, lex: quæ permittebat, ut monstruosi partus impune possent necari, uel exponi. hanc legem si, ut alias, à familia nominare uolumus, Siluiam licebit appellare. est enim Romulus Siluiæ gentis prænomen. reliqui; sex, qui Romæ regnarunt, suum omnes nomen, & prænomen habuerunt. Tulit idem de paricidio, id est de eadē hominis liberi. nam aduersus eos, qui patrem, aut matrem occidisset, pœnam nullam statuit; qui neminem unquam tam ab humanitate auersum, tam naturæ inimicum fore existimaret, ut parentibus, unde uitam ipsam, ac lucis usuram acceperant, manus afferret. neque per annos DC Romæ quisquam tale facinus perpetravit. post Annibalis bellum L. Ostius patrem fertur primus occidisse. Romulus autem, quicumque hominem occidisset, paricidam appellari uoluit. Etiam Numa Pompilius legem his uerbis composuit, ac edidit: Si quis hominem liberum sciens morti duit, paricida esto. qua lege Tullus Hostilius rex Horatium illum, qui sororem occiderat, uoluit iudicari. postremis reip. temporibus pœnas aduersus paricidas, lege lata, C. Cæsar auxit. tulit enim, ut paricidæ non exilio solum, ut antea, sed bonis etiam omnibus multarentur; reliqui uero, capitalium rerum condemnati, dimidia bonorum parte; cum antea integris patrimoniis exularent. Hic, propter nominis potius, quàm rei, similitudinem, leges de patricidio subiungemus. aliud enim est, esse paricidam: aliud, esse patricidam. paricida parem occidit, hoc est ciuis ciuem: patricida patrem, ut matricida matrem. Sanxit igitur lege Pompeius Magnus, ut, qui hoc tam impio crimine damnatus esset, infusus culeo cum cane, gallo gallinaceo, uipera, & simia, in mare, uel in amnem proiectus, uitam, omnium elementorum usu

R 2 priuatus,

De legibus

172
priuatus, amitteret. hoc & ante L. Sylla Felix lege sanxerat: sed Pompeius noua lege correxit, addiditq; multa, & inter ea, ut, non qui patrem, matrem ué tantum, uerum etiam qui cognatos, aut patronos occidissent, patricidii lege tenerentur. tamen si non omnes eadem pœna afficiebantur. nam qui cognatos, aut patronos occiderant, iis pœna erat ea, quam lex Cornelia de sicariis irrogabat. summo autem illo, quod memorauimus, supplicio, quod à rege Superbo excogitatum historiæ narrant, ut puniret grauius M. Tullium II uirum, qui librum de sacris mysteriis describendum Petronio Sabino tradidisset, mactabantur ii, qui patrem, aut matrem, auum, aut auiam necassent. de quibus tamen, nisi confessi prius essent, supplicium sumi leges uetabant. Nunc de ueneficio dicendum. locus autem uidetur postulare, ut, ante quàm ad leges ueniamus, quæ nobis est proposita tractatio, noua quædam afferamus, quæ fore non inutilia credimus non modo literarum humanarum studiosis, uerum etiam ipsis iurisconsultis, iis quidem, qui paulo splendidiorem doctrinam colunt; quales maxime nouimus, excellenti non minus humanitate, quàm doctrina, præditos uiros, Romæ Siluestrum Aldobrandinum, Antonium Augustinum, Antonium Galassium, Florentiæ Lælium Taurellum, Mediolani M. Antonium Caymum, Brixiae Iacobum Chiziolam, Vincentium Portulacum, qui latine scribendi elegantia, meo iudicio, ad antiquorum laudem accedit proxime; Patavii uero Guidonem Pancirolum, familiarem meum, qui noctes uigilat serenas, ut ait Lucretius, assiduoq; studio antiquitatem ex tenebris educit. Primum igitur illud ponatur, ueneficii crimen fuisse capitale: alterum, de eo quæsisse non prætorem modo, qui & iudex quæstionis dicebatur, uerum etiam iudicem quæstionis, qui prætor interdum non erat: tertium, uideri mihi satis manifestum errorem Budæum, uirum alioqui bene doctum, in suis adnotationibus esse lapsum, qui criminalibus, ut appellant, in causis, præter prætorem urbanum, neminem quæsisse, eumq; tum, nomine commutato, iudicem quæstionis esse dictum, tradiderit. Capitale fuisse ueneficium, indicat exilium Oppianici, de ueneficio condemnati: cuius mentio fit in ea pro Cluentio: & illud in eadem, cum futurum ait Cicero, si Cluentius ueneficii reus damnetur, ut patris sepulcro priuetur. clarissime autem hoc significatur

catur Institutionum iuris ciuilibus libro IIII. Probemus alterum, quod paulo difficilius uidetur. Iudicum quaestionis duo uideo fuisse genera; unum eorum, qui cum praetores essent, quaestionis etiam iudices appellabantur; alterum eorum, qui cum praetores non essent, capitali tamen de crimine quaerebant. de iudice quaestionis praetore, patet ex ea, quam proxime nominaui, pro Cluentio; in qua ita scriptum est: Iubet lex iudicem quaestionis, hoc est, Q. Voconium, eosque, qui illi iudices obuenerint, quaerere de ueneno. Voconium autem praetorem fuisse, duobus argumentis conuincitur: primum, quod in eo loco paulo ante Cicero dixit; Quid sibi illi scribae? quid lictores? quid ceteri, quos apparere huic quaestioni uideo, uolunt? lictores enim, qui magistratum non gereret, non habebat. iudicem autem quaestionis magistratus nomen fuisse, certe nemo dixerit. Alterum argumentum est, quod ibidem Cicero subiungit de aliis praetoribus, suam unoquoque quaestionem exercente. Haec, inquit, quaestio sola ita gubernatur? quid M. Pletorii, & C. Flaminii inter sicarios? quid C. Orchinii peculatus? quid mea de pecuniis repetundis? quid C. Aquillii de ambitu? quid reliqua quaestiones? quibus ex uerbis, praetorem fuisse Voconium, qui iudex quaestionis appellatur, quis non intelligit? nam, etsi praetores non nominat; satis tamen constat, de praetoribus intelligi. à quibus enim & tot quaestiones, nisi à praetoribus, & tam graues excernerentur, inter sicarios, de repetundis, de ambitu, peculatus? praeterea, se quaesisse de repetundis, in eo loco Cicero dicit. quod ab eo factum in praetura, Valerius, & Plutarchus confirmant. ut omittam, quod quaesitorem Aquillium nominat: cuius annum fuisse legitimum, eundem qui Ciceroni, ad petendum consulatum, prima docet ad Atticum epistola. ex quo, fuisse collegam in praetura, licet existimare. quod etiam lib. II de officiis manifestum est. collegam enim suum Cicero appellat. Rursus iudicem quaestionis Iunium, qui praetor non erat, quaesisse de ueneno in Oppianici causa, docet Pedianus his uerbis: Iunius quaesitor fuit in Cluentii causa, Verre praetore: in qua Oppianicus damnatus est. et alio loco: Damnato Oppianico, res in inuidia fuit; quod pecunia reus uideretur oppressus: & princeps illorum iudicum damnatus est C. Iunius, quod diceretur alios supposuisse, qui reum damnarent, non eos, quos praetor Verres fuerat subfortitus.

tus.

De legibus

tus. neque hic eum Pedianus, neque supra prætorem nominavit. Cicero autem in ea pro Cluentio, Condemnatus est, inquit, C. Iunius, qui ei quæstioni præfuerat. adde etiam illud, si placet: tum est condemnatus, cum esset iudex quæstionis. et alio loco: Quintus tribunus pl. conuicium C. Iunio iudici quæstionis maximum fecit. non fuisse autem prætorem, aperte, sic inquam aperte, ut clarius esse nihil possit, idem demonstrat in eadem, his uerbis: In hanc flammam recentem C. Iunium, qui illi quæstioni præfuerat, iniectum esse memini, & illum, hominem ædilicium, iam prætorem opinionibus hominum constitutum, de ciuitate esse sublatum. Ecce, non prætorium, sed prætorem opinionibus hominum constitutum dicit: quod, eum prætorem sine dubio futurum, homines opinarentur. prætor autem si fuisset, non eum ædilicium, sed prætorium uocasset. laudabant enim ueteres, ubi ornare aliquem uellent, ab eo magistratu, quem postremum gessisset; itaq; homo ædilicius, prætorius, consularis, dicebant. Præterea, cum prætores in leges non iurauerint, neque sententias tulerint, quod & Cicero, & Pedianus docent; à Iunio autem iudice quæstionis ideo multa petita sit, ut in oratione pro Cluentio legimus, quia in legem non iurasset: (erat enim illi iurandum, idem quod iudicibus, leges omnino se esse in ferenda sententia seruaturum) satis constat, Iunium, cum de Oppianico quæsiuit, prætorem non fuisse. Quod si quis dixerit, non tam Iunium iudicem quæstionis, quam Verrem prætorem, in illa Oppianici causa quæsiisse; quia Pedianus ita dicat; Iunius quæstor fuit in Cluentii causa, Verre prætore; & quia idem alio loco sortitionem, & subfortitionem à Verre prætore factam tradiderit: huic ita responderi poterit: sortitionem, & subfortitionem non illius modo iudicii, uerum etiam aliorum ideo pertinuisse ad C. Verrem, quia prætor urb. erat. quod ipse declarat Cicero in ea pro Cluentio. prætor autem urbanus de criminibus non quærebat; quare nec unquam quæstor dicebatur; sed ius tantum dicebat, hoc est iudices, & formam iudicii dabat. idemq; iudices, quibus alii prætores ad cognoscendas capitales causas uterentur, sortiebatur, & subfortiebatur. quod ex Pediano, & ex ipso etiam Cicerone satis liquet. Accedit locus ex libro I accusacionis in Verrem: quo in loco Q. Curtium iudicem quæstionis appellat Cicero, in causa Verris repetundarum: de qua prætor

prætor M' Acilius Glabrio cognoscebat. eumq; Curtium ait Pedianus à Cicerone esse reiectum. Illud addo; cum iam docuerim, iudicem quæstionis, & prætorem, & non prætorem, de crimine capitali cognovisse, tertium genus iudicium quæstionis interdum fuisse, quorum ius cognoscendi non esset, sed tantummodo subfortiendi. quod locus de Q. Curtio proximus iam ostendit: quem cognovisse de repetundis, absurdum est credere: cum, in ea causa prætorem quævisse Glabrium, ex Cicerone, & Pediano satis constet. itaque tertium hoc genus quæsitores dici non poterant: duo illa superiora genera, quoniam quidem quærerent, quæsitores & erant, & proprie dicebantur. Quod autem à Budæo scriptum est, prætorem urb. ubi de criminibus quæreretur, solum cognovisse: aperte falsum esse dico. non modo enim solus non quæsit prætor urb. sed nec omnino quæsit. ipse ius dicebat: quod, quærere, non est. quærebant ceteri collegæ, cum iis iudicibus, quos prætor urb. & sortitus, & subfortitus esset. exemplorum plena sunt omnia: unam, quæ multorum exemplorum loco sit, rationem afferam. Accusat Verrem Cicero in suis libris acerbissime: præturam urb. totam exagitat. obicit ne unquam, quod in causa capitali contra leges aliquid commiserit? nunquam certe. neque dubium, quin Verres, si potestatem illam prætor habuisset, multa fuerit inique facturus. Addit idem: prætorem urb. cum quæreret, iudicem quæstionis esse dictum. hoc certe nemo (de veteribus loquor: hos enim sequor) unquam tradidit: mirorq; , cur hoc illi, qui suæ sententiæ testem non haberet, placuerit affirmare. sed, ut opinor, error ex errore fluxit, nam cum, prætorem urb. quærere de criminibus, iam sibi persuasisset: quod omnino falsum est: sequi uidebatur, ut idem quæstionis iudex appellari posset. ego autem ostendi iam, quæstionis iudicem interdum quævisse, & prætorem fuisse, non tamen urbanum; ut quæsit Q. Volumnius de ueneficio: prætorem autem urbanum reip. temporibus quævisse, aut iudicem quæstionis uocatum, neque de veteribus uideo quenquam fuisse qui dixerit, neque coniecturis omnino ullis adduci possum ad suspicandum. Quæitoris porro erat, accusatorem, defensorem, testem, in officio quæque suo continere. Leges, quibus ueneficium uindicaretur, Romæ per annos multos nullæ fuerunt. non enim proprie ad ueneficium pertinet XII tab.

lex

De legibus

lex illa: Qui fruges excantassit, & Qui malum carmen incantassit, coercetor. etsi coniunctionem habere quandam uidetur cum ueneficii crimine. proprie uero, ac nominatim eo primum anno, quo C. Valerius Flaccus M. Claudius Marcellus consulatum gesserunt, qui post urbem conditam, si fastos sequimur, annus CDXXII fuit, de ueneficiis esse quaesitum, legemque constitutam, Liuius libro VIII scriptum reliquit. ex quo, quæ tum probitas fuerit, apparet; cum in tanta ciuitate, per tot annos, ueneficii nomine in iudicium uocatus nemo sit. Cornelia postea fuit, L. Syllæ; quam, bello ciuili confecto, dictator tulit, cum unus omnia teneret: quod ex his uerbis, quæ scripsit Cicero pro Cluentio, manifestum est. Postea, inquit, L. Sylla, homo à populi causa remotissimus, tamen, cum eius rei quaestionem hac ipsa lege constitueret, qua uos hoc tempore iudicatis, populum R. quem ab hoc genere liberum acceperat, alligare nouo quaestionis genere ausus non est. quod si fieri posse existimasset; pro illo odio, quod habuit in equestrem ordinem, nihil fecisset libentius, quam omnem illam acerbiterat proscriptionis suæ, questus in ueteres iudices, in hanc unam quaestionem contulisset. Huius autem legis poena capitalis non ad ueneficos tantum, sed ad eos etiam pertinuit, qui magicis incantationibus homines occidissent, aut qui mala medicamenta publice uendidissent. omnesque prorsus, nemine excepto, uiri, mulieres, liberi, serui, hac lege in iudicium uocabantur. Permissum autem esse reo, ut ex illius uoluntate, clam, aut palam, à iudicibus sententiæ ferrentur, ex ea, qua de proxime meminimus, oratione cognoscitur. eademque lege de corruptis iudiciis quaesitum, eadem declarat oratio. Secuta est consularis Iulia, C. Cæsaris, qui & ipse dictator fuit. nec tamen deinde ex lege Iulia, sed ex Cornelia, quamquam uetustior fuerit, iudicia sunt administrata: puto, quia non semper posterior lex priorem comprehendebat, sed interdum aliquid tantum addebat: ut uniuersa pene iudicii ratio à priore lege penderet. propterea Corneliam potius, quam Iuliam, posteriores iurisconsulti nominarunt. De ambitu quæ prima lata est, tribunicia Poetelia fuit, C. Fabio Ambusto, C. Plautio Proculo cos. deinde aliæ, consularis Cornelia Bæbia, à duobus eiusdem anni consulibus lata: tum alia, Cn. Cornelio Dolabella M. Fului Nobiliore cos. lata; ut ex epitome Liuiana colligitur: quæ utrum tribunicia

bunicia fuerit, an consularis, coniiicere non licet. Multis deinde post annis consularis Calpurnia : quam C. Calpurnius Piso consul, anno ab urbe condita DCLXXXVI, grauiorem, quàm antea, tulit : in qua, præter alias pœnas, pecuniaria quoque erat adiecta. huic legi ob nimiam eius seueritatem puto aliquid postea derogatum. nam in oratione pro C. Cornelio, de quatuor generibus, in quibus per senatum more maiorum statueretur aliquid de legibus, tertium Cicero memorat his uerbis. Tertium est de legum derogationibus. quo de genere persæpe S. C. fiunt, ut nuper de ipsa lege Calpurnia, quæ derogaretur. nunquam enim Calpurnia lex est abrogata : quam seruari Cicerone consule, ex oratione pro Murena cognouimus : sed ei derogatum aliquid, quòd ita senatus censeuisset, ea, quæ recitauimus, uerba significant. Hac lege accusatoribus præmium uidetur fuisse, ut, si ipsi ambitus damnati essent, aliorumq; eodem in genere culpam demonstraissent, in integrum restituerentur. id apparet (ut alia omittamus exempla) ex oratione pro Cluentio : quam post Calpurniam legem habitam esse, ex eo constat, quia prætor Cicero eam causam egit. quòd si accusator magistratum designatum in iudicium uocasset, eiusq; culpam iudicibus probasset : reus magistratum amittebat ; accusator eius locum assequeretur : si modo ei per ætatem, & per leges magistratum illum capere liceret. suspicari licet hoc è Syllæ Autroniiq; notissimo exemplo : quibus de ambitu, cum designati consules essent, damnatis, accusatores eorum Torquatus & Cotta consules facti sunt. nisi si, quod ego uerius existimo, consules non legis præmio factos intelligas Torquatum & Cottam, sed quia, comitiis post Syllæ Autroniiq; damnationem iterum habitis, populus eos creauerit. Tertium præmium lege datum accusatori, hoc quidem in crimine, tribus permutationem inuenio : si modo ea tribus, in qua reus censeretur, nobilior esset, quàm tribus accusatoris. hoc in oratione pro L. Balbo Ciceronis illa uerba declarant. Obiectum est etiam, quòd in tribum Crustumina perueniret : quod hic assecutus est legis de ambitu præmio. Quòd si nullum ex eo præmium accusator consequi posset, hoc est, neque suam ipsius absolutionem, quia damnatus non esset; neque ullum, deiecto reo, magistratum ; neque tribum, quia rei tribus non esset accusatoris tribu nobilior : pecuniam illi de publico esse datam, licet opinarii.

S id

De legibus

id autem ex eo suspicor, quòd Asconius in orationis pro Milone commentario, Milo, inquit, postero die factus reus ambitus apud Manlium Torquatum, absens damnatus est. illa quoque lege accusator eius fuit Ap. Claudius: & cum ei præmium lege daretur, negavit. non enim est ut intelligi possit, præmium illi lege datum aut ipsius absolutionem; nec enim recusasset: aut Milonis magistratum, qui designatus non erat; aut permutationem tribus, cum ipse in tribu rustica nobilissima censeretur. Claudios enim Pulchros in tribu Claudia fuisse, ex Livio cognoscitur. reliquum igitur fortasse pecunia fuit: quam accipere, dignitatis non erat: itaque Appius, patricia familia natus, Apii, uiri consularis, & auguris, filius, negavit. Post Calpurniam Tullia fuit, consularis & ipsa, lata à M. Tullio Cicerone consule: quæ & poenam grauiorem, quàm Calpurnia, & præterea aquæ & ignis per annos X interdictionem, hoc est X annorum exilium irrogavit ordini senatorio. itaque sine caussa mirantur non nulli, parum uidelicet attente in legenda historia uersati, cur Cicero in oratione pro Sylla dicat: Absuit ab oculis uestris; & cum lege retineretur, ipse se exilio pene multauit. quibus uerbis, de ambitu damnatis ciuitatem non esse lege Calpurnia ereptam, significat: cum idem in oratione pro Plancio scriptum reliquerit: Nunc postulatur à uobis, ut eius exilio, qui creatus sit, iudicium populi R. reprehendatis. quo declarat, Plancio exilium, si de ambitu damnatus sit, poenam futuram. pugnare omnino hæc inter se uidentur: sed conciliantur distinctione temporum. nam Sylla damnatus est ante Ciceronem consulem, Lepido & Tullo cos. ea lege, quam C. Calpurnius Piso tulerat: quæ cum esset seuerissima, damnatis tamen exilium non inferebat. oratio autem pro Plancio post Ciceronis consulatum habita est. quo tempore iudicia de ambitu ex ea lege, quam ipse consul Cicero tulerat, exercebantur: qua lege exilium senatoribus irrogatum esse, non obscure pro Murena oratio demonstrat. exilium autem non per omnem uitam, ut in aliis criminibus capitalibus, sed per decennium fuisse, tradidit Dio lib. XXXVII. Polybius tamen in eo libro, quem scripsit de rerump. generibus, aperte significat, multo ante legem Tulliam, atque etiam Calpurniam, capitalem ambitum fuisse. ait enim sic. Pecuniis palam apud Carthaginienses magistratus emuntur. quod Romæ capitali poena

pœna uindicatur. illa porro temporibus Africani minoris Polybius tradidit. ut nouam postea legem, uetere abrogata, de ambitu latam, credere sit necesse, quæ capitis pœnam ademerit. Aut, dicamus Polybii ætate capitalem fuisse ambitum non lege, sed more: cū eo de crimine, deq; aliis item capitalibus nondum prætores quærent, sed populus ipse tributis comitiis iudicaret. quod idem Polybius in eodem libro docet his uerbis: Capite damnandi solus potestatem habet populus. In Tullia illud quoque scriptum est, ne quis biennio, quo magistratum petiisset, petiturus ue esset, gladiatores daret, nisi ex testamento præstituta die; ne quis prandia uulgo daret. quam legem cum P. Vatinius contempsisset, obiicit ei Cicero tantam licentiam atque arrogantiam in asperrima illa interrogatione, & in oratione pro Sextio. In Aufidia tribunicia, quam tulit M. Aufidius Lurco, eadē fuere, quæ in superioribus legibus, noui hoc, ut, qui nummos in tribu pronunciaffet, si non dedisset, impune esset; sin dedisset, ut is, quoad uiueret, singulis tribubus HS CIO CIO CIO deberet. Consulares præterea duas inuenio, Pompeiam, & Iuliam, Cn. Pompeii Magni, & C. Iulii Cæsaris, qui postea dictator fuit: quæ quid aut diuersum, aut amplius, quàm quæ antea latæ fuerant leges, habuerint, exploratum non est. id quidem facile crediderim, cum lege Tullia de ambitu damnatis aquæ & ignis interdictio, hoc est exilium, per x annos irrogaretur, lege Pompeia diuturnius exilium, aut fortasse perpetuum, esse irrogatum. nam in Pompeia pœnam grauiorem, quàm antea, & formam iudiciorū breuiorem Pedianus nominat. hoc etiam hac lege sancitum esse uideo, ne rei laudarentur. quod idem Pompeius cum in Planci iudicio nō seruasset, M. Cato iudex Pompeii laudationem legi uetuit. quo autem tempore legem hanc Pompeius tulit, iudicum numerum uideatur constituisse CCCLX. quod & Velleius lib. II, & Plutarchus in Pompeio declarat. itidemq; pro CCC, legendum puto CCCLX, in epistola Cælii, fam. lib. VIII. nisi si aut Velleium, & Plutarchum malis esse mendosum, quàm epistolam Cælii; ut ubique legatur, CCC: aut, mendum æque apud omnes esse, aliquis existimet, nec CCC, aut CCCLX, sed CCCL iudices fuisse; ut eorum numerus cum numero tribuum, quæ xxxv erant, congruat; quod ex singulis tribubus deni crearentur. Lege item Iulia capitalem ambitum fuisse, apud Iustinianum scriptum est. Crimen de corruptis iu-

De legibus

diciis ipsum quoque capitale crediderim. id ex eo coniicio, quod C. Gracchus tribunus pl. eam legem in ordinem senatorium tulit, ceteros ordines excepit: ut in oratione pro Cluentio legimus. Cū igitur & crimen ipsum per se grauissimum fuerit; (quid enim grauius, quàm innocentem, accepta pecunia, condemnare?) et Gracchus eam legem, ut in eadem oratione ait Cicero, pro plebe tulerit, ad licentiam senatorii ordinis retundendam: leuiore poena eum contentum fuisse, uerisimile non est. quod eo magis existimo, quia postea crimen hoc L. Sylla comprehendit ea lege, quam de ueneno tulit; ut capitale crimen cum capitali, uenenum scilicet cum iudiciis corruptis, coniunxisse uideatur. hoc orationis pro Cluentio (ne pluribus utar exemplis) partes multæ declarant. et Sylla equestri ordini admodum fuit infensus, senatorii uero studiosissimus; Gracchi tamen legem in hoc secutus, equestrem ordinem, & plebem periculo liberauit. Quod autem coniectura adductus existimabam, id legis XII tab. testimonio Gellius confirmat: in qua scriptum esse ait, ut, qui ob rem iudicandam pecuniam accepisse conuictus esset, capite puniretur. ut Gracchus non hoc ipse nouum sanxerit, sed à XII tab. petiit in suam legem transtulerit. Romæ autem quis iudicium primus corruerit, ignoratur. quod & à Plutarcho traditum est in uita Coriolani. Athenis uero, idem scribit, Anytū, Anchemeonis filium, hanc pestem induxisse primum. Vnum addam ad ingenia excitanda; quod, quaestionibus positis, maxime fit; mirari me uehementer, cur in ea, quam proxime nominaui, oratione pecunias ob iudicandum captas Cicero repetundas uocet; quas diuersas fuisse nemo nescit: de quibus etiam propria lege quaerebatur: cum de iis, quæ ob rem iudicandam essent acceptæ, lege Cornelia de ueneno cognosceretur. nisi si pecuniæ repetundæ dicebantur non eæ solum, quas prouinciarum rectores contra leges accepissent, uerum & illæ, quarum causa, qui ob iudicandum eas cepissent, in iudicium uocarentur. quodam enim modo, cum aduersus eos ageretur, iudicio repeti pecunia uidebatur. id eo facilius crediderim, quia lege Iulia de repetundis non rectores modo prouinciarum, sed eos etiam, qui pecunia corrupti aliquid in iudicio uel commisissent, uel omisissent, esse comprehensos, iurisconsultorum libri demonstrant. nec sane, si ad rationem animus referatur, uideo quid intersit, utrum à fociis, publico fungens munere, pecunias contra leges,

ges, an à ciuibus aliquis accipiat. Adulterium lege Romilia capitale fuisse, literis proditum est, sic inquam capitale, ut pœna mors esset. tulit enim Romulus legem his uerbis: Adulterii conuictâ uir, & cognati, uti uolent, necanto. quod item lege Iulia confirmatû est: qua lege supplicio afficiebantur eodem, qui cum maribus nefandam libidinem exercuissent. stupratoribus autem, si essent honesti, pœnam irrogabat, publicationem partis dimidiæ bonorum: & capitale tunc stuprum non erat: sin humiles, corporis coercionem cum relegatione quinquennali, nisi per uim stuprum commissum esset; si per uim, tempore non præfinito. Et inter liberas tantum personas, ut scripsit Papinianus, adulterium stuprum ue passas, lex Iulia locum habuit. Quod autem, inquit, ad seruas pertinet, & legis Aquilia actio facile tenebit, & iniuriarum quoque competit. Hanc legem ab Augusto, non à C. Cæsare, qui eum adoptauit, esse latam Vlpianus tradit. Fuit etiam Scatinia, quam C. Scatinus Aricinus tribunus pl. tulit in eos, qui alienam pudicitiam sollicitassent, aut suam ipsi prostituissent; quibus pœnam irrogauit x millia nummum. est autem hæc lex multis ante Iuliam annis lata, satis leui pœna, quam Iulia capitalem fecit, non tamen, ut opinor, in eos, qui alienam pudicitiam tentassent, sed in eos, qui præposteram uel aduersi, uel auersi uenerem exercuissent. De falsis, quod in Polybio, Cicerone, Gellio scriptum inuenerim, lex fuit XII tab. ut qui falsum testimonium dixissent, è saxo Tarpeio deiicerentur. Postea, huius legis exemplum secutus, L. Sylla dictator legem tulit, quæ seruis ultimum supplicium, liberis aquæ & ignis interdictionem irrogabat, si quis in testamento, alio ue scripto, aut nûmo fraudem aliquo modo fecisset. qua de lege meminit Cicero in Verrem. Partus etiam suppositicios, asseuerationem falsi nominis, uel cognominis, signa adulterina, & si quis se pro alio gereret, uel illicitis insignibus uteretur, ad legem Corneliam L. Syllæ, quam proxime nominauimus, pertinuisse constat; præterea, qui duobus diuersa testimonia præberent, quiq; duobus eandem rem diuersis (ut hoc utar uerbo) contractibus in solidum uenderent; item qui, ad litem falsam instituendam, pecuniam acciperent, eam ue in rem coirent, consentirent, cœlarent, non obsterent. De iis, quos plagiarios uocarunt, legem Flauiam inuenio; quæ capitis pœnam interdum grauiorem, interdum leuiorem, personarum, & rerum habita ratione, irrogabat. nam, si quis

De legibus

quis liberum hominem sciens emisset, aduersus eum, ait Vlpianus, capitale crimen ex lege Flauia de plagio nascebatur. Tutelarum quàm diligenter apud ueteres habita ratio sit, inde constat, quòd specti tutoris iudicium, ut ex Cicerone cognoscitur, lege XII tab. capitale fuit. Et, ad arcendam infamiam, alia sancitum est lege XII tab. ut, si quis actitauisset, carmen ue condidisset, quod infamiam flagitium ue alteri inferret, capite puniretur. atque hoc postea L. Sylla, lege lata, maiestatis crimen fecit, ut Cicero in epistola ad Appium significat his uerbis: Est maiestas, ut Sylla uoluit, ne in quẽ uis impune declamare liceret. Furta quoque ueteres Romani capitali pœna uindictarunt. uideo enim, in XII tab. ita scriptum esse: Si quis nocte furtum faxit, & im aliquis occisit, iure cœsus esto: et, Fur manifesto furto prehensus interdum, si se telo defenderit, & im aliquis occisit, iure cœsus esto: et, Frugem, aratro quæsitam, furtim noctu si pauerit secuerit ue pubes, suspensus Cereri necator; impubes uerberator, noxiamq; duplionem præstato. Et clandestinæ coitiones capitale crimen fuit. nam, ut Porcii Latronis declamatio demonstrat, lege XII tab. cautum est, ne quis cœtus nocturnos in urbe agitare: idq; si quis fecisset, capite multaretur. postea lex Gabinia idem sanxit. Hæc de legibus, quibus capitalia crimina punirentur. Fuerunt aliæ de minoribus culpis, parem flagitio pœnam inferentes, hoc est minime capitalem, ut illa XII tab. Si quis iniuriam alteri faxit, xxv æris pœna sunt: et illa, huic admodum similis: Qui iniuria ceciderit alienas arbores, luito in singulas æris xxv. Atque has leges magna ex parte lex Aquillia de iniuria, ab Aquillio tribuno pl. rogata, correxit: de qua mentionẽ facit Vlpianus his uerbis. Lex Aquillia omnibus legibus, quæ ante de damno iniuria ue locutæ sunt, derogauit; siue lex XII tab. siue alia quæcunque fuerit. fuit autem ea lex priuilegium; cum eam Aquilius trib. pl. à plebe rogauerit. Fuit etiam Atinia de furtis, ne quid surreptum usu capi posset, sed ius rei suæ uindicandæ penes eum, cui surrepta esset, perpetuo maneret. Furti uero iudicium inter famosa turpiaq; iudicia numerabatur: quibus damnati, omni honore ac dignitate in perpetuum excluderentur; ut neque magistratum ullum capere, neque in senatum peruenire unquam possent. quod in oratione pro Cluentio demonstratur. Iniuriæ nomine & uis, nō modo publica, uerum etiam priuata, continetur. nam L. Sylla, ad arcendam

dam uim, legem tulit de iniuriis: de qua sic digestorum lib. XLVII: Lex Cornelia de iniuriis competit ei, qui iniuriarum agere uolet, ob eam rem, quòd se pulsatum, uerberatum ue, domum ue suam ui introitam esse dicat. qua lege cauetur, ut non iudicet ei, qui agit, gener, focer, uitricus, priuignus, sobrinus ue, propior ue eorum. quibus uerbis, omnem iniuriam, quæ manu fiat, constat lege Cornelia contineri. Huc referri potest, quod in agraria lege latum à C. Cæsare Callistratus ait: ut, qui terminos statutos extra suum agrum fines ue dolo malo mouissent, pecunia multarentur. De sodalitiis, lex XII tab. sanxit, ut sodalibus, qui eiusdem collegii essent, & ius coeundi haberent, potestas esset pactionis, quam uellent, inter se ineundæ, dum ne quid ex publica lege corrumpere; de qua tum Cicero in Catone, tum Gellius lib. XX meminit his uerbis: In uniuersum & cordi, & curæ Romanis ueteribus semper fuit, ne qua aut turpia, aut illicita, aut reip. perniciofa sodalitia coirent. Licinia postea lata est, ut sodalitia (sic enim ex oratione pro Plancio colligi uidetur posse) uel coercerentur, uel omnino tollerentur. Post eam Lectoria, de pœna in eos, qui adolescentes circumscriberent: quibus etiam, ut iis caueretur magis, iubebat curatores dari. Remmia contra eos, qui sine causa, & temere accusarent. Clodia, quam tulit P. Clodius tribunus pl. is, qui Ciceronem iniqua rogatione in exilium eiecit, de publicis iniuriis: quam Anagnini nescio cuius Menulæ causa, hominis impuri, latam, reprehendit Cicero in oratione pro domo. De alea fuerunt Titia, & Cornelia, illa, ut opinor, tribunicia, hæc consularis. Tum Iulia de annonæ, & illa, quæ ignominia fontes reos notarent, ne capere magistratum, ne inter iudices legi, ne alterum liceret accusare. quibus omnibus pœnam quidem esse irrogatam, non tamen capitalem, legitur. quo mirari minus licet, si de iis nec ita multa ueterum in libris reperiuntur. nos autem nihil de nostro: antiqua narramus, ab antiquis tradita: & ex eorum scriptis oratio nostra, siue paulo sit uberior, siue restrictior, tota pendet. Haftenus de numero, nominibusq; legum, quæ ad ius & publicum, & priuatum pertinent. nunc, ut in eo, quem instituimus, doctrinæ ordine pergamus; à quibus leges latæ sint, quo modo latæ, quo in loco, quo tempore, quibus de causis, quæ postremo uis legis esset, quàm licebit diligenter exponemus.

Leges

De legibus

LEGES nec nisi à magistratibus, nec nisi comitiis ferebantur. idq; probandum exemplis non existimo; ne, quæ ipsa per se satis aperta res est, in ea demonstranda superuacaneam operam suscipiam. sed, quia nec unus magistratus, nec una comitia erant; utrum ab uno, an ab omnibus magistratibus, & utrum unis, an omnibus comitiis ferrentur, aperiendum uidetur. Ferebantur leges à magistratibus maioribus quatuor, uno minore: à maioribus, prætor, & consule, qui ordinarii magistratus erant; item à dictatore, & interrege; qui maiores quidem, ordinarii tamen magistratus non erant, neque populi comitiis creabantur. censor autem, etsi erat inter maiores magistratus, ius tamen ferendæ legis, aut habendorum comitiorum non habebat. minor magistratus, qui leges ferret, tribunus pl. erat, nam ædiles cur. quæstores, ædiles pl. I I uiri capitales, I I I uiri monetæ cudendæ, tribuni mil. tam Rufuli, quàm Comitiati, etsi magistratus erant, leges tamen non ferebant. Neque uero hæc, quæ doctrinæ causâ à me traduntur, ueterum testimonio singula confirmare, & exemplorum multitudine librum infercire, necessarium existimo, non solum, quòd historiæ, libriq; , unde ipsi hæc hausimus, omnibus patent; sed etiam. quòd exemplis referta narratio dignitatem non habet, putidæ potius cuiusdam diligentia, ineptæq; ambitionis speciem quandam præferebat. Legislatores aut tributis comitiis, aut centuriatis, aut etiam, ut in imperio mandando, & in adoptionibus, curiatis legem ferebant. si tributis, aut cum S. C. aut sine: si centuriatis, è S. C. semper. plus omnino dignitatis, atque auctoritatis in centuriatis, sed potestatis non minus erat in tributis. æque enim populus uniuersus tenebatur iis legibus, quæ tributis comitiis ferebantur, atque iis, quæ centuriatis. idq; sancitum esse lege à Q. Hortensio dictatore lata, Lælius Felix memoriæ prodidit: cum ante iure eo, quod statuisset plebs, patricii non tenerentur. non enim aduocare patricos tribuni pl. neque ad eos referre ulla de re poterant. ita ne leges quidem proprie, sed plebiscita dicebantur, quæ tribunis pl. ferentibus accepta erant. Hortensius, quæ rogata plebs sanxisset, ea pertinere ad omnes Quirites uoluit: siue, ut iura plebis augeret; cum plebeius ipse esset: siue utili reip. consilio, quòd in libera ciuitate dissimilem ciuium conditionem discordiæ semina existimaret. in quo dissidentes ueterum opiniones licet agnoscere. nam,

nam, quod Hortensio dictatori à Lælio tribui scribit Gellius, id ad Q. Publiliū Philonem dictatorem Liuius refert, qui multis annis ante Hortensium dictator fuit. rursus neque ab Hortensio, neque à Philone, sed multo ante à L. Valerio Potito, & M. Horatio Barbato cos. eam legem esse latam, Dionysius tradit: qua in uarietate uerum internoscere difficile sit. nisi si, quod res est, non tanquam nouam legem esse latam, sed quasi ueterem à duobus dictatoribus, Philone, & Hortensio, renouatam intelligas. Scripsit etiam idem Lælius, cum tribunus pl. populum adesse iuberet, non comitia, sed consilium edicere debuisse: cum non uniuersum populum, sed plebem tantum, quæ pars populi est, aduocare tribunus posset. uerum hoc, quod à Lælio scriptum in Gellio legimus, obseruatum sit, nec ne, haud sane mihi certum est. quin, quò me inclinat coniectura, eò me dare si uelim; comitia, quæ tribunus pl. haberet, dicta crediderim, non solum post legem Hortensiam, quæ, discrimine sublato, tribunicis rogationibus ciues omnes pari iure subiecit; sed antea quoque, cum plebiscitis patricii non parerent. quid enim? non ne tributa comitia dicebantur, quæ designandis minoribus magistratibus haberentur? at tributa comitia non & à tribuno pl. habebantur? an igitur est, qui, cum tribuni pl. essent designandi, eius rei causa consilium à tribuno edictum legerit? quòd si quis, ut omnino Lælii distinctio confirmetur, non de eo populo, qui ad designandos magistratus, sed de eo, qui ad sciscendam legem aduocaretur, accipi uelit: ne hoc quidem assenserim: cum, aliter esse, ipso Cicerone magistro didicerim. uocat enim hic noster lib. II de diuinatione comitia & in legum iure, & in iudiciis, & in creandis magistratibus. præterea in oratione pro Sextio, Venio, inquit, ad comitia, siue magistratum, siue legum. et Liuius libro XXXI, Rogatio, inquit, de bello Macedonico primis comitiis ab omnibus ferme centuriis antiquata est. et ibidem: Pro se quoque consulem hortari, ut de integro comitia rogationi ferendæ ediceret. et lib. XLV. Macedonicus exercitus imperatori erat negligenter affuturus comitiis ferendæ legis. Iam uero & de reo iudicando comitia dicta, quæ tribunus pl. haberet, exempla testantur, ut in III de legibus, & apud Liuium quatuor libris, III, XXVI, XL, XLIII. quanquam, si quis ipsa Lælii uerba paulo attentius consideret; intelliget, nec ab ipso traditum id, quod nos, quasi traditum, exemplis redarguimus. ait enim, qui non uniuersum populum, sed partem aliquam populi

T adesse

De legibus

adesse iuberet, eum non comitia, sed consilium edicere debere. quibus uerbis, non quid fieret, sed quid fieri deberet, significat. notat igitur, & quodam modo reprehendit deprauatam consuetudinem; sicuti eodem loco, cum infert: Ita ne leges quidem proprie, sed plebiscita appellantur, quæ tribunis pl. ferentibus accepta sunt. quo in loco, Appellantur, accepit, pro, appellari debent. quod enim tradidit, obseruatum non esse; quæque tribunis rogantibus plebs iussit, ea tum plebiscita, tum leges & à Liuiio, & ab aliis dici, sæpe licet animaduvertere: sicuti & consilium plebis, & comitia de reo Postumio apud eundem Liuium libro XXV. Legem laturus magistratus scribebat eam domi, & cum peritis consultabat; ne quid contra populi rem, aut uoluntatem sanciret; ne forte pugnantia capita simul ferret; ne ue quid, quod uetus aliqua lex, si ferretur, inane infirmumque iuberet esse; (etsi, quæ postea ferretur lex, superiores omnes, præter Sacratas, abrogabat) ne curationem, potestatem, commodum ue aliquod ipse sibi sua lege, aut collegis, cognatis, affinibus mandaret: quod leges duæ, Licinia, & Aebutia, fieri uetuerunt: contra quas leges fecit P. Clodius: tulit enim, quod in oratione pro domo traditum est, ut sibi Ciceronis ædes liceret possidere. etiam illud in scribenda lege cauebatur, ne pluribus de rebus, quæ non eiusdem generis uiderentur, una rogatione ferretur: quod fieri cum lex Cæcilia & Didia uetabat; itaque à Clodio factum accusat Cicero pro domo sua; tum, faciendum non esse, indicat idem in suarum legum libro III his uerbis: Qui agent, non plus quam de singulis rebus consulunto. nam, Consulunto, est, populum roganto. consulitur enim populus, cum lex rogatur: itaque in oratione pro Milone, Nihil, inquit, de eius morte populus consultus, nulla quæstio decreta à senatu est. et pro domo sua: Si populus de ista re consultus esset. et Festus: Rogatio est, cum populus consulitur. etiam in senatu, consulere, est rogare sententias. ad Atticum lib. XII. Hic me laudat, inquit, quòd retulerim, non quòd patefecerim, quòd cohortatus sim, quòd denique ante, quam consulerem, ipse iudicauerim. Addebatur illa exceptio; ut, si quid ius non esset rogari, ne esset rogatum. quod in oratione pro domo notauimus. item: si quid contra alias leges eius legis ergo latum esset, ut ei, qui eam legem rogasset, impune esset. quod fuisse tralatitium, hoc est, scribi solitum in omnibus legibus, tradit Cicero lib. III epist. ad Att. Hæc igitur, quæ propolui, quasi legitima à bonis uiris in ferenda lege omnia

omnia cauebantur. sed ubi rationem uicit libido; spreta bonorum consuetudine, nihil præter suam potentiam & utilitatem in legem spectarunt. ideo sæpe leges Clodii, aut Vatini, alienas à more maiorum, acerbè reprehensas à Tullio uidemus. Scripta lege, legislator bene de rep. sentiens, ante quàm eam promulgaret, referebat ad senatum; ut, quo plus ponderis maioremq; uim lex haberet, de senatus eam sententia ferret. popularis uero, ac seditiosus magistratus sæpe, prætermissa senatus auctoritate, aut etiam contra senatus auctoritatem; legem rogabat. Promulgabatur deinde lex, id est, in publico ponebatur. est enim promulgare, ut ait Festus, quasi promulgare. id autem eo fiebat, ut inspiceret qui uellet, inspectam consideraret; non solum, ut intercedi posset ante, quàm ferretur; uerum etiam, ut aliquanto ante statuere cuius liceret, utrum, cum ferretur, antiquanda, an accipienda lex esset. addo etiam illud, ut quouis monere legislatorem posset uel de corrigenda, uel omnino de non ferenda lege. spatium autem promulgationis, ut ex Dionysio, & aliis patet, quacunque de re ferretur lex, erat trinundinum, id est per trinas nundinas. cum enim nundinarum causa ex agris in urbem ciues conuenirent; per trinundinum leges patere, ut à rustica plebe ter legi cognosciq; possent, uoluerunt. quod cum M. Antonius non seruasset, inuehitur in eum Cicero Philippica v his uerbis: Vbi lex Cæcilia, & Didia? ubi promulgatio trinundinum? et idem pro domo sua: Hora fortasse sexta diei questus sum in iudicio, cum C. Antonium collegam meum defenderem, quædam de rep. quæ mihi uisa sunt ad illius miseri causam pertinere. hæc homines improbi ad quosdam uiros fortes longe aliter, atque à me dicta erant, detulerunt. hora nona, illo ipso die tu es adoptatus. si, quod in ceteris legibus trinum nundinum esse oportet, id in adoptione satis est trium esse horarum: nihil reprehendo. si eadem obseruanda sunt; ut decreuit senatus M. Drusi legibus, quæ contra legem Cæciliam, & Didiam latæ essent, populum non teneri: iam intelligis, omni genere iuris, quod in sacris, quod in auspiciis, quod in legibus sit, te tribunum pl. non fuisse. Et, ut aliud ex alio, trinundinum non solum in lege ferenda, sed & in magistratu designando uideo esse seruatum, ob eam scilicet causam, ut consuleretur candidatis pariter, & populo; illis, ad magis conciliandos sibi plebis animos; huic, ne imprudenter aliquem repente crearet, quem creatum postea nollet. locum autem & in lege, & in magistratu fuisse

De legibus

se trinundino, minimè miror; qui uideam à Cicerone, oratione II in Rullum, appellari legem ea comitia, quibus maiores magistratus crearentur. nam si comitia lex sunt: sequitur, ut, quod in lege, idem in comitiis obseruetur. et, quod rationi consentaneum uidetur, id exempla clarius ostendunt. X uiris creandis, inquit Liuius lib. III, in trinundinum comitia indicta sunt. et in epistola ad Tironem Cicerone: Ad consulatus petitionem se uenturum: neque iam uelle absentis rationem haberi sui: se praesentem trinundinū petiturum. quod tamen non nisi tranquilla rep. seruatum existimo. nam Punico bello secundo Q. Fabius Maximus consul tertium, Romam comitiorum causa proficiscens, in eum, quem primum diem comitiale habuit, comitia edixit. idemq; fecit anno proximo C. Claudius Cento, dictator comitiorum consularium causa creatus. Sed nimirum, quod dici solet, silent leges inter arma: & ad remp. cuius causa latae leges ipsae sunt, omnia referenda. Seruabatur praeterea & in iudicio populi trinundinum, cum scilicet à populo reus iudicaretur. unde illud pro domo sua: Cum tam moderata iudicia populi sint à maioribus constituta; primum, ut ne poena capitis cum pecunia coniungatur; deinde, ne, nisi prodicta die, quis accusetur; tertio, ut ante magistratus accuset intermissa die, quam multam irroget, aut iudicet; quarto, sit accusatio trinundinum. sic enim, quam quo modo est in impressis libris, malim legere. Constat igitur, in omnibus plane comitiis, de legibus, de magistratibus, de reis, trinundini rationem esse ductam: idq; propterea, quod iam dixi, quia legis nomen in omnia comitia, quibuscunque de causis haberentur, conueniret. Neque uero trinundinum ita interpretor, ut, ipso tertiarum nundinarum die uel latae esse leges, uel designatum magistratum, uel reum à populo iudicatum, existimem: cum & Macrobius lib. I, comitia nundinis haberi non potuisse, neque concionem aduocare, id est cum populo agere, licuisse, ueterum testimonio probet: & Festus, nundinas non solum inter ferias, sed etiam inter nefastos dies apud antiquos fuisse dicat; inter ferias, ne cum populo agi liceret; inter nefastos dies, ne lege. Nundinas, inquit, feriarum diem esse uoluerunt antiqui, quo rustici mercandi uendendiq; causa in urbem conuenirent; eumq; nefastū, ne, si liceret cum populo agi, interPELLarentur nundinatores. aliud autem erat, cum populo agere; aliud, lege agere. cum populo agere, populum, est, ad consilium, aut comitia uocare, ut ait Festus: lege agere, ius experiri, in iudicio contendere. libro etiam IIII epist. ad Atticum,

Atticum, per duos nundinarum dies neque comitia esse habita, neque concionem ullam, his uerbis Cicero declarat. Ante x cal. nundinae, concio biduo nulla. Trinundinum igitur in eam sententiam dictum accipio, ut inter eum diem, quo promulgata lex erat, & eum, quo deinde ferretur, trinae nundinae intercederent; quo & sapius & a pluribus, urbem mercandi uendendiq; causa uisitantibus, promulgata lex cognosci posset. Post tertias nundinas, magistratus in eum locum, ubi legem laturus erat, siue in forum, siue in campum Martium, populum conuocabat. ibi cum legem praeco, subiiciente scriba, recitasset; tum, (forte etiam in toto trinundino, quotiescunque populus coiisset, uel suadebant legem, uel dissuadebant: sed maxime, ac uehementer fieri solitum quo die ferenda lex erat, consentaneum est) primum quidem is, qui legem promulgarat, populo suadebat, ut rogationem acciperet; sed post eum alii, non priuati modo, quibus ab aliquo magistratu concio daretur, (nam alioqui concionandi potestas priuatis non erat) uerum etiam quandoque magistratus, pro suo quisque sensu, uel suadebant, uel dissuadebant. Suaforem rogationis eum, qui rogabat, fuisse, ita uerisimile est, ut, exemplis, quae multa suppetunt, mihi esse utendum in re minime dubia, non existimem. quod autem minus uerisimile est; ut aliquis eius rogationis, quam ferret, ipse dissuasor fuerit; id nisi testimoniis probem, credibile non erit. atque hoc tum fiebat, cum magistratus non e sua, sed e senatus sententia rogationem ferebat. neque enim prohibebatur dissuadere ad populum, quod non probauerat in senatu. Pisonis consulis exemplum habemus in epistola, Vereor, ad Atticum lib. I. Piso, inquit, consul, lator rogationis, idem erat dissuasor. quod Attico, ut nouum & iniquum, scripsit Cicero; cum suadere suas rogationes reliqui solerent. unde illud Attici ad Ciceronem lib. II de legibus. Suade igitur, si placet, istam ipsam legem; ut ego, Vti rogas, possim edicere. loquitur enim Atticus cum Cicerone, uti cum magistratu legem rogante. et quemadmodum in eo libro personam Cicero sustinet magistratus legem rogantis; quod proxima superiora uerba declarant; Si quae forte leges a me hodie rogabuntur, quae non sint in nostra rep. nec fuerint, tamen erant ferre in more maiorum; qui tum ut lex ualebat: sic Atticus ciuem agit de ipsa lege suffragium ferentem. quod indicat illud: Vt ego, uti rogas, possim edicere. refert enim morem illum tabellarum, quibus sciscitabatur lex: quae his duabus erant literis signatae, V. R. id est, uti rogas: cum

De legibus

cum eæ, quibus lex reiiciebatur, una litera A, essent inscriptæ: quæ ualebat, antiquo, hoc est nihil nouari uolo, antiqua probo. Vereor autem, (ut à re proposita paululum digrediar) ne mendum lateat in uerbo, Edicere. cui, quantum ex antiqua latine loquendi consuetudine conicere, ac meminisse possum, in hac sententia locus non est. sed ad rem. Priuatus legem Cinciam de donis & muneribus Q. Fabius Maximus suasit; Ogulniam de sacerdotiis P. Decius Mus; Voconiam de hereditatibus M. Cato ille censorius; Corneliam de redditu Ciceronis Cn. Pompeius. Nec uero, qui priuati item lege disuasent, inuenire non facile est. exemplum habemus, in oratione pro lege Manilia, Q. Hortensii; in libro de amicitia, C. Lælii, & minoris Africani. Maniliam legem, de bello Mithridatico Cn. Pompeio extra ordinem mandando, dissuasit Hortensius; Papiariam, de tribunis pl. reficiendis, Lælius, & Africanus. atque hanc ipsam consuetudinem, ut priuati legem suaderent, aut dissuaderent, indicat Liuius lib. XLV his uerbis: Ita traditum erat, ne quis prius intercederet legi, quàm priuatis suadendi dissuadendiq; potestas facta esset: quo melius aut commoda legis aperirentur, aut uitia. quo persæpe euenit, ut aut ii, qui ad intercedendum uenerant, desisterent; aut intercederent, qui non professi essent se intercessuros. et eodem libro infra: Cum in Capitolio rogationem eam Ti. Sempronius ferre uellet; & priuatis lege dicendi locus esset; neque ad suadendum, ut in re minime dubia, quisquam procederet: Ser. Galba repente processit. item Cicero in oratione pro C. Cornelio; cuius extant reliquæ quædam, cum Asconii commentariis editæ. Est, inquit, ius uetandi, dum priuati dicunt, dum sitella deferitur, dum æquantur fortes, dum sortitio fit. quibus in locis cum & Liuius & Cicero de solis priuatis meminerint; non tamen eam potestatem solis priuatis fuisse debemus, existimare. partem enim pro toto posuerunt; quia priuati & sapius, & plures, quàm magistratus, aut pro lege, aut contra legem dicere solerent. Magistratum porro uel suadentium, uel dissuadentium legem exempla habemus hæc. M. Porcius Cato, ille maior, consul rogationem de abroganda lege Oppia, C. Lælius, ille sapiens, prætor Liciniam de cooptatione sacerdotum ad populum transferenda dissuasit. legem Maniliam prætor Cicero lucculenta, quæ extat, oratione suasit: agrariam Rullii iis, quæ extant, orationibus consul idem dissuasit. Verum hæc, quæ paulo longius, ut illustriora fierent, produximus, paucis admodum uerbis libro de

de legibus III Cicero comprehendit. Populum, inquit, docento, doceri à magistratibus priuatisq; patiuntor. in quo significatur, ut & ipsi magistratus, qui legem ferent, doceant, hoc est de ipsa lege dicant; & dicere alios quoque tum magistratus, tum priuatos patiantur. Infra uero, eodem libro, cum dixit, De promulgatione, de singulis rebus, de priuatis, magistratibus audiendis; priuatos posuit ante magistratus, cum supra primum magistratus, deinde priuatos nominasset. quòd si ad ueritatem ordo referatur; prius nominari priuatos, deinde magistratus oportuit. prior enim priuatis locus in suadenda dissuadenda uel lege ideo datus est, ne, si eos, qui magistratum gerebant, ante audissent, ab iis dissentire non auderent. idq; Dio historiæ suæ libro XXXIX scriptum reliquit. quos autem suadere aut dissuadere leges solitos fuisse diximus, eos in ea pro Flacco legis auctores Cicero appellat: cum auctores intelligat uel accipiendæ legis, uel antiquandæ. Hæc de suadentibus dissuadentibusq; legem. nunc de loco, unde suaderent, aut dissuaderent, addendum quiddam est. Nemo ad populum, nisi de loco superiore, concionabatur, siue ius priuatus esset, siue magistratum administraret. id autem ob eam causam, quo longius àstantibus in concione tū exaudiri uox, tum intelligi uerba possent. concionabantur igitur, si in foro, de Rostris, quæ ad Comitium fuisse, prope iuncta curiæ, Peditanus ait: si in campo Martio, uel alibi, de suggestu, aut editiore aliquo loco. concionari autem magistratibus pro ea, quam habebant, potestate omnibus licebat: priuatis, quod iam diximus, nisi concionem, id est concionandi potestatem, à magistratu aliquo acciperent, non licebat. et quia sæpius in foro, ubi Rostra fuisse diximus, quàm in campo, leges ferebantur: ideo sæpius de Rostris, quàm in campo, conciones habebantur. multo enim plures tributis comitiis, quæ legum quidem causâ, in foro, interdum & in Capitolio habebantur, quàm centuriatis, quæ in campo, latas esse constat; cum tribuni pl. qui comitia tributa, non centuriata, habebant, facillime ad leges rogandas adducerentur, quippe qui leges non ferrent ex senatus auctoritate: quod necesse erat de legibus centuriatis. Dixi, priuatos non nisi potestate à magistratu accepta concionari potuisse; magistratus autem cunctos suo iure potuisse. quod cum ita esse nunc etiam confirmem; tamen illud addo, summum in eo ius, summamq; potestatem tribunorum pl. fuisse: qui, si uellent, non priuatos modo, uerum & magistratus ipsos, atque etiam consulem, qui summus erat

De legibus

erat magistratus, prohibere concione poterant. itaque Ciceronem consulem extremo magistratus die Q. Metellus Nepos tribunus pl. concionis habendæ potestate priuauit: et Q. Metellum Celerem consulem à L. Flauio tribuno pl. in carcerē deductum; annoq; proxime confecuto M. Bibulum, item consulem, à P. Vatinius tribuno pl. historiæ narrant. non enim de Rostris modo concionantem, atque etiam de curru triumphantem detrahare tribuno pl. licebat, uerum & quoquò uellet, deducere, uel ad supplicium, si liberet: propterea quòd, cui uellet, manus iniicere, uetusto Sacratarum legum iure, poterat; ipsi, cum sacrosanctus esset, nemo poterat. Verū tribuni pl. potestatem suo loco, id est libro de magistratibus, referuimus: interim, quod in manibus est, ipsum agamus. Cum suaserant, dissuaserant ue legem primo loco magistratus, qui legem ferebat, secundo priuati, tertio reliqui magistratus; tum, præsentibus sacerdotibus, ut Dionysius scribit, & diuina exponentibus, sitella, uel urna (sitellam Cicero, urnam Lucanus uocat) deferabatur: in quam siue tribuum, si tributis comitiis lex ferretur, siue centuriarum, si centuriatis, nomina coniiciebantur, deinde, sortibus æquatis, hoc est, ita agitata sitella, ne qua fors subsultaret, atque existeret, sed pariter omnes æquata iacerent, sortitio fiebat; quæq; prima uel tribus, uel centuria, quæ secunda, quæ tertia de sitella exiisset, eundem, quem fors dederat, in suffragio ferendo locum atque ordinem tenebat. hæc dum agerentur; si quis tribunus pl. legi uellet intercedere, locus erat. nunquam autem ante suasionem dissuasionemq; legis intercessionem fuisse, declarant illa proxime recitata, quæ Liuius libro XLV, Cicero in oratione pro C. Cornelio tradiderunt. Et quoniam de intercessione, quæ legem impediabat, mentionem facimus: (neque enim legi tantum, uerum & senatus consultis, & prætorum decretis, aut iudiciis intercessum esse, animaduertimus) omnibus de causis, quæ, quo minus promulgata lex perferri posset, impedimento fuerunt, dicendum nobis est. Hæc quatuor traduntur: prima, intercessio; cum tribuni pl. quorum proprie intercedendi ius erat, edita uoce illa, Veto, de qua meminit Liuius, intercedebant: cuius generis exempla non desunt: altera, cum is, qui promulgarat, uel amicorum precibus adductus, uel senatus auctoritate commotus, uel ipse sua sponte consilium mutabat: quod C. Manilius, & L. Cæcilius, uterque tribunus pl. diuersis temporibus fecerunt, ille in lege de libertinorum suffragiis, hic in ea, quam de

de minuenda ambitus poena promulgauit. Tertia ratio fuit, cum, neque intercedente tribuno, neque eo, qui promulgauerat, confilium mutante, comitiales dies, id est eos, quibus agi cum populo licebat, consul eximebat, uel supplicationibus decernendis, uel feriis indicendis, non solum iis, quæ Latinæ dicebantur, quas indicare soli consules poterant, sed etiam iis, quæ imperatiuæ, quas non modo consulibus, uerum etiam prætoribus ipsorum arbitratu licebat imperare. quo genere usum esse Cn. Cornelium Lentulum Marcelinum consulem, ut C. Catonis tribuni pl. legibus obsisteret, uideamus in epistola, Placitum, libro II ad Q. fratrem. Quartam causam, quæ & ipsa comitiis, quacunque de re haberentur, impedimento esset, obnunciationem inuenimus: quam omnes plane magistratus habebant, ut in oratione in Antonium II Cicero significat his uerbis: Nos nunciationem solum habemus, consules & reliqui magistratus etiam speculationem. quo loco duas dictiones, nunciationem, & speculationem, alteram alterius sedem occupasse, facile crediderim: ut augures speculationem duntaxat habuerint, magistratus, si modo augures essent, ut erat Antonius, idem consul, & augur, simul cum speculatione etiam nunciationem, hoc est obnunciationem. idque cum ad ipsam Ciceronis sententiam magis quadrare, qui diligenter animum intenderit, intelliget: tum Feltus Pompeius ita esse, deprauatis ille quidem uerbis, satis tamen aperte significat in dictione spectatio. legamus igitur in ea oratione sic: Nos enim speculationem solum habemus, consules & reliqui magistratus etiam nunciationem: ut augures intelligat, cum, Nos, dicit: erat enim ipse augur: cum uero, Consules, subiicit, in eo notet Antonii consulis incertitiam; qui se id auguratus iure posse diceret, quod, quia consulatum gerebat, multo facilius poterat. præterea, ut de magistratibus obnunciantibus haud parum sæpe legimus, ita de auguribus de cælo seruantibus. seruare autem de cælo, spectatio est: quæ tolleretur, si uerum illud esset, Nos nunciationem solum habemus. Quod si quis dixerit; ideo uerum esse, nunciationem solum habuisse augures, quia speculationem, nisi iussi à magistratibus, non haberent: facile refelletur. nam si augurum spectatio non est; quia pendet à magistratuum uoluntate: ne nunciatio quidem erit; quia pendet à speculatione. qui enim esse potest nunciatio, nisi spectatio antecedit? præterea, si speculationem augur non habet, nisi iubente magistratu: ne nunciationem quidem habet, nisi eodem uolente. neutram igitur habebit: quandoquidem non ipsius, sed

V

magistratus

De legibus

magistratus in utraque potestas est. quo modo igitur consistit illud, Nos nunciationem solum habemus: siue nunciationem pro renunciatione, siue pro obnunciatione accipias? Obnunciatio autem duarum rerum obseruatione fiebat, uel cum de cœlo fulsisset, aut tonasset; (erat enim in augurum disciplina, ut, Ioue fulgente, tonante, comitia dimitterentur) quo genere impedimenti Pompeius Magnus in secundo consulatu, cum prætorem creari, uirum omnium integerrimum, M. Catonem uideret, ipse autem, hominem flagitiosissimum, P. Vatinius, Cæsaris gratia, uellet, comitia dissoluit: uel cum aues aduersa portenderent. auium porro uel cantus, uel uolatus obseruabatur. nec omnium erat eadem significatio; cum quædã à dextra uolantes, quædam à sinistra prosperos euentus ostenderent. itaque sinistra Romanis lætã, ut Græcis dextra: iisdem tamen & sinisterum fulmen triste omen fuit ad comitia, cum ad ceteras res esset optimum; et, si bubo uolaret à sinistra. præclare Lucanus hoc de genere lib. III, cum neglectam ueterem comitiorum rationem significaret, illa pronunciat: - Fingit solennia campus.

Nec cœlum seruare licet. tonat, augure surdo;

Et lætæ iurantur aues, bubone sinistro.

Redeo ad institutum. Sortitione tribuum aut centuriarum facta, dicebat is, qui legem ferebat: Si uobis uidetur, discedite Quirites. de quo Pediani uerba subscribam. Cum, inquit, id solum superest, ut populus sententiam ferat; iubet unumquemque is, qui fert legem, discedere. quod uerbum non hoc significat, quod in communi consuetudine est, de eo loco, ubi lex fertur, sed in suam quisque tribum discedat, in qua est suffragium laturus. populus enim confusus, ut semper alias, ita & in concione. Liuius autem lib. II, ubi de lege Leætoris loquitur, Consul, inquit, Appius negare ius esse tribuno in quenquam, nisi in plebeium: non enim populi, sed plebis eum magistratũ esse; nec ullum ipsum summouere pro imperio posse more maiorũ; quia ita dicatur: Si uobis uidetur, discedite Quirites. ubi, Discedite, dictum apparet, ad suffragia ferenda. libro uero III, ubi de Terentia lege agit, idem significat, cũ ait: Quemadmodũ se tribuni gessissent in prohibendo delectu, sic patres in lege, quæ per omnes comitiales dies ferebatur, impediẽda gerebant. initiũ erat rixæ, cũ discedere populũ iussissent tribuni; quod patres se summoueri haud sinebãt. Cum igitur, de concione iussu discedere, in suam quisque tribum, aut centuriã abiisset; priuatos homines inuenio, qui de lege laborarent, non

non modo populum, ut legem acciperet, ante lata suffragia rogasse, uerum etiam, cum suffragia lata essent, ne quid fallaciæ committeretur, ipsos aut tabellas distribuisse, aut distribuentibus præfuisse. idq; diribere proprio uocabulo dicebatur. quod muneris quia fere obiri curariq; ab iis soleret, qui neque ætate graues, neque gestis honoribus insignes admodum essent; id sibi & à senibus, & à dignitate præstantibus præcipue contigisse, gloriose commemorat Cicero in Pisonem. Hoc, inquit, certe uideo, quod indicant tabulæ publicæ, uos rogatores, uos diribitores, uos custodes fuisse tabellarum: et, quod in honoribus uestrorum propinquorum non facitis, uel ætatis excusatione, uel honoris; id in salute mea, nullo rogante, uos uestra sponte fecistis. eodemq; uerbo eadem de re usus est in ea post reditum in senatu, cum ait: Quando tantam frequentiam in campo, tantum splendorem Italiæ totius, ordinumq; omnium, quando illa dignitate tot rogatores, diribitores, custodesq; uidistis? Nec dubito, quin legendum sit, diribeantur, non diripiantur, in ea in Pisonem, in eo loco; An expectas, dum de te LXXV tabellæ diripiantur? pro, distribuantur; ut de te iudicium fiat. sic & Plinius manifeste accepit libro XXXVI, cap. XV. Hic est, inquit, ille domitor orbis populus, qui gentes, & regna diribet. Cistis autem suffragiorum custodiendis certos homines in comitiis præfuisse, qui Nongenti sint appellati, idem Plinius lib. XXXIII cap. II scriptum reliquit. Tabellis distributis, primo loco ea tribus, aut centuria suffragium ferebat, quæ, omnium tribuum, aut centuriarum nominibus in sortem coniectis, prima de sitella, de qua iam diximus, sorte exierat: eaq; prærogatiua dicebatur; quia prima rogaretur à magistratu, qui comitia habebat. at in prima tribu, aut centuria quis primus? uidelicet is, quem magistratus legem ferens deligebat: deligebat autem, quem & dignitate præstare, & rogationi suæ præter ceteros fauere iudicabat. utrunque cognoscitur in oratione pro Plancio: in qua ita scriptum est. Nam quòd primus sciuit legem de publicanis, tum, cum uir amplissimus consul id illi ordini per populum dedit, quod per senatum, si licuisset, dedisset: si in eo crimen est, quia suffragium tulit; quis non tulit publicanus? si, quia primus sciuit: utrum id sortis esse uis, an eius, qui illam legem ferebat? si sortis: nullum crimen est in casu. si consulis: splendor etiam Plancii, hunc à summo uiro principem ordinis iudicatum. quo constat, ideo primum Plancium ad suffragium ferendum à Cæsare consule lectum esse, quia primus ordinis equestris iudicaretur.

De legibus

quod ipsum confirmant illa pro domo sua: Consulari homini P. Clodius, euerſa rep. ciuitatem adimere potuit, concilio aduocato, conductis operis non ſolum egentium, ſed etiam ſeruorum, Sedulio principe? dixit enim, Sedulio principe, pro, primo omnium ſuffragium ferente. quod apertius proxime oſtendit, cum ait: Sin autem is primus ſciuit. erat enim quodam modo legis ornamentum, cum is eam ſciſcebat primus, cuius in ciuitate non leuis eſſet auctoritas. quod etſi ſatis clare indicant ea, quæ ex oratione pro Plancio recitauimus: tamen in hac ipſa pro domo ſua idem fit illuſtrius. ſubiungit enim poſt ea, quæ proxime ad exemplum attuli, non magno interuallo: Tu huius, ut acta tui præclari tribunatus hominis dignitate honeſtes, auctoritatem amplecteris. quaſi Clodius Sedulii, tanquam clari hominis, nomen publicis in tabulis ad legem honeſtandam ſcripſiſſet, aut fortatte etiam in æs ſimul cum ipſa lege incidiſſet. nam, ut dicam quod ſentio, ſuſpisor de mendo, ubi Sedulii mentio fit in ea pro domo ſua. quod enim legitur, Quid te audacius, qui in eius nomen incideris? id non placet, non enim cum audacia caſus congruit. nam, incidere, uerbum eſt in caſu poſitum: audacia uero uoluntatis eſt. non enim, qui incidit, audax eſt, ſed imprudens, & inſcius; qui uero audax, is non incidit, ſed incurrit, & irruit. quare aliter ſuſpisor à Cicerone ſcriptum eſſe, & forte ſic: Quid te audacius, qui in æs eius nomen incideris? leges enim in æs incidi ſolitas, paulo poſt docebimus. Cum igitur ab eo, quem magiſtratus ipſe primum delegiſſet, deincepsq; ab aliis eiufdem tribus, aut centuriæ perlata ſuffragia erant; tum, ſuffragiis in utranque ſententiam dinumeratis, & eorum numero punctis notato, eius tribus, aut centuriæ uoluntas cognoscebatur, eaq; à præcone renūciabatur; &, eadem in reliquis tribubus aut centuriis ratione ſeruata, ex maiore tribuum centuriarum ue numero uel antiquabatur, uel ſciſcebatur lex. hoc autem, dirimere ſuffragia, & diremptio ſuffragiorum, dicebatur. itaq; uetera habent exemplaria Varronis de re ruſt. lib. III. Dum dirimuntur ſuffragia, uis potius Villæ publicæ utamur umbra, quàm priuati candidati tabella? quod aperte declarat Lucanus, quem locum deprauari, &, ut aliis in locis, diribet pro dirimit, reponere, facile non fuit, in illo uerſu, lib. V. Et non admiſſæ dirimit ſuffragia plebis. et ad Q. fratrem, lib. III. epiſt. IIII. lego, diremptis tabellis, non, ut uulgo legitur, & ut habent libri quoque manuſcripti, diruptis. item in oratione pro Plancio, diremptio, non direptio. Diremptis

ptis igitur suffragiis, uel de antiquata lege, uel de accepta cognosce batur. ac de antiquata nihil est dicendum. scitam autem, atque acceptam, omnium ciuium iureiurando confirmari solitam legimus. itaque Q. Metellus, ille Numidicus, ne in legem Saturnini per uim latam iuraret, in exilium abire maluit, sibiq; potius de patria, quàm de sententia, decedendum putauit. quem anno post XLIII imitatus non est M. Cato, is, quem Uticensem historici nominant: qui cum leges P. Clodii nullo neque iure neque more rogatas putaret, in eas tamen iurauit, consilio usus optimo, ut Cicero ait in ea pro Sextio. nam ab eo, quod omnino ne fiat, fieri non potest, cum periculo dissentire, temeritatis uidetur esse. Post iusiurandum, in æs lex incide batur: quod indicat Liuius lib. III his uerbis: Prius quàm urbem consules egredierentur, leges x uirales, quibus tabulis duodecim est nomen, in æs incisas in publico proposuerunt. atque hoc libro x Dionysius confirmat. et Cicero in oratione III in Catilinam, Memoria teneris, inquit, Cotta, & Torquato cos. complures in Capitolio turres de cælo esse percussas: cum & simulacra deorum immortalium depulsa sunt; & statuæ ueterum hominum deiectæ; & legum æra liquefacta. quod ipsum uersibus deinde persecutus est in secundo de consulatu suo, ut libro I & II de diuinatione patet. eandem consuetudinem probant illa, quæ in I Philippica scripta sunt. Forum sepietur: omnes claudentur aditus: armati in præditiis multis in locis collocabuntur. quid tum? quod erit ita gestum, id lex erit, & in æs incidi iubebitis? quod etiam non multo ante dixerat: Quæ illæ in æs incidunt, in quo populi iussa perpetuasq; leges esse uoluit, pro nihilo habebuntur? exemplis non egemus: sed unum Suetonii, quod in C. Cæsaris uita legimus, quod apertam rem multo etiam illustrius ostendit, apponemus. Marcus, inquit, Claudius Marcellus consul, edicto præfatus, de summa se rep. acturum, retulit ad senatum, ut ei succederetur ante tempus: quoniam, bello confecto, pax esset; ac dimitti deberet uictor exercitus: & ne absentis ratio comitiis haberetur; quando nec plebiscito Pompeius postea abrogasset. acciderat autem, ut is, legem de iure magistratuum ferens, eo capite, quo à petitione honorum absentes summouebat, ne Cæsarem quidem exciperet per obliuionem; ac mox, lege iam in æs incisa, & in ærarium condita, corrigeret errorem. Hic illud occurrit. Si tum denique in æs leges incidebantur, cum perlatae essent; quod proxima Suetonii uerba ostendunt: cur in oratione pro Milone, cum de legibus

De legibus

gibus nondum latis, sed quas Clodius ferre cogitarat, mentionem facit, Incidebantur, inquit, iam domi leges, quæ nos nostris seruis addicerent? cur non, scribebantur, potius, quàm, Incidebantur? an incideret Clodius leges nondum latis? dicamus, quod omisit Peditius interpres; qui in arte Ciceronis indicanda parcus nimis est, sicuti in exponenda historia satis liberalis. notat Cicero cōfidentiam Clodii, hominis audacissimi; qui domi suæ leges non modo scriberet, sed etiam, quasi latis, incideret; quas, quo iure qua ue iniuria, cum suis operis & seruis omnino perferre constituerat. et est oratoris artificium, ad odium concitandum ea de inimico dicere, quæ etiam si fortasse facta non sunt, fieri tamen potuisse, eius, in quem dicitur, ante acta uita declarat. nihil erat, quod in Clodium, quamuis atrociter excogitatum, non uerisimile uideretur. ideo, Incidebantur potius, quàm scribebantur, dixit, uel uere, uel, quod magis puto, ὑπερβολικῶς, & tamen uerisimiliter, ut de P. Clodio; quem omnium audacissimum fuisse constabat. Ne illud quidem prætermittam, non in tabulis modo æneis, sed etiam in columnis incisas esse leges. de tabulis dubium non est: quas etiam aliquot, in hunc usque diem seruatas, ipsi uidimus. de columnis autem Cicero pro Balbo sic: Cum Latinis omnibus fœdus ictum Sp. Cassio, Postumo Geminio cos. quis ignorat? quod quidem nuper in columna ænea meminimus post Rostra incisum & perscriptum fuisse. qua ipsa de re Liuius libro II sic: Tantum sua laude obstitit famæ consulis Marcius; ut, nisi fœdus cum Latinis, columna ænea insculptum, monumento esset, ab Sp. Cassio uno, quia collega abfuerat, ictum; Postumum bellum gessisse cum Volscis, memoria cessisset. et Varro, ut apud Macrobius legimus, antiquissimam legem in columna ænea scripsit incisam fuisse, cui mentio intercalaris ascriberetur. nec deest Dionis in historia testimonium; qui lib. XLI, columnas, quibus incisæ leges legerentur, de cœlo tactas memoriæ prodidit. Scripta iam lege, promulgata, perlata, in æs incisa, (nis enim quasi gradibus ad id, quod in lege ultimum, ac summum est, peruenimus) unum restat, ut, ubi custodienda reponeretur, ostendamus. Scire igitur oportet, non eandem legum omnium fuisse rationem, sed aliquot, maximæq; tabulis æneis incisas, in publico proponi solitas, ut oculis ciuium paterent; quod exempla demonstrant; quæ uero æneas in tabulas essent incisæ, eas ad ærarium delatas, quod scilicet & senatus consulta. ibi cum publicis pecuniis, omniumq; publicarum rationum libris

bris conditæ asseruabantur. erat autem ærarium in Saturni Opisq; templo: templum autem in uico Iugario, id Capitoli radices. unde septies millies ₪s, à Cæsare dictatore depositum, post illius interitū M. Antonius consul abstulit. etsi tantum Opis in Philippica I & II, ubi hac de re Cicero loquitur, mentio fit: puto, quòd duabus cellis simulacra Opis & Saturni separatim dedicata colerentur, & ad Opis cellam propius, quàm ad Saturni, eam pecuniam Cæsar locasset. prius tamen reip. temporibus legem Iciliam in templo Dianæ, quod in Auentino monte fuit, repositam esse, legimus in historia Dionysii. Quæ ad rationem perferendæ legis attinerent, quæ fere ponderis aliquis esse uiderentur; omnia, ut arbitramur, persecuti sumus. nam, in quo differrent legum ferendarum comitia à ceteris comitiis, ut de magistratu creando, de reo iudicando, quia conuenire magis in librum de comitiis hæc tractatio uidetur, qui post hunc de legibus exhibit, hic omittimus. Locum ferendæ legis interdum Prata Flaminia, qui postea circus Flaminius dictus est, interdum etiam lucum Petelinum, quandoque Capitolium, sed plerunque forum, aut campū Martium fuisse legimus. de Pratis Flaminiiis, luco Petelino, Capitolio, Liuius testis est: de foro, declarant illa pro C. Rabirio Postumo: Si lex ferretur, conuolaretis ad Rostra. erant enim Rostra in foro. dixit autem, Conuolaretis ad Rostra, cum hoc subintelligeret, ut inde legem dissuaderetis. et aperte in oratione I in Antonium, & in V, & pro domo, & ubi non? de campo, inde constat, quòd; cum leges centuriatis comitiis sæpe latæ sint; centuriata porro comitia in campo esse habita, omnes historiæ narrent: manifeste sequitur, ut leges centuriatis comitiis latæ, in campo latæ sint. Hic oritur alia consideratio, loco ne sacro, an profano ferretur. sacro potius, quàm profano, crediderim: primum, quòd in Rostris, qui locus erat auguratus, templumq; dicebatur, sæpe à magistratu ferretur: itaque pro Sextio, Princeps, inquit, rogationis Q. Fabricius templum aliquanto ante lucem occupauit. occuparat enim, ut legem ferret. quod illa uerba pro Milone declarant: Potuit ne Fabricio, uiro optimo, cum de reditu meo legem ferret, pulso? occuparat autem Rostra, non templum alicui deo sacrum: quod ipse Cicero declarat infra, in eadem pro Sextio, subiungens, Tribunos pl. ferro è Rostris à Clodio pulsos, Fabricium intelligens. sed clarissime in Vatinius his uerbis: Cum L. Vettium indicem in Rostris, in illo, inquam, augurato templo ac loco collocaris. et Liuius lib. VIII, Naues, inquit, Antiatium

De legibus

tiationem partim in naualia Romæ subducta, partim incensa: Rostrisq; earum suggestum in foro extructum adornari placuit: Rostraq; id templum appellatum. Altera est ratio, quod leges à P. Clodio tribuno pl. in templo Castoris latas inuenio. quod indicat illud in Pisonem: Eodem in templo, eodem & loci uestigio, & temporis, arbitria non mei solum, sed patriæ funeris abstulisti. sic enim interpretor illud, Eodem in templo. quo in templo legem de mea pernicietulerat Clodius, eodem in templo de Macedonia tibi tradenda statim legem tulit: quam tu prouinciam ad arbitrium tuum pro meo funere, quod idem funus patriæ fuit, ipse pactus eras. itaque prouinciam lege traditam, quasi præmium à Clodio debitum, abstulisti. et apertius in oratione pro domo sua: Cum arma, inquit, in ædem Castoris comportabas, nihil aliud, nisi, uti ne quid per uim agi posset, machinabare. in libris autem de inuentione, Flaminium, inquit, cum, qui consul remp. male gessit bello Punico secundo, legem agrariam per seditionem ad populum ferentem, pater suus de templo deduxit. accersitur maiestatis. et apud Liuium, ante quam Rostra in foro extructa essent, de tribunis pl. legum rogandarum causa in templum coeuntibus, non semel mentionem fieri uidemus. Ferebat ergo magistratus legem in templo: ferebat suffragia de lege populus circa templum. locum enim tantæ multitudini ullo in templo fuisse, credibile non est. cum uero lex à magistratu ferretur, eodem in templo alios quoque magistratus affuisse, eos nimirum, qui cum magistratu legem ferente consentirent, legimus in oratione in Vatinium: Quæ quidem leges, inquit, anno post, sedentibus in templo duobus non consulibus, sed proditoribus huius ciuitatis, ac pestibus, una cum auspiciis, cum intercessionibus, cum omni iure publico conflagrauerunt. Ostendi latam in templo legem, cum in foro ferebatur, hoc est tributis comitiis. quid, cum in campo, centuriatis? tum in templis deorum non existimo, quæ in campo nulla fuisse legimus: quo tamen in loco à magistratu ferretur, eum locum ante auguratū fuisse crediderim. nam si tributis comitiis semper in templo; cur centuriatis, quæ maiorum rerum causa habebantur, profano in loco lex ferretur? sed fortasse uideri possit infirma coniectura. addamus exemplum, ut dubia res testimonio probetur. Liuius igitur lib. III, Tribuni, inquit, ut impediendæ rei nulla spes erat, de proferendo exercitu agere, eo magis, quod, & augures iussos adesse ad lacum Regillum, fama exierat, locumq; inaugurari, ubi auspicato cum populo

pulo agi posset: ut, quidquid Romæ ui tribunicia rogatum esset, id comitiis ibi abrogaretur. Inter leges autem, quæ in foro, & eas, quæ in campo ferrentur, dixi iam hoc interfuisse, quòd in foro tributis comitiis ferrentur, in campo comitiis centuriatis. nunc adiungo, primum illud, centuriatis comitiis eas esse latas, quæ è s. C. ferebantur: deinde illud; quæ centuriatis comitiis ferrentur, eas, si è s. C. non ferrentur, patribus quidem auctoribus semper esse latas. quod non à primis reip. temporibus, sed tantum post Publilii Philonis dictaturam obseruatum est. hunc enim dictatorem legem tulisse, ut legum, quæ comitiis centuriatis ferrentur, ante latum suffragium patres auctores fierent, scribit Liuius lib. VIII. quo significatur, non omnes antea leges, quæ centuriatis comitiis ferrentur, è s. C. aut patribus auctoribus esse latas. quòd si factum nunquam antea nõ erat, consuetudine seruata, quæ in Numa rege creando est inducta; ut scilicet, ante quàm populus suffragium iniret, patres in incertum comitiorum euentum auctores fierent; Publilius in plebem propensus, quia plebeia gentis erat, quod senatui liberum erat, id necessarium fecit; quodq; more factum erat, id ut lege fieret, sua lege sanxit. Neque uero, quod ait Liuius, Patres auctores fierent, expono, patres s. C. probarent. fiebant enim de re & relata, & disputata s. C. quid porro referri & disputari opus erat id, quod omnino probari à senatu Publilia lex iuberet? nam de quo fit s. C. id eiusmodi est, ut improbari & abiici potuerit: est autem & probatum, & acceptum, quia maior pars senatus ita senserit. at in hoc non, utrum uis licere, neque plurium senatorum uoluntatem spectari, Publilius uoluit, sed, quasi ab uniuerso senatu iam probatum esset, ita, uellent nolent, patres auctores esse. ergo sic existimare debemus; quæ leges centuriatis comitiis ferrentur, eas post legem Publiliam aut è s. C. aut certe patribus auctoribus esse latas; quæ uero ante legem Publiliam centuriatis comitiis latae erant, alias è s. C. alias sine s. C. patribus tamen auctoribus, alias neque è s. C. neque patribus auctoribus. Nihil ne igitur interfuit, dicet aliquis, inter leges, quæ patribus auctoribus, & eas, quæ è s. C. ferrentur? nihil, mea sententia, ante legem Publiliam. nam, siue è s. C. siue patribus auctoribus ferrentur; è senatus uoluntate ferebantur. post legem autem Publiliam multum inter huiusmodi leges interfuit, atque adeo tantum, quantum inter secundam & aduersam uoluntatem interest. nam secunda senatus uoluntate ferebantur eæ leges, quæ s. C. probatae iam erant:

X aduersa

De legibus

aduersa uero non nunquam ea, quarum patres auctores fiebant. probabant enim inuiti, lege coacti. itaque honorificentius habebatur id, quod è s. C. centuriatis comitiis latum esset, quam id, quod iisdem comitiis patribus auctoribus. sed extremis reip. temporibus nullam legem centuriatis comitiis sine s. C. patribus auctoribus latam inuenio, permultas autem s. C. iisdem comitiis: siue, quod abrogata sit Publilia lex: siue, quod, cum idem Publilius eodem tempore, postea quam Q. Hortensius dictator legem tulisset, ut eo iure quod plebs statuisset, omnes Quirites tenerentur; nihil attinuit patres auctores de eo fieri, quo, uel si auctores ipsi non fierent, tamē omnes ciues aequē tenerentur. itaque magistratus aut è s. C. centuriatis comitiis, aut, si senatus dissentiret, tributis leges tulerunt: (quāquam & leges multae tributis comitiis ex s. C. latae sunt) cum duabus legibus, Publilia, & Hortensia, eandem uim haberent leges tributis comitiis latae, quam habuerunt antea leges ea, quae centuriatis comitiis, patribus auctoribus, latae erant. non enim, quod ait Cicero Philippica X, Legem Pansa comitiis centuriatis ex auctoritate nostra laturus est, eo sensu dictum existimo, quod eam legem patribus auctoribus Pansa laturus esset; sed, Ex auctoritate nostra, expono, ex s. C. loquitur enim de Caesaris actis: quae lege confirmari, & sanciri, senatus cupiebat. cum porro cuperet; nimirum s. C. potius, quam alia quauis ratione, declararet. quod si cui, auctoritatem senatus pro s. C. usurpari, nouum est: nihil errabit, si, ut de latine loquendi consuetudine recte iudicare possit, Ciceronis libros diligenter euoluerit. Hic fortasse quaeretur; ante Publiliam legem omnes ne leges, quas senatus, siue centuriatis, siue tributis comitiis, ferri cuperet, ferretur è s. C. an uero alia è s. C. alia uero sine s. C. tantū patribus auctoribus. utrumque factum est. nam neque omnes è s. C. neque omnes patribus auctoribus latae sunt. de latis è s. C. testimonium res non desiderat: exemplorum enim plena sunt omnia. patribus autem auctoribus minus quidem multae, sed aliquot tamen latae sunt, ut Petilia de ambitu, à tribuno pl. tributis comitiis lata; de qua Liuius libro VII. Quaeretur etiam, (pergam enim dubitando, quod non solum ueterum librorum obseruatio, sed ipsa me coniectura ducit) utrum centuriatis comitiis leges à maiore tantum magistratu, an etiam à minore ferrentur. faciamus, quod oratores solent: qui cum testibus rem probare non possunt, argumentantur à simili, & hoc genere saepe fidem faciunt. item nos, cum, centuriatis

riatis comitiis à minore magistratu leges latae sint, nec ne, affirmare non possumus; quia neutrum ab antiquis traditum est; similitudinē sequemur, &, quod in creandis magistratibus fieri solitum est, idem in ferendis legibus obseruatum esse dicemus. nam si creandis magistratibus centuriata comitia nunquam, nisi à maiore magistratu, habita sunt: itidem, ferendis legibus nunquam, nisi à maiore, esse habita, consentaneum est. illud autem est. esse igitur & hoc dicemus. neque enim, cur non sit, aut ratio suadet, aut exempla demonstrant. De legum tempore, quae notauimus, haec sunt: neque omnibus diebus licuisse legem ferri, neque, quibus liceret, per omnes horas. licebat fastis tantum diebus: nefastis non licebat. nec uero fastis omnibus, sed comitialibus duntaxat. comitialibus autem ita licebat, si nemo de cælo seruaret. quae duabus legibus, Aelia, & Fusia, sancita erant. id annis prope centum ante Ciceronis aetatem, ut scripsit ipse in oratione in Pisonem, institutum, ad extrema fere mansit reip. tempora. Pifone autem & Gabinio cos. P. Clodius tribunus pl. Ciceronis ac bonarum partium inimicus, ut armaret immoderata licentia tribuniciam potestatem, dierum discrimen, & auspiciorum impedimenta sustulit. neque enim tantum, ut omnibus plane fastis ferri lex posset, uerum etiam, ne quis per eos dies, quibus cum populo liceret agi, de cælo seruaret, rogationem tulit. idq; postea seruatum esse, uidentur illa significare, quae scripta sunt in oratione de prouinciis: Aut statuendum uobis est, legem Aeliam manere, legem Fusiā non esse abrogatam, non omnibus fastis legem ferri licere; cum lex feratur, de cælo seruari, obnunciari, intercedi licere. Ergo, ante legem Clodiam, non omnibus diebus, sed fastis, non omnibus fastis, sed comitialibus, nec comitialibus, si quis de cælo seruaret, ius ferendae legis erat: post legem Clodiam, non omnibus quidem diebus, sed omnibus tamen fastis, quod ante non licuerat, etiam si de cælo seruaretur, ferri lex potuit. Horae uero, quibus agi cum populo posset, omnes erant intra ortum solis, & occasum. reliquis non licebat. ante primam enim horam nihil agi licuisse cū populo, cum ait Dio in extremo lib. λθ, non expono, ante primam horam Romani diei, cuius initium à media nocte sumebatur, sed, ante lucem, ante auroram. quod ipse quoque Dio sic interpretatur, his uerbis: *ὁ γὰρ ἄλλος ὁ σέβουτος κρύφα, καὶ ὑπὸ τὴν ἑω σφατηγῶν τὸν ἡφρόντισιν ἔδωκε: καὶ περ οὐκ ἐξὸν ἐκ τῶν νόμων, πρὶν πρῶτην ὥραν γενέσθαι, ἐν τῇ δὴ μὴ τί χρεματισθῆναι.* quod si non ante primam; sequitur, ut nec post extremam, id est

De legibus

eam, quæ diem claudit, agi cum populo licuerit: siquidem neque uespertina s. c. rata fuisse, neque prætori urb. ius dicere post solis occasum licuisse, traditum est. sicut igitur non omnibus diebus ferre legem licebat, ita nec omnibus horis: quibus autem horis, iis ita licebat, si neque fulgeret Iuppiter, neque tonaret. Nunc de causis agamus: quæ ipsa quoque nostri promissi pars est. A corruptis moribus manasse leges, nemini dubium est. nam ubi continenter & sobrie uiuitur, ubi colitur pietas, ubi iustitiæ locus est; quorsum ibi lex feratur? nec sanis corporibus quæ sita medicina est: nec, qui leniter & sedato cursu amnes fluerent, sed incitatis, extraq; ripas fluentibus aggeres obiecti. ac uetustissimi mortalium, prorsus omnem uim, atque omnem luxum ignorantes, tranquillam uitam, ipsa natura duce, uiuebant. post erupit iniuria; et, quod quisque potuit, id quisque uelle, neglecta ratione, cepit. tunc necessario leges latæ, & iniectæ licentiæ quasi fræna, quæ, si quis recte agere sua sponte nollet, eum pænæ metu in officio continerent. itaque, conseruandæ augendæq; ciuitatis caussa, & ut esset bene uiuendi norma, legem inuentam, manifeste cognoscitur. neque minus ad hunc finem spectarunt, quæ de religione, quàm quæ de bello leges latæ sunt. quæ sita pietas in deos uidetur, quæ sita populo uoluptas, ut in ludis: omnia tamen ad publicam utilitatem referebantur. cuius autem legis uitiosa ac turpis origo sit; ea lex nominanda non est. nam legis caussa iustitia, & lex ipsa iusta ac sancta debet esse. inde enim publicum exortur commodum. publicum dico, & quo munitur imperium aduersus hostilem uim, & quo priuati ciues, sua quisque bona, suum quisque ius, aduersus priuatorum iniurias tuentur. quod si hoc in omni bene instituta ciuitate, multo magis agnoscitur in rep. Romana: quæ dum optimis legibus paret, malas autem uel abrogat suffragiis populi, uel tollit s. c. orbem terrarum pene uniuersum imperio cōprehendit. quæq; ciuitates aut malas leges habuerunt, aut bonis nō recte sunt usæ; aliæ ui externa, aliæ domestica seditione conciderūt. quod & apud ueteres sæpe accidisse legimus; & nostra non semel tempestate uidimus. Superest de potestate legis. ea, quæritur, primum utrum maxima, deinde, si maxima, utrum perpetua. quod pro nostra consuetudine breuiter ostendemus. Erat in lege summa uis; non solum, quia, quod erat lege sancitum, Quirites omnes tenebantur; quod tribus legibus, una consulari Valeria Horatia, duabus dictatoriis, Pubilia, & Hortensia, sancitum supra diximus; (paucas tamen

men excipio, quibus non omnes plane ciues obstringebantur; quo de genere fuisse legem de repetundis, iam ostendimus: lata enim est post illas tres, consularem unam, dictatorias duas, à nobis proxime nominatas: &, quodcunque postremum populus iussit, id ius ratumq; esse XII tab. lege sancitum est) uerum etiam, quia, non, ut prætoris edictum, item lex annuo spatio terminabatur, sed uigebat usque dum alia lege abrogaretur. abrogari uero omnes licuit, præter Sacratas: quæ uiolatæ sæpe, abrogatæ nunquam sunt. abroganti uero non eadem, quæ uiolanti legem, pœna sancitur. ceteræ leges & abrogari omnes potuerunt, & abrogatæ multæ sunt. tamen nulla lata lex est, quæ ipsa se contra abrogationem quasi sanctionis sepimento non munierit, graui pœna, multa ue ei, qui abrogasset, irrogata. at multi multas abrogarunt, neque tamen ullam propterea subire pœnam. dixi iam, plus fuisse potestatis in eo, quod postremum populus iussisset, quam in eo, quod antea iusserat: id lege XII tab. sancitum esse. iussum autem populi & suffragia fuerunt, quibus abrogabantur leges. itaque, non quid antea populo placuisset, sed quid ei postremum placeret, spectari solebat. sensit autem in hoc genere populus non semper è rep. nam quemadmodum sæpe malas leges bonus populus, sic interdum bonas malus abrogauit. à senatu uero nunquam lex ulla, nisi reip. caussa, sublata est; ut, cum Appuleiæ, Mario consule referente, s. C. damnatæ sunt; quod ab hoste reip. L. Appuleio Saturnino rogatæ essent: aut, cum Liuiæ consilio Philippi consulis sublata, quia contra auspicia, quæ seruari lex Aelia iubebat, à M. Liuiio Druso latæ iudicarentur. erant enim quatuor omnino genera, (ut ipsa fere Ciceronis uerba usurpem, quæ sunt in oratione pro C. Cornelio) quibus per senatum more maiorum statueretur aliquid de legibus: unum eiusmodi, placere legem abrogari, ut Q. Cæcilio M. Iunio cos. quæ leges rem militarem impedirent, ut abrogarentur. atque hoc genere non abrogabat legem senatus, (nam abrogare proprie populus dicebatur) sed, ut abrogaretur, statuebat. Alterum genus erat: quæ lex lata esse diceretur, ea non uideri populum teneri, ut L. Marcio Sex. Iulio cos. de legibus Liuiis: quæ ut uno s. C. tollerentur, Philippus consul, Liuii inimicus, obtinuit à senatu. ideo autem, huiusmodi legibus non uideri populum teneri, senatus decernebat, quia, contra auspicia latas esse, augures monuissent. tanta Romæ fuit in auguribus auctoritas. de quibus libro II de legibus hæc à Cicerone scripta legimus.

Quid

De legibus

Quid religiosius, quàm cum populo, cum plebe agendi ius aut dare, aut non dare? quid, leges, non iure rogatas, tollere? nihil domi, nihil militia, per magistratus gestum, sine augurū auctoritate posse cuiquam probari? quæ ipsa, & alia, in libro de religione, tractabimus. Tertium, de legum derogationibus. quo de genere persæpe S. C. fiunt, ut de lege Calpurnia de ambitu, quæ derogaretur. Quartum genus, quòd ea Ciceronis oratio mutila admodum est, neque in ipsa, neque in Pediano interprete, ac ne alibi quidem, quod sciam, inuenitur. me tamen in eam partem coniectura ducit, ut existimem, cum aliquem senatus hostem iudicaret, simul, ut eius quoque leges, quæ quidem aduersus rep. essent, tollerentur, eodem S. C. aut alio, proxime facto, iudicasse. quarum enim maxime legum caussa perniciosus patriæ cuius damnatus sit, & à rep. remotus; eas ipsas leges in rep. non hæsisse, sed abiectas illico esse, etiam si ab historia non prodatur, ueri tamen simillimum est. quale fuit, quod de legibus Saturnini proxime, & de legibus M. Antonii in prima huius libri parte diximus. Recte igitur semper, & iustissime senatus. A populo uero, aut ab iis, qui mercede conducti speciem quandam populi præseferabant, temeritate potius, aut fraude, quàm consilio, aut ratione, salutare ciuitati leges non nunquam abrogatæ sunt, ut, rogante P. Clodio tribuno pl. Aelia de auspiciis, Fusia de diebus comitialibus. Postremum illud est, cum, uerbo quidem, neque à senatu, neque à populo, tacito autem omnium consensu per desuetudinem leges abrogabantur. id quod & Iulianus iurisconsultus notauit. Erat igitur in lege uis non solū maxima; quod Cicero in Philippica II satis plane narrat, cum ait: In publicis actis nihil est lege grauius: uerum etiam perpetua: siquidem uetustate neque tollebatur lex, ut edictum; neque debilitabatur, ut S. C. nisi si leges essent eiusmodi, ut reip. minimi consulere uiderentur. nam has contrario usu non solum debilitatas, uerum etiam plane extinctas, neque damnatum esse quenquam, quia fecisset aduersus eam legem, quæ iam exerceri desisset, satis constare uideo. leges autem multæ, quandiu resp. stetit, perpetuo iure ualuerunt, cum, ipso libertatis initio, à primis consulibus, ac iam ante à primis regibus latæ essent. quibus ego de legibus loquor, cum perpetuam uim legi tribuo. nam perniciosas leges, nec iure rogatas, non perpetuo iure esse, sed tolli quamprimum utile est: cuiusmodi multæ S. C. sublatae sunt. populus autem, quem sæpe à reip. commodo malæ rationes auerterent, rectam

rectam in diiudicandis legibus normam non agnuit, sed utiles sæpe abrogauit, sæpe sciuit inutiles. Illud tamen, quia pertinet ad abrogandi rationem, quod in Festo Pompeio notauimus, non omittam: in sanctione legum adscribi solitum, ne per saturam abrogari derogari ue liceret. erat enimatura, lex multis aliis conferta legibus, accepto nomine à genere cibi, ex uariis rebus condito. id autem eo placuit in sanctione adscribi, quia in lege multis legibus permixta & confusa subesse fraus, quæ populum falleret, facile poterat: at in simplici lege, si de abrogandâ derogando ue populus rogabatur, non difficile erat, id, quo de rogabatur, quale esset, intelligere. Addam & illud, fractam esse legis uim, non modo cum alia lege nominatim abrogaretur, sed etiam, cum, non omnino tota, sed eius pars lege posterius lata tolleretur; quod, derogare, dicebatur; aut, cum, nulla superioris legis mentione facta, aliquid ei contrarium posteriore lege rogaretur: quod erat, obrogare. atque, hoc quidem de genere, apud Liuium libro IX P. Sempronius tribunus pl. aduersus Ap. Claudium censorem in concione ita disputat: Ideo Aemiliae potius legi paruerunt, quàm illi antiquæ, quia hanc postremum populus iusserat, & quia, ubi duæ contrariæ leges sunt, semper antiquæ abrogat noua. est etiam in II de inuentione ita scriptum: In duabus contrariis legibus, utra posterius lata sit, considerare oportet. nam postrema quæque grauißima est. Omnino, quod legis uim maximam fuisse dixi, eo dixi, non solum quia nihil esset lege grauius, & in publicis actis nihil obseruaretur magis; uerum etiam, quia legis sententia pertineret ad omnes ciues, & omnibus æqua iura describeret, præsertim à quo tempore Q. Hortensius dictator rogationem tulit, de qua iam meminimus, ut, quod plebs sanxisset, eo Quirites omnes tenerentur. ueruntamen duo genera legum excipio, alterum, quo non omnes ciues, alterum, quod omnes quidem, sed dispari iure comprehenderet. primum enim illud apud Ciceronem lib. III ad Atticum obseruauimus; quam legem aliquis tribunus pl. ferret, ea lege collegas eius obstrictos minime fuisse. deinde; ut omittam leges alias, quibus senatores tenebantur, ceteri autem erant ordines liberati; quam legem, ne quis iudicio circumueniretur, C. Gracchus tulit, eam pro plebe, non in plebem esse latam, declaratur in oratione pro Cluentio. posteaq; L. Sylla Felix, cum eius rei quæstionem sua lege constitueret, populum R. quem ab hoc genere liberum acceperat, alligare nouo quæstionis genere ausus non est.

De legibus

est. ergo hac lege, quæ primum Sempronia fuit, de C. Gracchi la-
toris nomine; deinde Cornelia, postea quàm L. Sylla, lege lata,
quæstionem & ipse eiusdem rei constituit; qua deinde potius, quàm
Sempronia, eius generis iudicia sunt administrata; hac, inquam, le-
ge, ut est in oratione pro Cluentio, senatores, & ii, qui magistra-
tum gesserant, soli tenebantur: ut, quemadmodum recte agentibus
plura præmia, sic plura peccantibus iudiciorum pericula propo-
sita essent. Lege etiam Iulia de pecuniis repetundis equestrem ordi-
nem non fuisse alligatum legimus in oratione pro Rabirio Postu-
mo. in oratione uero pro Cluentio quæ lex item de pecuniis repe-
tundis nominatur, qua & ipsa præter ordinem senatorium nemo te-
nebatur, Iulia non fuit; ut ex temporum examinatione, quæ me sæ-
pe magnis erroribus expediuit, facile conieci. nam cum, Iuliam de
repetundis latam esse à C. Cæsare in primo consulatu, notum sit, uel
ex historia, uel è Ciceronis orationibus, atque epistolis; orationem
autem pro Cluentio annis aliquot ante Cæsaris consulatum Cice-
ro prætor habuerit: sequitur, ut omnino, quod ad nomen attinet,
diuersæ leges fuerint. Quænam igitur fuit, dicet aliquis? Corne-
lia, L. Syllæ: ex qua multa in suam legem postea Cæsar transtulit.
de qua sic in ea pro Postumo: Si est hoc nouum in lege Iulia, si-
cuti multa sunt, seuerius scripta, quàm in antiquis legibus, & san-
ctius iudicata: sane etiam consuetudo huius generis iudiciorum no-
ua. sin hoc totidem uerbis translatus caput est, quot fuit non mo-
do in Cornelia, sed etiam ante in lege Seruilia: per deos immorta-
les, quid agimus iudices, aut quem hunc morem nouorum iudicio-
rum in remp. inducimus? Reliquum est, ut de lege agamus, quæ
omnes quidem ciues, dissimili tamen conditione alstringeret. at hoc
quidem cum multis exemplis probare possim, uno contentus ero.
fuit igitur huius generis Tullia de ambitu: qua lege aliam plebi, a-
liam senatoribus irrogatam esse pœnam, constat ex oratione pro Mu-
rena. id quod ostendimus iam, cum de legibus capitalia crimina
uindicantibus ageretur. Dictum est de legibus. ordiemur nunc
de magistratibus.

INDEX RERVM MEMORABILIVM.

ACILIA lex de repetundis	53 a	Cassia lex L. Cassii de suffragiis	20 b
Accusatores	68 a	Catonis censorii lex Porcia de ficiariis	60 a
Adoptio	28 a	Cincia lex de donis & muneribus	42 b
Adulteria	66 b	Claudia lex de nummis	42 a
Aebutia lex de XII tabulis corrigendis	40 a	Claudia lex de publicis iniuriis	68 a
Aebutia lex de legibus ferendis	40 a	Cœlia lex de suffragiis	20 b
Aelia lex de comitiorum iure ac tempore	17 a	Coitrones clandestinæ	67 b
Aelia Sanctia lex de locupletibus	29 a	Collegia restituta	28 a
Aelia Sentia lex de testamentis	29 a	Comitia	16 b 21 a
Aemilia lex de sumptibus	43 b	Coniugia	36 a
Agraria	26 b	Cornelia de alea	68 a
Alea	68 a	Cornelia Bæbia lex de ambitu	64 b
Ambitio	42 b	Cornelia lex L. Syllæ de falsis	28 b
Ambitus	64 b	Cornelia lex L. Syllæ de imperio	25 a
Annona	68 a	Cornelia lex L. Syllæ de iniuriis	67 b
Antonia lex de centurionum iudiciis	34 a	Cornelia lex L. Syllæ de maiestate	50 b
Antonia de damnatorum de ui prouocatione	57 b	Cornelia lex L. Syllæ de repetundis	55 a
Antonia de maiestate	50 b	Cornelia lex L. Sillæ dictatoris de senato-	
Antonia de iudicum numero	34 b	rum iudiciis	53 a
Appuleia lex L. Saturnini tribuni pl. de maiestate	50 a	Cornelia lex L. Syllæ de sumptibus	43 b
Aquillia lex tribunicia de iniuria	67 b	Cornelia lex L. Sillæ de ficiariis	62 a
Aquillia lex de adulterio	67 a	Cornelia lex L. Syllæ de ueneficio	64 b
Arma	55 b	Cornelia lex de iis, qui soluerentur legibus	21 b
Ateria uel Tarpeia lex de multa	41 b	Cornelia lex de prætioribus	36 b
Atinia lex de usucapionibus	40 a	Coronæ	26 b
Atinia lex de furtis	67 b	Crimen capitale	44 a
Atinii lex de tribunorum pl. creatione	10 b	Crimina	44 a
Aufidia lex de ambitu	66 a	Curiata lex de imperio	25 a
Augusti lex de iudicum numero	34 b	DAMNATI à populo	21 b
Augusti lex de adulterio	67 a	Decem uirorum lex de coniugiis	36 b
Augusti lex de testamentis	28 b	Didia lex de sumptibus	43 a
Aurelia lex de iudicum numero	34 b	Dies iudicarii	35 b
Aurelia lex L. Cottæ prætoris de iudiciis	33 a	Drusi lex de iudicum numero	34 b
BÆBIA Cornelia lex de ambitu	64 b	Duodecim tab.leges de iure ac libertate ciuium Romanorum	37 a
Bæbia lex de quatuor prætorum creatione	75 b	Duodecim tab.leges de sumptu in mortuis et lamentatione	38 a
Budei error	64 a	Duodecim tab.leges X uirorum de magistratibus	10 b
CAECILIA Didia lex de fœnore	39 a	Duodecim tab. lex de arboribus	67 b
Cæcilii tribuni pl. lex de repetundis	52 b	Duodecim tab. lex de clandestinis coitionibus	67 b
Cæsaris lex de iudicum numero	34 b	Duodecim tab. lex de corruptis iudiciis	66 b
Cæsaris lex graria de iniuriis	68 a	Duodecim tab. lex de ueneficio	64 a
Cæsaris consulis lex de repetundis	55 a	Duodecim tab. lex de falsis testimonis	67 a
Cæsaris lex Iulia de damnatis de ui	57 a	Duodecim tab. lex de furiosis	43 b
Cæsaris lex de ueneficio	64 b	Duodecim tab. lex de furtis	67 b
Cæsaris lex de maiestate	50 b	Duodecim tab. lex de infamia	67 b
Cæsaris lex de patronorum numero	35 a	Duodecim tab. lex de iniuria	67 b
Cæsaris lex de Stellate campo, agroq; Campano diuidendo	28 a	Duodecim tab. lex de maiestate	50 a
Cæsaris lex de ficiariis	60 a	Duodecim tab. lex de populi postremo iussu	21 b
Cæsaris lex de paricidiis	63 a	Duodecim tab. lex de patria potestate	43 b
Cæsaris lex de sacerdotiis	5 b	Duodecim tab.leges de prodigi bonis	43 b
Cæsaris lex de iudiciis	34 a	Duodecim tab. lex de sacris	4 b
Calpurnia lex prætoris de ludis Apollinariibus	8 a	Duodecim tab. lex de reis	43 b
Calpurnia de ambitu	65 a	Duodecim tab. lex de sepulcris	37 b
Canuleii lex de coniugiis	36 b	Duodecim tab. lex de sodalitiis	68 a
Carbonis lex de suffragiis	20 b	Duodecim tab. lex de terminis ac finibus	44 a
Cassii lex de ordine senatorio	17 a	Duodecim tab. lex de tutoribus	67 b
Cassii tribuni pl. lex de damnatis à populo	21 b	Duodecim tab. lex de coniugiis	36 b
Cassii dictatoris lex de prouinciis	21 b	Duodecim tab. de sanatiibus	44 a

Y ERROR

ERROR Budæi	64 a	Lætoria de plebeis magistratibus	10 a
Error Gellii	41 b	Lætoria de plebeiorum magistratuum crea- tione	16 b
Error Patreculi	33 b	Latores legum	68 b
Error Pediani	31 a	Lætoria lex de adolescentibus circumscri- bendis	68 a
Error Plutarchi	29 b	Legationes	16 b
Error Valerii	27 a	Leges quo in loco latæ	76 a
Error Vlrici Zaffi	17 b	Leges quo tempore ferrentur	78 a
Exilium	45 a	Legum Romanarum origo	3 a
FABIA lex de sectatorum numero	42 b	Leges de fontibus reis	68 a
Falcidia lex de testamentis	28 b	Leges de adoptione	28 a
Falsa testimonia	67 a	Leges de iudicibus	35 a
Fannia lex de sumptibus	43 a	Leges quibus de causis latæ	78 b
Fannia de ludis Megalensibus	8 a	Leges de adoptantis ac adoptati ætate	28 a
Fines	41 b	Leges de iure ac libertate ciuium Romano- rum	37 a
Flauia lex de agris	27 b	Leges à quibus latæ	68 b
Flauia de plagiariis	67 a	Leges ne diuersis de rebus ferrentur	39 a
Fœnus	38 a	Leges de sepulcris	38 a
Furia lex de testamentis	28 b	Leges de perduellione	51 a
Furiosi	43 b	Leges de sepulcrorum sacratione	37 b
Furta	67 b	Leges de triumphis causis	26 b
Fufia lex de comitiis iure ac tempore	17 a	Leges de mulierum dote publicanda	37 a
Fufia de iure ciuili	40 a	Leges cur scriptæ	2 b
GABINIA lex de clandestinis coitioni- bus	67 b	Legum uis	78 a
Gabinia de suffragiis	20 b	Leges de diebus iudicialiis	36 a
Gegania lex de censoribus	11 b	Legum custodiendarum reponendarumq; lo- cus	76 a
Gellii error	41 b	Leges de priuilegiis irrogatione	21 b
Gracchi lex de iudicium numero	34 b	Legibus soluendi	21 b
IMPERIVM rectorum prouinciarum	24 b	Legis descriptio	2 b
Incestus	49 b	Legis ferendæ impedimenta	73 a
Indicia	36 a	Legum numerus ac nomina	2 b
Infamix	67 b	Legum correctio	40 a
Iniuriæ	67 b	Legum latores	68 a
Iniuriæ publicæ	68 a	Lex non omnes ciues similiter astringens	78 a
Iudices	34 b	Lex de ægroti in iudicium uocatione	43 b
Iudicia	29 a	Lex de ædiliis cur. creatione	13 a
Iudicia corrupta	66 b	Lex de tempore agendi cum populo	26 a
Iudiciorum moderatio	37 b	Lex de ambitu	64 b
Iulia L. Cæsaris de ciuitate	40 b	Lex de bellis gerendis	25 b
Iulia lex C. Cæsaris de damnatis de ui	57 a	Lex de candidatis	12 a
Iulia de ambitu	66 a	Lex de magistratibus	12 b
Iulia de iudiciis	34 a	Lex de ciuitate	40 a
Iulia de maiestate	50 b	Lex de ciuitate sociis ac Latinis danda	40 a
Iulia de ueneficio	64 b	Lex de comitiis	14 a 20 a
Iulia de annona	68 a	Lex de uxore ducenda	36 b
Iulia de armis	55 b	Lex de comitiis	21 a
Iulia de coniugiis	37 a	Lex de indicio	36 a
Iulia de iudicibus	35 b	Lex de iudicium ætate	34 b
Iulia de iudicium ætate	34 b	Lex de libertinorum coniugiis	36 b
Iulia de multa	42 a	Lex de laurea corona	26 b
Iulia de peculatu	59 a	Lex de consulum creatione	12 a
Iulia lex repetundarum de testibus	35 b	Lex de decorum manium iuribus	37 b
Iulia de testimonio dicendo	35 b	Lex de histronibus	8 b
Iulia de perduessione	52 a	Lex de magistratibus curulibus	12 a
Iulia Augusti de adulterio	67 a	Lex de moderandis iudiciis	37 b
Iunia de testamentis	28 b	Lex naturæ	1 a
Iunia Licinia de trinundino non seruato	40 a	Lex de nomenclatore	21 a
Iuris diffinitio	1 b	Lex de triumpho	26 b
Iuris diuifio	2 b	Lex de prætura	13 a
Iuris altera diuifio	3 a	Lex de petitione consulatus	12 a
Ius ciuile	28 a	Lex de populo non seuocando	26 b
Ius prætorum	36 a		
Iusta populi	21 b		
LÆTORIA lex de stipulantium ætate	35 a		

Lex de duorum prætorum creatione	15 b	Papiria de ciuitate	40 b
Lex de trium prætorum creatione	15 b	Parentum potestas	42 b
Lex de prætoris urbani absentia	12 b	Paricidium	63 a
Lex de quercea corona donandis	25 b	Patricidium	63 a
Lex de quæstorum numero	12 a	Patroni	34 b
Lex de sacerdotum uacatione militiæ	7 a	Peculatus	57 b
Lex de sepulcris	37 b	Perduellio	51 a
Lex de tribunis militum consulari potestate	11 b	Petronia lex de ciuitate	40 b
Lex de tribunorum pl. absentia ab urbe	15 a	Plagiarii	67 a
Lex de tribunorum pl. concione	10 b	Plautia lex de ciuitate	40 a
Lex de tuenda fide	43 b	Plautia de iudicum numero	34 b
Lex de ueneficio	64 b	Pletorii tribuni pl. lex de prætore urbis	15 b
Lex de uindictis	43 b	Plotia lex de agris	27 b
Lex de auguribus	5 a	Plotia de iudicibus	33 a
Lex de pontificum numero	5 a	Plotia de ui	56 b
Lex de clauo pangendo	8 b	Plutarchi error	29 b
Licina lex de sumptibus	43 a	Petelia lex de ambitu	64 b
Licina de plebei consulis creatione	12 a	Pompeia lex de ui	57 a
Licina de agris	27 a	Pompeia de iudiciis	34 a
Licina de ciuitate	40 b	Pompeia de iudicum numero	34 b
Licina de scenore	39 a	Pompeia de ambitu	66 a
Licina de trinundino in legibus ferendis seruando	40 a	Pompeii Magni edictum de armis	55 b
Licina de ludis Apollinaribus	7 b	Pompeii Magni lex de prouocatione	15 b
Licina de sodalitiis	68 a	Pompeii Magni lex Bithynis & Ponticis data	23 a
Liua lex de X uiris agrorum	27 b	Pompeii Magni de magistratibus	16 b
Liua de nummis	42 a	Pompeii Magni de patricidis	63 a
Liua de iudiciis	35 a	Populi iussa	21 b
Liua de ciuitate	41 b	Populi seuocatio	26 b
Ludi	7 b	Porcia lex de ficiariis	60 a
MAGISTRATVS	9 a	Porcia de iure ac libertate ciuium Ro.	37 a
Maestas	49 b	Prætorum ius	36 a
Mam. Aemilii dictatoris lex de censura	11 b	Prouincia populi Romani	22 a
Mamilia lex de Iugurthæ sociis	41 b	Publicæ iniuriæ	68 a
Mamilia de finibus	41 b	Publilia lex de prætoribus	17 a
Manlii lex de uicesima manumissorum	26 b	Publilia de plebeis magistratibus	10 a 16 b
Marcia lex de agris	27 b	QVINCTIA lex de agris	27 b
Maria lex de suffragiis	21 a	Quinctia de censorum creatione	11 b
Memmia lex de accusatione	36 a	Religio	3 b
Menenia lex de multa	42 a	Remmia lex de accusatoribus	68 a
Menia lex de magistratibus	13 b	Reperundæ	52 b
Metilia lex de sumptibus	42 b	Remmia lex de testibus	35 b
Militia	25 b	Romilia lex de sacris	4 b
Mucia lex de ciuitate	40 b	Romilia lex de adulterio	66 b
Mulæ	41 b	Romuli regis lex de ipsius imperio	3 b
Munera	42 b	Romuli lex de urbis mœnibus	3 b
NATVRAE lex	1 a	Romuli lex de sacris	4 a
Numæ regis lex de sacerdotibus	4 b	Romuli lex de auguriis	3 b
Numæ de coniugis	36 b	Romuli lex de nocturnis uigiliis in templo	4 a
Numæ de incestu	49 b	Romuli lex de fabulosis deorum figmentis	4 a
Numæ de paricidiis	51 a	Romuli lex de diis peregrinis	4 a
Numæ de cæde hominis liberi	63 a	Romuli lex de sacerdotibus	4 b
Nummi	42 a	Romuli lex de magistratibus	9 a
OCTAVIANI lex de perduellione	52 a	Romuli lex de populi potestate	9 a
Ogulnia lex de pontificum augurumq; numero	5 a	Romuli lex de duum uirorum creatione	9 a
Orchia lex de sumptibus	43 a	Romuli lex de tribuno Celerum	9 a
PAPIA lex de ciuitate	41 b	Romuli lex de quæstorum creatione	9 a
Papia de coniugis	36 b	Romuli lex de coniugiis	36 a
Papia de testimonio dicendo	35 b	Romuli lex de monstruosis partibus	63 a
Papia de uirgine Vestali	7 a	Romuli lex de cæde hominis liberi	63 a
Papiria lex de multa	42 a	Romuli lex de adulterio	66 b
Papiria de suffragiis	20 b	Roscia lex de spectaculis	8 a
Papiria de nummis	42 a	Rubria lex de agris	27 b
		Rulli lex de agris	28 a
		SACRATA lex de militum nomine, deq; tributis	

bunus mil.	25 b	Syllæ lex de iudiciis	53 a
Sacra lex de plebeis magistratibus	10 a	Syllæ lex de ficiis	60 a
Sacra lex de iure ac libertate ciuium R.	37 a	Syllæ lex de corruptis iudiciis	66 b
Scatinia lex de puerorum amoribus	67 a	TARPEIA lex de multa	41 b
Scribonia lex de agris	27 b	Tarquini superbi supplicium de patriciis	63 b
Sectatores	42 b	Termini	44 a
Sempronia lex de prouinciis	21 b	Testamenta	28 b
Sempronia lex de iudiciis	32 b	Testes	35 b
Sempronia lex de frumento	42 a	Testimonia falsa	67 a
S. c. de coniugio	36 b	Titia lex de agris	27 b
S. c. de tollendis M. Liuii Drusi legibus	41 b	Titia lex de ludis	8 b
S. c. de ludis Apollinaribus	8 a	Titia lex de alca	68 a
S. c. de ludis Megalensibus	8 a	Trebonia lex de Gallis prouinciis	23 b
S. c. de Ti. Gracchi seruanda lege agraria	27 b	Triumphus	26 a
S. c. de sepulcris	38 a	Tullia lex de legationibus	16 b
Sepulera	37 b	Tullia lex de ambitu	65 b
Seruilia lex de repetundis	53 a	Tutela	67 b
Seruilia lex de ciuitate	40 a	VALERIA lex de iure ac libertate ciuium	
Seruilia lex de iudiciis	32 b	Romanorum	37 a
Seruilia lex de repetundis	53 a	Valeria lex de sumptibus	42 b
Seuocatio populi	26 b	Valerii Maximus errata	7 a 41 a
Sextia Licinia lex de sacris	4 b	Varia lex de maiestate	50 a
Sextia Menenia lex de multa	42 a	Vatinia lex de Gallis prouinciis	23 b
Sicarii	59 b	Vatinia lex de iudiciis	34 a
Silua lex Romuli regis de monstrosis		Veneficium	63 b
partibus	63 a	Viaria de agrorum diuisione	27 b
Sodalitia	68 a	Vicesima	26 b
Stipulantes	35 a	Vindiciae	43 b
Suffragia	20 b	Vis	55 b
Sumptuariæ leges	42 b	Voconia lex de testamentis	28 b
Syllæ dictatoris lex de tribunis pl.	15 b	Voleronis lex de plebeiorum magistratuum	
Syllæ lex de agris	27 b	creatione	16 b
Syllæ lex de sumptibus	42 b	Vfucapiones	40 a



5817950

